

मलिक मुहम्मद जायसी
पदमावत

१.स्तुति खंड

सुमिरौं आदि एक करतारू । जेहि जिउ दीन्ह कीन्ह संसारू ॥
कीन्हेसि प्रथम जोति परकासू । कीन्हेसि तेहि पिरीत कैलासू ॥
कीन्हेसि अगिनि, पवन, जल खेहा । कीन्हेसि बहुतै रंग उरेहा ॥
कीन्हेसि धरती, सरग, पतारू । कीन्हेसि बरन बरन औतारू ॥
कीन्हेसि दिन, दिनअर, ससि, राती । कीन्हेसि नखत, तराइन-पाँती ॥
कीन्हेसि धूप, सीउ औ छाँहा । कीन्हेसि मेघ, बीजु तेहिं माँहा ॥
कीन्हेसि सप्त मही बरम्हंडा । कीन्हेसि भुवन चौदहो खंडा ॥
कीन्ह सबै अस जाकर दूसर छाज न काहि ।

पहिलै ताकर नावँ लै कथा करौं औगाहि ॥१॥

कीन्हेसि सात समुन्द अपारा । कीन्हेसि मेरु, खिखिंद पहारा ॥
कीन्हेसि नदी, नार औ झरना । कीन्हेसि मगर मच्छ बहु बरना ॥
कीन्हेसि सीप, मोती जेहि भरे । कीन्हेसि बहुतै नग निरमरे ॥
कीन्हेसि बनखंड औ जरि मूरी । कीन्हेसि तरिवर तार खजूरी ॥
कीन्हेसि साउज आरन रहई । कीन्हेसि पंखि उड़हिं जहँ चहई ॥
कीन्हेसि बरन सेत ओ स्यामा । कीन्हेसि भूख नींद बिसरामा ॥
कीन्हेसि पान फूल बहु भोगू । कीन्हेसि बहु ओषद, बहु रोगू ॥
निमिख न लाग करत ओहि, सबै कीन्ह पल एक ।

गगन अंतरिख राखा बाज खंभ बिनु टेक ॥२॥

कीन्हेसि अगर कसतुरी बेना । कीन्हेसि भीमसेन औ चीना ॥
कीन्हेसि नाग, जो मुख विष बसा । कीन्हेसि मंत्र, हरै जेहि डसा ॥
कीन्हेसि अमृत , जियै जो पाए । कीन्हेसि बिकख, मीचु जेहि खाए ॥
कीन्हेसि ऊख मीठ-रस-भरी । कीन्हेसि करू-बेल बहु फरी ॥
कीन्हेसि मधु लावै लै माखी । कीन्हेसि भौर, पंखि औ पाँखी ॥
कीन्हेसि लोबा इंदुर चाँटी । कीन्हेसि बहुत रहहिं खनि माटी ॥
कीन्हेसि राकस भूत परेता । कीन्हेसि भोकस देव दएता ॥

कीन्हेसि सहस अठारह बरन बरन उपराजि ।

भुगुति दुहेसि पुनि सबन कहँ सकल साजना साजि ॥३॥

कीन्हेसि मानुष, दिहेसि बड़ाई । कीन्हेसि अन्न, भुगुति तेहिं पाई ॥
कीन्हेसि राजा भूँजहिं राजू । कीन्हेसि हस्ति घोर तेहिं साजू ॥
कीन्हेसि दरब गरब जेहि होई । कीन्हेसि लोभ, अघाइ न कोई ॥
कीन्हेसि जियन, सदा सब चाहा । कीन्हेसि मीचु , न कोई रहा ॥
कीन्हेसि सुख औ कोटि अनंदू । कीन्हेसि दुख चिंता औ धंदू ॥
कीन्हेसि कोइ भिखारि, कोइ धनी । कीन्हेसि सँपति विपति पुनि घनी ॥

कीन्हेसि कोई निभरोसी, कीन्हेसि कोइ बरियार ।

छारहिं तें सब कीन्हेसि, पुनि कीन्हेसि सब छार ॥४॥

धनपति उहै जेहिक संसारू । सबै देइ निति, घट न भँडारू ॥
जावत जगत हस्ति औ चाँटा । सब कहँ भुगुति राति दिन बाँटा ॥
ताकर दीठि जो सब उपराहीं । मित्र सत्रु कोइ बिसरै नाही ॥
पखि पतंग न बिसरे कोई । परगट गुपुत जहाँ लागि होई ॥
भोग भुगुति बहु भाँति उपाई । सबै खवाई, आप नहिं खाई ॥
ताकर उहै जो खाना पियना । सब कहँ देइ भुगुति ओ जियना ॥
सबै आस-हर ताकर आसा । वह न काहु के आस निरासा ॥

जुग जुग देत घटा नहिं, उभै हाथ अस कीन्ह ।

और जो दीन्ह जगत महाँ, सो सब ताकर दीन्ह ॥५॥

आदि एक बरनों सोइ राजा । आदि न अंत राज जेहि छाजा ॥
सदा सरबदा राज करेई । औ जेहि चहै राज तेहि देई ॥
छत्रहिं अछत, निछत्रहिं छावा । दूसर नाहिं जो सरवरि पावा ॥
परबत ढाह देख सब लोगू । चाँटहि करै हस्ति-सरि-जोगू ॥
बज्रांह तिनकहिं मारि उडाई । तिनहि बज्र करि देई बडाई ॥
ताकर कीन्ह न जानै कोई । करै सोइ जो चित्त न होई ॥
काहु भोग भुगुति सुख सारा । काहु बहुत भूख दुख मारा ॥
सबै नास्ति वह अहथिर, ऐस साज जेहि केर ।

एक साजे औ भाँजे, चहै सँवारै फेर ॥६॥

अलख अरूप अबरन सो कर्ता । वह सब सों, सब ओहि सों वर्ता ॥
परगट गुपुत सो सरबबिआपी । धरमी चीन्ह, न चीन्है पापी ॥
ना ओहि पूत न पिता न माता । ना ओहि कुटुब न कोई सँग नाता ॥
जना न काहु, न कोइ ओहि जना । जहाँ लागि सब ताकर सिरजना ॥
वै सब कीन्ह जहाँ लागि कोई । वह नहिं कीन्ह काहु कर होई ॥
हुत पहिले अरु अब है सोई । पुनि सो रहै रहै नहिं कोई ॥
और जो होइ सो बाउर अंधा । दिन दुइ चारि मरै करि धंधा ॥
जो चाहा सो कीन्हेसि, करै जो चाहै कीन्ह ।

बरजनहार न कोई, सबै चाहि जिउ दीन्ह ॥७॥

एहि विधि चीन्हहु करहु गियानू । जस पुरान महाँ लिखा बखानू ॥
जीउ नाहिं पै जिये गुसाई । कर नाहीं, पै करै सवाई ॥
जीभ नाहिं पै सब किछु बोला । तन नाहीं, सब ठाहर डोला ॥
स्रवन नाहिं पै सक किछु सुना । हिया नाहिं पै सब किछु गुना ॥
नयन नाहिं पै सब किछु देखा । कौन भाँति अस जाइ बिसेखा ॥
है नाहीं कोइ ताकर रूपा । ना ओहि सन कोइ आहि अनूपा ॥
ना ओहि ठाउँ न ओहि बिनु ठाउँ । रूप रेख बिनु निरमल नाऊ ॥
ना वह मिला न बेहरा, ऐस रहा भरिपूरि ।

दीठिवंत कहँ नीयरे, अंध मूरुखहिं दूरि ॥८॥

और जो दीन्हेसि रतन अमोला । ताकर मरम न जानै भोला ॥
दीन्हेसि रसना और रस भोगू । दीन्हेसि दसन जो बिहँसै जोगू ॥
दीन्हेसि जग देखन कहँ नैना । दीन्हेसि स्रवन सुनै कहँ बैना ॥
दीन्हेसि कंठ बोल जेहि माहाँ । दीन्हेसि कर-पल्लौ बर बाहाँ ॥
दीन्हेसि चरन अनूप चलाहीं । सो जानइ जेहि दीन्हेसि नाहीं ॥

जोवन मरम जान पै बूढा । मिला न तरुनापा जग हूँढाँ ॥
दुख कर मरम न जानै राजा । दुखी जान जा पर दुख बाजा ॥
काया मरम जान पै रोगी, भोगी रहै निचिंत ।

सब कर मरम गोसाईं (जान) जो घट घट रहै नित ॥९॥

अति अपार करता कर करना । बरनि न कोई पावै बरना ॥
सात सरग जौ कागद करई । धरती समुद दुहँ मसि भरई ॥
जावत जग साखा बनढाखा । जावत केस रोंव पँखि -पाखा ॥
जावत खेह रेह दुनियाई । मेघबूँद औ गगन तराई ॥
सब लिखनी कै लिखु संसारा । लिखि न जाइ गति-समुद अपारा ॥
ऐस कीन्ह सब गुन परगटा । अबहुँ समुद महँ बूँद न घटा ॥
ऐस जानि मन गरब न होई । गरब करे मन बाउर सोई ॥

बड़ गुनवंत गोसाईं, चहै सँवारै बेग ।

औ अस गुनी सँवारे, जो गुन करै अनेग ॥१०॥

कीन्हेसि पुरुष एक निरमरा । नाम मुहम्मद पूनौ-करा ॥
प्रथम जोति बिधि ताकर साजी । औ तेहि प्रीति सिहित उपराजी ॥
दीपक लेसि जगत कहँ दीन्हा । भा निरमल जग, मारग चीन्हा ॥
जौ न होत अस पुरुष उजारा । सूझि न परत पंथ अँधियारा ॥
दुसरे ढाँवँ दैव वै लिखे । भए धरमी जे पाढत सिखे ॥
जेहि नहिं लीन्ह जनम भरि नाऊँ । ता कहँ कीन्ह नरक महँ ठाऊँ ॥
जगत बसीठ दई ओहिं कीन्हा । दुइ जग तरा नावँ जेहि लीन्हा ॥
गुन अवगुन बिधि पूछव, होइहिं लेख औ जोख ।

वह बिनउब आगे होइ, करब जगत कर मोख ॥११॥

चारि मीत जो मुहमद ठाऊँ । जिन्हहिं दीन्ह जग निरमल नाऊँ ॥
अबाबकर सिद्दीक सयाने । पहिले सिदिक दीन वइ आने ॥
पुनि सो उमर खिताब सुहाए । भा जग अदल दीन जो आए ॥
पुनि उसमान पंडित बड़ गुनी । लिखा पुरान जो आयत सुनी ॥
चौथे अली सिंह बरियारू । सौँहँ न कोऊ रहा जुझारू ॥
चारिउ एक मतै, एक बाना । एक पंथ औ एक सँधाना ॥
बचन एक जो सुना वइ साँचा । भा परवान दुहँ जग बाँचा ॥

जो पुरान बिधि पठवा, सोई पढत गरंथ ।

और जो भूले आवत, सो सुनि लागे पंथ ॥१२॥

सेरसाहि देहली-सुलतान । चारिउ खंड तपै जस भानू ॥
ओही छाज छात औ पाटा । सब राजै भुइँ धरा लिलाटा ॥
जाति सूर औ खँडे सूरा । और बुधिवंत सबै गुन पूरा ॥
सूर नवाए नवखँड वई । सातउ दीप दुनी सब नई ॥
तह लागि राज खड्ग करि लीन्हा । इसकंदर जुलकरन जो कीन्हा ॥
हाथ सुलेमाँ केरि अँगूठी । जग कहँ दान दीन्ह भरि मूठी ॥
औ अति गरू भूमिपति भारी । टेक भूमि सब सिहित सँभारी ॥

दीन्ह असीस मुहम्मद, करहु जुगहि जुग राज ।

बादसाह तुम जगत के जग तुम्हार मुहताज ॥१३॥

बरनौँ सूर भूमिपति राजा । भूमि न भार सहै जेहि साजा ॥
हय गय सेन चलै जग पूरी । परबत टूटि उडहिं होइ धूरी ॥

रेनु रैनि होइ रबिहिं गरासा । मानुख पंखि लेहिं फिरि बासा ॥
 भुईं उडि अंतरिक्ख मृतमंडा । खंड खंड धरती बरहंडा ॥
 डोलै गगन, इंद्र डरि काँपा । बासुकि जाइ पतारहि चाँपा ॥
 मेरु धसमसै, समुद सुखाई । बन खंड टूटि खेह मिल जाई ॥
 अगिलिहिं कहँ पानी लेइ बाँटा । पछिलहिं कहँ नहिं काँदों आटा ॥
 जो गढ़ नएउ न काहुहि चलत होइ सो चूर ।

जब वह चढै भूमिपति सेर साहि जग सूर ॥१४॥

अदल कहौं पुहुमी जस होई । चाँटा चलत न दुखवै कोई ॥
 नौसेरवाँ जो आदिल कहा । साहि अदल सरि सोउ न अहा ॥
 अदल जो कीन्ह उमर कै नाई । भइ अहा सगरी दुनियाई ॥
 परी नाथ कोइ छुवै न पारा । मारग मानुष सोन उछारा ॥
 गऊ सिंह रेंगहि एक बाटा । दूनौ पानि पियहिं एक घाटा ॥
 नीर खीर छानै दरबारा । दूध पानि सब करै निनारा ॥
 धरम नियाव चलै; सत भाखा । दूबर बली एक सम राखा ॥

सब पृथवी सीसहिं नई जोरि जोरि कै हाथ ।

गंग जमुन जौ लागि जल तौ लागि अम्मर नाथ ॥१५॥

पुनि रूपवंत बखानौं काहा । जावत जगत सबै मुख चाहा ॥
 ससि चौदसि जो दई सँवारा । ताहू चाहि रूप उँजियारा ॥
 पाप जाइ जो दरसन दीसा । जग जुहार कै देत असीसा ॥
 जैस भानु जग ऊपर तपा । सबै रूप ओहि आगे छपा ॥
 अस भा सूर पुरुष निरमरा । सूर चाहि दस आगर करा ॥
 सौँह दीठि कै हेरि न जाई । जेहि देखा सो रहा सिर नाई ॥
 रूप सवाई दिन दिन चढा । बिधि सुरूप जग ऊपर गढा ॥

रूपवंत मनि माथे, चंद्र घाटि वह बाढि ।

मेदिनि दरस लोभानी, असतुति बिनवै ठाढि ॥१६॥

पुनि दातार दई जग कीन्हा । अस जग दान न काहू दीन्हा ॥
 बलि विक्रम दानी बड़ कहे । हातिम करन तियागी अहे ॥
 सेरसाहि सरि पूज न कोऊ । समुद सुमेर भँडारी दोऊ ॥
 दान डाँक बाजै दरबारा । कीरति गई समुंदर पारा ॥
 कंचन परसि सूर जग भयऊ । दारिद भागि दिसंतर गयऊ ॥
 जो कोइ जाइ एक बेर माँगा । जनम न भा पुनि भूखा नागा ॥
 दस असमेध जगत जेइ कीन्हा । दान-पुन्य सरि सौँह न दीन्हा ॥

ऐस दानि जग उपजा सेरसाहि सुलतान ।

ना अस भयउ न होइहि, ना कोइ देइ अस दान ॥१७॥

सैयद असरफ पीर पियारा । जेहि मोहि पंथ दीन्ह उँजियारा ॥
 लेसा हिये प्रेम कर दीया । उठी जोति भा निरमल हीया ॥
 मारग हुत अँधियार जो सूझा । भा अँजोर, सब जाना बूझा ॥
 खार समुद्र पाप मोर मेला । बोहित-धरम लीन्ह कै चेला ॥
 उन्ह मोर कर बूडत कै गहा । पायों तीर घाट जो अहा ॥
 जाकहँ ऐस होइ कंधारा । तुरत बेगि सो पावै पारा ॥
 दस्तगीर गाढे कै साथी । वह अवगाह दीन्ह तेहि हाथी ॥

जहाँगीर वै चिस्ती निहकलंक जस चाँद ।

वै मखदूम जगत के, हौं ओहि घर के बाँद ॥१८॥

ओहि घर रतन एक निरमरा । हाजी शेख सबै गुन भरा ॥
तेहि घर दुइ दीपक उजियारे । पंथ देइ कहँ दैव सँवारे ॥
सेख मुहम्मद पून्यो-करा । सेख कमाल जगत निरमरा ॥
दुऔ अचल ध्रुव डोलहि नाहीं । मेरु खिखिद तिन्हहुँ उपराहीं ॥
दीन्ह रूप औ जोति गोसाईं । कीन्ह खंभ दुइ जग के ताई ॥
दुहुँ खंभ टेके सब महीं । दुहुँ के भार सिहित थिर रही ॥
जेहि दरसे औ परसे पाया । पाप हरा, निरमल भइ काया ॥

मुहमद तेइ निचिंत पथ जेहि सग मुरसिद पीर ।

जेहिके नाव औ खेवक बेगि लागि सो तीर ॥१९॥

गुरु मोहदी खेवक मै सेवा । चलै उताइल जेहिं कर खेवा ॥
अगुवा भयउ सेख बुरहानू । पंथ लाइ मोहि दीन्ह गियानू ॥
अहलदाद भल तेहि कर गुरू । दीन दुनी रोसन सुरखुरू ॥
सैयद मुहमद कै वै चेला । सिद्ध-पुरुष-संगम जेहि खेला ॥
दानियाल गुरु पंथ लखाए । हजरत ख्वाज खिजिर तेहि पाए ॥
भए प्रसन्न ओहि हजरत ख्वाजे । लिये मेरइ जहँ सैयद राजे ॥
ओहि सेवत में पाई करनी । उधरी जीभ, प्रेम कवि बरनी ॥

वै सुगुरू, हौं चेला, नित बिनवौं भा चेर ।

उन्ह हुत देखै पायउँ दरस गोसाईं केर ॥२०॥

एक नयन कवि मुहमद गुनी । सोइ विमोहा जेहि कवि सुनी ॥
चाँद जँस जग विधि औतारा । दीन्ह कलंक, कीन्ह उजियारा ॥
जग सूझा एकै नयनाहाँ । उआ सूक जस नखतन्ह माहाँ ॥
जौ लहि अंवाहिं डाभ न होई । तौ लहि सुगँध बसाइ न सोई ॥
कीन्ह समुद्र पानि जो खारा । तौ अति भयउ असूझ अपारा ॥
जौ सुमेरु तिरसूल बिनासा । भा कंचन-गिरि, लाग अकासा ॥
जौ लहि घरी कलंक न परा । काँच होइ नहिं कंचन-करा ॥

एक नयन जस दरपन औ निरमल तेहि भाउ ।

सब रूपवंतइ पाउँ गहि मुख जोहहिं कै चाउ ॥२१॥

चारि मीन कवि मुहमद पाए । जोरि मित्ताई सिर पहुँचाए ॥
यूसूफ मलिक पँडित बहु ज्ञानी । पहिले भेद-बात वै जानी ॥
पुनि सलार कादिम मतिमाहाँ । खॉडे-दान उभै निति बाहाँ ॥
मियाँ सलौने सिंघ बरियारू । बीर खेतरन खड़ग जुझारू ॥
सेख बड़े, बड़ सिद्ध बखाना । किए आदेस सिद्ध बड़ माना ॥
चारिउ चतुरदसा गुन पढे । औ संजोग गोसाईं गढे ॥
विरिछ होइ जौ चंदन पासा । चंदन होइ बेधि तेहि बासा ॥

मुहमद चारिउ मीत मिलि भए जो एकै चित्त ।

एहि जग साथ जो निबहा, ओहि जग बिछुरन कित्त ॥२२॥

जायस नगर धरम अस्थानू । तहाँ आइ कवि कीन्ह बखानू ॥
औ बिनती पँडितन सन भजा । टूट सँवारहु, नेरवहु सजा ॥
हौं पँडितन केर पछलागा । किछु कहि चला तबल देइ डगा ॥

हिय भंडार नग अहै जो पूजी । खोली जीभ तारू के कूँजी ॥
 रतन-पदारथ बोल जो बोला । सुरस प्रेम मधु भरा अमोला ॥
 जेहि के बोल बिरह के घाया । कह तेहि भूख कहाँ तेहि माया ॥
 फेरे भेख रहै भा तपा । धूरि-लपेटा मानिक छपा ॥
 मुहमद कबि जौ बिरह भा ना तन रकत न माँसु ।
 जेइ मुख देखा तेइ हसा, सुनि तेहि आयउ आँसु ॥२३॥

सन नव सै सत्ताइस अहा । कथा अरंभ-बैन कबि कहा ॥
 सिंघलदीप पदमिनी रानी । रतनसेन चितउर गढ आनी ॥
 अलउद्दीन देहली सुलतानू । राघौ चेतन कीन्ह बखानू ॥
 सुना साहि गढ छेंका आई । हिंदू तुरुकन्ह भई लराई ॥
 आदि अंत जस गाथा अहै । लिखि भाखा चौपाई कहै ॥
 कवि बियास कवला रस-पूरी । दूरि सो नियर, नियर सो दूरी ॥
 नियरे दूर, फूल जस काँटा । दूरि जो नियरे, जस गुड चाँटा ॥
 भँवर आइ बनखँड सन कँवल कै बास ।
 दादुर बास न पावई भलहि जो आछै पास ॥२४॥

२.सिंहल द्वीप वर्णन खंड

सिंघलदीप कथा अब गावौं । औ सो पदमिनी बरनि सुनावौं ॥
 निरमल दरपन भाँति बिसेखा । जौ जेहि रूप सो तैसई देखा ॥
 धनि सो दीप जहँ दीपक बारी । औ पदमिनि जो दई सँवारी ॥
 सात दीप बरनै सब लोगू । एकौ दीप न ओहि सरि जोगू ॥
 दियादीप नहिं तस उँजियारा । सरनदीप सर होइ न पारा ॥
 जंबूदीप कहाँ तस नाहीं । लंकदीप सरि पूज न छाहीं ॥
 दीप गभस्थल आरन परा । दीप महुस्थल मानुस हरा ॥
 सब संसार परथमैं आए सातौं दीप ।
 एक दीप नहिं उत्तिम सिंघलदीप समीप ॥१॥

ग्रंथबसेन सुगंध नरेसू । सो राजा, वह ताकर देसू ॥
 लंका सुना जो रावन राजू । तेहु चाहि बड ताकर साजू ॥
 छप्पन कोटि कटक दल साजा । सबै छत्रपति औ गढ राजा ॥
 सोरह सहस घोड़ घोड़सारा । स्यामकरन अरु बाँक तुखारा ॥
 सात सहस हस्ती सिंघली । जनु कबिलास एरावत बली ॥
 अस्वपतिक-सिरमोर कहावै । गजपतीक आँकुस गज नावै ॥
 नरपतीक कहँ और नरिंदू । भूपतीक जग दूसर इंदू ॥
 ऐस चक्कवै राजा चहँ खंड भय होइ ।
 सबै आइ सिर नावहिं सरबरि करै न कोइ ॥२॥

जबहिं दीप नियरावा जाई । जनु कबिलास नियर भा आई ॥
 घन अमराउ लाग चहँ पासा । उठा भूमि हुत लागि अकासा ॥
 तरिवर सबै मलयगिरि लाई । भइ जग छाँह रैनि होइ आई ॥
 मलय-समीर सोहावन छाहाँ । जेठ जाड लागै तेहि माहाँ ॥
 ओही छाँह रैनि होइ आवै । हरियर सबै अकास देखावै ॥

पथिक जो पहुँचै सहि कै घामू । दुख बिसरै, सुख होइ बिसरामू ॥
जेइ वह पाई छाँह अनूपा । फिरि नहिं आइ सहै यह धूपा ॥
अस अमराउ सघन घन, बरनि न पारौं अंत ।

फूलै फरै छवौ ऋतु, जानहु सदा बसंत ॥३॥

फरे आँब अति सघन सोहाए । औ जस फरे अधिक सिर नाए ॥
कटहर डार पींड सन पाके । बड़हर, सो अनूप अति ताके ॥
खिरनी पाकि खाँड अस मीठी । जामुन पाकि भँवर अति डीठी ॥
नरियर फरे फरी फरहरी । फुरै जानु इंद्रासन पुरी ॥
पुनि महुआ चुअ अधिक मिठासू । मधु जस मीठ, पुहुप जस बासू ॥
और खजहजा अनबन नाऊँ । देखा सब राउन-अमराऊ ॥
लाग सबै जस अमृत साखा । रहै लोभाइ सोइ जो चाखा ॥
लवंग सुपारी जायफल सब फर फरे अपूर ।

आसपास घन इमिली औ घन तार खजूर ॥४॥

बसहिं पंखि बोलहिं बहु भाखा । करहिं हुलास देखि कै साखा ॥
भोर होत बोलहिं चुहुचुही । बोलहिं पाँडुक एकै तूही ॥
सारौं सुआ जो रहचह करही । कुरहिं परेवा औ करबरही ॥
'पीव पीव' कर लाग पपीहा । 'तुही तुही' कर गडुरी जीहा ॥
'कुहू कुहू' करि कोइल राखा । औ भिंगराज बोल बहु भाखा ॥
'दही दही' करि महारि पुकारा । हारिल बिनवै आपन हारा ॥
कुहुकहिं मोर सोहावन लाग । होइ कुराहर बोलहि कागा ॥
जावत पंखी जगत के भरि बैठे अमराऊँ ।

आपनि आपनि भाषा लेहिं दई कर नाऊँ ॥५॥

पैग पैग पर कुआँ बावरी । साजी बैठक और पाँवरी ॥
और कुंड बहु ठावहिं ठाऊँ । औ सब तीरथ तिन्ह के नाऊँ ॥
मठ मंडप चहुँ पास सँवारे । तपा जपा सब आसन मारे ॥
कोइ सु ऋषीसुर, कोइ सन्यासी । कोई रामजती बिसवासी ॥
कोई ब्रह्मचार पथ लागे । कोइ सो दिगंबर बिचरहिं नाँगे ॥
कोई सु महेसुर जंगम जती । कोइ एक परखै देवी सती ॥
कोई सुरसती कोई जोगी । निरास पथ बैठ बियोगी ॥

सेवरा, खेवरा, बानपर, सिध, साधक, अवधूत ।

मानसरोदक बरनौं काहा । भरा समुद अस अति अवगाहा ॥
पानि मोती अस निरमल तासू । अमृत आनि कपूर सुबासू ॥
लंकदीप कै सिला अनाई । बाँधा सरवर घाट बनाई ॥
खँड खँड सीढी भई गरेरी । उतरहिं चढहिं लोग चहुँ फेरी ॥
फूला कँवल रहा होइ राता । सहस सहस पखुरिन कर छाता ॥
उलथहिं सीप, मोति उतराहीं । चुगहिं हंस औ केलि कराहीं ॥
खनि पतार पानी तहँ काढा । छीरसमुद निकसा हुत बाढा ॥

ऊपर पाल चहुँ दिसि अमृत-फल सब रूख ।

देखि रूप सरवर कै गै पियास औ भूख ॥७॥

पानि भरै आवहिं पनिहारी । रूप सुरूप पदमिनी नारी ॥
पदुमगंध तिन्ह अंग बसाहीं । भँवर लागि तिन्ह सँग फिराहीं ॥

लंक-सिंधिनी, सारगनैनी । हंसगामिनी कोकिलबैनी ॥
 आवहिं झुंड सो पाँतिहिं पाँती । गवन सोहाइ सु भाँतिहिं भाँती ॥
 कनक कलस मुखचंद दिपाहीं । रहस केलि सन आवहिं जाहीं ॥
 जा सहुँ वै हेरै चख नारी । बाँक नैन जनु हनहिं कटारी ॥
 केस मेघावर सिर ता पाई । चमकहिं दसन बीजु कै नाई ॥

माथे कनक गागरी आवहिं रूप अनूप ।

जेहि के अस पनहारी सो रानी केहि रूप ॥८॥

ताल तलाव बरनि नहिं जाहीं । सूझै वार पार किछु नाहीं ॥
 फूले कुमुद सेत उजियारे । मानहुँ उए गगन महुँ तारे ॥
 उतरहिं मेघ चढहिं लेइ पानी चमकहिं मच्छ बीजु कै बानी ॥
 पौरहिं पंख सुसंगहिं संगी । सेत पीत राते बहु रंगा ॥
 चकई चकवा केलि कराहीं । निसि के बिछोह, दिनहिं मिलि जाहीं ॥
 कुररहिं सारस करहिं हुलासा । जीवन मरन सो एकहिं पासा ॥
 बोलहिं सोन ठेक बगलेदी । रही अबोल मीन जल भेदी ॥

नग अमोल तेहि तालहिं दिनहिं बरहिं जस दीप ।

जो मरजिया होइ तहुँ सो पावै वह सीप ॥९॥

आस पास बहु अमृत बारी । फरीं अपूर होइ रखवारी ॥
 नारग नीबू सुरँग जंभीरा । औ बदाम बहु भेद अँजीरा ॥
 गलगल तुरज सदाफर फरे । नारँग अति राते रस भरे ॥
 किसमिस सेव फरे नौ पाता । दारिऊँ दाख देखि मन राता ॥
 लागि सुहाई हरफारयोरी । उनै रही केरा कै घौरी ॥
 फरे तूत कमरख औ न्योजी । रायकरौंदा बेर चिरौंजी ॥
 संगतरा व छुहारा दीठे । और खजहजा खाटे मीठे ॥

पानि देहिं खँडवानी कुवहिं खाँड बहु मेलि ।

लागी घरी रहट कै सीचहिं अमृतबेल ॥१०॥

पुनि फुलवारि लागि चहुँ पासा । विरिछ बेधि चंदन भइ बासा ॥
 बहुत फूल फूलीं घनबेली । केवडा चंपा कुंद चमेली ॥
 सुरँग गुलाल कदम और कूजा । सुगंध बकौरी गंधब पूजा ॥
 जाही जूही बगुचन लावा । पुहुप सुदरसन लाग सुहावा ॥
 नागेसर सदबरग नेवारी । औ सिंगारहार फुलवारी ॥
 सोनजरद फूलीं सेवती । रूपमंजरी और मालती ॥
 मौलसिरी बेइलि औ करना । सबै फूल फूले बहुबरना ॥

तेहिं सिर फूल चढहिं वै जेहि माथे मनि-भाग ।

आछहिं सदा सुगंध बहु जनु बसंत औ फाग ॥११॥

सिंगलनगर देखु पुनि बसा । धनि राजा अस जे कै दसा ॥
 ऊँची पौरी ऊँच अवासा । जनु कैलास इंद्र कर वासा ॥
 राव रंक सब घर घर सुखी । जो दीखै सौ हँसता-मुखी ॥
 रचि रचि साजे चंदन चौरा । पोतें अगर मेद औ गौरा ॥
 सब चौपारहिं चंदन खभा । ओठेंघि सभासद बैठे सभा ॥
 मनहुँ सभा देवतन्ह कर जुरी । परी दीठि इंद्रासन पुरी ॥
 सबै गुनी औ पंडित ज्ञाता । संसकिरित सबके मुख बाता ॥

अस कै मंदिर सँवारे जनु सिवलोक अनूप ।

घर घर नारि पदमिनी मोहहिं सरसन रूप ॥१२॥

पुनि देखी सिंघल फै हाटा । नवौ निद्धि लछिमी सब बाटा ॥
 कनक हाट सब कुहकुहँ लीपी । बैठ महाजन सिंघलदीपी ॥
 रचहिं हथौडा रूपन ढारी । चित्र कटाव अनेक सवारी ॥
 सोन रूप भल भयऊ पसारा । धवल सिरीं पोतहिं घर बारा ॥
 रतन पदारथ मानिक मोती । हीरा लाल सो अनबन जोती ॥
 औ कपूर बेना कस्तूरी । चंदन अगर रहा भरपूरी ॥
 जिन्ह एहि हाट न लीन्ह बेसाहा । ता कहँ आन हाट कित लाहा ॥
 कोई करै बेसाहिनी, काहू केर बिकाइ ।

कोई चलै लाभ सन, कोई मूर गँवाइ ॥१३॥

पुनि सिंगारहाट भल देसा । किए सिंगार बैठीं तहँ बेसा ॥
 मुख तमोल तन चीर कुसुंभी । कानन कनक जडाऊ खुंभी ॥
 हाथ बीन सुनि मिरिग भुलाहीं । नर मोहहिं सुनि, पैग न जाहीं ॥
 भौंह धनुष, तिन्ह नैन अहेरी । मारहिं बान सान सौं फेरी ॥
 अलक कपोल डोल हँसि देहीं । लाइ कटाछ मारि जिउ लेहीं ॥
 कुच कंचुक जानौ जुग सारी । अंचल देहिं सुभावहिं ढारी ॥
 केत खिलार हारि तेहि पासा । हाथ झारि उठि चलहिं निरासा ॥

चेटक लाइ हरहिं मन जब लहि होइ गथ फेट ।

साँठ नाठि उटि भए बटाऊ, ना पहिचान न भेंट ॥१४॥

लेइ के फूल बैठि फुलहारी । पान अपूरब धरे सँवारी ॥
 साँधा सबै बैठ ले गाँधी । फूल कपूर खिरौरी बाँधी ॥
 कतहँ पंडित पढँहि पुरानू । धरमपंथ कर करहिं बखानू ॥
 कतहँ कथा कहै किछु कोई । कतहँ नाच-कूद भल होई ॥
 कतहँ चिरहँटा पंखी लावा । कतहँ पखंडी काठ नचावा ॥
 कतहँ नाद सबद होइ भला । कतहँ नाटक चेटक-कला ॥
 कतहँ काहु ठगविद्या लाई । कतहँ लेहिं मानुष बौराई ॥

चरपट चोर गँठिछोरा मिले रहहिं ओहि नाच ।

जो ओहि हाट सजग भा गथ ताकर पै बाँच ॥१५॥

पुनि आए सिंघल गढ़ पासा । का बरनों जनु लाग अकासा ॥
 तरहिं करिन्ह बासुकि कै पीठी । ऊपर इंद्र लोक पर दीठी ॥
 परा खोह चहुँ दिसि अस बाँका । काँपै जाँघ, जाइ नहिं झाँका ॥
 अगम असूझ देखि डर खाई । परै सो सपत-पतारहिं जाई ॥
 नव पौरी बाँकी, नवखंडा । नवौ जो चढ़े जाइ बरम्हंडा ॥
 कंचन कोट जरे नग सीसा । नखतहिं भरी बीजु जनु दीसा ॥
 लंका चाहि ऊँच गढ़ ताका । निरखि न जाइ, दीठि तन थाका ॥

हिय न समाइ दीठि नहिं जानहुँ ठाढ सुमेर ।

कहँ लागि कहौँ ऊँचाई, कहँ लागि बरनों फेर ॥१६॥

निति गढ़ बाँचि चलै ससि सूरू । नाहिं त होइ बाजि रथ चूरू ॥
 पौरी नवौ बज्र कै साजी । सहस सहस तहँ बैठे पाजी ॥
 फिरहिं पाँच कोतवार सुभौरी । काँपै पावैं चपत वह पौरी ॥

पौरहिं पौरि सिंह गढि काढे । डरपहिं लोग देखि तहँ ठाढे ॥
 बहुविधान वै नाहर गढे । जनु गाजहिं, चाहहिं सिर चढे ॥
 टारहिं पूँछ , पसारहिं जीहा । कुंजर डरहिं कि गुंजरि लीहा ॥
 कनक सिला गढि सीढी लाई । जगमगाहि गढ ऊपर ताइ ॥
 नवौं खंड नव पौरी , औ तहँ बज्र केवार ।

चारि बसेरे सौं चढे , सत सौं उतरे पार ॥१७॥

नव पौरी पर दसवँ दुवारा । तेहि पर बाज राज-घरियारा ॥
 घरी सो बैठि गनै घरियारी । पहर सो आपनि बारी ॥
 जबहीं घरी पूजि तेई मारा । घरी घरी घरियार पुकारा ॥
 परा जो डाँड जगत सब डाँडा । का निचिंत माटी कर भाँडा ॥
 तुम्ह तेहि चाक चढे हौ काँचे । आएहु रहै न थिर होइ बाँचे ॥
 घरी जो भरी घटी तुम्ह आऊ । का निचिंत होइ सोउ बटाऊ ॥
 पहरहिं पहर गजर निति होई । हिया बजर, मन जाग न सोई ॥
 मुहमद जीवन-जल भरन, रहँट-घरी कै रीति ।

घरी जो आई ज्यों भरी , ढरी,जनम गा बीति ॥१८॥

गढ पर नीर खीर दुइ नदी । पनिहारी जैसे दुरपदी ॥
 और कुंड एक मोतीचूरु । पानी अमृत, कीच कपूरु ॥
 ओहि क पानि राजा पै पीया । बिरिध होइ नहिं जौ लहि जीया ॥
 कंचन-बिरछि एक तेहि पासा । जस कलपतरु इंद्र-कविलासा ॥
 मूल पतार, सरग ओहि साखा । अमरबेलि को पाव, को चाखा ॥
 चाँद पात औ फूल तराई । होइ उजियार नगर जहँ ताई ॥
 वह फल पावै तप करि कोई । बिरधि खाइ तौ जोवन होई ॥
 राजा भए भिखारी सुनि वह अमृत भोग ।

जेइ पावा सो अमर भा, ना किछु व्याधि न रोग ॥१९॥

गढ पर बसहिं झारि गढ पती । असुपति, गजपति, भू-नर-पती ॥
 सब धौराहर सोने साजा । अपने अपने घर सब राजा ॥
 रूपवंत धनवंत सभागे । परस पखान पौरि तिन्ह लागे ॥
 भोग-विलास सदा सब माना । दुख चिंता कोइ जनम न जाना ॥
 मँदिर मँदिर सब के चौपारी । बैठि कुँवर सब खेलहिं सारी ॥
 पासा ढरहिं खेल भल होई । खड्गदान सरि पूज न कोई ॥
 भाँट बरनि कहि कीरति भली । पावहिं हस्ति घोड़ सिंघली ॥

मँदिर मँदिर फुलवारी, चोवा चंदन बास ।

निसि दिन रहै बसंत तहँ छवौ ऋतु बारह मास ॥२०॥

पुनि चलि देखा राज-दुआरा । मानुष फिरहिं पाइ नहिं बारा ॥
 हस्ति सिंघली बाँधे बारा । जनु सजीव सब ठाढ पहारा ॥
 कौनौ सेत, पीत रतनारे । कौनों हरे, धूम औ कारे ॥
 बरनहिं बरन गगन जस मेघा । औ तिन्ह गगन पीठी जनु ठेघा ॥
 सिंघल के बरनों सिंघली । एक एक चाहि एक एक बली ॥
 गिरि पहार वै पैगहि पेलहिं । बिरिछ उचारि डारि मुख मेलहिं ॥
 माते तेइ सब गरजहिं बाँधे । निसि दिन रहहिं महाउत काँधे ॥

धरती भार न अगवै, पाँव धरत उठ हालि ।

कुरुम टुटै, भुइँ फाटै तिन हस्तिन के चालि ॥२१॥

पुनि बाँधे रजवार तुरंगा । का बरनों जस उन्हकै रंगा ॥
लील, समंद चाल जग जाने । हाँसुल, भौर, गियाह बखाने ॥
हरे, कुरंग, महुअ बहु भाँती । गरर, कोकाह, बुलाह सु पाँती ॥
तीख तुखार चाँड औ बाँके । सँचरहिं पौरि ताज बिनु हाँके ॥
मन तें अगमन डोलहिं बागा । लेत उसास गगन सिर लागा ॥
पौन-समान समुद पर धावहिं । बूड न पाँव, पार होइ आवहिं ॥
थिर न रहहिं, रिस लोह चबाहीं । भाँजहिं पूँछ, सीस उपराहीं ॥

अस तुखार सब देखे जनु मन के रथवाह ।

नैन-पलक पहुँचावहिं जहँ पहुँचा कोइ चाह ॥२२॥

राजसभा पुनि देखे बईठी । इंद्रसभा जनु परि गै डीठी ॥
धनि राजा असि सभा सँवारी । जानहु फूलि रही फुलवारी ॥
मुकुट बाँधि सब बैठे राजा । दर निसान नित जिन्हके बाजा ॥
रूपवंत, मनि दिपै लिलाटा । माथे छात, बैठ सब पाटा ॥
मानहुँ कँवल सरोवर फूले । सभा क रूप देखि मन भूले ॥
पान कपूर मेद कस्तूरी । सुगँध वास भरि रही अपूरी ॥
माँझ ऊँच इंद्रासन साजा । गंधवसेन बैठ तहँ राजा ॥

छत्र गगन लागि ताकर, सूर तवै जस आप ।

सभा कँवल अस बिगसै, माथे बड़ परताप ॥२३॥

साजा राजमंदिर कैलासू । सोने कर सब धरति अकासू ॥
सात खंड धौराहर साजा । उहै सँवारि सकै अस राजा ॥
हीरा ईट, कपूर गिलावा । औ नग लाइ सरग लै लावा ॥
जावत सबै उरेह उरेहे । भाँति भाँति नग लाग उबेहे ॥
भाव कटाव सब अनवत भाँती । चित्र कोरि कै पाँतिहिं पाँती ॥
लाग खंभ-मनि-मानिक जरे । निसि दिन रहहिं दीप जनु बरे ॥
देखि धौरहर कर उँजियारा । छपि गए चाँद सुरुज औ तारा ॥

सुना सात बैकुंठ जस तस साजे खँड सात ।

बेहर बेहर भाव तस खंड खंड उपरात ॥२४॥

वरनों राजमंदिर रनिवासू । जनु अछरीन्ह भरा कविलासू ॥
सोरह सहस पदमिनी रानी । एक एक तें रूप बखानी ॥
अतिसुरूप औ अति सुकुवाँरी । पान फूल के रहहिं अधारी ॥
तिन्ह ऊपर चंपावति रानी । महा सुरूप पाट-परधानी ॥
पाट बैठि रह किए सिंगारू । सब रानी ओहि करहिं जोहारू ॥
निति नौरंग सुरंगम सोई । प्रथम बैस नहिं सरवरि कोई ॥
सकल दीप महँ जेती रानी । तिन्ह महँ दीपक बारह-बानी ॥

कुँवर बतीसो-लच्छनी अस सब माँ अनूप ।

जावत सिंघलदीप के सबै बखानै रूप ॥२५॥

३.जन्म-खंड

चंपावति जो रूप सँवारी । पदमावति चाहै औतारी ॥
 भै चाहै असि कथा सलोनी । मेटि न जाइ लिखी जस होनी ॥
 सिंघलदीप भए तब नाऊँ । जो अस दिया बरा तेहि ठाऊँ ॥
 प्रथम सो जोति गगन निरमई । पुनि सो पिता माथे मनि भई ॥
 पुनि वह जोति मातु-घट आई । तेहि ओदर आदर बहु पाई ॥
 जस अवधान पूर होइ मासू । दिन दिन हिये होइ परगासू ॥
 जस अंचल महँ छिपै न दीया । तस उँजियार दिखावै हीया ॥

सोने मँदिर सँवारहिँ औ चंदन सब लीप ।

दिया जो मनि सिवलोक महँ उपना सिंघलदीप ॥१॥

भए दस मास पूरि भइ घरी । पदमावति कन्या औतरी ॥
 जानौ सूर किरिन-हुति काढी । सुरुज-कला घाटि, वह बाढी ॥
 भा निसि महँ दिन कर परकासू । सब उँजियार भएउ कविलासू ॥
 इते रूप मूरति परगटी । पूनौ ससी छीन होइ घटी ॥
 घटतहिँ घटत अमावस भई । दिन दुइ लाज गाडि भुइँ गई ॥
 पुनि जो उठी दुइज होइ नई । निहकलंक ससि विधि निरमई ॥
 पदुमगंध बेधा जग बासा । भौर पतंग भए चहुँ पासा ॥

इते रूप भै कन्या जेहिँ सरि पूज न कोइ ।

धनि सो देस रुपवंता जहाँ जन्म अस होइ ॥२॥

भै छठि राति छठीं सुख मानी । रइस कूद सौँ रैनि बिहानी ॥
 भा विहान पंडित सब आए । काढि पुरान जनम अरथाए ॥
 उत्तिम घरी जनम भा तासू । चाँद उआ भूइँ, दिपा अकासू ॥
 कन्यारासि उदय जग कीया । पदमावती नाम अस दीया ॥
 सूर प्रसंसै भएउ फिरीरा । किरिन जामि, उपना नग हीरा ॥
 तेहि तें अधिक पदारथ करा । रतन जोग उपना निरमरा ॥
 सिंघलदीप भए औतारू । जंबूदीप जाइ जमबारू ॥

राम अजुध्या ऊपने लछन बतीसो संग ।

रावन रूप सौँ भूलिहि दीपक जैस पतंग ॥३॥

कहेन्हि जनमपत्री जो लिखी । देइ असीस बहुरे जोतिषी ॥
 पाँच बरस महँ भय सो बारी । कीन्ह पुरान पढै बैसारी ॥
 भै पदमावति पंडित गुनी । चहुँ खंड के राजन्ह सुनी ॥
 सिंघलदीप राजघर बारी । महा सुरुप दई औतारी ॥
 एक पदमिनी औ पंडित पढी । दहुँ केहि जोग गोसाईँ गढी ॥
 जा कहँ लिखी लच्छि घर होनी । सो असि पाव पढी औ लोनी ॥
 सात दीप के बर जो ओनाहीं । उत्तर पावहिँ, फिरि फिरि जाहीं ॥

राजा कहै गरब कै अहाँ इंद्र सिवलोक ।

सो सरवरि है मोरे, कासौँ करौँ बरोक ॥४॥

बारह बरस माहँ भै रानी । राजै सुना सँजोग सयानी ॥
 सात खंड धौराहर तासू । सो पदमिनि कहँ दीन्ह निवासू ॥
 औ दीन्ही सँग सखी सहेली । जो सँग करै रहसि रस-केली ॥
 सबै नवल पिउ संग न सोई । कँवल पास जनु बिगीस कोई ॥

सुआ एक पदमावति ठाऊँ । महा पंडित हीरामन नाऊँ ॥
 दई दीन्ह पंखिहि अस जोती । नैन रतन, मुख मानिक मोती ॥
 कंचन बरन सुआ अति लोना । मानहुँ मिला सोहागहिं सोना ॥
 रहहिं एक सँग दोउ, पढहिं सासतर वेद ।

बरम्हा सीस डोलावहीं, सुनत लाग तस भेद ॥५॥

भै उनंत पदमावति बारी । रचि रचि विधि सब कला सँवारी ॥
 जग बेधा तेहि अंग-सुवासा । भँवर आइ लुबुधे चहुँ पासा ॥
 बेनी नाग मलयागिरि पैठी । ससि माथे होइ दूइज बैठी ॥
 भौंह धनुक साधे सर फेरै । नयन कुरंग भूलि जनु हेरै ॥
 नासिक कीर, कँवल मुख सोहा । पदमिनि रूप देखि जग मोहा ॥
 मानिक अधर, दसन जनु हीरा । हिय हुलसे कुच कनक-गँभीरा ॥
 केहरि लंक, गवन गज हारे । सुरनर देखि माथ भुइँ धारे ॥

जग कोइ दीठि न आवै आछहि नैन अकास ।

जोगि जती संन्यासी तप साधहि तेहि आस ॥६॥

एक दिवस पदमावति रानी । हीरामन तइँ कहा सयानी ॥
 सुनु हीरामन कहौँ बुझाई । दिन दिन मदन सतावै आई ॥
 पिता हमार न चालै बाता । त्रसहि बोलि सकै नहिं माता ॥
 देस देस के बर मोहि आवहिं । पिता हमार न आँख लगावहिं ॥
 जोवन मोर भयउ जस गंगा । देइ देइ हम्ह लाग अनंगा ॥
 हीरामन तब कहा बुझाई । विधि कर लिखा मेटि नहिं जाई ॥
 अज्ञा देउ देखौँ फिरि देसा । तोहि जोग बर मिलै नरेसा ॥

जौ लागि मैं फिरि आवौँ मन चित धरहु निवारि ।

सुनत रहा कोइ दुरजन, राजहि कहा विचारि ॥७॥

राजा सुना दीठी भै आना । बुधि जो देहि सँग सुआ सयाना ॥
 भएउ रजायसु मारहु सूआ । सूर सुनाव चाँद जहँ ऊआ ॥
 सत्रु सुआ के नाऊ बारी । सुनि धाए जस धाव मँजारी ॥
 तब लागि रानी सुआ छपावा । जब लागि ब्याध न आवै पावा ॥
 पिता क आयसु माथे मोरे । कहहु जाय विनवौ कर जोरे ॥
 पंखि न कोई होइ सुजानू । जानै भृगुति कि जान उडानू ॥
 सुआ जो पढै पढाए बैना । तेहि कत बुधि जेहि हिये न नैना ॥

मानिक मोती देखि वह हिये न ज्ञान करेइ ।

दारिउँ दाख जानि कै अवहिं ठोर भरि लेइ ॥८॥

वै तौ फिरे उतर अस पावा । विनवा सुआ हिये डर खावा ॥
 रानी तुम जुग जुग सुख पाऊ । होइ अज्ञा बनवास तौ जाऊँ ॥
 मोतिहिं मलिन जो होइ गइ कला । पुनि सो पानि कहाँ निरमला ॥
 ठाकुर अंत चहै जेहि मारा । तेहि सेवक कर कहाँ उबारा ॥
 जेहि घर काल-मजारी नाचा । पंखहि पाउँ जीउ नहिं बाँचा ॥
 मैं तुम्ह राज बहुत सुख देखा । जौ पूछहि देइ जाइ न लेखा ॥
 जो इच्छा मन कीन्ह सो जेंवा । यह पछिताव चल्योँ विनु सेवा ॥

मारै सोइ निसोगा, डरै न अपने दोस ।

केरा केलि करै का जौँ भा बैरि परोस ॥९॥

रानी उतर दीन्ह कै माया । जौ जिउ जाउ रहै किमि काया? ॥
 हीरामन! तू प्रान परेवा । धोख न लाग करत तोहिं सेवा ॥
 तोहिं सेवा बिछुरन नहिं आखीं । पींजर हिये घालि कै राखीं ॥
 हौं मानुस, तू पंखि पियारा । धरन क प्रीति तहाँ केइ मारा ॥
 का सौ प्रीति तन माँह बिलाई? । सोइ प्रीति जिउ साथ जो जाई ॥
 प्रीति मार लै हियै न सोचू । ओहि पंथ भल होइ कि पोचू ॥
 प्रीति पहार भार जो काँधा । सो कस छुटै, लाइ जिउ बाँधा ॥
 सुअटा रहै खुरुक जिउ, अबहिं काल सो आव ।
 सत्रु अहै जो करिया कबहुँ सो बोरे नाव ॥१०॥

४. मानसरोदक - खंड

एक दिवस पून्यो तिथि आई । मानसरोदक चली नहाई ॥
 पदमावति सब सखी बुलाई । जनु फुलवारि सबै चलि आई ॥
 कोइ चंपा कोइ कुंद सहेली । कोइ सु केत, करना, रस बेली ॥
 कोइ सु गुलाल सुदरसन राती । कोइ सो बकावरि-बकुचन भाँती ॥
 कोइ सो मौलसिरि, पुहपावती । कोइ जाही जूही सेवती ॥
 कोई सोनजरद, कोइ केसर । कोइ सिंगार-हार नागेसर ॥
 कोइ कूजा सदबर्ग चमेली । कोई कदम सुरस रस-बेली ॥
 लीं सबै मालति सँग फूलीं कवँल कुमोद ।
 बेधि रहे गन गँधरब बास-परमदामोद ॥१॥

खेलत मानसरोवर गई । जाइ पाल पर ठाढ़ी भई ॥
 देखि सरोवर हँसै कुलेली । पदमावति सौं कहहिं सहेली ॥
 ए रानी मन देखु बिचारी । एहि नैहर रहना दिन चारी ॥
 जौ लागि अहै पिता कर राजू । खेलि लेहु जो खेलहु आजु ॥
 पुनि सासुर हम गवनब काली । कित हम, कित यह सरवर-पाली ॥
 कित आवन पुनि अपने हाथा । कित मिलि कै खेलब एक साथी ॥
 सासु ननद बोलिन्ह जिउ लेहीं । दारुन सासुर न निसरै देहीं ॥
 पिउ पियार सिर ऊपर, पुनि सो करै दहुँ काह ।
 दहुँ सुख राखै की दुख, दहुँ कस जनम निवाह ॥२॥

मिलहिं रहसि सब चढहिं हिंडोरी । झूलि लेहिं सुख बारी भोरी ॥
 झूलि लेहु नैहर जब ताई । फिरि नहिं झूलन देइहिं साई ॥
 पुनि सासुर लेइ राखहिं तहाँ । नैहर चाह न पाउब जहाँ ॥
 कित यह धूप, कहाँ यह छाँहा । रहब सखी विनु मंदिर माहाँ ॥
 गुन पूछहि औ लाइहि दोखू । कौन उतर पाउब तहँ मोखू ॥
 सासु ननद के भौंह सिकोरे । रहब सँकोचि दुवौ कर जोरे ॥
 कित यह रहसि जो आउब करना । ससुरेइ अंत जनम भरना ॥
 कित नैहर पुनि आउब, कित ससुरे यह खेल ।
 आपु आपु कहँ होइहिं परब पंखि जस डेल ॥३॥

सरवर तीर पदमिनी आई । खोंपा छोरि केस मुकलाई ॥
 ससिमुख, अंग मलयगिरि बासा । नागिन झाँपि लीन्ह चहुँ पासा ॥
 ओनई घटा परी जग छाँहा । ससि के सरन लीन्ह जनु राहाँ ॥
 छपि गै दिनहिं भानु कै दसा । लेइ निसि नखत चाँद परगसा ॥
 भूलि चकोर दीठि मुख लावा । मेघघटा महँ चंद देखावा ॥
 दसन दामिनी, कोकिल भाखी । भौंहेँ धनुख गगन लेइ राखी ॥
 नैन खँजन दुइ केलि करेहीं । कुच नारंग मधुकर रस लेहीं ॥
 सरवर रूप बिमोहा, हिये होलोरहि लेइ ।

पाँव छुवै मकु पावों एहि मिस लहरहि देइ ॥४॥

धरी तीर सब कंचुकि सारी । सरवर महँ पैठीं सब बारी ॥
 पाइ नीर जानों सब बेली । हुलसहिं करहिं काम कै केली ॥
 करिल केस बिसहर बिस-भरे । लहरें लेहिं कवँल मुख धरे ॥
 नवल बसंत सँवारी करी । होइ प्रगट जानहु रस-भरी ॥
 उठी कोंप जस दारिवँ दाखा । भई अनंत पेम कै साखा ॥
 सरवर नहिं समाइ संसारा । चाँद नहाइ पैट लेइ तारा ॥
 धनि सो नीर ससि तरई ऊई । अब कित दीठ कमल औ कूई ॥
 चकई बिद्धुरि पुकारै, कहाँ मिलौं, हो नाहँ ।

एक चाँद निसि सरग महँ, दिन दूसर जल माँह ॥५॥

लागीं केलि करै मझ नीरा । हंस लजाइ बैठ ओहि तीरा ॥
 पदमावति कौतुक कहँ राखी । तुम ससि होहु तराइन्ह साखी ॥
 बाद मेलि कै खेल पसारा । हार देइ जो खेलत हारा ॥
 सँवरिहि साँवरि, गोरिहि । आपनि लीन्ह सो जोरी ॥
 बूझि खेल खेलहु एक साथ । हार न होइ पराए हाथा ॥
 आजुहि खेल, बहुरि कित होई । खेल गए कित खेलै कोई ॥
 धनि सो खेल खेल सह पेमा । रउताई औ कूसल खेमा ॥

मुहमद बाजी पेम कै ज्यों भावै त्यों खेल ।

तिल फूलहि के सँग ज्यों होइ फुलायल तेल ॥६॥

सखी एक तेइ खेल ना जाना । भै अचेत मनि-हार गवाँना ॥
 कवँल डार गहि भै बेकरारा । कासों पुकारों आपन हारा ॥
 कित खेलै अइउँ एहि साथ । हार गँवाइ चलिउँ लेइ हाथा ॥
 घर पैठत पूँछब यह हारू । कौन उतर पाउब पैसारू ॥
 नैन सीप आँसू तस भरे । जानौ मोति गिरहिं सब ढरे ॥
 सखिन कहा बौरी कोकिला । कौन पानि जेहि पौन न मिला ॥
 हार गँवाइ सो ऐसै रोवा । हेरि हेराइ लेइ जौं खौवा ॥

लागीं सब मिलि हेरै बूडि बूडि एक साथ ।

कोइ उठी मोती लेइ, काहू घोंघा हाथ ॥७॥

कहा मानसर चाह सो पाई । पारस-रूप इहाँ लगी आई ॥
 भा निरमल तिन्ह पायँन्ह परसे । पावा रूप रूप के दरसे ॥
 मलय समीर बास तन आई । भा सीतल, गै तपनि बुझाई ॥
 न जनों कौन पौन लेइ आवा । पुन्य-दसा भै पाप गँवावा ॥
 ततखन हार बेगि उतिराना । पावा सखिन्ह चंद बिहँसाना ॥

बिगसा कुमुद देखि ससि-रेखा । भै तहँ ओप जहाँ जोइ देखा ॥
 पावा रूप रूप जस चहा । ससि-मुख जनु दरपन होइ रहा ॥
 नयन जो देखा कवँल भा, निरमल नीर सरीर ।
 हँसत जो देखा हंस भा, दसन-जोति नग हीर ॥८॥

५.सुआ-खंड

पदमावति तहँ खेल दुलारी । सुआ मँदिर महँ देखि मजारी ॥
 कहेसि चलौं जौ लहि तन पाँखा । जिउ लै उडा ताकि बन ढाँखा ॥
 जाइ परा बन खँड जिउ लीन्हें । मिले पँखि, बहु आदर कीन्हें ॥
 आनि धरेन्हि आगे फरि साखा । भुगुति भेंट जौ लहि विधि राखा ॥
 पाइ भुगुति सुख तेहि मन भएऊ । दुख जो अहा बिसरि सब गएऊ ॥
 ए गुसाईँ तूँ ऐस विधाता । जावत जीव सबन्ह भुकदाता ॥
 पाहन महँ नहिँ पतँग बिसारा । जहँ तोहि सुनिर दीन्ह तुई चारा ॥
 तौ लहि सोग बिछोह कर भोजन परा न पेट ।

पुनि बिसरन भा सुमिरना जब संपति भै भेंट ॥१॥

पदमावति पहँ आइ भँडारी । कहेसि मँदिर महँ परी मजारी ॥
 सुआ जो उत्तर देत रह पूछा । उडिगा, पिंजर न बोलै छूँछा ॥
 रानी सुना सबहिँ सुख गएऊ । जनु निसि परी, अस्त दिन भएऊ ॥
 गहने गही चाँद कै करा । आँसु गगन जस नखतन्ह भरा ॥
 टूट पाल सरवर बहि लागे । कवँल बूड, मधुकर उडि भागे ॥
 एहि विधि आँसु नखत होइ चूए । गगन छाँ सरवर महँ ऊए ॥
 चिहुर चुईँ मोतिन कै माला । अब सँकेतबाँधा चहुँ पाला ॥
 उडि यह सुअटा कहँ बसा खोजु सखी सो बासु ।

दहँ है धरती की सरग, पौन न पावै तासु ॥२॥

चहँ पास समुझावहिँ सखी । कहाँ सो अब पाउब, गा पँखी? ॥
 जौ लहि पींजर अहा परेवा । रहा बंदि महँ, कीन्हेसि सेवा ॥
 तेहि बंदि हुति छुटै जो पावा । पुनि फिरि बंदि होइ कित आवा ॥
 वै उड़ान-फर तहियै खाए । जब भा पँखी, पाँख तन आए ॥
 पींजर जेहिक सौँपि तेहि गएउ । जो जाकर सो ताकर भएउ ॥
 दस दुवार जेहि पींजर माँहा । कैसे बाँच मँजारी पाहाँ ॥
 यह धरती अस केतन लीला । पेट गाढ अस, बहुरि न ढीला ॥

जहाँ न राति न दिवस है, जहाँ न पौन न पानि ।

तेहि बन सुअटा चलि बसा कौन मिलावै आनि ॥३॥

सुए तहाँ दिन दस कल काटी । आय बियाध दुका लेइ टाटी ॥
 पैग पैग भुईँ चापत आवा । पंखिन्ह देखि हिए डर खावा ॥
 देखिय किछु अचरज अनभला । तरिवर एक आवत है चला ॥
 एहि बन रहत गई हम्ह आऊ । तरिवर चलत न देखा काऊ ॥
 आज तो तरिवर चल, भल नाहीं । आवहु यह बन छाँडि पराहीं ॥
 वै तौ उडे और बन ताका । पंडित सुआ भूलि मन थाका ॥

साखा देखि राजु जनु पावा । बैठ निचिंत चला वह आवा ॥
पाँच बान कर खोंचा, लासा भरे सो पाँच ।

पाँख भरे तन अरुझा, कित मारे विनु बाँच ॥४॥

बाँधिगा सुआ करत सुख केली । चूरि पाँख मेलेसि धरि डेली ॥
तहवाँ बहुत पंखि खरभरहीं । आपु आपु महुँ रोदन करही ॥
बिखदाना कित होत अँगूरा । जेहि भा मरन डहन धरि चूरा ॥
जौं न होत चारा कै आसा । कित चिरिहार दुक्त लेइ लासा ॥
यह विष चअरै सब बुधि ठगी । औ भा काल हाथ लेइ लगी ॥
एहि झूठी माया मन भूला । ज्यों पंखी तैसे तन फूला ॥
यह मन कठिन मरै नहिं मारा । काल न देख, देख पै चारा ॥

हम तौ बुद्धि गँवावा विष-चारा अस खाइ ।

तै सुअटा पंडित होइ कैसे बाझा आइ ॥५॥

सुए कहा हमहुँ अस भूले । टूट हिंडोल-गरब जेहि भूले ॥
केरा के बन लीन्ह बसेरा परा साथ तहुँ बैरी केरा ॥
सुख कुरवारि फरहरी खाना । ओहु विष भा जब व्याध तुलाना ॥
काहेक भोग बिरिद्ध अस फरा । आइ लाइ पंखिन्ह कहूँ धरा? ॥
सुखी निचिंत जोरि धन करना । यह न चिंत आगे है मरना ॥
भूले हमहुँ गरब तेहि माहाँ । सो बिसरा पावा जेहि पाहाँ ॥
होइ निचिंत बैठे तेहि आइ । तब जाना खोंचा हिए गाइ ॥

चरत न खुरुक कीन्ह जिउ, तब रे चरा सुख सोइ ।

अब जो पाँद परा गिउ, तब रोए का होइ ॥६॥

सुनि कै उतन आँसु पुनि पोछे । कौन पंखि बाँधा बुधि -ओछे ॥
पंखिन्ह जौ बुधि होइ उजारी । पढा सुआ कित धरै मजारी ॥
कित तीतिर बन जीभ उघेला । सो कित हँकरि फाँद गिउ मेला ॥
तादिन व्याध भए जिउलेवा । उठे पाँख भा नावँ परेवा ॥
भै बियाधि तिसना सँग खाधू । सूझै भुगुति, न सूझ बियाधू ॥
हमहिं लोभवै मेला चारा । हमहिं गर्बवै चाहै मारा ॥
हम निचिंत वह आव छिपाना । कौन बियाधहि दोष अपाना ॥

सो औगुन कित कीजिए जिउ दीजै जेहि काज ।

अब कहना है किछु नहीं, मस्ट भली, पखिराज ॥७॥

६.रतनसेन जन्म खंड

चित्रसेन चितउर गढ राजा । कै गढ कोट चित्र सम साजा ॥
तेहि कुल रतनसेन उजियारा । धनि जननी जनमा अस बारा ॥
पंडित गुनि सामुद्रिक देखा । देखि रूप औ लखन बिसेखा ॥
रतनसेन यह कुल-निरमरा । रतन-जोति मन माथे परा ॥
पदुम पदारथ लिखी सो जोरी । चाँद सुरुज जस होइ अजोरी ॥
जस मालति कहूँ भौर वियोधी । तस ओहि लागि होइ यह जोगी ।
सिंघलदीप जाइ यह पावै । सिद्ध होइ चितउर लेइ आवै ॥

मोग भोज जस माना, विक्रम साका कीन्ह ।
परखि सो रतन पारखी सबै लखन लिखि दीन्ह ॥१॥

७.बनिजारा-खंड

चितउरगढ कर एक बनिजारा । सिंघलदीप चला बैपारा ॥
बाम्हन हुत निपट भिखारी । सो पुनि चलत बैपारी ॥
ऋन काहू सन लीन्हेसि काढी । मकु तहँ गए होइ किछु बाढी ॥
मारग कठिन बहुत दुख भएऊ । नाँघि समुद्र दीप ओहि गएऊ ॥
देखि हाट किछु सूझ न ओरा । सबै बहुत, किछु दीख न थोरा ॥
पै सुठि ऊँच बनिज तहँ केरा । धनी पाव, निधनी मुख हेरा ॥
लाख करोरिन्ह वस्तु बिकाई । सहसन केरि न कोउ ओनाई ॥
सबहीं लीन्ह बेसाहना औ घर कीन्ह बहोर ।

बाम्हन तहवाँ लेइ का गाँठि साँठि सिठि थोर ॥१॥

झुरै ठाढ हौं, काहे क आवा । बनिज न मिला, रहा पछितावा ॥
लाभ जानि आएउँ एहि हाटा । मूर गँवाइ चलेउँ तेहि बाटा ॥
का मैं मरन-सिखावन सिखी । आएउँ मरै, मीचु हति लिखी ॥
अपने चलत सो कीन्ह कुबानी । लाभ न देख, मूर भै हानी ॥
का मैं बोआ जनम ओहि भूँजी । खोइ चलेउँ घरहू कै पूँजी ॥
जेहि व्योहरिया कर व्यौहारू । का लेइ देव जौ छेंकिहि वारू ॥
घर कैसे पैठब मैं छूछे । कौन उततर देवौं तेहि पूछे ॥
साथि चले, सँग बीछुरा, भए बिच समुद्र पहार ।

आस-निरासा हौं फिरौं, तू बिधि देहि अधार ॥२॥

तबहिं व्याध सुआ लेइ आवा । कंचन-बरन अनूप सुहावा ॥
बेंचै लाग हाट लै ओही । मोल रतन मानिक जहँ होहीं ॥
सुअहिं को पूछ ? पतंग मँडारे । चल न, दीख आछै मन मारे ॥
बाम्हन आइ सुआ सौं पूछा । दहँ, गुनवंत, कि निरगुन छूछा ॥
कहु परबत्ते! गुन तोहि पाहाँ । गुन न छपाइय हिरदय माहाँ ॥
हम तुम जाति बराम्हन दोऊ । जातिहि जाति पूछ सब कोऊ ॥
पंडित हौ तौ सुनावहु वेदू । बिनु पूछे पाइय नहिं भेदू ॥
हौं बाम्हन औ पंडित, कहु आपन गुन सोइ ।

पढे के आगे जो पढै दून लाभ तेहि होइ ॥३॥

तब गुन मोहि अहा, हो देवा । जब पिंजर हुत छूट परेवा ॥
अब गुन कौन जो बँद, जजमाना । घालि मँजूसा बेचै आना ॥
पंडित होइ सो हाट न चढा । चहौं बिकाय, भूलि गा पढा ॥
दुइ मारग देखौं यहि हाटा । दई चलावै दहँ केहि बाटा ॥
रोवत रकत भएउ मुख राता । तन भा पियर कहीं का बाता ॥
राते स्याम कंठ दुइ गीवाँ । तेहिं दइ फंद डरौं सुठि जीवा ॥

अब हों कंठ फंद दुइ चीन्हा । दहूँ ए चाह का कीन्हा ॥
पढी गुन देखा बहुत में, है आगे डर सोइ ।

धुंध जगत सब जानि कै भूलि रहा बुधि खोइ ॥४॥

सुनि बाम्हन बिनवा चिरिहारू । करि पंखिन्ह कहँ मया न मारू ॥
निठुर होइ जिउ बधसि परावा । हत्या केर न तोहि डर आवा ॥
कहसि पंखि का दोस जनावा । निठुर तेइ जे परमँस खावा ॥
आवहिं रोइ, जात पुनि रोना । तबहुँ न तजहिं भोग सुख सोना ॥
औ जानहिं तन होइहि नासू । पोखें माँसु पराये माँसू ॥
जौ न होंहिं अस परमँस-खाधू । कित पंखिन्ह कहँ धरै बियाधू ॥
जो व्याधा नित पंखिन्ह धरई । सो बेचत मन लोभ न करई ॥

बाम्हन सुआ वेसाहा सुनि मति बेद गरंथ ।

मिला आइ कै साथिन्ह, भा चितउर के पंथ ॥५॥

तब लागि चित्रसेन सर साजा । रतनसेन चितउर भा राजा ॥
आइ बात तेहि आगे चली । राजा बनिज आए सिंघली ॥
हैं गजमोति भरी सब सीपी । और वस्तु बहु सिंघल दीपी ॥
बाम्हन एक सुआ लेइ आवा । कंचन-बरन अनूप सोहावा ॥
राते स्याम कंठ दुइ काँठा । राते डहन लिखा सब पाठा ॥
औ दुइ नयन सुहावन राता । राते ठोर अमी-रस बाता ॥
मस्तक टीका, काँध जनेऊ । कवि बियास, पंडित सहदेऊ ॥

बोल अरथ सों बोलै, सुनत सीस सब डोल ।

राजमंदिर महुँ चाहिय अस वह सुआ अमोल ॥६॥

भै रजाइ जन दस दौराए । बाम्हन सुआ बेगि लेइ आए ॥
बिप्र असीस बिनति औधारा । सुआ जीउ नहिं करौं निनारा ॥
में यह पेट महा बिसवासी । जेइ सब नाव तपा सन्यासी ॥
डासन सेज जहाँ किछु नाहीं । भुइँ परि रहै लाइ गिउ बाही ॥
आँधर रहे, जो देख न नैना । गूँग रहै, मुख आव न बैना ॥
बहिर रहै, जो स्रवन न सुना । पै यह पेट न रह निरगुना ॥
कै कै फेरा निति यह दोखी । बारहिं बार फिरै, न सँतोखी ॥

सो मोहिं लेइ मँगावै लावै भूख पियास ।

जौ न होत अस बैरी केहु कै आस ॥७॥

सुआ असीस दीन्ह बड़ साजू । बड़ परताप अखंडित राजू ।
भागवंत बिधि बड़ औतारा । जहाँ भाग तहँ रूप जोहारा ॥
कोइ केहु पास आस कै गौना । जो निरास डिढ आसन मौना ॥
कोइ बिनु पूछे बोल जो बोला । होइ बोल माटी के मोला ॥
पढि गुनि जानि वेद-मति भेऊ । पूछे बात कहँ सहदेऊ ॥
गुनी न कोई आपु सराहा । जो बिकाइ, गुन कहा सो चाहा ॥
जौ लागि गुन परगट नहिं होई । तौ लहि मरम न जानै कोई ॥

चतुरवेद हों पंडित, हीरामन मोहिं नावँ ।

पदमावति सों मेरवौं, सेव करौं तेहि ठावँ ॥८॥

रतनसेन हीरामन चीन्हा । एक लाख बाम्हन कहँ दीन्हा ॥
बिप्र असीसि जो कीन्ह पयाना । सुआ सो राजमंदिर महुँ आना ॥

बरनों काह सुआ कै भाखा । धनि सो नावँ हीरामन राखा ॥
 जो बोलै राजा मुख जोवा । जानौ मोतिन हार परोवा ॥
 जौ बोलै तौ मानिक मूँगा । नाहिं त मौन बाँध रह गूँगा ॥
 मनहुँ मारि मुख अमृत मेला । गुरु होइ आप, कीन्ह जग चेला ॥
 सुरुज चअँद कै कथा जो कहेऊ । पेम क कहनि लाइ गहेऊ ॥
 जौ जौ सुनै धुनै सिर, राजहिं प्रीति अगाहु ।
 अस, गुनवंता नाहिं भल, बाउर करिहै काहु ॥१॥

८.नागमती सुआ संवाद खंड

दिन दस पाँच तहाँ जो भए । राजा कतहुँ अहेरै गए ॥
 नागमती रूपवंती रानी । सब रनिवास पाट परधानी ॥
 कै सिंगार कर दरपन लीन्हा । दरसन देखि गरब जिउ कीन्हा ॥
 बोलहु सुआ पियारे-नाहाँ । मोरे रूप कोइ जग माहाँ ॥
 हँसत सुआ पहुँ आइ सो नारी । दीन्ह कसौटी ओपनिवारी ॥
 सुआ बानि कसि कहु कस सोना । सिंघलदीप तोर कस लोना ॥
 कौन रुप तोरी रुपमनी । दहुँ हौं लोनि, कि वै पदमिनी ॥
 जो न कहसि सत सुअटा तेहि राजा कै आन ।
 है कोई एहि जगत महुँ मोरे रूप समान ॥१॥

सुमिरि रूप पदमावति केरा । हँसा सुआ, रानी मुख हेरा ॥
 जेहि सरवर महुँ हंस न आवा । बगुला तेहि सरस हंस कहावा ॥
 दर्ई कीन्ह अस जगत अनूपा । एक एक तें आगरि रूपा ॥
 कै मन गरब न द्वाजा काहू । चाँद घटा औ लागेउ राहू ॥
 लोनि बिलोनि तहाँ को कहै । लोनी सोई कंत जेहि चहै ॥
 का पूछहु सिंघल कै नारी । दिनहिं न पूजै निसि अँधियारी ॥
 पुहुप सुवास सो तिन्ह कै काया । जहाँ माथ का बरनों पाया ॥
 गढी सो सोने सोंधे, भरी सो रूपै भाग ।

सुनत रूखि भइ रानी, हिये लोन अस लाग ॥२॥
 जौ यह सुआ मँदिर महुँ अहई । कबहुँ बात राजा सौं कहई ॥
 सुनि राजा पुनि होइ वियोगी । छाँडे राज, चलै होइ जोगी ॥
 बिख राखिय नहिं, होइ अँकूरू । सबद न देइ भोर तमचूरू ॥
 धाय दामिनी बेगि हँकारी । ओहि सौंपा हिये रिस भारी ॥
 देखु सुआ यह है मँदचाला । भएउ न ताकर जाकर पाला ॥
 मुख कह आन, पेट बस आना । तेहि औगुन दस हाट बिकाना ॥
 पंखि न राखिय होइ कुभाखी । लेइ तहुँ मारू जहाँ नहिं साखी ॥
 जेहि दिन कहँ मैं डरति हौं, रैन छपावौं सूर ।

लै चह-दीन्ह कवँल कहँ, मोकहुँ होइ मयूर ॥३॥
 धाय सुआ लेइ मारै गई । समुझि गियान हिये मति भई ॥
 सुआ सो राजा कर बिसरामी । मारि न जाइ चहै जेहि स्वामी ॥
 यह पंडित खंडित बैरागू । दोष ताहि जेहि सूझ न आगू ॥
 जो तिरिया के काज न जाना । परै धोख, पाछे पछिताना ॥

नागमति नागिनि-बुधि ताऊ । सुआ मयूर होइ नहिं काऊ ॥
जौ न कंत के आयसु माहीं । कौन भरोस नारि कै वाही ॥
मकु यह खोज निसि आए । तुरय-रोग हरि-माथे जाए ॥

दुइ सो छपाए ना छपै एक हत्या एक पाप ।

अंतहिं करहिं बिनास लेइ, सेइ साखी देई आप ॥४॥

राखा सुआ, धाय मति साजा । भएउ कौज निसि आएउ राजा ॥
रानी उतर मान सौं दीन्हा । पंडित सुआ मजारी लीन्हा ॥
मैं पूछा सिंघल पदमिनी । उतर दीन्ह तुम्ह, को नागिनी ॥
वह जस दिन, तुम निसि अंधियारी । कहाँ बसंत; करील क बारी ॥
का तोर पुरुष रैन कर राऊ । उलू न जान दिवस कर भाऊ ॥
का वह पंखि कूट मुँह कूटे । अस बड़ बोल जीभ मुख छोटे ॥
जहर चुवै जो जो कह बाता । अस हतियार लिए मुख राता ॥
माथे नहिं बैसारिय जौ सुठि सुआ सलोन ।

कान टुटैं जेहि पहिरे का लेइ करब सो सोन ॥५॥

राजै सुनि वियोग तस माना । जैसे हिय विक्रम पछिताना ॥
बह हीरामन पंडित सूआ । जो बोलै मुख अमृत चूआ ॥
पंडित तुम्ह खंडित निरदोखा । पंडित हुतें परै नहिं धोखा ॥
पंडित केरि जीभ मुख सूधी । पंडित बात न कहै बिरूधी ॥
पंडित सुमति देइ पथ लावा । जो कुपंथि तेहि पंडित न भावा ॥
पंडित राता बदन सरेखा । जो हत्यार रुहिर सो देखा ॥
की परान घट आनहु मती। की चलि होहु सुआ सँग सती ॥
जिनि जानहु कै औगुन मँदिर सोइ सुखराज ।

आयसु मेंटें कंत कर काकर भा न अकाज ॥६॥

चाँद जैस धनि उजियारि अही । भा पिउ-रोस, गहन अस गही ॥
परम सोहाग निबाहि न पारी । भा दोहाग सेवा जब हारी ॥
एतनिक दोस बिरचि पिउ रूठा । जो पिउ आपन कहै सो झूठा ॥
ऐसे गरब न भूलै कोई । जेहि डर बहुत पियारी सोई ॥
रानी आइ धाय के पासा । सुआ मुआ सेवँर कै आसा ॥
परा प्रीति-कंचन महँ सीसा । बिहरि न मिलै, स्याम पै दीसा ॥
कहाँ सोनार पास जेहि जाऊँ । देइ सोहाग करै एक ठाऊँ ॥

मैं पिउ -प्रीति भरोसे गरब कीन्ह जिउ माँह ।

तेहि रिस हों परहेली, रूसेउ नागर नाहँ ॥७॥

उतर धाय तब दीन्ह रिसाई । रिस आपुहि, बुधि औरहि खाई ॥
मैं जो कहा रिस जिनि करु बाला । को न गयउ एहि रिस कर घाला ॥
तू रिसभरी न देखेसि आगू । रिस महँ काकर भयउ सोहागू ॥
जेहि रिस तेहि रस जोगे न जाई । बिनु रस हरदि होइ पियराई ॥
बिरसि बिरोध रिसहि पै होई । रिस मारै, तेहि मार न कोई ॥
जेहि रिस कै मरिए, रस जीजै । सो रस तजि रिस कबहुँ न कीजै ॥
कंत-सोहाग कि पाइय साधा । पावै सोइ जो ओहि चित बाँधा ॥

रहै जो पिय के आयसु औ बरतै होइ हीन ।
 सोइ चाँद अस निरमल, जनम न होइ मलीन ॥८॥
 जुआ-हारि समुझी मन रानी । सुआ दीन्ह राजा कहँ आनी ॥
 मानु पीय ! हौं गरब न कीन्हा । कंत तुम्हार मरम मैं लीन्हा ॥
 सेवा करै जो बरहौ मासा । एतनिक औगुन करहु बिनासा ॥
 जौं तुम्ह देइ नाइ कै गीवा । छाँडहुँ नहिं बिनु मारे जीवा ॥
 मिलतहु महँ जनु अहौ निनारे । तुम्ह सौं अहै अदेस, पियारे ! ॥
 मैं जानेउँ तुम्ह मोही माहाँ । देखौं ताकि तौ हौ सब पाहाँ ॥
 का रानी, का चेरी कोई । जा कहँ मया करहु भल सोई ॥
 तुम्ह सौं कोइ न जीता, हारे बररुचि भोज ।
 पहिलै आपु जो खोवै करै तुम्हार सो खोज ॥९॥

९. राजा-सुआ संवाद खंड

राजै कहा सत्य कहू सूआ । बिनु सत जन सेंवर कर भूआ ॥
 होइ मुख रात सत्य के बाता । जहाँ सत्य तहँ धरम सँघाता ॥
 बाँधी सिहिटि अहै सत केरी । लछिमी अहै सत्य कै चेरी ॥
 सत्य जहाँ साहस सिधि पावा । औ सतवादी पुरुष कहावा ॥
 सत कहँ सती सँवारे सरा । आगि लाइ चहुँ दिसि सत जरा ॥
 दुइ जग तरा सत्य जेइ राखा । और पियार दइहि सत भाखा ॥
 सो सत छाँड़ि जो धरम बिनासा । भा मतिहीन धरम करि नासा ॥
 तुम्ह सयान औ पंडित, असत न भाखौं काउ ।
 सत्य कहहु तुम मोसौं, दुहुँ काकर अनियाउ ॥१॥
 सत्य कहत राजा जिउ जाऊ । पै मुख असत न भाखौं काऊ ॥
 हौं सत लेइ निसरेउँ एहि बूते । सिंघलदीप राजघर हँते ॥
 पदमावति राजा कै बारी । पदुम-गंध ससि बिधि औतारी ॥
 ससि मुख, अंग मलयगिरि रानी । कनक सुगंध दुआदस बानी ॥
 अहँ जो पदमिनि सिंघल माहाँ । सुगंध रूप सब तिन्हकै छाहाँ ॥
 हीरामन हौं तेहिक परेवा । कंठा फूट करत तेहि सेवा ॥
 औ पाएउँ मानुष कै भाषा । नाहिं त पंखि मूठि भर पाँखा ॥
 जौ लहि जिऔं रात दिन सँवरौं ओहि कर नावँ ।
 मुख राता, तत हरियर दुहुँ जगत लेइ जावँ ॥२॥
 हीरामन जो कवँल बखाना । सुनि राजा होइ भँवर भुलाना ॥
 आगे आव, पंखि उजियारा । कहँ सो दीप पतंग कै मारा ॥
 अहा जो कनक सुवासित ठाऊँ । कस न होइ हीरामन नाऊँ ॥
 को राजा, कस दीप उतंगू । जेहि रे सुनत मन भएउ पतंगू ॥
 सुनि समिद्र भा चख किलकिला । कवँलहि चहाँ भँवर होइ मिला ॥
 कहू सुगंध धनि कस निरमली । भा अलि-संग, कि अबहीं कली ॥
 औ कहू तहँ जहँ पदमिनी लोनी । घर-घर सब के होइ जो होनी ॥
 सबै बखान तहाँ कर कहत सो मोसौं आव ।
 चहाँ दीप वह देखा, सुनत उठा अस चाव ॥३॥

का राजा हौं बरनों तासू । सिंघलदीप आहि कैलासू ॥
 जो गा तहाँ भुलाना सोई । गा जुग बीति न बहुरा कोई ॥
 घर घर पदमिनि छतिसौ जाती । सदा बसंत दिवस औ राती ॥
 जेहि जेहि बरन फूल फुलवारी । तेहि तेहि बरन सुगंध सो नारी ॥
 गंधबसेन तहाँ बड़ राजा । अछरिन्ह महुँ इंद्रासन साजा ॥
 सो पदमावति तेहि कर बारी । जो सब दीप माँह उजियारी ॥
 चहुँ खंड के बर जो ओनाही । गरबहि राजा बोलै नाहीं ॥
 उअत खंड के बर जो ओनाही । गरबहि राजा बोलै नाहीं ॥

उअत सूर जस देखिय चाँद छपै तेहि धूप ।

ऐसे सबे जाहिं छपि पदमावति के रूप ॥४॥

सुनि रवि-नावँ रतन भा राता । पंडित फेरि उहै कहु बाता ॥
 तें सुरंग मूरत वह कही । चित महुँ लागि चित्र होइ रही ॥
 जनु होइ सुरुज आइ मन बसी । सब घट पूरि हिये परगसी ॥
 अब हौं सुरुज, चाँद वह छाया । जल बिनुमीन, रकत बिनु काया ॥
 किरिन-करा भा प्रेम -अँकूरु । जौ ससि सरग, मिलौं होइ सूरु ॥
 सहसौ करा रूप मन भूला । जहुँ जहुँ दीठ कवँल जनु फूला ॥
 तहाँ भवँर जिउ कँवला गंधी । भइ ससि राहु केरि रिनि बंधी ॥

तीनि लोक चौदह खंड सबै परे मोहिं सूझि ।

पेम छँडि नहिं लोन किछु, जो देखा मन बूझि ॥५॥

पेम सुनत मन भूल न राजा । कठिन पेम, सिर देइ तौ छाजा ॥
 पेम-फाँद जो परा न छूटा । जीउ दीन्ह पै फाँद न टूटा ॥
 गिरगिट छंद धरै दुख तेता । खन खन पीत, रात खन सेता ॥
 जान पुछार जो भा बनबासी । रोंव रोंव परे फँद नगवासी ॥
 पाँखन्ह फिरि फिरि परा सो फाँदू । उडि न सकै, अरुझा भा बाँदू ॥
 'मुयों मुयों' अहनिसि चिल्लाई । ओही रोस नागन्ह धै खाई ॥
 पंडुक, सुआ, कंक वह चीन्हा । जेहिं गिउ परा चाहि जिउ दीन्हा ॥
 तितिर-गिउ जो फाँद है, नित्ति पुकारै दोख ।

सो कित हँकारि फाँद गिउ मेलै कित मारे होइ मोख ॥६॥

राजै लीन्ह ऊबि कै साँसा । ऐस बोल जिनि बोलु निरासा ॥
 भलेहि पेम है कठिन दुहेला । दुइ जग तरा पेम जेइ खेला ॥
 दुख भीतर जो पेम-मधु राखा । जग नहिं मरन सहै जो चाखा ॥
 जो नहिं सीस पेम-पथ लावा । सो प्रियिमी महुँ काहे क आवा ॥
 अब मैं पंथ पेम सिर मेला । पाँव न ठेलु, राखु कै चेला ॥
 पेम बार सो कहै जो देखा । जो न देख का जान विसेखा ॥
 तौ लागि दुख पीतम नहिं भेंटा । मिलै, तौ जाइ जनम-दुख मेटा ॥

जस अनूप, तू बरनेसि, नखसिख बरनु सिंगार ।

है मोहिं आस मिलै कै, जौ मेरवै करतार ॥७॥

१०.नखशिख खंड

का सिंगार ओहि बरनौं, राजा । ओहिक सिंगार ओहि पै छाजा ॥
 प्रथम सीस कस्तूरी केसा । बलि बासुकि, का और नरेसा ॥
 भौर केस, वह मालति रानी । बिसहर लुरे लेहिं अरघानी ॥
 बेनी छोरि झार जौं बारा । सरग पतार होइ अंधियारा ॥
 कोंपर कुटिल केस नग कारे । लहरन्हि भरे भुअंग बैसारे ॥
 बेधे जनों मलयगिरि बासा । सीस चढे लोटहिं चहँ पासा ॥
 घुँघरवार अलकै विषभरी । सँकरैं पेम चहँ गिउ परी ॥

अस फदवार केस वै परा सीस गिउ फाँद ।

अस्टौ कुरी नाग सब अरुझ केस के बाँद ॥१॥

बरनौं माँग सीस उपराहीं । सेंदुर अबहिं चढा जेहि नाहीं ॥
 बिनु सेंदुर अस जानहु दीआ । उजियर पंथ रैनि महँ कीआ ॥
 कंचन रेख कसौटी कसी । जनु घन महँ दामिनि परगसी ॥
 सरु-किरिन जनु गगन बिसेखी । जमुना माँह सुरसती देखी ॥
 खाँडै धार रुहिर नु भरा । करवत लेइ बेनी पर धरा ॥
 तेहि पर पूरि धरे जो मोती । जमुना माँझ गंग कै सोती ॥
 करवत तपा लेहिं होइ चूरू । मकु सो रुहिर लेइ देइ सेंदूरू ॥

कनक दुवासन बानि होइ चह सोहाग वह माँग ।

सेवा करहिं नखत सब उवै गगन जस गाँग ॥२॥

कहाँ लिलार दुइज कै जोती । दुइजन जोति कहाँ जग ओती ॥
 सहस किरिन जो सुरुज दिपाई । देखि लिलार सोउ छपि जाई ॥
 का सरवर तेहि देउं मयंकू । चाँद कलंकी, वह निकलंकू ॥
 औ चाँदहि पुनि राहु गरासा । वह बिनु राहु सदा परगासा ॥
 तेहि लिलार पर तलक बईठा । दुइज-पाट जानहु ध्रुव दीठा ॥
 कनक-पाट जनु बैठा राजा । सबै सिंगार अत्र लेइ साजा ॥
 ओहि आगे थिर रहा न कोऊ । दहँ का कहँ अस जुरै सँजोगू ॥

खरग, धनुक, चक बान दुइ, जग-मारन तिन्ह नावँ ।

सुनि कै परा मुरुछि कै (राजा) मोकहँ हए कुठावँ ॥३॥

भौहँ स्याम धनुक जनु ताना । जा सहँ हेर मार विष-बाना ॥
 हनै धुनै उन्ह भौहनि चढे । केइ हतियार काल अस गढे ॥
 उहै धनुक किरसुन पर अहा । उहै धनुक राघौ कर गहा ॥
 ओहि धनुक रावन संघारा । ओहि धनुक कंसासुर मारा ॥
 ओहि धनुक बैधा हुत राहू । मारा ओहि सहस्राबाहू ॥
 उहै धनुक में थापहँ चीन्हा । धानुक आप बेझ जग कीन्हा ॥
 उन्ह भौहनि सरि केउ न जीता । अछरी छपीं, छपीं गोपीता ॥

भौह धनुक, धनि धानुक, दूसर सरि न कराइ ।

गगन धनुक जो ऊनै लाजहि सो छपि जाइ ॥४॥

नैन बाँक,सरि पूज न कोऊ । मानसरोदक उथलहिं दोऊ ॥
 राते कँवल करहिं अलि भवाँ । घूमहिं माति चहहिं अपसवाँ ॥
 उठहि तुरंग लेहिं नहिं बागा । चहहिं उलथि गगन कइँ लागा ॥
 पवन झकोरहिं देइ हिलोरा । सरग लाइ भुइँ लाइ बहोरा ॥

जग डोलै डोलत नैनाहाँ । उलटि अडार जाहिं पल माहाँ ॥
जबहिं फिराहिं गगन गहि बोरा । अस वै भौर चक्र के जोरा ॥
समुद-हिलोर फिरहिं जनु झूले । खंजन लरहिं, मिरिग जनु भूले ॥
सुभर सरोवर नयन वै, मानिक भरे तरंग ।

आवत तीर फिरावहीं काल भौर तेहिं संग ॥५॥

बरुनी का बरनौ इमि बनी । साधे बान जानु दुइ अनी ॥
जुरी राम रावन कै सेना । बीच समुद्र भए दुइ नैना ॥
बारहिं पार बनावरि साधा । जा सहुँ हेर लाग विष-बाधा ॥
उन्ह बानन्ह अस को जो न मारा । बेधि रहा सगरौ संसारा ॥
गगन नखत जो जाहिं न गने । वै सब बान ओही के हने ॥
धरती बान बेधि सब राखी । साखी ठाढ देहिं सब साखी ॥
रोवँ रोवँ मानुष तन ठाढे । सूतहि सूत बेध अस गाढे ॥
बरुनि-बान अस ओपहुँ, बेधे रन बन ढाँख ।

सौजहिं तन सब रोवाँ, पंखहि तन सब पाँख ॥६॥

नासिक खरग देउँ कह जोगू । खरग खीन, वह बदन-सँजोगू ॥
नासिक देखि लजानेउ सूआ । सूक अइ बेसरि होइ ऊआ ॥
सुआ जो पिअर हिरामन लाजा । और भाव का बरनौँ राजा ॥
सुआ, सो नाक कठोर पँवारी । वह कोंवर तिल-पुहुप सँवारी ॥
पुहुप सुगंध करहिं एहि आसा । मकु हिरकाइ लेइ हम्ह पासा ॥
अधर दसन पर नासिक सोभा । दारिउँ बिंब देखि सुक लोभा ॥
खंजन दुहुँ दिसि केलि कराही । दहुँ वह रस कोउ पाव कि नाहीं ॥
देखि अमिय-रस अधरन्ह भएउ नासिका कीर ।

पौन बास पहुँचावै, अस रम छाँड न तीर ॥७॥

अधर सुरंग अमी-रस-भरे । बिंब सुरंग लाजि बन फरे ॥
फूल दुपहरी जानौँ राता । फूल झरहिं ज्यों-ज्यों कह बाता ॥
हीरा लेइ सो विद्रुम-धारा । बिहँसत जगत होइ उजियारा ॥
भए मँझीठ पानन्ह रँग लागे । कुसुम रंग थिर रहै न आगे ॥
अस कै अधर अमी भरि राखे । अबहिं अद्भूत, न काहू चाखे ॥
मुख तँबोल-रँग-धारहि रसा । केहि मुख जोग जो अमृत बसा ॥
राता जगत देखि रँगराती । रुहिर भरे आछहि बिहँसाती ॥
अमी अधर अस राजा सब जग आस करेइ ।

केहि कहँ कवँल बिगासा, को मधुकर रस लेइ ? ॥८॥

दसन चौक बैठे जनु हीरा । औ बिच बिच रंग स्याम गँभीरा ॥
जस भादौँ-निसि दामिनि दीसी । चमकि उठै तस बनी बतीसी ॥
वह सुजोति हीरा उपराहीं । हीरा-जाति सो तेहि परछाहीं ॥
जेहि दिन दसनजोति निरमई । बहुतै जोति जोति ओहि भई ॥
रवि ससि नखत दिपहिं ओहि जोती । रतन पदारथ मानिक मोती ॥
जहँ जहँ बिहँसि सुभावहि हँसी । तहँ तहँ छिटकि जोति परगसी ॥
दामिनि दमकि न सरवरि पूजी । पुनि ओहि जोति और को दूजी ? ॥

हँसत दसन अस चमके पाहन उठे झरक्कि ।

दारिउँ सरि जो न कै सका, फाटेउ हिया दरक्कि ॥९॥

रसना कहों जो कह रस बाता । अमृत-बैन सुनत मन राता ॥
 हरै सो सुर चातक कोकिला । विनुबसंत यह बैन न मिला ॥
 चातक कोकिल रहहिं जो नाहीं । सुहि वह बैन लाज छपि जाहीं ॥
 भरे प्रेम-रस बोलै बोला । सुनै सो माति घूमि कै डोला ॥
 चतुरवेद-मत सब ओहि पाहाँ । रिग,जजु, सअम अथरवन माहाँ ॥
 एक एक बोल अरथ चौगुना । इंद्र मोह, बरम्हा सिर धुना ॥
 अमर, भागवत, पिंगल गीता । अरथ बूझि पंडित नही जीता ॥
 भासवती औ ब्याकरन, पिंगल पढै पुरान ।

वेद-भेद सौं बात कह, सुजनन्ह लागै बान ॥१०॥

पुनि बरनों का सुरंग कपोला । एक नारंग दुइ किए अमोला ॥
 पुहुप-पंक रस अमृत साँधे । केइ यह सुरंग खरौरा बाँधे ॥
 तेहि कपोल बाएँ तिल परा । जेइ तिल देखि सो तिल तिल जरा ॥
 जनु घुँघची ओहि तिल करमुहीं । बिरह-बान साधे सामुहीं ॥
 अग्नि-बान जानौ तिल सूझा । एक कटाछ लाख दस झूझा ॥
 सो तिल गाल नहिं गएऊ । अब वह गाल काल जग भएऊ ॥
 देखत नैन परी परिछाहीं । तेहि तें रात साम उपराहीं ॥
 सो तिल देखि कपोल पर गगन रहा ध्रुव गाडि ।

खिनहिं उठै खिन बूडै, डोलै नहिं तिल छाँडि ॥११॥

स्रवन सीप दुइ दीप सँवारे । कुँडल कनक रचे उजियारे ॥
 मनि-मंडल झलकैं अति लोने । जनु कौंधा लौकहि दुइ कोने ॥
 दुहुँ दिसि चाँद सुरुज चमकाहीं । नखतन्ह भरे निरखि नहिं जाहीं ॥
 तेहि पर खूँट दीप दुइ बारे । दुइ ध्रुव दुऔ खूँट बैसारे ॥
 पहिरे खुंभी सिंगलदीपी । जनों भरी कचपचिआ सीपी ॥
 खिन खिन जबहि चीर सिर गहै । काँपति बीजु दुऔ दिसि रहै ॥
 डरपहिं देवलोक सिंघला । परै न बीजु टूटि एक कला ॥
 करहिं नखत सब सेवा स्रवन दीन्ह अस दोउ ।

चाँद सुरुज अस गोहने और जगत का कोउ ? ॥१२॥

बरनों गीउ कंबु कै रीसी । कंचन-तार-लागि जनु सीसी ॥
 कुँदै फेरि जानु गिउ काढी । हरी पुछार ठगी जनु ठाढी ॥
 जनु हिय काढि परवा ठाढा । तेहि तै अधिक भाव गिउ बाढा ॥
 चाक चढाइ साँच जनु कीन्हा । बाग तुरंग जानु गहि लीन्हा ॥
 गए मयूर तमचूर जो हारे । उहै पुकारहिं साँझ सकारे ॥
 पुनि तेहि ठाँव परी तिनि रेखा । घूँट जो पीक लीक सब देखा ॥
 धनि ओहि गीउ दीन्ह बिधि भाऊ । दहुँ कासौं लेइ करै मेराऊ ॥
 कंटसिरी मुकुतावली सोहै अभरन गीउ ।

लागै कंठहार होइ को तप साधा जीउ ॥१३॥

कनक दंड दुइ भुजा कलाई । जानौं फेरि कुँदैरै भाई ॥
 कदलि-गाभ कै जानौ जोरी । औ राती ओहि कँवल हथोरी ॥
 जानो रकत हथोरी बूडी । रवि परभात तात, वै जूडी ॥
 हिया काढि जनु लीन्हेसि हाथा । रुहिर भरी अँगुरी तेहि साथ ॥
 औ पहिरे नग जरी अँगूठी । जग विनु जीउ,जीउ ओहि मूठी ॥

बाहूँ कंगन, टाड सलोनी । डोलत बाँह भाव गति लोनी ॥
जानौ गति बेडिन देखराई । बाँह डोलाइ जीउ लेइ जाई ॥
भुज-उपमा पौनार नहिं, खीन भयउ तेहि चिंत ।

ठाँवहि ठाँव बेध भा, ऊबि साँस लेइ नित ॥१४॥

हिया थार, कुच कंचन लारू । कनक कचौर उठे जनु चारू ॥
कुंदन बेल साजि जनु कूंदे । अमृत रतन मोन दुइ मूंदे ॥
बेधे भौर कंट केतकी । चाहहिं बेध कीण्ह कंचुकी ॥
जोबन बान लेहिं नहिं बागा । चाहहिं हुलसि हिये हठ लागा ॥
अग्नि-बान दुइ जानौं साधे । जग बेधहिं जौं होहिं न बाँधे ॥
उतंग जँभीर होइ रखवारी । छुइ को सकै राजा कै बारी ॥
दारउँ दाख फरे अनचाखे । अस नारंग दहूँ का कहूँ राखे ॥

राजा बहुत मुए तपि लाइ लाइ भुइँ माथ ।

काहूँ छुवै न पाए, गए मरोरत हाथ ॥१५॥

पेट परत जनु चंदन लावा । कुहँकुहँ-केसर-बरन सुहावा ॥
खीर अहार न कर सुकुवौरा । पान फूल के रहै अधारा ॥
साम भुअंगिनि रोमावली । नाभी निकसि कवल कहूँ चली ॥
आइ दुऔ नारंग बिच भई । देखि मयूर ठमकि रहि गई ॥
मनहूँ चढी भौरन्ह पाँती । चंदन खाँभ बास कै माती ॥
की कालिंदी बिरह-सताई । चलि पयाग अरइल बिच आई ॥
नाभि कुंड बिच बारानसी । सौंह को होइ, मीचु तहँ बसी ॥

सिर करवत, तन करसी बहुत सीझ तन आस ।

बहुत धूम घुटि घुटि मिए, उतर न देइ निरास ॥१६॥

बैरिनि पीठि लीन्ह वह पाछे । जनु फिरि चली अपछरा काछे ॥
मलयागिरि कै पीठि सँवारी । बेनी नागिनि चढी जो कारी ॥
लहरैँ देति पीठि जनु चढी । चीर ओहार कंचुली मढी ॥
दहूँ का कहूँ अस बेनी कीन्हीं । चंदन बास भुअंगै लीन्हीं ॥
किरसुन करा चढा ओहि माथे । तब तौ छूट,अब छुटै न नाथे ॥
कारे कवल गहे मुक देखा । ससि पाछे जनु राहु बिसेखा ॥
को देखै पावै वह नागू । सो देखै जेहि के सिर भागू ॥

पन्नग पंकज मुख गहे खंजन तहाँ बईठ ।

छत्र, सिंघासन, राज, धन ताकहूँ होइ जो डीठ ॥१७॥

लंक पुहुमि अस आहि न काहू । केहरि कहीं न ओहि सरि ताहू ॥
बसा लंक बरनै जग झीनो । तेहि तें अधिक लंक वह खीनी ॥
परिहँस पियर भए तेहिं बसा । लिए डंक लोगन्ह कह डसा ॥
मानहूँ नाल खंड दुइ भए । दुहूँ बिच लंक-तार रहि गए ॥
हिय के मुरे चलै वह तागा । पैग देत कित सहि सक लागा ॥
छुद्रघटिका मोहहिं राजा । इंद्र अखाड आइ जनु बाजा ॥
मानहूँ बीन गहे कामिनी । गावहि सबै राग रागिनी ॥

सिंघ न जीता लंक सरि, हारि लीन्ह बनबासु ।

तेहि रिस मानुस रकत पिय, खाइ मारि कै माँसु ॥१८॥

नाभिकुंड सो मयल समीरू । समुद भँवर जस भँवै गँभीरू ॥
बहुतै भँवर बवंडर भए । पहुँचि न सके सरग कहूँ गए ॥

चंदन माँझ कुरंगिनी खोजू । दहूँ को पाउ , को राजा भोजू ॥
 को ओहि लागि हिचंचल सीझा । का कहूँ लिखी, ऐस को रीझा ॥
 तीवइ कवँल सुगंध सरीरू । समुद लहरि सोहै तन चीरू ॥
 भूलहिं रतन पाट के झोपा । साजि मैन अस का पर कोपा ॥
 अबहिं सो अहैं कवँल कै करी । न जनौ कौन भौर कहूँ धरी ॥
 बेधि रहा जग बासना परिमल मेद सुगंध ।

तेहि अरघानि भौर सब लुबुधे तजहिं न बंध ॥१९॥

बरनौं नितंब लंक कै सोभा । औ गज-गवन देखि मन लोभा ॥
 जुरे जंघ सोभा अति पाए । केरा-खंभ फेरि जनु लाए ॥
 कवल-चरन अति रात बिसेखी । रहैं पाट पर, पुहुमि न देखी ॥
 देवता हाथ हाथ पगु लेहिं । जहूँ पगु धरै सीस तहूँ देहीं ॥
 माथे भाग कोउ अस पावा । चरन-कँवल लेइ सीस चढावा ॥
 चूरा चाँद सुरुज उजियारा । पायल बीच करहिं झनकारा ॥
 अनवट विछिया नखत तराई । पहुँचि सकै को पायँन ताई ॥

बरनि सिंगार न जानेउँ नखसिख जैस अभोग ।

तस जग किछुइ न पाएउँ उपमा देउँ ओहि जोग ॥२०॥

११.प्रेम खंड

सुनतहि राजा गा मुरझाई । जानौं लहरि सुरुज कै आई ॥
 प्रेम-घाव-दुख जान न कोई । जेहि लागै जानै पै सोई ॥
 परा सो पेम-समुद्र अपारा । लहरहिं लहर होइ बिसँभारा ॥
 बिरह भौर होइ भाँवरि देई । खिनखिन जीउ हिलोरा लेई ॥
 खिनहिं उसास बूडि जिउ जाई । खिनहिं उठे निसरै बोराई ॥
 खिनहिं पीत, खिनहोइ मुख सेता । खिनहिं चेत, खिन होइ अचेता ॥
 कठिन मरन तें प्रेम-बेवस्था । ना जिउ जियै, न दसवँ अवस्था ॥
 जनु लेनिहार न लेहिं जिउ, हरहिं तरासहिं ताहिं ।

एतनै बोल आव मुख, करैं तराहि तराहि ॥१॥

जहूँ लागि कुटुंब लोग औ नेगी । राजा राय आए सब बेगी ॥
 जावत गुनी गारुडी आए । ओझा, बैद, सयान बोलाए ॥
 चरचहिं चेर्टा परिखहिं नारी । नियर नाहिं ओषद तहूँ बारी ॥
 राजहिं आहि लखन कै करा । सकति-कान मोहा है परा ॥
 नहिं सो राम, हनिवँत बडि दूरी । को लेइ आव सजीवन -मूरी ॥
 बिनय करहिं जे गढ़ पती । का जिउ कीन्ह, कौन मति मती ॥
 कहहु सो पीर, काह पुनि खाँगा । समुद सुमेरु आव तुम्ह माँगा ॥

धावन तहाँ पठावहु, देहिं लाख दस रोक ।

होइ सो बेलि जेहि बारी, आनहिं सबै बरोक ॥२॥

जब भा चेत उठा बैरागा । बाउर जनों सोइ उठि जागा ॥
 आवत जग बालक जस रोआ । उठा रोइ 'हा ज्ञान सो खौआ ' ॥
 हौं तो अहा अमरपुर जहाँ । इहाँ मरनपुर आएउँ कहाँ ॥

केइ उपकार मरन कर कीन्हा । सकति हँकारि जीउ हरि लीन्हा ॥
 सोवत रहा जहाँ सुख-साखा । कस न तहाँ सोवत बिधि राखा ॥
 अब जिउ उहाँ, इहाँ तन सूना । कब लागि रहै परान-बिहूना ॥
 जौ जिउ घटहि काल के हाथा । घट न नीक पै जीउ -निसाथा ॥

अहुठ हाथ तन सरवर, हिया कवँल तेहि माँह ।

नैनहिं जानहु नीयरे , कर पहुँचत औगाह ॥३॥

सबन्ह कहामन समुझहु राजा । काल सेंति कै जूझ न छाजा ॥
 तासौं जूझ जात जो जीता । जानत कृष्ण तजा गोपीता ॥
 औ न नेह काहू सौं कीजै । नाँव मिटै, काहे जिउ दीजै ॥
 पहिले सुख नेहहिं जब जोरा । पुनि होइ कठिन निबाहत ओरा ॥
 अहुठ हाथ तन जैस सुमेरू । पहुँचि न जाइ परा तस फेरू ॥
 ज्ञान-दिस्टि सौं जाइ पहुँचा । पेम अदिस्ट गगन तें ऊँचा ॥
 धुव तें ऊँच पेम धुव ऊआ । सिर देइ पाँव देइ सो छूआ ॥

तुम राजा औ सुखिया, करहु राज-सुख भोग ।

एहि रे पंथ सो पहुँचै ,सहै जो दुःख बियोग ॥४॥

सुऐ कहा मन बूझहु राजा । करब पिरीत कठिन है काजा ॥
 तुम रजा जेई घर पोई । कवँल न भेंटेउ भेंटेउ कोई ॥
 जानहिं भौर जौ तेहि पथ लूटे । जीउ दीन्ह औ दिएहु न छूटे ॥
 कठिन आहिं सिंघल कर राजू । पाइय नाहिं झूझ कर साजू ॥
 ओहि पथ जाइ जो होइ उदासी । जोगी, जती, तपा, सन्यासी ॥
 भोग किए जौं पावत भोगू । तजि सो भो कोइ करत न जोगू ॥
 तुम राजा चाहहु सुख पावा । भोगहि जोग करत नहिं भावा ॥

साधन्ह सिद्धि न पाइय, जौ लागि सधै न तप्प ।

सो पै जानै बापुरा, करै जो सीस कलप्प ॥५॥

का भा जोग कथनि के कथे । निकसै घिउ न बिना दधि मथे ॥
 जौ लहि आप हेराइ न कोई । तौ लहि हेरत पाव न सोई ॥
 पेम -पहार कठिन बिधि गढा । सो पै चढै जो सिर सौं चढा ॥
 पंथ सूरि कै उठा अँकूरू । चोर चढै, की चढ मंसूरू ॥
 तू राजा का पहिरसि कंथा । तोरे घरहहि माँझ दस पंथा ॥
 काम, क्रोध, तिस्ना, मद, माया । पाँचौ चोर न छाँडहिं काया ॥
 नवौ सेंध तिन्ह कै दिठियारा । घर मूसहिं निसि, की उजियारा ॥

अबहू जागु अजाना, होत आव निसि भोर ।

तब किछु हाथ न लागहिं, मूसि जाहिं जब चोर ॥६॥

सुनि सो बात राजा मन जागा । पलक न मार, पेम चित लागा ॥
 नैनन्ह ढरहिं मोति औ मूँगा । जस गुर खाइ रहा होइ गूँगा ॥
 हिय कै जोति दीप वह सूझा । यह जो दीप अँधियारा बुझा ॥
 उलटि दीठी माया सौं रूठो । पटि न फिरी जानि कै झूठी ॥
 झझौ पै नाहीं अहथिर दसा । जग उजार का कीजिय बसा ॥
 गुरु बिरह चिनगी जो मेला । जो सुलगाइ लेइ सो चेला ॥
 अब करि फनिग भुंग कै करा । भौर होहुँ जेहि कारन जरा ॥

फूल फूल फिरि पूछौं, जौ पहुँचौं ओहि केत ।
 तन नेवछावरि कै मिलौं, ज्यों मधुकर जिउ देत ॥७॥
 बंधु मीत बहुतै समुझावा । मान न राजा कोउ भुलावा ॥
 उपजि पेम पीर जेहि आई । परबोधत होइ अधिक सो आई ॥
 अमृत बात कहत बिष जाना । पेम क बचन मीठ कै माना ॥
 जो ओहि विषै मारिकै खाई । पूँछहु तेहि सन पेम-मिठाई ॥
 पूँछहु बात भरथरिहि जाई । अमृत राज तजा विष खाई ॥
 औ महेस बड़ सिद्ध कहावा । उनहूँ विषै कंठ पै लावा ॥
 होत आव रवि-किरिन विकासा । हनुवँत होइ को देइ सुआसा ॥
 तुम सब सिद्धि मनावहु, हिइ गनेस सिद्धि लेव ।
 चेला को न चलावै, तुलै गुरु जेहि भेव ॥८॥

१२.जोगी खंड

तजा राज, राजा भा जोगी । औ किंगरी कर गहेउ बियोगी ॥
 तन बिसँभर मन बाउर लटा । अरुझा पेम, परी सिर जटा ॥
 चंद्र बदन औ चंदन देहा । भसम चढाइ कीन्ह तन खेहा ॥
 मेखल, सिंघी, चक्र धँधारी । जोगवाट रुदराछ, अधारी ॥
 कथा पहिरि दंड कर गहा । सिद्ध होइ कहँ गोरख कहा ॥
 मुद्रा स्रवन, कंठ जपमाला । कर उदपान, काँध बघछाला ॥
 पाँवरि पाँव, दीन्ह सिर छाता । खप्पर लीन्ह भेस करि राता ॥
 चला भुगुति माँगै कहँ, साधि कया तप जोग ।
 सिद्ध होइ पदमावति, जेहि कर हिये बियोग ॥१॥
 गनक कहहिं गनि गौन न आजू । दिन लेइ चलहु, होइ सिध काजू ॥
 पेम-पंथ दिन घरी न देखा । तब देखै जब होइ सरेखा ॥
 जेहि तन पेम कहाँ तेहि माँसू । कया न रकत, नैन नहिं आँसू ॥
 पंडित भूल, न जानै चालू । जिउ लेत दिन पूछ न कालू ॥
 सती कि बौरी पूछिहि पाँडे । औ घर पैठि कि सैंतै भाँडे ॥
 मरै जो चलै गंग गति लेई । तेहि दिन कहाँ घरी को देई ॥
 मैं घर बार कहाँ कर पावा । घरी के आपन, अंत परावा ॥
 हौं रे पथिक पखेरू, जेहि बन मोर निबाहु ।
 खेलि चला तेहि बन कहँ, तुम अपने घर जाहु ॥२॥
 चहुँ दिसि आन साँटया फेरी । भै कटकाई राजा केरी ॥
 जावत अहहिं सकल अरकाना । साँभर लेहु, दूरि है जाना ॥
 सिंघलदीप जाइ अब चाहा । मोल न पाउब जहाँ बेसाहा ॥
 सब निबहै तहँ आपनि साँठी । साँठि बिना सो रह मुख माटी ॥
 राजा चला साजि कै जोगू । साजहु बेगि चलहु सब लोगू ॥
 गरब जो चडे तुरब कै पीठी । अब भुइँ चलहु सरग कै डीठी ॥
 मंतर लेहु होहु सँग-लागू । गुदर जाइ ब होइहि आगू ॥
 का निचिंत रे मानुस, आपन चीते आछु ।
 लेहि सजग होइ अगमन, मन पछिताव न पाछु ॥३॥

बिनवै रतनसेन कै माया । माथै छात, पाट निति पाया ॥
 बिलसहु नौ लख लच्छि पियारी । राज छाँडि जिनि होहु भिखारी ॥
 निति चंदन लागै जेहि देहा । सो तन देख भरत अब खेहा ॥
 सब दिन रहेहु करत तुम भोगू । सो कैसे साधव तप जोगू ॥
 कैसे धूप सहब विनु छाहाँ । कैसे नींद परिहि भुइ माहाँ ॥
 कैसे ओढव काथरि कंथा । कैसे पाँव चलव तुम पंथा ॥
 कैसे सहब खीनहि खिन भूखा । कैसे खाव कुरकुटा रूखा ॥

राजपाट , दर परिगह , तुम्ह ही सौं उजियार ।

बैठि भोग रस मानहु , खै न चलहु अँधियार ॥४॥

मोहि यह लोभ सुनाव न माया । काकर सुख काकर यह काया ॥
 जो निआन तन होइहि छारा । माटहि पोखि मरै को भारा ॥
 का भूलौं एहि चंदन चोवा । बैरी जहाँ अंग कर रोवाँ ॥
 हाथ, पाँव, सरन औं आँखी । ए सब उहाँ भरहि मिलि साखी ॥
 सूत सूत तन बोलहिं दोखू । कहू कैसे होइहि गति मोखू ॥
 जौं भल होत राज औ भोगू । गोपिचंद नहिं साधत जोगू ॥
 उन्ह हिय-दीठि जो देख परेबा । तजा राज कजरी-बन सेवा ॥
 देखि अंत अस होइहि , गुरू दीन्ह उपदेस ।

सिंघल दीप जाव इम, माता ! देहु अदेस ॥५॥

रोवहिं नागमती रनिवासू । केइ तुम्ह कंत दीन्ह बनवासू ॥
 अब को हमहिं करिहि भोगिनी । हमहुँ साथ होव जोगिनी ॥
 की हम्ह लावहु अपने साथी । की अब मारि चलहु एहि हाथा ॥
 तुम्ह अस बिछुरै पीउ पिरिता । जहँवाँ राम तहाँ सँग सीता ॥
 जौ लहि जिउ सँग छाँड न काया । करिहौं सेव, पखरिहौं पाया ॥
 भलेहि पदमिनी रूप अनूपा । हमतें कोइ न आगरि रूपा ॥
 भवै भलेहि पुरुखन कै डीठी । जिनहिं जान तिन्ह दीन्ही पीठी ॥
 देहिं असीस सबै मिलि, तुम्ह माथे नित छात ।

राज करहु चितउरगढ, राखउ पिय अहिबात ॥६॥

तुम्ह तिरिया मति हीन तुम्हारी । मूरुख सो जो मतै घर नारी ॥
 राघव जो सीता सँग लाई । रावन हरी, कवन सिधि पाई ॥
 यह संसार सपन कर लेखा । बिछुरि गए जानौं नहिं देखा ॥
 राजा भरथरि सुना जो ज्ञानी । जेहि के घर सोरह सै रानी ॥
 कुच लीन्हे तरवा सहराई । भा जोगी, कोउ संग न लाई ॥
 जोगहि काह भौग सौं काजू । चहै न धन धरनी औ राजू ॥
 जूड कुरकुटा भीखहि चाहा । जोगी तात भात कर काहा ॥

कहा न मानै राजा, तजी सबाई भीर ।

चला छाँडि कै रोवत, फिरि कै देइ न धीर ॥७॥

रोवत माय, न बहुरत बारा । रतन चला, घर भा अँधियारा ॥
 बार मोर जौ राजहि रता । सो लै चला, सुआ परबता ॥
 रोवहिं रानी, तजहिं पराना । नोचहिं बार, करहिं खरिहाना ॥

चूरहिं गिउ अभरन, उर हारा । अब कापर हम करब सिंगारा ॥
जा कहँ कहहिं रहसि कै पीऊ । सोइ चला, काकर यह जीऊ ॥
मरै चहहिं, पै मरै न पावहिं । उठे आगि, सब लोग बुझावहिं ॥
घरी एक सुठि भएउ अँदोरा । पुनि पाछे बीता होइ रोरा ॥
टूटे मन नौ मोती, फूटे मन दस काँच ।

लान्ह समेटि सब अभरन, होइगा दुख के नाच ॥८॥

निकसा राजा सिंगी पूरी । छाँडा नगर मैलि कै धूरी ॥
राय रान सब भए बियोगी । सोरह सहस कुँवर भए जोगी ॥
माया मोह हरा सेइ हाथा । देखेन्हि बूझि निआन न साथी ॥
छाँडेन्हि लोग कुटुंब सब कोऊ । भए निनान सुख दुख तजि दोऊ ॥
सँवरै राजा सोइ अकेला । जेहि के पंथ चले होइ चेला ॥
नगर नगर औ गाँवहिं गाँवाँ । छाँडि चले सब ठाँवहि ठावाँ ॥
काकर मढ, काकर घर माया । ताकर सब जाकर जिउ काया ॥

चला कटक जोगिन्ह कर कै गेरुआ सब भेसु ।

कोस बीस चारिहु दिसि जानों फुला टेसु ॥९॥

आगे सगुन सगुनिये ताका । दहिने माछ रूप के टाँका ॥
भरे कलस तरुनी जल आई । 'दहिउ लेहु' ग्वालनि गोहराई ॥
मालिनि आव मौर लिए गाँथे । खंजन बैठ नाग के माथे ॥
दहिने मिरिग आइ बन धाएँ । प्रतीहार बोला खर बाएँ ॥
विरिख सँवरिया दहिने बोला । बाएँ दिसा चापु चरि डोला ॥
बाएँ अकासी धौरी आई । लोवा दरस आई दिखराई ॥
बाएँ कुररी, दहिने कूचा । पहुँचै भुगुति जैस मन रूचा ॥

जा कहँ सगुन होहिं असु, औ गवनै जेहि आस ।

अस्ट महासिधि तेहि कहँ, जस कवि कहा बियास ॥१०॥

भयउ पयान चला पुनि राजा । सिंगि-नाद जोगिन कर बाजा ॥
कहेन्हि आजु किछु थोर पयाना । काल्हि पयान दूरि है जाना ॥
ओहि मिलान जौ पहुँचै कोई । तब हम कहब पुरुष भल सोई ॥
है आगे परबत कै बाटा । विषम पहार अगम सुठि घाटा ॥
बिच बिच नदी खोह औ नारा । ठावहिं ठाँव बैठ बटपारा ॥
हनुवँत केर सुनब पुनि हाँका । दहुँ को पार होइ, को थाका ॥
अस मन जानि सँभारहु आगू । अगुआ केर होहु पछलागू ॥

करहिं पयान भोर उठि, पंथ कोस दस जाहिं ।

पंथी पंथा जे चलहिं, ते का रहहिं ओठाहिं ॥११॥

करहु दीठी थिर होइ बटाऊ । आगे देखि धरहु भुइँ पाऊ ॥
जो रे उबट होइ परे बुलाने । गए मारि, पथ चलै न जाने ॥
पाँयन पहिरि लेहु सब पौरी काँट धसैं, न गडै अँकरौरी ॥
परे आइ बन परबत माहाँ । दंडाकरन बीझ-बन जाहाँ ॥
सघन ढाँख-बन चहुँदिसि फूला । बहु दुख पाव उहाँ कर भूला ॥
झाखर जहाँ सो छाँडहु पंथा । हिलगि मकोइ न फारहु कंथा ॥
दहिने बिदर, चँदेरी बाएँ । दहुँ कहँ होइ बाट दुइ ठाएँ ॥

एक बाट गइ सिंघल, दूसरि लंक समीप ।

हैं आगे पथ दूऔ, दहु गौनब केहि दीप ॥१२॥

ततखन बोला सुआ सरेखा । अगुआ सोइ पंथ जेइ देखा ॥
सो का उडै न जेहि तन पाँखू । लेइ सो परासहि बूडत साखू ॥
जस अंधा अंधै कर संगी । पंथ न पाव होइ सहलंगी ॥
सुनु मत , काज चहसि जौं साजा । बीजानगर विजयगिरि राजा ॥
पहुचौ जहागोंड औ कोला । तजि बाएँ अँधियार, खटोला ॥
दक्खिन दहिने रहहि तिलंगा । उत्तर बाएँ गढ -काटंगा ॥
माँझ रतनपुर सिंघदुवारा । झारखंड देइ बाँव पहारा ॥
आगे पाव उडैसा, बाएँ दिए सो बाट ।

दहिनावरत देइ कै, उतरु समुद के घाट ॥१३॥

होत पयान जाइ दिन केरा । मिरिगारन महुँ भएउ बसेरा ॥
कुस-साँथरि भइ सौर सुपेती । करवट आइ बनी भुईं सेंती ॥
चलि दस कोस ओस तन भीजा । काया मिलि तेहिं भसम मलीजा ॥
ठाँव ठाँव सब सोअहिं चेला । राजा जागै आपु अकेला ॥
जेहि के हिये पेम-रंग जामा । का तेहि भूख नीद बिसरामा ॥
बन अँधियार, रैन अँधियारी । भादों बिरह भएउ अति भारी ॥
किंगरी हाथ गहे बैरागी । पाँच तंतु धुन ओही लागी ॥
नैन लाग तेहि मारग, पदमावति जेहि दीप ।

जैस सेवातिहि सेवै, बन चातक, जल सीप ॥१४॥

१३.राजा-गजपति-संवाद खंड

मासेक लाग चलत तेहि बाटा । उतरे जाइ समुद के घाटा ॥
रतनसेन भा जोगी-जती । सुनि भेंटै आवा गजपती ॥
जोगी आपु ,कटक सब चेला । कौन दीप कहँ चाहहिं खेला ॥
“आए भलेहि, मया अब कीजै । पहनाई कहँ आयसु दीजै ” ॥
“सुनहु गजपती उतर हमारा । हम्ह तुम्ह एकै, भाव निरारा ” ॥
नेवतहु तेहि जेहि नहिं यह भाऊ । जो निहचै तेहि लाउ नसाऊ ॥
इहै बहुत जौ बोहित पावों । तुम्ह तैं सिंघलदीप सिधावों ॥
“जहाँ मोहिं निजु जाना कटक होउँ लेइ पार ।

जों रे जिओं तौ बहुरों, मरों ओहि के बार ” ॥१॥

गजपती कहा “सीस पर माँगा । बोहित नाव न होइहि खाँगा ” ॥
ए सब देउँ आनि नव-गढे । फूल सोइ जो महेसुर चढे ॥
पै गोसाईं सन एक बिनाती । मारग कठिन, जाव केहि भाँती ॥
सात समुद्र असूझ अपारा । मारग मगर मच्छ घरियारा ॥
उठै लहरि नहिं जाइ सँभारी । भागहि कोइ निबहै वैपारी ॥
तुम सुखिया अपने घर राजा । जोखउँ एत सहहु केहि काजा ॥
सिंघलदीप जाइ सो कोई । हाथ लिए आपन जिउ होई ॥
खार, खीर, दधि, जल उदधि, सुर, किलकिला अकूत ।

को चढि नाँचै समुद ए , है काकर अस बूत ? ॥२॥

“गजपती यह मन सकती सीऊ । पै जेहि पेम कहाँ तेहि जीऊ ”॥
 जो पहिले सिर दै पगु धरई । मूए केर मीचु का करई? ॥
 सुख त्यागा, दुख साँभर लीन्हा । तब पयान सिंघल मुँह कीन्हा ॥
 भौरा जान कवँल कै प्रीती । जेहि पहुँ बिथा पेम कै बीती ॥
 औ जेइ समुद पेम कर देखा । तेइ एहि समुद बूँद करि लेखा ॥
 सात समुद सत कीन्ह सँभारू । जौँ धरती, का गरुअ पहारू ॥
 जौ पै जीउ बाँध सत बेरा । बरु जिउ जाइ फिरै नहिँ फेरा ॥
 रंगनाथ हीँ जा कर, हाथ ओहि के नाथ ।

गहे नाथ सो खँचै, फेरे फिरै न माथ ॥३॥

पेम समुद्र जो अति अवगाहा । जहाँ न वार न पार न थाहा ॥
 जो एहि खीर समुद महुँ परे । जीउ गँवाइ हंस होइ तरे ॥
 हीँ पदमावति कर भिखमंगा । दीठि न आव समुद औ गंगा ॥
 जेहि कारन गिउ काथरि कथा । जहाँ सो मिलै जावँ तेहि पंथा ॥
 अब एहि समुद परेउँ होइ मरा । मुए केर पानी का करा? ॥
 मर होइ बहा कतहुँ लेइ जाऊ । ओहि के पंथ कोउ धरि खाऊ ॥
 अस में जानि समुद महुँ परऊँ । जौ कोइ खाइ बेगि निसतरऊँ ॥
 सरग सीस, धर धती, हिया सो पेम समुंद ।

नैन कौडिया होइ रहे, लेइ लेइ उठहिँ सो बुँद ॥४॥

कठिन वियोग जाग दुख-दाहू । जरतहि मरतहि ओर निबाहू ॥
 डर लज्जा तहुँ दुवौ गवाँनी । देखे किछु न आगि नहिँ पानी ॥
 आगि देखि वह आगे धावा । पानि देखि तेहि सौँह धँसावा ॥
 अस बाउर न बुझाए बूझा । जेहि पथ जाइ नीक सो सुझा ॥
 मगर-मच्छ-डर हिये न लेखा । आपुहि चहै पार भा देखा ॥
 औ न खाहि ओहि सिंघ सदूरा । काठहु चाहि अधिक सो झूरा ॥
 काया माया संग न आथी । जेहिह जिउ सौँपा सोई साथी ॥
 जो किछु दरब अहा सँग, दान दीन्ह संसार ।

ना जानी केहि सत सेंती, दैव उतारै पार ॥५॥

धनि जीवन औ ताकर हीया । ऊँच जगत महुँ जाकर दीया ॥
 दिया सो जप तप सब उपराहीं । दिया बराबर जग किछु नाहीं ॥
 एक दिया ते दशगुन लहा । दिया देखि सब जग मुख चहा ॥
 दिया करै आगे उजियारा । जहाँ न दिया तहाँ अँधियारा ॥
 दिया मँदिर निसि करै अँजोरा । दिया नाहिँ घर मूसहिँ चोरा ॥
 हातिम करन दिया जो सिखा । दिया रहा धर्मन्ह महुँ लिखा ॥
 दिया सो काज दुवौ जग आवा । इहाँ जो दिया उहाँ सब पावा ॥

“निरमल पंथ कीन्ह तेइ जेइ रे दिया किछु हाथ ।

किछु न कोइ लेइ जाइहि दिया जाइ पै साथ ” ॥६॥

१४. बोहित खंड

सो न डोल देखा गजपती । राजा सत्त दत्त दुहुँ सती ॥
 अपनेहि काया, आपनेहि कथा । जीउ दीन्ह अगुमन तेहि पंथा ॥

निहचै चला भरम जिउ खोई । साहस जहाँ सिद्धि तहँ होई ॥
 निहचै चला छाँड़ि कै राजू । बोहित दीन्ह, दीन्ह सब साजू ॥
 चढा बेगि, तब बोहित पेले । धनि सो पुरुष पेम जेइ खेले ॥
 पेम-पंथ जौ पहुँचै पारा । बहुरि न मिलै आइ एहि छारा ॥
 तेहि पावा उत्तिम कैलासू । जहाँ न मीचु, सदा सुख-बासू ॥

एहि जीवन कै आस का, जस सपना पल आधु ।

मुहमद जियतहि जे मुए, तिन्ह पुरुषन्ह कह साधु ॥१॥

जस बन रेंगि चलै गज-ठाटी । बोहित चले, समुद गा पाटी ॥
 धावहि बोहित मन उपराहीं । सहस कोस एक पल महँ जाहीं ॥
 समुद अपार सरग जनु लागा । सरग न घाल गनै बैरागा ॥
 ततखन चाल्हा एक देखावा । जनु धौलागिरि परबत आवा ॥
 उठी हिलोर जो चाल्ह नराजी । लहरि अकास लागि भुइँ बाजी ॥
 राजा सेंती किँवर सब कहहीं । अस अस मच्छ समुद महँ अहहीं ॥
 तेहि रे पंथ हम चाहहिं गवना । होहु सँजत बहुरि नहिं अवना ॥

गुरु हमार तुम राजा, हम चेला तुम नाथ ।

जहाँ पाँव गुरु राखै, चेला राखै माथ ॥२॥

केवट हँसे सो सुनत गवेजा । समुद न जानु कुवाँ कर मेजा ॥
 यह तौ चाल्ह न लागै कोहू । का कहिहौ जब देखिहौ रोहू ॥
 सो अबहीं तुम्ह देखा नाहीं । जेहि मुख ऐसे सहस समाहीं ॥
 राजपंखि तेहि पर मेड़ राहीं । सहस कोस तिन्ह कै परछाहीं ॥
 तेइ ओहि मच्छ ठोर भरि लेहीं । सावक-मुख चारा लेइ देहीं ॥
 गरजै गगन पंखि जब बोला । डोल समुद्र डैन जब डोला ॥
 तहाँ चाँद औ सूर असूझा । चढै सोइ जो अगुमन बूझा ॥

दस महँ एक जाइ कोइ करम, धरम, तप, नेम ।

बोहित पार होइ जब तबहि कुसल औ खेम ॥३॥

राजे कहा कीन्ह मैं पेमा । जहाँ पेम कहँ कूसल खेमा ॥
 तुम्ह खेवहु जौ खैवै पारहु । जैसे आपु तरहु मोहिं तारहु ॥
 मोहिं कुसल कर सोच न ओता । कुसल होत जौ जनम न होता ॥
 धरती सरग जाँत-पट दोऊ । जो तेहि बिच जिउ राख न कोऊ ।
 हौं अब कुसल एक पै माँगौं । पेम-पंथ त बाँधि न खाँगौं ॥
 जौ सत हिय तौ नयनहिं दीया । समुद न डरै पैठि मरजीया ॥
 तहँ लागि हेरौं समुद ढँढोरी । जहँ लागि रतन पदार्थ जोरी ॥

सप्त पतार खोजि कै, काढौं वेद गरंथ ।

सात सरग चढि धावौं, पदमावति जेहि पंथ ॥४॥

१५. सात समुद्र खंड

सायर तरे हिये सत पूरा । जौ जिउ सत, कायर पुनि सूरा ॥
 तेइ सत बिहित कुरी चलाए । तेइ सत पवन पंख जनु लाए ॥
 सत साथी, सत कर संसारू । सत्त खेइ लेइ लावै पारू ॥
 सत्त ताक सब आगू पाछू । जहँ तहँ मगर मच्छ औ काछू ॥

उठै लहरि जनु ठाढ पहारा । चढै सरग औ परै पतारा ॥
 डोलहिं बोहित लहरैं खाही । खिन तर होहिं, खिनहिं उपराहीं ॥
 राजै सो सत हिरदै बाँधा । जेहि सत टेकि करै गिरि काँधा ॥
 खार समुद सो नाँघा, आए समुद जहँ खीर ।

मिले समुद वै सातौ, बेहर बेहर नीर ॥१॥

खीर-समुद का बरनाँ नीरू । सेत सरूप, पियत जस खीरू ॥
 उलथहिं मानिक, मोती, हीरा । दरब देखि मन होइ न थीरा ॥
 मनुआ चाह दरब औ भोगू । पंथ भुलाइ बिनासै जोगू ॥
 जोगी होइ सो मनहिं सँभारै । दरब हाथ कर समुद पवारै ॥
 दरब लेइ सोई जो राजा । जो जोगी तेहिके केहि काजा ॥
 पंथहि पंथ दरब रिपु होई । ठग, बटमार, चोर सँग सोई ॥
 पंथी सो जो दरब सौं रूसे । दरब समेटि बहुत अस मूसे ॥
 खीर समुद सो नाँघा, आए समुद-दधि माँह ।

जो है नेह क बाउर, तिन्ह कहँ धूप न छाँह ॥२॥

दधि समुद्र देखत तस दाधा । पेम क लुबुध दगध पै साधा ॥
 पेम जो दाधा धनि वह जीऊ । दधि जमाइ मथि काढे घीऊ ॥
 दधि एक वूँद जाम सब खीरू । काँजी-वूँद विनसि होइ नीरू ॥
 साँस डाँडि, मन मथनी गाढी । हिये चोट बिनु फूट न साढी ॥
 जेहि जिउ पेम चदन तेहि आगी । पेम बिहून फिरै डर भागी ॥
 पेम कै आगि जरै जाँ कोई । दुख तेहि कर न अँबिरथा होई ॥
 जो जानै सत आपुहि जाँरै । निसत हिये सत करै न पारै ॥

दधि-समुद्र पुनि पार भे, पेमहि कहा सँभार ।

भावै पानी सिर परै, भावै परै अँगार ॥३॥

आए उदधि समुद्र अपारा । धरती सरग जरै तेहि झारा ॥
 आगि जो उपनी ओहि समुंदा । लंका जरी ओहि एक बुंदा ॥
 बिरह जो उपना ओहि तें गाढा । खिन न बुझाइ जगत महँ बाढा ॥
 जहाँ सो बिरह आगि कहँ डीठी । सौँह जरै, फिरि देइ न पीठी ॥
 जग महँ कठिन खडग कै धारा । तेहि तें अधिक बिरह कै झारा ॥
 अगम पंथ जो ऐस न होई । साथ किए पावै सब कोई ॥
 तेहि समुद्र महँ राजा परा । जरा चहै पै रोवँ न जरा ॥
 तलफै तेल कराह जिमि, इमि तलफै सब नीर ।

यह जो मलयगिरि प्रेम कर, बेधा समुद समीर ॥४॥

सुरा समुद पुनि राजा आवा । महुआ मद छाता दिखरावा ॥
 जो तेहि पियै सो भाँवरि लेई । सीस फिरै, पथ पैगु न देई ॥
 पेम सुरा जेहि के हिय माहाँ । कित बैठे महुआ कै छाहाँ ॥
 गुरू के पास दाख-रस रसा । बैरी बबुर मारि मन कसा ॥
 बिरह के दगध कीन्ह तन भाठी । हाड जराइ दीन्ह सब काठी ॥
 नैन नीर सौं पोता किया । तस मद चुवा बरा जस दिया ॥
 बिरह सरागन्धि भूँजै माँसू । गिरि परै रक्त कै आँसू ॥

मुहमद मद जो पेम कर, गए दीप तेहि साथ ।

सीस न देइ पतंग होइ, तौ लगि लहै न खाध ॥५॥

पुनि किलकिला समुद महुँ आए । गा धीरज, देखत डर खाए ॥
 भा किलकिल अस उठै हिलोरा । जनु अकास टूटै चहुँ ओरा ॥
 उठै लहरि परबत कै नाई । फिरि आवै जोजन सौ ताई ॥
 धरती लेइ सरग लहि बाढा । सकल समुद जानहुँ भा ठाढा ॥
 नीर होइ तर ऊपर सोई । माथे रंभ समुद जस होइ ॥
 फिरत समुद जोजन सौ ताका । जैसे भँवै केहाँर क चाका ॥
 भै परलै नियराना जबहीं । मरै जो जब परलै तेहि तबहीं ॥
 गै औसान सबन्ह कर, देखि समुद कै बाढ़ि ।

नियर होत जनु लीलै, रहा नैन अस काढ़ि ॥६॥

हीरामन राजा सौं बोला । एही समुद आए सत डोला ॥
 सिंहलदीप जो नाहिं निबाहू । एही ठाँव साँकर सब काहू ॥
 एहि किलकिला समुद्र गँभीरू । जेहि गुन होइ सो पावै तीरू ॥
 इहै समुद्र-पंथ मझधारा । खाँडे कै असि धार निनारा ॥
 तीस सहस्र कोस कै पाटा । अस साँकर चलि सकै न चाँटा ॥
 खाँडे चाहि पैनि बहुताई । बार चाहि ताकर पतराई ॥
 एही ठाँव कहँ गुरु सँग लीजिय । गुरु सँग होइ पार तौ कीजिय ॥
 मरन जियन एहि पंथहि, एही आस निरास ।

परा सो गएअउ पतारहि, तरा सो गा कबिलास ॥७॥

राजै दीन्ह कटक कहँ बीरा । सुपुरुष होहु, करहु मन धीरा ॥
 ठाकुर जेहिक सूर भा कोई । कटक सूर पुनि आपुहि होई ॥
 जौ लहि सती न जिउ सत बाँधा । तौ लहि देइ केहाँर न काँधा ॥
 पेम-समुद महुँ बाँधा बेरा । यह सब समुद बूँद जेहि केरा ॥
 ना हौं सरग क चाहौं राजू । ना मोहिं नरक सेंति किछु काजू ॥
 चाहौं ओहि कर दरसन पावा । जेइ मोहिं आनि पेम-पथ लावा ॥
 काठहि काह गाढ का ढीला । बूड न समुद, मगर नहिं लीला ॥
 कान समुद धँसि लीन्हेसि, भा पाछे सब कोइ ।

कोइ काहू न सँभारे, आपनि आपनि होइ ॥८॥

कोइ बोहित जस पौन उडाहीं । कोई चमकि बीजु अस जाहीं ॥
 कोई जस भल धाव तुखारू । कोई जैस बैल गरियारू ॥
 कोई जानहुँ हरुआ रथ हाँका । कोई गरुअ भार बहु थाका ॥
 कोई रेंगहिं जानहुँ चाँटी । कोई टूटि होहिं तर माटी ॥
 कोई खाहिं पौन कर झोला । कोइ करहिं पात अस डोला ॥
 कोई परहिं भौर जल माहाँ । फिरत रहहिं, कोइ देइ न बाहाँ ॥
 राजा कर भा अगमन खेवा । खेवक आगे सुआ परेवा ॥

कोइ दिन मिला सबेरे, कोइ आवा पछ-राति ।

साकर जस जस साजु हुत, सो उतरा तेहि भाँति ॥९॥

सतएँ समुद मानसर आए । मन जो कीण्ह साहस, सिधि पाए ॥
 देखि मानसर रूप सोहावा । हिय हिलास पुरइनि होइ छावा ॥
 गा अँधियार, रैन-मसि छूटी । भा भिनसार किरिन-रवि फूटी ॥
 'अस्ति अस्ति' सब साथी बोले । अंध जो अहे नैन बिधि खोले ॥
 कवँल बिगस तस बिहँसी देहीं । भौर दसन होइ कै रस लेहीं ॥
 हँसहिं हंस औ करहिं किरिरा । चुनहिं रतन मुकुताहल हीरा ॥

जो अस आव साधि तप जोगू । पूजै आस, मान रस भोगू ॥
 भौर जो मनसा मानसर, लीन्ह कँवलरस आइ ।
 धुन जो हियाव न कै सका , झर काठ तस खाइ ॥१०॥

१६.सिंहलद्वीप खंड

पूछा राजै कहु गुरु सूआ । न जनों आजु कहाँ दहुँ ऊआ ॥
 पौन बास सीतल लेइ आवा । कया दहत चंदनु जनु लावा ॥
 कबहुँ न एस जुडान सरीरू । परा अगिनि महुँ मलय-समीरू ॥
 निकसत आव किरिन-रविरेखा । तिमिर गए निरमल जग देखा ॥
 उठै मेघ अस जानहुँ आगे । चमकै बीजु गगन पर लागै ॥
 तेहि ऊपर जनु ससि परगासा । औ सो चंद कचपची गरासा ॥
 और नखत चहुँ दिसि उजियारे । ठावहिं ठाँव दीप अस बारे ॥

और दखिन दिसि नीयरे, कंचन-मेरु देखाव ।

जनु बसंत ऋतु आवै, तैसि तैसि बास जग आव ॥१॥

तूँ राजा जस बिकरम आदी । तू हरिचंद बैन सतवादी ॥
 गोपिचंद तुइँ जीता जोगू । औ भरथरी न पूज बियोगू ॥
 गोरख सिद्धि दीन्ह तोहि हाथू । तारी गुरु मछंदरनाथू ॥
 जीत पेम तुइँ भूमि अकासू । दीठि परा सिंघल-कबिलासू ॥
 वह जो मेघ गढ़ लाग अकासा । बिजुरी कनय-कोट चहु पास ॥
 तेहि पर ससि जो कचपचि भरा । राजमंदिर सोने नग जरा ॥
 और जो नखत देख चहुँ पास ॥ सब रानिन्ह कै आहिं अवासा ॥
 गगन सरोवर, ससि कँवल, कुमुद तराइन्ह पास ।

तू रवि उआ, भौर होइ, पौन मिला लेइ बास ॥२॥

सो गढ़ देखु गगन तें ऊँचा । नैनन्ह देखा, कर न पहुँचा ॥
 बिजुरी चक्र फिरै चहुँ फेरी । औ जमकात फिरै जम केरी ॥
 धाइ जो बाजा कै मन साधा । मारा चक्र भएउ दुइ आधा ॥
 चाँद सुरुज औ नखत तराई । तेहि डर अंतरिख फिरहिं सबाई ॥
 पौन जाइ तहुँ पहुँचै चहा । मारा तैस लोटि भुइँ रहा ॥
 अगिनि उठी, जरि बुझी निआना । धुआँ उठा, उठि बीच बिलाना ॥
 पानि उठा उठि जाइ न छूआ । बहुरा रोइ, आइ भुइँ चूआ ॥
 रावन चहा सौंह होइ , उतरि गए दस माथ ।

संकर धरा लिलाट भुइँ , और को जोगीनाथ ॥३॥

तहाँ देखु पदमावति रामा । भौर न जाइ, न पंखी नामा ॥
 अब तोहि देउँ सिद्धि एक जोगू । पहिले दरस होइ, तब भोगू ॥
 कंचन मेरु देखाव सो जहाँ । महादेव कर मंडप तहाँ ॥
 ओहि-क खंड जस परबत मेरू । मेरुहि लागि होइ अति फेरू ॥
 माघ मास, पाछिल पछ लागे । सिरी पंचिमी होइहि आगे ॥
 उघरहि महादेव कर बारू । पूजिहि जाइ सकल संसारू ॥
 पदमावति पुनि पूजै आवा । होइहि एहि मिस दीठि मेरावा ॥

तुम्ह गौनहु ओहि मंडप, हौं पदमावति पास ।

पूजै आइ बसंत जब , तब पूजै मन-आस ॥४॥

राजै कहा दरस जौं पावौं । परबत काह, गगन कहँ धावौं ॥
 जेहि परबत पर दरसन लहना । सिर सौं चढौं, पाँव का कहना ॥
 मोहूँ भावै ऊँचै ठाऊँ । ऊँचै लेउँ पिरीतम नाऊँ ॥
 पुरुषहि चाहिय ऊँच हियाऊ । दिन दिन ऊँचे राखै पाऊ ॥
 सदा ऊँच पै सेइय बारा । ऊँचै सौ कीजिय बेवहारा ॥
 ऊँचै चढै, ऊँच खंड सूझा । ऊँचे पास ऊँच मति बूझा ॥
 ऊँचे सँग संगति निति कीजै । ऊँचे काज जीउ पुनि दीजै ॥
 दिन दिन ऊँच होइ सो, जेहि ऊँचे पर चाउ ।

ऊँचे चढत जो खसि परै ,ऊँच न छाँडिय काउ ॥५॥

हीरामन देइ बचा कहानी । चला जहाँ पदमावति रानी ॥
 राजा चला सँवरि सो लता । परबत कहँ जो चला परबता ॥
 का परबत चढि देखै राजा । ऊँच मँडप सोने सब साजा ॥
 अमृत सदाफर फरे अपूरी । औ तहँ लागि सजीवन-मूरी ॥
 चौमुख मंडप चहूँ केवारा । बैठे देवता चहूँ दुवारा ॥
 भीतर मँडप चारि खँभ लागे । जिन्ह वै छुए पाप तिन्ह भागे ॥
 संख घंट घन बाजहिं सोई । औ बहु होम जाप तहँ होई ॥
 महादेव कर मंडप, जग मानुस तहँ आव ।
 जस हींछा मन जेहि के ,सो तैसे फल पाव ॥६॥

१७.मंडपगमन खंड

राजा बाउर बिरह-बियोगी । चेला सहस तीस सँग जोगी ॥
 पदमावति के दरसन-आसा । दंडवत कीन्ह मँडप चहुँ पासा ॥
 पुरुब बार कै सिर नावा । नावत सीस देव पहुँ आवा ॥
 नमो नमो नारायन देवा । का मैं जोग, करौं तोरि सेवा ॥
 तूँ दयाल सब के उपराहीं । सेवा केरि आस तोहि नाहीं ॥
 ना मोहि गुन, न जीभ-बाता । तूँ दयाल, गुन निरगुन दाता ॥
 पुरवहु मोरि दरस कै आसा । हौं मारग जोवौं धरि साँसा ॥
 तेहि बिधि बिनै न जानौं, जेहि बिधि अस्तुति तोरि ।

करहु सुदिस्टि मोहिं पर , हींछा पूजै मोहि ॥१॥

कै अस्तुति जब बहुत मनावा । सबद अकूत मँडप महुँ आवा ॥
 मानुष पेम भएउ बैकुंठी । नाहिं त काह, छार भरि मूठी ॥
 पेमहि माँह बिरह रस रसा । मैन के घर मधु अमृत बसा ॥
 निसत धाइ जौं मरै त काहा । सत जौं करै बैठि तेहि लाहा ॥
 एक बार जौं मन देइ सेवा । सेवहि फल प्रसन्न होइ देवा ॥
 सुनि कै सबद मँडप झनकारा । बैठा आइ पुरुब के बारा ॥
 पिंड चड़ाइ छार जेति आँटी । माटी भएउ अंत जो माटी ॥

माटी मोल न किछु लहै , औ माटी सब मोल ।

दिस्टि जौं माटी सौं करै, माटी होइ अमोल ॥२॥

बैठ सिंघछाला होइ तपा । 'पदमावति पदमावति' जपा ॥
 दीठि समाधि ओही सौं लागी । जेहि दरसन कारन बैरागी ॥
 किंगरी गहे बजावै झुरै । भोर साँझ सिंगी निति पूरै ॥
 कंथा जरै, आगि जनु लाई । विरह-धँधार जरत न बुझाई ॥
 नैन रात निसि मारग जागे । चढै चकोर जानि ससि लागे ॥
 कुंडल गहे सीस भुँइ लावा । पाँवरि होउं जहाँ ओहि पावा ॥
 जटा छोरि कै बार बहारौं । जेहि पथ आव सीस तहँ वारौं ॥
 चारिहु चक्र फिरौ मै, डँड न रहौं थिर मार ।
 होइ कै भसम पौन सँग (धावौ) जहाँ परान-अधार ॥३॥

१८.पदमावती-वियोग-खंड

पदमावति तेहि जोग सँजोगा । परी पेम-बसे बियोगा ॥
 नींद न परै रैनि जौं आवा । सेज केंवाच जानु कोइ लावा ॥
 दहै चंद औ चंदन चीरू दगध करै तन बिरह गँभीरू ॥
 कलप समान रेनि तेहि बाढी । तिलतिल भर जुग जुग जिमि गाढी ॥
 गहै बीन मकु रैनि बिहाई । ससि-बाहन तहँ रहै ओनाई ॥
 पुनि धनि सिंघ उरेहै लागै । ऐसहि बिथा रैनि सब जागै ॥
 कहँ वह भौर कवँल रस-लेवा । आइ परै होइ घिरिन परेवा ॥
 से धनि बिरह-पतंग भइ, जरा चहै तेहि दीप ।

कंत न आव भिरिंग होइ, का चंदन तन लीप? ॥१॥

परी बिरह बन जानहुँ घेरी । अगम असूझ जहाँ लगी हेरी ॥
 चतुर दिसा चितवै जनु भूली । सो बन कहँ जहँ मालति फूली ॥
 कवँल भौर ओही बन पावै । को मिलाइ तन-तपनि बुझावै ॥
 अंग अंग अस कँवल सरीरा । हिय भा पियर कहै पर पीरा ॥
 चहै दरस रवि कीन्ह विगासू । भौर-दीठि मनो लागि अकासू ॥
 पूँछै धाय, बारि! कहु वाता । तुई जस कँवल फूल रँग राता ॥
 केसर बरन हिया भा तोरा । मानहुँ मनहिं भएउ किछु भोरा ॥
 पौन न पावै संचरै, भौर न तहाँ बईठ ।

भूलि कुरंगिनि कस भई, जानु सिंघ तुई डीठ ॥२॥

धाय! सिंघ बरू खातेउ मारी । की तसि रहति अही जसि बारी ॥
 जोबन सुनेउं की नवल बसंतू । तेहि बन परेउ हस्ति मैमंतू ॥
 अब जोबन बारी को राखा । कुंजर बिरह बिधंसै साखा ॥
 मैं जानेउं जोबन रस भोगू । जोबन कठिन सँताप बियोगू ॥
 जोबन गरुअ अपेल पहारू । सहि न जाइ जोबन कर भारू ॥
 जोबन अस मैमंत न कोई । नवें हस्ति जौं आँकुस होई ॥
 जोबन भर भादौं जस गंगा । लहरें देइ, समाइ न अंगा ॥

परिउं अथाह, धाय हौं जोबन-उदधि गँभीर ।

तेहि चितवौ चारिहु दिसि जो गहि लावै तीर ॥३॥

पदमावति! तुइ समुद सयानी । तोहि सर समुद न पूजै, रानी ॥
 नदी समाहिं समुद महुँ आई । समुद डोलि कहु कहाँ समाई ॥

अबहिं कवँल-करी हित तोरा । आइहि भौर जो तो कहँ जोरा ॥
 जोबन-तुरी हाथ गहि लीजिय । जहाँ जाइ तहँ जाइ न दीजिय ॥
 जोबन जोर मात गज अहै । गहहँ ज्ञान-आँकुस जिमि रहै ॥
 अबहिं बारि पेम न खेला । का जानसि कस होइ दुहेला ॥
 गगन दीठि करु नाइ तराहीं । सुरुज देखु कर आवै नाहीं ॥
 जब लागि पीउ मिलै नहिं, साधु पेम कै पीर ।

जैसे सीप सेवाति कहँ तपै समुद मँझ नीर ॥४॥

दहै, धाय! जोबन एहि जीऊ । जानहुँ परा अगिनि महँ घीऊ ॥
 करबत सहौं होत दुइ आधा । सहि न जाइ जोबन कै दाधा ॥
 बिरह समुद्र भरा असँभारा । भौर मेलि जिउ लहरिन्ह मारा ॥
 बिहग नाग होइ सिर चढि डसा । होइ अगिनि चंदन महँ बसा ॥
 जोबन पंखी, बिरह बियाधू । केहरि भयउ कुरंगिनि-खाधू ॥
 कनक पानि कित जोबन कीन्हा । औटन कठिन बिरह ओहि दीन्हा ॥
 जोबन जलहि बिरह मसि छूआ । फूलहिं भौर, फरहिं भा सूआ ॥
 जोबन चाँद उआ जस, बिरह भएउ सँग राहु ।

घटतहि घटत छीन भइ, कहै न पारौं काहु ॥५॥

नैन ज्यों चक्र फिरै चहुँ ओरा । बरजै धाय, समाहिं न कोरा ॥
 कहेसि पेम जौं उपना, बारी । बाँधु सत्त, मन डोल न भारी ॥
 जेहि जिउ महँ होइ सत्त पहारू । परै पहार न बाँकै बारू ॥
 सती जो जरे पेम सत लागी । जौं सत हिये तौ सीतल आगी ॥
 जोबन चाँद जो चौदस करा । बिरह के चिनगी सो पुनि जरा ॥
 पौन बाँध सो जोगी जती । काम बाँध सो कामिनि सती ॥
 आव बसंत फूल फुलवारी । देव बार सब जैहँ बारी ॥
 तुम्ह पुनि जाहु बसंत लेइ, पूजि मनावहु देव ।

जीउ पाइ जग जनम है, पीउ पाइ के सैव ॥६॥

जब लागि अवधि आइ नियराई । दिन जुग-जुग बिरहनि कहँ जाई ॥
 भूख नींद निसि दिन गै दौऊ । हियै मारि जस कलपै कोऊ ॥
 रोवँ रोवँ जनु लागहि चाँटे । सूत सूत बेधहिं जनु काँटे ॥
 दगधि कराह जरै जस घीऊ । बेगि न आव मलयगिरि पीऊ ॥
 कौन देव कहँ जाइ के परसौं । जेहि सुमेरु हिय लाइय कर सौं ॥
 गुपुति जो फूलि साँस परगटै । अब होइ सुभर दहहि हम्ह घटै ॥
 भा सँजोग जो रे भा जरना । भोगहि भए भोगि का करना ॥
 जोबन चंचल ढीठ है, करै निकाजै काज ।

धनि कुलवंति जो कुल धरै, कै जोबन मन लाज ॥७॥

१९.पदमावती-सुआ-भेंट-खंड

तेहि बियोग हीरामन आवा । पदमावति जानहुँ जिउ पावा ॥
 कंठ लाइ सूआ सौं रोई । अधिक मोह जौं मिलै बिछोई ॥
 आगि उठे दुख हिये गँभीरू । नैनहिं आइ चुवा होइ नीरू ॥
 रही रोइ जब पदमिनि रानी । हँसि पूछहिं सब सखी सयानी ॥

मिले रहस भा चाहिय दूना । कित रोइय जौं मिलै बिछूना
 तेहि क उतर पदमावति कहा । बिछुरन-दुख जो हिये भरि रहा ॥
 मिलत हिये आएउ सुख भरा । वह दुख नैन नीर होइ ढरा ॥
 बिछुरंता जब भेंटै, सो जानै जेहि नेह ।

सुख-सुहेला उगवै, दुःख झरै जिमि मेह ॥१॥

पुनि रानी हँसि कूसल पूछा । कित गवनेहु पीजर के छँछा ॥
 रानी! तुम्ह जुग जुग सुख पाटू । छाज न पंखिहि पीजर -ठाटू ॥
 जब भा पंख कहाँ थिर रहना । चाहै उडा पंखि जौं डहना ॥
 पीजर महुँ जो परेवा घेरा । आइ मजारि कीन्ह तहुँ फेरा ॥
 दिन एक आइ हाथ पै मेला । तेहि डर बनोवास कहँ खेला ॥
 तहाँ बियाध आइ नर साधा । छूटि न पाव मीचु कर बाँधा ॥
 वै धरि बेचा बाम्हन हाथा । जंबूदीप गएउँ तेहहि साथा ॥
 तहाँ चित्र चितउरगढ, चित्रसेन कर राज ।

टीका दीन्ह पुत्र कहँ, आपु लीन्ह सर साज ॥२॥

बैठ जो राज पिता के ठाऊँ । राजा रतनसेन ओहि नाऊँ ॥
 बरनों काह देस मनियारा । जहँ अस नग उपना उजियारा ॥
 धनि माता औ पिता बखाना । जेहिके बंस अंस अस आना ॥
 लछन बतीसौ कुल निरमला । बरनि न जाइ रूप औ कला ॥
 वै हौं लीन्ह, अहा अस भागू । चाहै सोने मिला सोहागू ॥
 सो नग देखि हींछा भइ मोरी । है यह रतन पदारथ जोरी ॥
 है ससि जोग इहै पै भानु । तहाँ तुम्हार मैं कीन्ह बखानू ॥
 कहाँ रतन रतनागर, कंचन कहाँ सुमेर ।

दैव जो जोरी दुहुँ लिखी, मिलै सो कौनेहु फेर ॥३॥

सुनत बिरह चिनगी ओहि परी । रतन पाव जौं कंचन-करी ॥
 कठिन पेम विरहा दुख भारी । राज छाँडि भा जोगि भिखारी ॥
 मालति लागि भौर जस होइ । होइ बाउर निसरा बुधि खोई ॥
 कहेसि पतंग होइ धनि लेऊँ । सिंघलदीप जाइ जिउ देऊँ ॥
 पुनि ओहि कोउ न छाँड अकेला । सोरह सहस कुँवर भए चेला ॥
 और गनै को संग सहाई । महादेव मढ मेला जाई ॥
 सूरुज पुरुष दरस के ताई । चितवै चंद चकोर के नाई ॥
 तुम्ह बारी रस जोग जेहि, कँवलहि जस अरघानि ।

तस सूरुज परगास कै, भौर मिलाएउँ आनि ॥४॥

हीरामन जो कही यह बाता । सुनिकै रतन पदारथ राता ॥
 जस सूरुज देखे होइ ओपा । तस भा बिरह कामदल कोपा ॥
 सुनि कै जोगी केर बखानू । पदमावति मन भा अभिमानू ॥
 कंचन करी न काँचहि लोभा । जौं नग होइ पाव तब सोभा ॥
 कंचन जौं कसिए कै ताता । तब जानिय दहुँ पीत की राता ॥
 नग कर मरम सो जडिया जाना । जडै जो अस नग देखि बखाना ॥
 को अब हाथ सिंघ मुख घालै । को यह बात पिता सौं चालै ॥

सरग इंद्र डरि काँपै, बासुकि डरै पतार ।

कहाँ सो अस बर प्रिथिमी मोहि जोग संसार ॥५॥

तू रानी ससि कंचन-करा । वह नग रतन सूर निरमरा ॥
बिरह बजागि बीच का कोई । आगि जो छुवै जाइ जरि सोई ॥
आगि बुझाइ परे जल गाढै । वह न बुझाइ आपु ही बाढै ॥
बिरह के आगि सूर जरि काँपा । रातिहि दिवस जरै ओहि तापा ॥
खिनहिं सरग, खिन जाइ पतारा । थिर न रहै एहि आगि अपारा ॥
धनि सो जीउ दगध इमि सहै । अकसर जरै, न दूसर कहै ॥
सुलगि भीतर होइ सावाँ । परगट होइ न कहै दुख नावाँ ॥
काह कहौं हौं ओहि सौं, जेइ दुख कीन्ह निमेट ।

तेहि दिन आगि करै बह, (बाहर) जेहि दिन होइ सो भेंट ॥६॥

सुनि कै धनि 'जारी अस कया' मन भा मयन, हिये भै मया ॥
देखौं जाइ जरै कस भानू । कंचन जरे अधिक होइ बानू ॥
अब जौं मरै वह पेम-बियोगी । हत्या मोहिं, जेहि कारन जोगी ॥
सुनि कै रतन पदारथ राता । हीरामन सौं कह यह बाता ॥
जौं वह जोग सँभारै छाला । पाइहिं भुगुति, देहुँ जयमाला ॥
आव बसंत कुसल जौं पावौं । पूजा मिस मंडप कहँ आवौं ॥
गुरु के बैन फूल हौं गाँथे । देखौं नैन, चढावैं माथे ॥

कवल भवर तुम्ह बरना, मैं माना पुनि सोइ ।

चाँद सूर कहँ चाहिए, जौं रे सूर वह होइ ॥७॥

हीरामन जो सुना रस बाता । पावा पान भएउ मुख राता ॥
चला सुआ, रानी तब कहा । भा जो परावा कैसे रहा ॥
जो निति चलै सँवारे पाँखा । आजु जो रहा, काल्हि को राखा ॥
न जनौं आजु कहाँ दहुँ ऊआ । आएहु मिलै, चलेहु मिलि, सूआ ॥
मिलि कै बिछुरि मरन कै आना । कित आएहु जौं चलेहु निदाना ॥
तनु रानी हौं रहतेउँ राँधा । कैसे रहौं बचन कर बाँधा ॥
ताकरि दिस्टि ऐसि तुम्ह सेवा । जैसे कुंज मन रहै परेवा ॥

बसै मीन जल धरती, अंबा बसै अकास ।

जौं पिरीत पै दुवौ महुँ अंत होहिं एक पास ॥८॥

आवा सुआ बैठ जहँ जोगी । मारग नैन, बियोग बियोगी ॥
आइ पेम-रस कहा सँदेसा । गोरख मिला, मिला उपदेसा ॥
तुम्ह कहँ गुरु मया बहु कीन्हा । कीन्ह अदेस, आदि कहि दीन्हा ॥
सबद, एक उन्ह कहा अकेला । गुरु जस भिंग, फनिग जस चेला ॥
भिंगी ओहि पाँखि पै लेई । एकहि बार छीनि जिउ देई ॥
ताकहु गुरु करै असि माया । नव औतार देइ, नव काया ॥
होई अमर जो मरि कै जीया । भौर कवल मिलि कै मधु पीया ॥

आवै ऋतु बसंत जब, तब मधुकर तब बासु ।

जोगी जोग जो इमि करैं, सिद्धि समापत तासु ॥९॥

२०.बसंत खंड

दैऊ देउ कै सो ऋतु गँवाई । सिरी पंचमी पहुँची आई ॥
 भएउ हुलास नवल ऋतु माहाँ । खिन न सोहाइ धूप औ छाहाँ ॥
 पदमावति सब सखी हँकारी । जावत सिंघलदीप कै बारी ॥
 आजु बसंत नवल ऋतुराजा । पंचमि होइ, जगत सब साजा ॥
 नवल सिंगार बनस्पति कीन्हा । सीस परासहि सेंदुर दीन्हा ॥
 बिगसि फूल फूले बहु बासा । भौर आइ लुबुधे चहुँ पासा ॥
 पियर-पात दुख झरे निपाते । सुख पल्लव उपने होइ राते ॥
 अवधि आइ सो पूजी, जो हीँछा मन कीन्हा ।

चलहु देवगढ़ गोहने, चहहुँ सो पूजा दीन्हा ॥१॥

फिरी आन ऋतु बाजन बाजे । ओ सिंगार बारिन्ह सब साजे ॥
 कवँल-कली पदमावति रानी । होइ मालति जानौँ बिगसानी ॥
 तारा मँडल पहिरि भल चोला । भरे सीस सब नखत अमोला ॥
 सखी कुमोद सहस दस संगी । सबै सुगंध चढाए अंगा ॥
 सब राजा रायन्ह कै बारी । बरन बरन पहिरे सब सारी ॥
 सबै सुरूप, पदमिनी जाती । पान, फूल सेंदुर सब राती ॥
 करहिं किलोल सुरंग-रंगीली । औ चोवा चंदन सब गीली ॥

चहुँ दिसि रही सो बासना फुलवारी अस फुलि ।

वै बसंत सौँ भूलीं, गा बसंत उन्ह भूलि ॥२॥

भै आहा पदमावति चली छत्तिस कुरि भई गोहन भली ॥
 भई गोरी सँग पहिरि पटोरा । बाम्हनि ठाँव सहस अँग मोरा ॥
 अगरवारि गज गौन करेई । बैसिनि पावँ हंसगति देई ॥
 चंदेलिनि ठमकहिं पगु धारा । चली चौहानि, होइ झनकारा ॥
 चली सोनारि सोहाग सोहाती । औ कलवारि पेम-मधु-माती ॥
 बानिनि चली सेंदुर दिए माँगा । कयथिनि चली समाई न आँगा ॥
 पटइनि पहिरि सुरँग तन चोला । औ बरइनि मुख खात तमोला ॥
 चलीं पउनि सब गोहने, फूल डार लेइ हाथ ।

बिस्वनाथ कै पूजा, पदमावति के साथ ॥३॥

कवँल सहाय चलीं फुलवारी । फर फूलन सब करहिं धमारी ॥
 आपु आपु महुँ करहिं जोहारू । यह बसंत सब कर तिवहारू ॥
 चहै मनोरा झूमक होई । फर औ फूल लिएउ सब कोई ॥
 फागु खेलि पुनि दाहब होरी । सैंतब खेह, उडाउब झोरी ॥
 आजु साज पुनि दिवस न दूजा । खेलि बसंत लेहु कै पूजा ॥
 भा आयसु पदमावति केरा । बहुरि न आइ करब हम फेरा ॥
 तस हम कहँ होइहि रखवारी । पुनि हम कहाँ, कहाँ यह बारी ॥

पुनि रे चलब घर आपने, पूजि बिसेसर-देव ।

जेहि काहुहि होइ खेलना, आजु खेलि हँसि लेव ॥४॥

काहू गही आँब कै डारा । काहू जाँबु बिरह अति झारा ॥
 कोइ नारँग कोइ झाड चिरौंजी । कोइ कटहर, बड़हर, कोइ न्यौजी ॥
 कोइ दारिउँ कोइ दाख औ खीरी । कोइ सदाफर, तुरँज जँभीरी ॥
 कोइ जायफर, लौंग, सुपारी । कोइ नरियर, कोइ गुवा, छोहारी ॥

कोइ बिजौर, करौंदा जूरी । कोइ अमिली, कोइ महुअ, खजूरी ॥
 काहू हरफारेवरि कसौंदा । कोइ अँवरा, कोइ राय करौंदा ॥
 काहू गही केरा कै घौरी । काहू हाथ परी निंबकौरी ॥
 काहू पाई नीयरे , कोउ गए किछु दूरि ।

काहू खेल भएउ बिष, काहू अमृत मूरि ॥५॥

पुनि बीनहिं सब फूल सहेली । खोजहिं आस-पास सब बेली ॥
 कोइ केवडा, कोइ चंप नेवारी । कोइ केतकि मालति फुलवारी ॥
 कोइ सदबरग, कुंद, कोइ करना । कोइ चमेलि, नागेसर बरना ॥
 कोइ मौलसिरि, पुहुप बकौरी । कोई रूपमंजरी गौरी ॥
 कोइ सिंगारहार तेहि पाहाँ । कोइ सेवती, कदम के छाहाँ ॥
 कोइ चंदन फूलहिं जनु फूली । कोइ अजान-बीरो तर भूली ॥
 (कोइ) फूल पाव, कोइ पाती, जेहि के हाथ जो आँट ।

(कोइ) हारचीर अरुझाना, जहाँ छुवै तहँ काँट ॥६॥

फर फूलन्ह सब डार ओढाई । झुंड बाँधि कै पंचम गाई ॥
 बाजहिं ढोल दुंदुभी भेरी । मादर, तूर, झाँझ चहु फेरी ॥
 सिंगि संख, डफ बाजन बाजे । बंसी, महुअर सुरसँग साजे ॥
 और कहिय जो बाजन भले । भाँति भाँति सब बाजत चले ॥
 रथहिं चढी सब रूप-सोहाई । लेइ बसंत मठ-मँडप सिधाई ॥
 नवल बसंत; नवल सब बारी । सेंदुर बुक्का होइ धमारी ॥
 खिनहिं चलहिं; खिन चाँचरि होई । नाच कूद भूला सब कोई ॥
 सेंदुर खेह उडा अस, गगन भएउ सब रात ।

राती सगरिउ धरती, राते बिरिछन्ह पात ॥७॥

एहिं बिधि खेलति सिंघलरानी । महादेव-मढ जाइ तुलानी ॥
 सकल देवता देखै लागे । दिस्टि पाप सब ततछन भागै ॥
 एइ कबिलास इंद्र कै अछरी । की कहूँ तें आई परमेसरी ॥
 कोई कहै पदमिनी आई । कोइ कहै ससि नखत तराई ॥
 कोई कहै फूली फुलवारी । फूल ऐसि देखहु सब बारी ॥
 एक सुरुप औ सुंदर सारी । जानहु दिया सकल महि बारी ॥
 मुरुछि परै जोई मुख जोहै । जानहु मिरिग दियारहि मोहै ॥
 कोई परा भौर होइ , बास लीन्ह जनु चाँप ।

कोइ पतंग भा दीपक, कोइ अधजर तन काँप ॥८॥

पदमावति गै देव दुवारा । भीतर मँडप कीन्ह पैसारा ॥
 देवहि संसे भा जिउ केरा । भागौं केहि दिसि मंडप घेरा ॥
 एक जोहार कीन्ह औ दूजा । तिसरे आइ चढाएसि पूजा ॥
 फर फूलन्ह सब मँडप भरावा । चंदन अगर देव नहवावा ॥
 लेइ सेंदुर आगे भै खरी । परसि देव पुनि पायन्ह परी ॥
 और सहेली सबै बियाहीं । मो कहँ देव कतहुँ बर नाहीं ॥
 हौं निरगुन जेइ कीन्ह न सेवा । गुनि निरगुनि दाता तुम देवा ॥
 बर सौं जोग मोहि मेरवहु , कलस जाति हौं मानि ।

जेहि दिन हींछा पूजै बेगि चढावहुँ आनि ॥९॥

हींछि हींछि बिनवा जस जानी । पुनि कर जोरि ठाडि भइ रानी ॥
 उतरु को देइ, देव मरि गएउ । सबत अकूत मँडप महुँ भएउ ॥
 काटि पवारा जैस परेवा । सोएव ईस, और को देवा ॥
 भा बिनु जिउ नहिं आवत ओझा । बिष भइ पूरि, काल भा गोझा ॥
 जो देखै जनु बिसहर डसा । देखि चरित पदमावति हँसा ॥
 भल हम आइ मनावा देवा । गा जनु सोइ, को मानै सेवा ॥
 कौ हींछा पूरै, दुख खोवा । जेहि मानै आए सोइ सोवा ॥
 जेहि धरि सखी उठावहिं, सीस विकल नहिं डोल ।

धर कोइ जीव न जानौं, मुख रे बकत कुबोल ॥१०॥

ततखन एक सखी बिहँसानी । कौतुक आइ न देखहु रानी ॥
 पुरुब द्वार मढ जोगी छाए । न जनौं कौन देस तें आए ॥
 जनु उन्ह जोग तंत तन खेला । सिद्ध होइ निसरे सब चेला ॥
 उन्ह महुँ एक गुरु जो कहावा । जनु गुड देइ काहू बौरावा ॥
 कुँवर बतीसौ लच्छन राता । दसएँ लच्छन कहै एक बाता ॥
 जानौं आहि गोपिचंद जोगी । की सो आहि भरथरी वियोगी ॥
 वै पिंगला गए कजरी आरन । ए सिंघल आए केहि कारन ॥

यह मूरति, यह मुद्रा, हम न देख अवधूत ।

जानौं होहिं न जोगी कोइ राजा कर पूत ॥११॥

सुनि सो बात रानी रथ चढ़ी । कहँ अस जोगी देखौं मठी ॥
 लेइ सँग सखी कीन्ह तहँ फेरा । जोगिन्ह आइ अपछरन्ह घेरा ॥
 नयन कचोर पेम पद भरे । भइ सुदिस्टि जोगी सहुँ टरे ॥
 जोगी दिस्टि दिस्टि सौं लीन्हा । नैन रोपि नैनहिं जिउ दीन्हा ॥
 जेहि मद चढा परा तेहि पाले । सुधि न रही ओहि एक पियाले ॥
 परा माति गोरख कर चेला । जिउ तन छाँडि सरग कहँ खेला ॥
 किंगरी गहे जो हुत बैरागी । मरतिहु बार उहै धुनि लागी ॥
 जेहि धंधा जाकर मन लागै सपनेहु सूझ सो धंध ।

तेहि कारन तपसी तप साधहिं, करहिं पेम मन बंध ॥१२॥

पदमावति जस सुना बखानू । सहस-करा देखेसि तस भानू ॥
 मेलेसि चंदन मकु खिन जागा । अधिकौ सूत, सीर तन लागा ॥
 तब चंदन आखर हिय लिखे । भीख लेइ तुइ जोग न सिखे ॥
 घरी आइ तब गा तूँ सोई । कैसे भुगुति परापति होई ॥
 अब जौं सूर अहौ ससि राता । आएउ चढ़ि सो गगन पुनि साता ॥
 लिखि कै बात सखिन सौं कही । इहै ठाँव हौं बारति रही ॥
 परगट होहुँ न होइ अस भंगू । जगत या कर होइ पतंगू ॥
 जा सहुँ हौं चख हेरौं सोइ ठाँव जिउ देइ ।

एहि दुख कतहुँ न निसरौं, को हत्या असि लेइ ॥१३॥

कीन्ह पयान सबन्ह रथ हाँका । परबत छाँडि सिंगलगढ ताका ॥
 बलि भए सबै देवता बली । हात्यारि हत्या लेइ चली ॥
 को अस हितू मुए गह बाहीं । जौं पै जिउ अपने घट नाहीं ॥
 जौ लहि जिउ आपन सब कोई । बिनु जिउ कोइ न आपन होई ॥
 भाइ बंधु औ मीत पियारा । बिनु जिउ घरी न राखै पारा ॥

बिनु जिउ पिंड छार कर कूरा । छार मिलावै सौ हित पूरा ॥
तेहि जिउ बिनु अब मरि भा राजा । को उठि बैठि गरब सौं गाजा ॥
परी कथा भुइँ लोटे, कहाँ रे जिउ बलि भीउँ ।

को उठाइ बैठारै बाज पियारे जीव ॥१४॥

पदमावति सो मँदिर पईठी । हँसत सिंघासन जाइ बईठी ॥
निसि सूती सुनि कथा बिहारी । भा बिहान कह सखी हँकारी ॥
देव पूजि जस आइउँ काली । सपन एक निसि देखिउँ, आली ॥
जनु ससि उदय पुरुब दिसि लीन्हा । ओ रवि उदय पछिउँ दिसि कीन्हा ॥
पुनि चलि सूर चाँद पहुँ आवा । चाँद सुरुज दुहुँ भएउ मेरावा ॥
दिन औ राति भए जनु एका । राम आइ रावन-गढ छेकाँ ॥
तस किछु कहा न जाइ निखेधा । अरजुन-बान राहु गा बेधा ॥
लंक जानहु सब लूटी, हनुवँ विधंसी बारि ।

जागि उठिउँ अस देखत, सखि कहु सपन विचारि ॥१५॥

सखी सो बोली सपन-विचारू । काल्हि जो गइहुँ देव के बारू ॥
पूजि मनाइहुँ बहुतै भाँती । परसन आइ भए तुम्ह राती ॥
सूरुज पुरुष चाँद तुम रानी । अस वर दैउ मेरावै आनी ॥
पच्छिउँ खंड कर राजा कोई । सो आवा वर तुम्ह कहँ होई ॥
किछु पुनि जूझ लागि तुम्ह रामा । रावन सौं होइहि सँगरामा ॥
चाँद सुरुज सौं होइ बियाहू । बारि विधंसब बेधव राहू ॥
जस ऊषा कहँ अनिरुध मिला । मेटि न जाइ लिखा पुरबिला ॥
सुख सोहाग जो तुम्ह कहँ, पान फूल रस भोग ।

आजु काल्हि भा चाहै, अस सपने कसँजोग ॥१६॥

२१.राजा रत्नसेन सती खंड

कै बसंत पदमावति गई । राजहि तब बसंत सुधि भई ॥
जो जागा न बसंत न बारी । ना वह खेल, न खेलनहारी ॥
ना वह ओहि कर रूप सुहाई । गै हेराइ, पुनि दिस्टि न आई ॥
फूल झरे, सूखी फुलवारी । दीठि परी उकठी सब बारी ॥
केइ यह बसंत बसंत उजारा ?। गा सो चाँद, अथवा लेइ तारा ॥
अब तेहि बिनु जग भा अँधकूपा । वह सुख छाँह, जरौं दुख-धूपा ॥
बिरह-दवा को जरत सिरावा ?। को पीतम सौं करै मेरावा ॥

हिये देख तब चंदन खेवरा, मिलि कै लिखा बिछोव ।

हाथ मींजि सिर धुनि कै, रोवै जो निचींत अस सोव ॥१॥

जस बिछोह जल मीन दुहेला । जल हुँत काढि अगिनि महुँ मेला ॥
चंदन-आँक दाग हिय परे । बुझहिं न ते आखर परजरे ॥
जनु सर-आगि होइ हिय लागे । सब तन दागि सिंघ बन दागे ॥
जरहिं मिरिग बन-खँड तेहि ज्वाला । औ ते जरहिं बैठ तेहि छाला ॥
कित ते आँक लिखे जौं सोवा । मकु आँकन्ह तेइ करत बिछौवा ॥
जैस दुसंतहि साकुंतला । मधवानलहि काम-कंदला ॥

भा बिछोह जस नलहि दमावति । मैना मूँदि छपी पदमावति ॥
आइ बसंत जो छिप रहा, होइ फूलन्ह के भेस ।

केहि बिधि पावौं भौर होइ , कौन गुरू-उपदेस ॥२॥

रोवै रतन-माल जनु चूरा । जहँ होइ ठाढ, होइ तहँ कूरा ॥
कहाँ बसंत औ कोकिल बैना । कहाँ कुसुम अति बेधा नैना ॥
कहाँ सो मूरति परी जो डीठी । काढि लिहेसि जिउ हिये पईठी ॥
कहाँ सो देस दरस जेहि लाहा । जौं सुबसंत करीलहि काहा ॥
पात-बिछोह रूख जो फूला । सो महुआ रोवै अस भुला ॥
टपकैं महुआ आँसु तस परहीं । होइ महुआ बसमत ज्यों झरहीं ॥
मोर बसंत सो पदमिनि बरी । जेहि बिनु भएउ बसंत उजारी ॥

पावा नवल बसंत पुनि, बहु बहु आरति बहु चोप ।

ऐस न जाना अंत ही, पात झरहिं, होइ कोप ॥३॥

अरे मलिछ बिसवासी देवा । कित मैं आइ कीन्ह तोरि सेवा ॥
आपनि नाव चढै जो देई । सो तौ पार उतारे खेई ॥
सुफल लागि पग टेकेउँ तोरा । सुआ क सेंबर तू भा मोरा ॥
पाहन चढि जो चहै भा पारा । सो ऐसे बूडै मझ धारा ॥
पाहन सेवा कहाँ पसीजा ?। जनम न ओद होइ जो भीजा ॥
बाउर सोइ जो पाहन पूजा । सकत को भार लेइ सिर दूजा ॥
काहे न जिय सोइ निरासा । मुए जियत मन जाकरि आसा ॥
सिंघ तरेंदा जेइ गहा, पार भए तेहि साथ ।

ते पै बूडे बाउरे, भेंड पूछि जिन्ह हाथ ॥४॥

देव कहा सुनु , बउरे राजा । देवहि अगुमन मारा गाजा ॥
जौं पहिलेहि अपने सिर परई । सो का काहुक धरहरि करई ॥
पदमावति राजा कै बारी । आइ सखिन्ह सह बदन उधारी ॥
जैस चाँद गोहने सब तारा । परेउँ भुलाइ देखि उजियारा ॥
चमकहिं दसन बीजु कै नाई । नैन-चक्र जमकात भवाँई ॥
हौं तेहि दीप पतंग होइ परा । जिउ जम काढि सरग लेइ धरा ॥
बहुरि न जानौं दहुँ का भई । दहुँ कविलास कि कहुँ अपसई ॥
अब हौं मरौं निसाँसी, हिये न आवै साँस ।

रोगिया की को चालै, वेदहि जहाँ उपास ॥५॥

आनहि दोस देहुँ का काहू । संगी कया, मया नहिं ताहू ॥
हता पियारा मीत बिछोई । साथ न लाग आपु गै सोई ॥
का मैं कीन्ह जो काया पोषी । दूषन मोहिं, आप निरदोषी ॥
फागु बसंत खेलि गई गोरी । मोहि तन लाइ बिरह कै होरी ॥
अब कस कहाँ छार सिर मेलौं । छार जो होहुँ फाग तब खेलौं ॥
कित तप कीन्ह छाँडि कै राजू । गएउ अहार न भा सिध काजू ॥
पाएउ नहिं होइ जोगी जती । अब सर चढौं जरौं जस सती ॥
आइ जो पीतम फिरि गा, मिला न आइ बसंत ।

अब तन होरी घालि कै, जारि करौं भसमंत ॥६॥

ककनू पंखि जैस सर साजा । तस सर साजि जरा चह राजा ॥
 सकल देवता आइ तुलाने । दहूँ का होइ देव असथाने ॥
 बिरह अगिनि बजागि असूझा । जरै सूर न बुझाए बूझा ॥
 तेहि के जरत जो उठै बजागी । तिनउँ लोक जरै तेहि लागी ॥
 अबहि कि घरी सो चिनगी छूटै । जरहिं पहार पहन सब फूटै ॥
 देवता सबे भसम होइ जाहीं । छार समेटे पाउब नाहीं ॥
 धरती सरग होइ सब ताता । है कोई एहि राख बिधाता ॥
 मुहमद चिनगी पेम कै, सुनि महि गगन डेराइ ।

धनि बिरही औ धनि हिया, तहँ अस अगिनि समाइ ॥७॥

हनुवंत वीर लंक जेइ जारी । परवत उहै अहा रखवारी ॥
 बैठि तहाँ होइ लंका ताका । छठएँ मास देइ उठि हाँका ॥
 तेहि कै आगि उहौ पुनि जरा । लंका छाडि पलंका परा ॥
 जाइ तहा वै कहा संदेसू । पारबती औ जहाँ महेसू ॥
 जोगी आहि बियोगी कोई । तुम्हरे मँडप आगि तेइ बोई ॥
 जरा लँगूर सु राता उहाँ । निकसि जो भागि भएँ करमुहाँ ॥
 तेहि बजागि जरै हौं लागा । बजरअंग जरतहि उठि भागा ॥
 रावन लंका हौं दही, वह हौं दाहै आव ।

गए पहार सब औटि कै, को राखै गहि पाव ॥८॥

२२.पार्वती-महेश खंड

ततखन पहुँचे आइ महेसू । बाहन बैल, कुस्टि कर भेसू ॥
 काथरि कया हडावरि बाँधे । मुंड-माल औ हत्या काँधे ॥
 सेसनाग जाके कँठमाला । तनु भभुति, हस्ती कर छाला ॥
 पहुँची रुद्र-कवँल कै गटा । ससि माथे औ सुरसरि जटा ॥
 चँवर घंट औ डँवरू हाथा । गौरा पारबती धनि साथी ॥
 औ हनुवंत वीर संग आवी । धरे भेस बादर जस छावा ॥
 अवतहि कहेन्हि न लावहु आगी । तेहि कै सपथ जरहु जेहि लागी ॥
 की तप करै न पारेहु, की रे नसाएहु जोग ?।

जियत जीउ कस काढ़हु? कहहु सो मोहिं बियोग ॥१॥

कहेसि मोहिं बातन्ह बिलमावा । हत्या केरि न डर तोहि आवी ॥
 जरै देहु, दुख जरौ अपारा । निस्तर पाइ जाउँ एक बारा ॥
 जस भरथरी लागि पिंगला । मो कहँ पदमावति सिंघला ॥
 मै पुनि तजा राज औ भोगू । सुनि सो नावँ लीन्ह तप जोगू ॥
 एहि मढ सेएँ आइ निरासा । गइ सो पूजि, मन पूजि न आसा ॥
 मैं यह जिउ डाढे पर दाधा । आधा निकसि रहा, घट आधा ॥
 जो अधजर सो विलंब न आवी । करत बिलंब बहुत दुख पावा ॥

एतना बोल कहत मुख, उठी बिरह कै आगि ।

जौं महेस न बुझावत, जाति सकल जग लागि ॥२॥

पारबती मन उपना चाऊ । देखौ कुँवर केर सत भाऊ ॥
 ओहि एहि बीच, की पेमहि पूजा । तन मन एक, कि मारग दूजा ॥

भइ सुरूप जानहुँ अपछरा । बिहँसि कुँवर कर आँचर धरा ॥
 सुनहु कुँवर मोसौँ एक बाता । जस मोहिं रंग न औरहि राता ॥
 औ बिधि रूप दीन्ह है तोकों । उठा सो सबद जाइ सिव-लोका ॥
 तब हौं तोपहँ इंद्र पठाई । गइ पदमिनि, तैं अछरी पाई ॥
 अब तजु जरन, मरन, तप जोगू । मोसौँ मानु जनम भरि भोगू ॥

हौं अछरी कबिलास कै जेहि सरि पूज न कोइ ।

मोहि तजि सँवरि जो ओहि मरसि, कौन लाभ तेहि होइ ? ॥३॥

भलेहिं रंग अछरी तोर राता । मोहिं दूसरे सौं भाव न बाता ॥
 मोहिं ओहि सँवरि मुए तस लाहा । नैन जो देखसि पूछसि काहा ॥
 अबहिं ताहि जिउ देइ न पावा । तोहि असि अछरी ठाहि मनावा ॥
 जौं जिउ देइहौं ओहि कै आसा । न जानौं काह होइ कबिलासा ॥
 हौं कबिलास काह लै करऊँ । सोइ कबिलास लागि जेहि मरऊँ ॥
 ओहि के बार जीउ नहिं बारौं । सिर उतारि नेवछावरि सारौं ॥
 ताकरि चाह कहै जो आई । दोउ जगत तेहि देहुँ बडाई ॥

ओहि न मोरि किछु आसा, हौं ओहि आस करेउँ ।

तेहि निरास पीतम कहँ, जिउ न देउँ का देउँ ॥४॥

गौरइ हँसि महेस सौं कहा । निहचै एहि बिरहानल दहा ॥
 निहचै यह ओहि कारन तपा । परिमल पेम न आछे छपा ॥
 निहचै पेम-पीर यह जागा । कसे कसौटी कंचन लागा ॥
 बदन पियर जल डभकहिं नैना । परगट दुवौ पेम के बैना ॥
 यह एहि जनम लागि ओहि सीझा । चहै न औरहि, ओही रीझा ॥
 महादेव देवन्ह के पिता । तुम्हरी सरन राम रन जिता ॥
 एहँ कहँ तसमया केरहू । पुरवहु आस, कि हत्या लेहू ॥

हत्या दुइ के चढाए काँधे बहु अपराध ।

तीसर यह लेउ माथे, जौ लेवै कै साध ॥५॥

सुनि कै महादेव कै भाखा । सिद्धि पुरुष राजै मन लाखा ॥
 सिद्धहि अंग न बैठे माखी । सिद्ध पलक नहिं लावै आँखी ॥
 सिद्धहि संग होइ नहिं छाया । सिद्धहि होइ भूख नहिं माया ॥
 जेहि गज सिद्ध गोसाईं कीन्हा । परगट गुपुत रहै को चीन्हा ॥
 बैल चढा कुस्ती कर भेसू । गिरजापति सत आहि महेसू ॥
 चीन्हे सोइ रहै जो खोजा । जस विक्रम औ राजा भोजा ॥
 जो ओहि तंत सत्त सौं हेरा । गएउ हेराइ जो ओहि भा मेरा ॥

बिनु गुरु पंथ न पाइय, भूलै सो जो मेट ।

जोगी सिद्ध होइ तब, जब गोरख सौं भेंट ॥६॥

ततखन रतनसेन गहबरा । रोउब छाँड़ि पाँव लेइ परा ॥
 मातै पितै जनम कित पाला । जो अस फाँद पेम गिउ घाला ॥
 धरती सरग मिले हुत दोऊ । केइ निनार कै दीन्ह बिछोऊ ॥
 पदिक पदारथ कर-हुँत खोवा । टूटहि रतन, रतन तस रोवा ॥
 गगन मेघ जस बरसै भला । पुहुमी पूरि सलिल बहि चला ॥
 सायर टूट, सिखर गा पाटा । सूझ न बार पार कहँ घाटा ॥
 पौन पानि होइ होइ सब गिरई । पेम के फंद कोइ जनि परई ॥

तस रोवै जस जिउ जरै, गिरे रकत औ माँसु ।

रोवँ रोवँ सब रोवहिँ सूत सूत भरि आँसु ॥७॥

रोवत बूडि उठा संसारू । महादेव तब भएउ मयारू ॥
 कहेन्हि न रोव, बहुत तैं रोवा । अब ईसर भा, दारिद खोवा ॥
 जो दुख सहै होइ दुख ओकाँ । दुख बितु सुख न जाइ सिवलोका ॥
 अब तैं सिद्ध भएसि सिधि पाई । दरपन कया छूटि गई काई ॥
 कहौं बात अब हौं उपदेसी । लागु पंथ, भूले परदेसी ॥
 जौं लागि चोर सेंधि नहि देई । राजा केरि न मूसै पेई ॥
 चढें न जाइ बार ओहि खूँदी । परै त सेंधि सीस-बल मूँदी ॥
 कहौं सो तोहि सिंहलगढ़, है खंड सात चढाव ।

फिरा न कोई जियत जिउ, सरग-पंथ देइ पाव ॥८॥

गढ़ तस बाँक जैसि तोरि काया । पुरुष देखु ओही कै छाया ॥
 पाइय नाहिं जूझ हठि कीन्हे । जेइ पावा तेइ आपुहि चीन्हे ॥
 नौ पौरी तेहि गढ़ मझियारा । औ तहँ फिरहिँ पाँच कोटवारा ॥
 दसवँ दुआर गुपुत एक ताका । अगम चडाव, बाट सुठि बाँका ॥
 भेदै जाइ सोइ वह घाटी । जो लहि भेद, चढै होइ चाँटी ॥
 गढँ तर कुंड , सुरँग तेहि माहाँ । तहँ वह पंथ कहौं तोहि पाहाँ ॥
 चोर बैठ जस सेंधि सँवारी । जुआ पैत जस लाव जुआरी ॥
 जस मरजिया समुद धँस, हाथ आव तब सीप ।

ढूँडि लेइ जो सरग दुआरी, चढै सो सिंघलदीप ॥९॥

दसवँ दुआर ताल कै लेखा । उलटि दिस्टि जो लाव सो देखा ॥
 जाइ सो तहाँ साँस मन बंधी । जस धँसि लीन्ह कान्ह कालिंदी ॥
 तू मन नाथु मारि कै साँसा । जो पै मरहि अबहिँ करु नासा ॥
 परगट लोकचार कहु बाता । गुपुत लाउ कन जासौं राता ॥
 'हौं हौं' कहत सबै मति खोई । जौं तू नाहि आहि सब कोई ॥
 जियतहि जूरे मरै एक बारा । पुनि का मीचु, को मारै पारा ॥
 आपुहि गुरू सो आपुहि चेला । आपुहि सब औ आपु अकेला ॥
 आपुहि मीच जियन पुनि , आपुहि तन मन सोइ ।
 आपुहि आपु करै जो चाहै , कहौं सो दूसर कोइ ॥१०॥

२३.राजा-गढ़-छेंका खंड

सिधि गुटिका राजै जब पावा । पुनि भइ सिद्धि गनेस मनावा ॥
 जब संकर सिधि दीन्ह गुटेका । परी हुल, जोगिन्ह गढ़ छेंका ॥
 सबें पदमिनी देखहिं चढी । सिंघल छेंकि उठा होइ मढी ॥
 जस घर भरे चोर मत कीन्हा । तेहि बिधि सेंधि चाह गढ़ दीन्हा ॥
 गुपुत चोर जो रहै सो साँचा । परगट होइ जीउ नहिं बाँचा ॥
 पोरि पौरि गढ़ लाग केवारा । औ राजा सौं भई पुकारा ॥
 जोगी आइ छेंकि गढ़ मेला । न जनों कौन देस तैं खेला ॥

भयउ रजायसु देखौ, को भिखारि अस ढीठ ।

बेगि बरज तेहि आवहु , जन दुइ पठैं बसीठ ॥१॥

उतरि बसीठन्ह आइ जोहारे । की तुम जोगी की बनिजारे ॥
 भएउ रजायसु आगे खेलहिं । गढ तर छाँडि अनत होइ मेलहिं ॥
 अस लागेहु केहि के सिख दीन्हे । आएहु मरे हाथ जिउ लीन्हे ॥
 इहाँ इंद्र अस राजा तपा । जबहिं रिसाई सूर डरि छपा ॥
 हौ बनिजार तौ बनिज बेसाहौ । भरि बैपार लेहु जो चाहौ ॥
 हौ जोगी तौ जुगुति सौं माँगौं । भुगुति लेहु, लै मारग लागौ ॥
 इहाँ देवता अस गए हारी । तुम्ह पतिंग को अहौ भिखारी ॥
 तुम्ह जोगी बैरागी, कहत न मानहु कोहु ।

लेहु माँगि किछु भिच्छा, खेलि अनत कहूँ होहु ॥२॥

‘आनु जो भीखि हौं आएऊँ लेई । कस न लेऊँ जौं राजा देई ॥
 पदमावति राजा कै बारी । हौं जोगी ओहि लागि भिखारी ॥
 खप्पर लेइ बार भा माँगौं । भुगुति देइ देइ मारग लागौं ॥
 सोई भुगुति परापति भूजा । कहाँ जाऊँ अस बार न दूजा ॥
 अब धर इहाँ जीउ ओहि ठाउँ । भसम होऊँ बरु तजौं न नाऊँ ॥
 जस बिनु प्रान पिंड है छँछा । धरम लाइ कहिहौं जो पूछा ॥
 तुम्ह बसीठ राजा के ओरा । साखी होहु एहि भीख निहोरा ॥
 जोगी बार आव सो, जेहि भिच्छा कै आस ।

जो निरास दिढ आसन, कित गौने केहु पास ?’ ॥३॥

सुनि बसीठ मन उपनी रीसा । जौ पीसत घुन जाइहि पीसा ॥
 जोगी अस कहूँ कहै न कोई । सो कहु बात जोग जो होई ॥
 वह बड़ राज इंद्र कर पाटा । धरती परा सरग को चाटा ॥
 जौं यह बात जाइ तहँ चली । छूटहिं अबहिं हस्ति सिंघली ॥
 औं जौं छुटहि बज्र कर गोटा । बिसरिहि भुगुति, होइ सब रोटा ॥
 जहँ केहु दिस्टि न जाइ पसारी । तहाँ पसारसि हाथ भिखारी ॥
 आगे देखि पाँव धरु, नाथा । तहाँ न हेरु टूट जहँ माथा ॥

वह रानी तेहि जौग है, जाहि राज औ पाटु ।

सुंदर जाइहि राजघर, जोगहि बाँदर काटु ॥४॥

जौं जोगी सत बाँदर काटा । एकै जोग, न दूसरि बाटा ॥
 और साधना आवै साधे । जोग-साधना आपुहि दाधे ॥
 सरि पहुँचाव जोगि कर साथू । दिस्टि चाहि अगमन होइ हाथू ॥
 तुम्हरे जोर सिंघल के हाथी । हमरे हस्ति गुरु हैं साथी ॥
 अस्ति नास्ति ओहि करत न बारा । परबत करै पाँव कै छारा ॥
 जोर गिरे गढ जावत भए । जे गढ गरब करहिं ते नए ॥
 अंत क चलना कोइ न चीन्हा । जो आवा सो आपन कीन्हा ॥
 जोगिहि कोह न चाहिय, तस न मोहिं रिस लागि ।

जोग तंत ज्यौं पानी, काह करै तेहि आगि ? ॥५॥

बसिठन्ह जाइ कही अस बाता । राजा सुनत कोह भा राता ॥
 ठावहिं ठाँव कुँवर सब माखे । केइ अब लीन्ह जोग, केइ राखे ॥
 अबहिं बेगहि करौ सँजोऊ । तस मारहु हत्या नहिं होऊ ॥
 मंत्रिन्ह कहा रहौ मन बूझे । पति न होइ जोगिन्ह सौं जूझे ॥
 ओहि मारे तौ काह भिखारी । लाज होइ जौं माना हारी ॥
 ना भल मुए, न मारे मोखू । दुवौ बात लागै सम दोखू ॥

रहे देहु जौं गढ़ तर मेले । जोगी कित आछैं बिनु खेले ॥

आछे देहु जो गढ़ तरे , जनि चालहु यह बात ।

तहँ जो पाहन भख करहिनँ , अस केहिके मुख दाँत ॥६॥

गए बसीठ पुनि बहुरि न आए । राजै कहा बहुत दिन लाए ॥

न जनों सरग बात दहँ काहा । काहु न आइ कही फिरि चाहा ॥

पंख न काया, पौन न पाया । केहि बिधि मिलौ होइ कै छाया ? ॥

सँवरि रक्त नैनहिँ भरि चूआ । रोइ हँकारेसि माझी सूआ ॥

परी जो आसु रक्त कै टूटी । रेंगि चलीं जस बीरबहूटी ॥

ओहि रक्त लिखि दीन्ही पाती । सुआ जो लीन्ह चोंच भइ राती ॥

बाँधी कंठ परा जरि काँठा । बिरह क जरा जाइ कित नाठा ? ॥

मसि नैना, लिखनी बरुनि, रोइ रोइ लिखा अकत्थ ।

आखर दहै , न कोइ छुवै , दीन्ह परेवा हत्थ ॥७॥

औ मुख बचन जो कहा परेवा । पहिले मोरि बहुत कहि सेवा ॥

पुनि रे सँवार कहेसि अस दूजी । जो बलि दीन्ह देवतन्ह पूजी ॥

सो अबहिँ तुम्ह सेव न लागा । बलि जिउ रहा, न तन सो जागा ॥

भलेहि ईस हू तुम्ह सेव न लागा । बलि जिउ रहा, न तनि सो जागा ॥

जौ तुम्ह मया कीन्ह पगु धारा । दिस्टि देखाइ वान बिष मारा ॥

जो जाकर अस आसामुखी । दुख महँ ऐस न मारै दुखी ॥

नैन भिखारि न मानहिँ सीखा । आगमन दौरि देहिँ पै भीखा ॥

नैनहिँ नैन जो बेधि गए , नहिँ निकसैं वे वान ।

हिये जो आखर तुम्ह लिखे, ते सुठि लीन्ह परान ॥८॥

ते बिषवान लिखों कहँ ताई । रक्त जो चुआ भीजि दुनियाई ॥

जान जो गारै रक्त पसेऊ । सुखी न जान दुखी कर भेऊ ॥

जेहि न पीर तेहिँ काकरि चिंता । पीतम निटुर होइँ अस निंता ॥

कासों कहों बिरह कै भाषा । जासौ कहों होइ जरि राखा ॥

बिरह आगि तन बन बन जरे । नैन नीर सब सायर भरे ॥

पाती लिखी सँवरि तुम्ह नावाँ । रक्त लिखे आखर भए सावाँ ॥

आखर जरहिँ न काहू छूआ । तब दुख देखि चला लेइ सूआ ॥

अब सुठि मरौं, छूछि गइ (पाती) पेम पियारे हाथ ।

भेंट होत दुख रोइ सुनावत जीउ जात जौं साथ ॥९॥

कंचन तार बाँधि गिउ पाती । लेई गा सुआ जहाँ धनि राती ॥

जैसे कँवल सूर के आसा । नीर कंठ लहि मरत पियासा ।

बिसरा भौग सेज सुख-बासा । जहाँ भौर सब तहाँ हुलासा ॥

तौ लगी धीर सुना नहिँ पीऊ । सुना त घरी रहै नहिँ जीऊ ।

तौ लगी सुख हिय पेम न जाना । जहाँ पेम कत सुख बिसरामा ॥

अगर चंदन सुठि दहै सरीरू । औ भा अगिनि क्या कर चीरू ॥

कथा कहानी सुनि जिउ जरा । जानहुँ घीउ बसंदर परा ॥

बिरह न आपु सँभारै , मैल चीर , सिर रूख ।

पिउ पिउ करत राति दिन , जस पपिहा मुख सूख ॥१०॥

ततखन गा हीरामन आई । मरत पियास छाँह जनु पाई ॥

भल तुम्ह सुआ ? कीन्ह है फेरा । कहहु कुसल अब पीतम केरा ॥

बाट न जानौं, अगम पहारा । हिरदय मिला न होइ निनारा ॥

मरम पानि कर जान पियासा । जो जल महुँ ता कहँ का आसा? ॥
 का रानी यह पूछहु बाता । जिन कोइ होइ पेम कर राता ॥
 तुम्हरे दरसन लागि बियोगी । अहा सो महादेव मठ जोगी ॥
 तुम्ह बसंत लेइ तहाँ सिधाई । देव पूजि पुनि ओहि पहुँ आई ॥
 दिस्टि बान तस मारेहु, घायल भा तेहि ठाँव ।

दूसरि बात न बोलै, लेइ पदमावति नाँव ॥११॥

रोवँ रोवँ वै बान जो फूटे । सूतहि सूत रुहिर मुख छूटे ॥
 नैनहिं चली रक्त कै धारा । कंथा भीजि भएउ रतनारा ॥
 सूरुज बूडि उठा होई ताता । औ मजीठ टेसू बन राता ॥
 भा बसंत रातीं बनसपती । औ राते सब जोगी जती ॥
 पुहुमि जो भीजि, भएउ सब गेरू । औ राते तहुँ पंखि पखेरू ॥
 राती सती अग्नि सब काया । गगन मेघ राते तेहि छाया ॥
 ईगुर भा पहार जौं भीजा । पै तुम्हार नहिं रोवँ पसीजा ॥
 तहाँ चकोर कोकिला, तिन्ह हिय मया पईठि ।

नैन रक्त भरि आए, तिन्ह फिरि कीन्ह न दीठ ॥१२॥

ऐस बसंत तुमहिं पै खेलहु । रक्त पराए सेंदुर मेलेहु ॥
 तुम्ह तौ खेलि मँदिर महुँ आई । ओहि क मरम पै जान गोसाई ॥
 कहेसि जरै को बारहि बारा । एकहि बार होहुँ जरि छारा ॥
 सर रचि चहा आगि जो लाई । महादेव गौरी सुधि पाई ॥
 आइ बुझाइ दीन्ह पथ तहाँ । मरन-खेल कर आगम जहाँ ॥
 उलटा पंथ पेम के बारा । चढै सरग, जौ परै पतारा ॥
 अब धँसि लीन्ह चहै तेहि आसा । पावै साँस, कि मरै निरासा ॥
 पाती लिखि सो पठाई, इहै सबै दुख रोइ ।

दहुँ जिउ रहै कि निसरै, काह रजायसु होइ ॥१३॥

कहि कै सुआ जो छोडेसि पाती । जानहु दीप छुवत तस ताती ॥
 गीउ जो बाँधा कंचन-तागा । राता साँव कंठ जरि लागा ॥
 अग्नि साँस सँग निसरै ताती । तरुवर जरहिं ताहि कै पाती ॥
 रोइ रोइ सुआ कहै सो बाता । रक्त कै आँसु भएउ मुख राता ॥
 देख कंठ जरि लाग सो गेरा । सो कस जरै बिरह अस घेरा ॥
 जरि जरि हाड भयउ सब चूना । तहाँ मासु का रक्त बिहूना ॥
 वह तोहि लागि कथा सब जारी । तपत मीन, जल देहि पवारी ॥
 तोहि कारन वह जोगी, भसम कीन्ह तन दाह ।

तू असि निठुर निछोही, बात न पूछै ताहि ॥१४॥

कहेसि सुआ ! मोसौं सुनु बाता । चहौं तो आज मिलौं जस राता ॥
 पै सो मरम न जाना भोरा । जानै प्रीति जो मरि कै जोरा ॥
 हौं जानति हौं अबही काँचा । ना वह प्रीति रंग थिर राँचा ॥
 ना वह भएउ मलयगिरि बासा । ना वह रवि होइ चढा अकासा ॥
 ना वह भयउ भौर कर रंगू । ना वह दीपक भएउ पतंगू ॥
 ना वह करा भृंग कै होई । ना वह आपु मरा जिउ खौई ॥
 ना वह प्रेम औटि एक भएउ । ना ओहि हिये माँझ डर गयऊ ॥
 तेहि का कहिय जिउ रहै जो पीतम लागि ।

जहँ वह सुनै लेइ धँसि, का पानी, का आगि ॥१५॥

पुनि धनि कनक-पानि मसि माँगी । उतर लिखत भीजी तन आँगी ॥
 तस कंचन कहँ चहिय सोहागा । जौं निरमल नग होइ तौ लागा ॥
 हौं जो गई सिव मंडप भोरी । तहँवाँ कस न गाँठि तैं जोरी ॥
 भा बिसँभार देखि कै नैना । सखिन्ह लाज का बोलौं बैना ? ॥
 खेलहिं मिस में चंदन घाला । मकु जागसि तौं देउँ जयमाला ॥
 तबहुँ न जागा, गा तू सोई । जागे भेंट, न सोए होई ॥
 अब जौं सूर होइ चढै अकासा । जौं जिउ देइ त आवै पासा ॥

तौ लागि भुगुति न लेइ सका, रावन सिय जब साथ ।

कौन भरोसे अब कहौं, जीउ पराए हाथ ॥१६॥

अब जौं सूर गगन चढि आवै । राहु होइ तौ ससि कहँ पावै ॥
 बहुतन्ह ऐस जीउ पर खेला । तू जोगी कित आहि अकेला ॥
 विक्रम धँसा प्रेम के बारा । सपनावति कहँ गएउ पतारा ॥
 मधुपाछ मुगुधावति लागी । गगनपूर होइगा बैरागी ॥
 राजकुँवर कंचनपुर गयऊ । मिरगावति कहँ जोगी भएऊ ॥
 साध कुँवर खंडावत जोगू । मधु-मालति कर कीन्ह वियोगू ॥
 प्रेमावति कहँ सुरपुर साधा । ऊषा लागि अनिरुध बर बाँधा ॥

हौं रानी पदमावती, सात सरग पर बास ।

हाथ चढौं मैं तोहिके, प्रथम करै अपनास ॥१७॥

हौं पुनि इहाँ ऐस तोहि राती । आधी भेंट पिरीतम-पाती ॥
 तहँ जौ प्रीति निबाहै आँटा । भौर न देख केत कर काँटा ॥
 होइ पतंग अधरन्ह गहु दीया । लेसि समुद धँसि होइ सीप सेवाती ॥
 चातक होइ पुकारु, पियासा । पीउ न पानि सेवाति कै आसा ॥
 सारस कर जस बिछुरा जोरा । नैन होइ जस चंद चकोरा ॥
 होहि चकोर दिस्टि ससि पाहाँ । औ रबि होहि कँवलदल माहाँ ॥
 महुँ ऐसै होउँ तोहि कहँ, सकहि तौ ओर निबाहु ।

रोहु बेधि अरजुन होइ, जीतु दुरपदी ब्याहु ॥१८॥

राजा इहाँ ऐस तप झूरा । भा जरि बिरछ छार कर कूरा ।
 नैन लाइ सो गएउ बिमोही । भा बिनु जिउ, दीन्हेसि ओही ॥
 कहँ पिंगला सुखमन नारी । सूनि समाधि लागि गइ तारी ॥
 बूँद समुद्र जैस होइ मेरा । गा हेराई अस मिलै न हेरा ।
 रंगहि पान मिला जस होई । आपहि खोइ रहा होइ सोई ॥
 सुए जाइ जब देखा तासू । नैन रकत भरि आए आँसू ॥
 सदा पिरीतम गाढ करेई । ओहि न भुलाइ, भूलि जिउ देई ॥

मूरि सजीवन आनि कै, औ मुख मेला नीर ।

गरुड पंख जस झारै, अमृत बरसा कीर ॥१९॥

मुआ जिया बास जो पावा । लीन्हेसि साँस, पेट जिउ आवा ॥
 देखेसि जागि, सिर नावा । पाती देइ मुख बचन सुनावा ॥
 गुरु क बचन स्रवन दुइ मेला । कीन्ह सुदिस्टि, बेगु चलु चेला ॥
 तोहि अलि कीन्ह आप भइ केवा । हौं पठवा गुरु बीच परेवा ॥
 पौन साँस तोसौं मन लाई । जोवै मारग दिस्टि बिछाई ॥
 जस तुम्ह कया कीन्ह अगिदाहू । सो सब गुरु कहँ भएउ अगाहू ॥

तव उदंत लिखि दीन्हा । वेगि आउ , चअहै सिध कीन्हा ॥

आवहु सामि सुलचछना, जीउ बसै तुम्ह नाँव ।

नैनहिं भीतर पंथ है , हिरदय भीतर ठावँ ॥२०॥

सुनि पदमावति कै असि मया । भा बसंत, उपनी नइ कया ॥

सुआ क बोल पौन होइ लागा । उठा सोइ, हनुवँत अस जागा ॥

चाँद मिलै कै दीन्हेसि आसा । सहसौ कला सूर परगासा ॥

पाति लीन्ह, लेइ सीस चढावा । दीठि चकोर चंद जस पावा ॥

आस पियासा जो जेहि केरा । जों झिझकार, ओहि सहुँ हेरा ॥

अब यह कौन पानि मैं पीया । भा तन पाँख, पतँग मरि जीया ॥

उठा फुलि हिरदय न समाना । कंथा टूक टूक बेहराना ॥

जहाँ पिरितम वै बसहिं, यह जिउ बलि तेहि बाट ।

वह जौ बोलावै पावँ सौं, हौं तहँ चलौ लिलाट ॥२१॥

जो पथ मिला महेसहि सेई । गएउ समुद ओहि धँसि लेई ॥

जहँ वह कुंड विषम औगाहा । जाइ परा तहँ पाव न थाहा ॥

बाउर अंद पेम कर लागू । सौहँ धँसा, किछु सूझ न आगू ॥

लीन्हे सिधि साँसा मन मारा । गुरू मछंदरनाथ सँभारा ॥

चेला परे न छाँडहि पाछू । चेला मच्छ , गुरू जस काछू ॥

जस धँसि लीन्ह समुद मरजीया । उघरे नैन, बरै जस दीया ॥

खोजि लीन्ह सो सरग-दुआरा । बज्र जो मूँदे जाइ उघारा ॥

बाँक चढाव सरग गढ , चढत गएउ होइ भोर ।

भइ पुकार गढ ऊपर, चढे सेंधि देइ चोर ॥२२॥

२४.गंधर्वसेन मंत्री खंड

राजै सुनि, जोगी गढ चढे । पूछै पास जो पंडित पढे ॥

जोगी गढ जो सेंधि दै आवहिं । बोलहु सबद सिद्धि जस पावहिं ॥

कहहिं वेद पढि पंडित बेदी । जोगि भौर जस मालति भेदी ॥

जैसे चोर सेंधि सिर मेलहिं । तस ए दुवौ जीउ पर खेलहिं ॥

पंथ न चलहिं वेद जस लिखा । सरग जाए सूरी चढि सिखा ॥

चोर होइ सूरी पर मोखू । देइ जौ सूरी तिन्हहि नहिं दोखू ॥

चोर पुकारि बेधि घर मूसा । खेलै राज भँडार मँजूसा ॥

जस ए राजमँदिर महँ, दीन्ह रेनि कहँ सेंधि ।

तस छेंकहु पुनि इन्ह कहँ , मारहु सूरी बेधि ॥१॥

राँध जो मंत्री बोले सोई । एस जो चोर सिद्धि पै कोई ॥

सिद्ध निसंक रैनि दिन भवँहीं । ताका जहाँ तहाँ अपसवहीं ॥

सिद्ध निडर अस अपने जीवा । खडग देखि कै नावहिं गीवा ॥

सिद्ध जाइ पै जिउ बध जहाँ । औरहि मरन पंख अस कहाँ ॥

चढा जो कोपि गगन उपराहीं । थोरे साज मरै सो नाहीं ॥

जंबूक जूझ चढै जौ राजा । सिंध साज कै चढै तौ छाजा ॥

सिद्ध अमर, काया जस पारा । छरहिं मरहि, बर जाई न मारा ॥

छरही काज कृस्न कर , राजा चढै रिसाइ ।

सिद्धगिद्ध जिन्ह दिस्टि गगन पर , बिनु छर किछु न बसाइ ॥२॥

अबहीं करहु गुदर मिस साजू । चढहिं बजाइ जहाँ लगी राजू ॥
होहिं सँजोवल कुँवर जो भोगी । सब दर छेंकि धरहिं अब जोगी ॥
चौबिस लाख छत्रपति साजे । छपन कोटि दर बाजन बाजे ॥
बाइस सहस हस्ति सिंघली । सकल पहार सहित महि हली ॥
जगत बराबर वै सब चाँपा । डरा इंद्र बासुकि हिय काँपा ॥
पदुम कोट रथ साजे आवहिं । गिरि होइ खेह गगन कहँ धावहिं ॥
जनु भुईँचाल चलत महि परा । टूटी कमठ पीठि, हिय डरा ॥

छत्रहि सरग छाइगा, सूरज गयउ अलोपि ।

दिनहिं राति अस देखिय, चढा इंद्र अस कोपि ॥३॥

देखि कटक औ मैमँत हाथी । बोले रतनसेन कर साथी ॥
होत आव दल बहुत असूझा । अस जानिय किछु होइहि जूझा ॥
राजा तू जोगी होइ खेला । एही दिवस कहँ हम भए चेला ॥
जहाँ गाढ ठाकुर कहँ होई । संग न छाँडै सेवक सोई ॥
जो हम मरन दिवस मन ताका । आजु आइ पूजी वह साका ॥
बरु जिउ जाइ, जाइ नहिं बोला । राजा सत-सुमेरु नहिं बोला ॥
गुरु केर जाँ आयसु पावहिं । सौँह होहिं औ चक्र चलावहिं ॥

आजु करहिं रन भारत, सत बाचा देइ राखि ।

सत्य देख सब कौतुक , सत्य भरै पुनि साखि ॥४॥

गुरु कहा चेला सिध होहू । पेम-बारहोइ करहु न कोहू ॥
जाकहँ सीस नाइ कै दीजै । रंग न होइ ऊभ जाँ कीजै ॥
जेहि जिउ पेम पानि भा सोई । जेहि रँग मिलै ओहि रँग होई ॥
जाँ पै जाइ पेम सौँ जूझा । कित तप मरहिं सिद्ध जो बूझा ॥
एहि सेंति बहुरि जूझ नहिं करिए । खड्ग देखि पानी होइ ढरिए ॥
पानिहि काह खड्ग कै धारा । लौटि पानि होइ सोइ जोप मारा ॥
पानी सेंती आगि का करई । जाइ बुझाइ जाँ पानी परई ॥

सीस दीन्ह मै अगमन, पेम पानि सिर मेलि ।

अब सो प्रीति निबाहौं , चलौं सिद्ध होइ खेलि ॥५॥

राजै छेंकि धरे सब जोगी । दुख ऊपर दुख सहै बियोगी ॥
ना जिउ धरक जरत होइ कोई । नाहीं मरन जियन डर होई ॥
नाग फाँस उन्ह मेला गीबा । हरख न बिसमाँ एकौ जीबा ॥
जेइ जिउ दीन्ह सो लेइ निकासा । बिसरै नहिं जाँ लहि तन सासा ॥
कर किंगरी तेहि तंतु बजावै । इहै गीत बैरागी गावै ॥
भलेहि आनि गिउ मेली फाँसी । है न सोच हिय, रिस सब नासी ॥
मैं गिउ फाँद ओहि दिन मेला । जेहि दिन पेम पंथ होइ खेला ॥

परगट गुपुत सकल महँ पूरि रहा सो नावँ ।

जहँ देखौं तहँ ओही, दूसर नहिं जहँ जावँ ॥६॥

जब लगी गुरु हौं अहा न चीन्हा । कोटि अंतरपट बीचहि दीन्हा ॥
जब चीन्हा तब और न कोई । तन मन जिउ जीवन सब सोई ॥
हौं हौं करत धोख इतराहीं । जय भा सिद्ध कहाँ परछाहीं ॥
मारै गुरु, कि गुरु जियावै । और को मार? मरै सब आवै ॥

सूरी मेलु , हस्ति करु चुरु । हौं नहिं जानौं, जानै गुरु ॥
 गुरु हस्ति पर चढा सो पेखा । जगत जो नास्ति, नास्ति पै देखा ॥
 अंध मीन जस जल महँ धावा। जल जीवन चल दिस्टि न आवा ॥
 गुरु मोरे मोरे हिये, दिए तुरंगम ठाठ ।

भीतर करहिं डोलावै, बाहर नाचै काठ ॥७॥

सो पदमावति गुरु हौं चेला । जोग-तंत जेहि कारन खेला ॥
 तजि वह बार न जानौं दूजा । जेहि दिन मिलै, जातरा-पूजा ॥
 जीउ काढ़ि भुईं धरौं लिलाटा । ओहि कहँ देउँ हिये महँ पाटा ॥
 को मोहिं ओहि छुआवै पाया । नव अवतार, देइ नइ काया ॥
 जीउ चाहि जो अधिक पियारी । माँगै जीउ देउँ बलिहारी ॥
 माँगै सीस, देउँ सह गीवा । अधिक तरौ जौं मारै जीवा ॥
 अपने जिउ कर लोभ न मोहीं । पेम बार होइ माँगों ओही ॥
 दरसन ओहि कर दिया जस, हौ सो भिखारि पतंग ।

जो करवत सिर सारै , मरत न मोरौं अंग ॥८॥

पदमावति कँवला ससि जोती । हँसे फूल, रोवै सब मोती ॥
 बरजा पितै हँसी औ रोजू । लागे दूत, होइ निति खोजू ॥
 जबहिं सुरुज कहँ लागा राहू । तबहिं कँवल मन भएउ अगाहू ॥
 बिरह अगस्त जो बिसमौ उएऊ । सरवर हरष सूखि सब गएऊ ॥
 परगट ढारि सके नहिं आँसू । घटि घटि माँसु गुपुत होइ नासू ॥
 जस दिन माँझ रैनि होइ आई । बिगसत कँवल गएउ मुरझाई ॥
 राता बदन गएउ होइ सेता । भँवत भँवर रहि गए अचेता ॥
 चित्त जो चिंता कीन्ह धनि, रोवै रोवै समेत ।

सहस साल सहि, आहि भरि, मुरुछि परी, गा चेत ॥९॥

पदमावति सँग सखी सयानी । गनत नखत सब रैनि बिहानी ॥
 जानहिं मरम कँवल कर कोई । देखि बिथा बिरहिन के रोई ॥
 बिरहा कठिन काल कै कला । बिरह न सहै, काल बरु भला ॥
 काल काढ़ि जिउ लेइ सिधारा । बिरह-काल मारे पर मारा ॥
 बिरह आगि पर मेलै आगी । बिरह घाव पर घाव बजागी ॥
 बिरह बान पर बान पसारा । बिरह रोग पर रोग सँचारा ॥
 बिरह साल पर साल नवेला । बिरह काल पर काल दुहेला ॥
 तन रावन होइ सर चढा, बिरह भयउ हनुवंत ।

जारे ऊपर जाँरै , चित मन करि भसमंत ॥१०॥

कोइ कुमोद पसारहिं पाया । कोइ मलयगिरि छिरकहिं काया ॥
 कोइ मुख सीतलल नीर चुवावै । कोइ अंचल सौं पौन डोलावै ॥
 कोई मुख अमृत आनि निचोवा । जनु बिष दीन्ह, अधिक धनि सीबा ॥
 जोवहिं साँस खिनहि खिन सखी । कब जिउ फिरै पौन-पर पँखी ॥
 बिरह काल होइ हिये पईठा । जीउ काढ़ि लै हाथ बईठा ॥
 खिनहिं मौन बाँधे, खिन खोला । गही जीभ मुख आव न बोला ॥
 खिनहिं बेझि कै बानन्ह मारा । कँपि कँपि नारि मरै बेकरारा ॥
 कैसेहु बिरह न छँडे भा ससि गहन गरास ।

नखत चहँ दिसि रोवहिं, अंधर धरति अकास ॥११॥

घरि चारि इमि गहन गरासी । पुनि बिधि हिये जोति परगासी ॥
 निरसँस ऊभि भरि लीन्हेसि साँसा । भा अधार, जीवन कै आसा ॥
 बिनवहिं सखी, छूट ससि राहू । तुम्हरी जोति जोति सब काहू ॥
 तू ससि-बदन जगत उजियारी । केइ हरि लीन्ह, कीन्ह अँधियारी ॥
 तू गजगामिनि गरब गरेली । अब कस आस छाँड तू , बेली ॥
 तू हरि लंक हराए केहरि । अब कित हारि करति है हिय हरि ॥
 तू कोकिल-बैनी जग मोहा । केइ व्याधा होइ गहा निछोहा ॥
 कँवल कली तू पदमिनि! गइ निसि भयउ बिहान ।

अबहुँ न संपुट खोलसि, जब रे उआ जग भानु ॥१२॥

भानु नावँ सुनि कँवल बिगासा । फिरि कै भौर लीन्ह मधु बासा ॥
 सरद चंद मुख जबहिं उघेली । खंजन नैन उठे करि केली ॥
 बिरह न बोल आव मुख ताई । मरि मरि बोल जीउ बरियाई ॥
 दवँ बिरह दारुन, हिय काँपा । खोलि न जाइ बिरह-दुख झाँपा ॥
 उदधि समुद जस तरग देखावा । चख घूमहिं, मुख बात न आवा ॥
 यह सुनि लहरि लहरि पर धावा । भँवर परा, जिउ थाह न पावा ॥
 सखि आनि बिष देहु तौ मरऊँ । जिउ न पियार, मरै का डरऊँ ॥

खिनहिं उठै, खिन बूडै, अस हिय कँवल सँकेत ।

हीरामनहि बुलावहि, सखी गहन जिउ लेत ॥१३॥

चेरी धाय सुनत खिन घाई । हीरामन लेइ आइँ बोलाई ॥
 जनहु बैद ओषद लेइ आवा । रोगिया रोग मरत जिउ पावा ॥
 सुनत असीस नैन धनि खोले । बिरह-बैन कोकिल जिमि बोले ॥
 कँवलहिं बिरह-बिथा जस बाढी । केसर-बरन पीर हिय गाढी ॥
 कित कँवलहिं भा पेम-अँकूरु । जो पै गहन लेहि दिन सूरु ॥
 पुरइनि-छाँह कँवल कै करी । सकल बिथा सुनि अस तुम हरी ॥
 पुरुष गभीर न बोलहिं काहू । जो बोलहिं तौ और निवाहू ॥
 एतनै बोल कहत मुख, पुनि होइ गई अचेत ।

पुनि को चेत सँभारै? उहै कहत मुख सेत ॥१४॥

और दगध का कहौं अपारा । सती सो जरै कठिन अस द्वारा ॥
 होई हनुबंत पैठ है कोई । लंकादाहु लागु करै सोई ॥
 लंका बुझी आगि जौ लागी । यह न बुझाइ आँच बज्रागी ॥
 जनहु अगिनि के उठहिं पहारा । औ सब लागहिं अंग अंगारा ॥
 कटि कटि माँसु सराग पिरोवा । रक्त कै आँसु माँसु सव रोवा ॥
 खिन एक बार माँसु अस भूँजा । खिनहिं चबाइ सिंघ अस गूँजा ॥
 एहि रे दगध हुँत उतिम मरीजै । दगध न सहिय, जीउ बरु दीजै ॥

जहँ लागि चंदन मलयगिरि, औ सायर सब नीर ।

सब मिलि आइ बुझावहिं, बुझै न आगि सररीर ॥१५॥

हीरामन जौ देखेसि नारी । प्रीति-बेल उपनी हिय-बारी ॥
 कहेसि कस न तुम्ह होहु दुहेली । अरुझी पेम जो पीतम बेली ॥
 प्रीति बेलि जिनि अरुझै कोई । अरुझै, मुए न छूटै सोई ॥
 प्रीति बेलि ऐसै तन डाढा । पलुहत सुख, बाढत दुख बाढा ॥
 प्रीति बेलि कै अमर को बोई । दिन दिन बढ़ै, छीन नहिं होई ॥

प्रीति बेलि सँग बिरह अपारा । सरग पतार जरै तेहि झारा ॥
प्रीति अकेलि बेलि चढि छावा। दूसर बेलि न सँचरै पावा ॥

प्रीति बेलि अरुझै जब, तब सुछाँह सुख साख ।

मिलै पीरीतम आइ कै, दाख बेलि रस चाख ॥१६॥

पदमावति उठि टेकै पाया । तुम्ह हुँत देखौं पीतम-छाया ॥
कहत लाज औ रहै न जीऊ । एक दिसि आगि दुसर दिसि पीऊ ॥
सूर उदयगिरि चढत भुलाना । गहने गहा, कँवल कुँभिलाना ॥
ओहट होइ मरौं तौ झूरी । यह सुठि मरौं जो नियर, न दूरी ॥
घट महुँ निकट, बिकट होइ मेरू । मिलहि न मिले, परा तस फेरू ॥
तुम्ह सो मोर खेवक गुरु देवा । उतरौं पार तेही बिधि खेवा ॥
दमनहिं नलहिं जो हंस मेरावा । तुम्ह हीरामन नावँ कहावा ॥
मूरि सजीवन दूरि है, सालै सकती बानु ।

प्राण मुकुत अब होत है, बेगि देखावहु भानु ॥१७॥

हीरामन भुई धरा लिलाटू । तुम्ह रानी जुग जुग सुख-पाटू ॥
जेहि के हाथ सजीवन मूरी । सो जानिय अब नाहीं दूरी ॥
पिता तुम्हार राज कर भोगी । पूजै बिप्र मरावै जोगी ॥
पौरि पौरि कोतवार जो बैठा । पेम कलुबुध सुरग होइ पैठा ॥
चढत रैनि गढ होइगा भोरू । आवत बार धरा कै चोरू ॥
अब लेइ गए देइ ओहि सूरी । तेहि सौं अगाह बिथा तुम्ह पूरी ॥
अब तुम्ह जिउ काया वह जोगी । कया क रोग जानु पै रोगी ॥

रूप तुम्हार जीउ कै (आपन) पिंड कमावा फेरि ।

आपु हेराइ रहा, तेहि काल न पावै हेरि ॥१८॥

हीरामन जो बात यह कही । सूर गहन चाँद तब गही ॥
सूर के दुख सौं ससि भइ दुखी । सो कित दुख मानै करमुखी ॥
अब जाँ जोगि मरै मोहि नेहा । मोहि ओहि साथ धरति गगनेहा ॥
रहै त करौं जनम भरि सेवा । चलै त, यह जिउ साथ परेवा ॥
कहेसि कि कौन करा है सोई । पर काया परवेस जो होई ॥
पलटि सो पंथ कौन बिधि खेला । चेला गुरु, गुरु भा चेला ॥
कौन खंड अस रहा लुकाई । आवै काल, हेरि फिरिजाई ॥

चेला सिद्धि सो पावै, गुरु सौं करै अछेद ।

गुरु करै जो किरिपा, पावै चेला भेद ॥१९॥

अनु रानी तुम गुरु, वह चेला । मोहि बूझहु कै सिद्ध नवेला ॥
तुम्ह चेला कहँ परसन भई । दरसन देइ मँडप चलि गई ॥
रूप गुरु कर चलै डीठा । चित समाइ होइ चित्र पर्ईठा ॥
जीउ काढि लै तुम्ह अपसई । वह भा कया, जीव तुम्ह भई ॥
कया जो लाग धूप औ सीऊ । कया न जान, जान पै जीऊ ॥
भोग तुम्हार मिला ओहि जाई । जो ओहि बिथा सो तुम्ह कहँ आई ॥
तुम ओहिके घट, वह तुम माहाँ । काल कहाँ पावै वह छाहाँ ॥

अस वह जोगी अमर भा, पर काया परवेस ।

आवै काल, गुरुहि तहँ, देखि सो करै अदेस ॥२०॥

सुनि जोगी कै अमर जो करनी । नेवरी बिथा बिरह कै मरनी ॥
 कवैल-करी होइ बिगसा जीऊ । जनु रवि देख छूटि गा सीऊ ॥
 जो अस सिद्ध को मारै पारा ? निपुरुष तेई जरै होइ छारा ॥
 कहौ जाइ अब मोर सँदेसू । तजौ जोग अब, होइ नरेसू ॥
 जिनि जानहु हौं तुम्ह सौं दूरी । नैनन माँझ गडी वह सूरी ॥
 तुम्ह परसेद घटे घट केरा । मोहिं घट जीव घटत नहिं बेरा ॥
 तुम्ह कहँ पाट हिये महुँ साजा । अब तुम मोर दुहुँ जग राजा ॥
 जौं रे जियहिं मिलि गर रहहिं, मरहिं त एकै दोउ ।
 तुम्ह जिउ कहँ जिनि होइ किछु, मोहिं जिउ होउ सो होउ ॥२१॥

२५.रत्नसेन सूली खंड

बाँधि तपा आने जहँ सूरी । जुरे आई सब सिंघलपूरी ॥
 पहिले गुरुहि देइ कह आना । देखि रूप सब कोइ पछिताना ॥
 लोग कहहिं यह होइ न जोगी । राजकुँवर कोइ अहै बियोगी ॥
 काहुहि लागि भएउ है तपा । हिये सो माल, करहु मुख जपा ॥
 जस मारै कहँ बाजा तूरु । सूरी देखि हँसा मंसूरु ॥
 चमके दसन भएउ उजियारा । जो जहँ तहाँ बीजू अस मारा ॥
 जोगी केर करहु पै खोजू । मकु यह होइ न राजा भोजू ॥
 सब पूछहिं, कहु जोगी! जाति जनम औ नाँव ।

जहाँ ठाँव रोवै कर, हँसा सो कहु केहि भाव ॥१॥

का पूछहु अब जाति हमारी । हम जोगी औ तपा भिखारी ॥
 जोगिहि कौन जाति, हो राजा । गारि न कोह, मारि नहिं लाजा ॥
 निलज भिखारि लाज जेइ खोई । तेहि के खोज परै जिनि कोई ॥
 जाकर जीउ मरै पर बसा । सूरि देखि सो कस नहिं हँसा? ॥
 आजु नेह सौ होइ निबेरा । आजु पुहुमि तजि गगन बसेरा ॥
 आजु कया पीजर वँदि टूटा । आजुहिं प्रान-परेवा छूटा ॥
 आजु नेह सौं होइ निनारा । आजु प्रेम-सँग चला पियारा ॥
 आजु अवधि सिर पहुँची, किए जाहु मुख रात ।

बेगि होहु मोहिं मारहु, जिनि चालहु यह बात ॥२॥

कहेन्हि सँवरु जेहि चाहसि सँवरा । हम तोहि करहिं केत कर भँवरा ॥
 कहेसि ओहि सँवरौं हरि फेरा । मुए जियत आहौं जेहि केरा ॥
 औ सँवरौं पदमावति रामा । यह जिउ नेवछावरि जेहि नामा ॥
 रकत क बूँद कया जस अहही । 'पदमावति पदमावति' कहही ॥
 रहै त बूँद बूँद महुँ ठाऊँ । परै त सोई लेइ लेइ नाऊँ ॥
 रोंब रोंब तन तासौं ओधा । सूतहि सूत बेधि जिउ सोधा ॥
 हाइहि हाइ सबद सो होई । नस नस माँह उठै धुनि सोई ॥

जागा बिरह तहाँ का, गूद माँसु कै हान ?।

हौं पुनि साँचा होइ रहा, ओहि के रूप समान ॥३॥

जोगिहि जबहिं गाढ अस परा । महादेव कर आसन टरा ॥
 वै हँसि पारबती सौं कहा । जानहुँ सूर गहन अस गहा ॥
 आजु चढे गढ ऊपर तपा । राजै गहा सूर तब छपा ॥

जग देखै गा कौतुक आजू । कीन्ह तपा मारै कहँ साजू ॥
 पारबती सुनि पाँयन्ह परी । चलि, महेस ! देखै एहि घरी ॥
 भेस भाँट भाँटिनि कर कीन्हा । औ हनुवंत भीर सँग लीन्हा ॥
 आए गुपुत होइ देखन लागी । वह मूरति कस सती सभागी ॥
 कटक असूझ देखि कै, राजा गरब करेइ ।

देउ क दशा न देखै, दहँ का कहँ जय देइ ॥४॥

आसन लेइ रहा होइ तपा । 'पदमावति पदमावति' जपा ॥
 मन समाधि तासौं धुनि लागी । जेहि दरसन कारन बैरागी ॥
 रहा समाइ रूप औ नाऊँ । और न सूझ बार जहँ जाऊँ ॥
 औ महेस कहँ करौं अदेस । जेइ यह पंथ दीन्ह उपदेसू ॥
 पारबती पुनि सत्य सराहा । औ फिरि मुख महेस कर चाहा ॥
 हिय महेस जौं, कहै महेसी । कित सिर नावहिं ए परदेसी ? ॥
 मरतहु लीन्ह तुम्हारहि नाऊँ । तुम्ह चित किए रहे एहि ठाऊँ ॥
 मारत ही परदेसी, राखि लेहु एहि बीर ।

कोइ काहू कर नाही जो होइ चलै न तीर ॥५॥

लेइ सँदेस सुअटा गा तहाँ । सूरी देहिं रतन कहँ जहाँ ॥
 लेइ सँदेस सुअटा गा तहाँ । सूरी देहिं रतन कहँ जहाँ ॥
 देखि रतन हीरामन रोवा । राजा जिउ लोगन्ह हठि खोवा ॥
 देखि रुदन हीरामन केरा । रोवहि सब, राजा मुख हेरा ॥
 माँगहि सब विधिना सौं रोई । कै उपकार छोडावै कोई ॥
 कहि सदेस सब बिपति सुनाई । बिकल बहुत, किछु कहा न जाई ॥
 काढि प्रान बैठी लेइ हाथा । मरै तौ मरौं, जिऔ एक साथी ॥
 सुनि सँदेस राजा तब हँसा । प्रान प्रान घट घट कहँ बसा ॥
 सुअटा भाँट दसौंधी, भए जिउ पर एक ठाँव ।

चलि सो जाइ अब देख तहँ, जहँ बैठा रह राव ॥६॥

राजा रहा दिस्टि के औंधी । रहि न सका तब भाँट दसौंधी ॥
 कहेसि मेलि कै हाथ कटारी । पुरुष न आछे बैठ पेटारी ॥
 कान्ह कोपि जब मारा कंसू । तब जाना पुरुष कै बंसू ॥
 गंध्रबसेन जहाँ रिस बाढा । जाइ भाँट आगे भा ठाढा ॥
 बोल गंध्रबसेन रिसाई । कस जोगी, कस भाँट असाई ॥
 ठाढ देख सव राजा राऊ । बाएँ हाथ दीन्ह बरम्हाऊ ॥
 जोगी पानि, आगि तू राजा । आगिहि पानि जूझ नहिं छाजा ॥

आगि बुझाइ पानि सौं, जूझु न, राजा ! बूझु ।

लीन्हे खप्पर बार तोहि, भिक्षा देहि, न झूझु ॥७॥

जोगि न होइ, आहि सो भोजू । जानहु भेद करहु सो खोजू ॥
 भारत ओइ जूझ जौ ओधा । होहिं सहाय आइ सब जोधा ॥
 महादेव रनघंट बजावा । सुनि कै सबद बरम्हा चलि आवा ॥
 फनपति फन पतार सौं काढा । अस्टौ कुरी नाग भए ठाढा ॥
 छप्पन कोटि बसंदर बरा । सवा लाख परबत फरहरा ॥
 चढै अत्र लै कृस्न मुरारी । इंद्रलोक सब लाग गोहारी ॥

तैंतिस कोटि देवता साजा । औ छानवे मेघदल गाजा ॥
नवौ नाथ चलि आवहिं, औ चौरासी सिद्ध ।

आजु महाभारत चले, गगन गरुड औ गिद्ध ॥८॥

भइ अज्ञा को भाँट अभाऊ । बाएँ हाथ देइ बरम्हाऊ ॥
को जोगी अस नगरी मोरी । जो देइ सेंधि चढै गड चोरी ॥
इंद्र डरै निति नावै माथा । जानत कृष्ण सेस जेइ नाथा ॥
बरम्हा डरै चतुर-मुख जासू । औ पातार डरै बलि बासू ॥
मही हलै औ चलै सुमेरू । चाँद सूर औ गगन कुबेरू ॥
मेघ डरै बिजूरी जेहि दीठी । कूरुम डरै धरति जेहि पठी ॥
चहाँ आजु माँगौ धरि केसा । और को कीट पतंग नरेसा? ॥

बोला भाँट, नरेस सुन, गरब न छाजा जीउ ।

कुंभकरन कै खोपरी, बूडत बाँचा भीउँ ॥९॥

रावन गरब बिरोधा रामू । आही गरब भएउ संग्रामू ॥
तस रावन अस को बरिबंडा । जेहि दस सीस, बीस भुजदंडा ॥
सूरुज जेहि कै तपै रसोई । नितहिं बसंदर धोती धोई ॥
सूक सुमंता, ससि मसिआरा । पौन करै निति बार बोहारा ॥
जमहिं लाइ कै पाटी बाँधा । रहा न दूसर सपने काधा ॥
जो अस बज्र टरै नहिं टारा । सोऊ मुवा दुइ तपसी मारा ॥
नाती पूत कोटि दस अहा । रोवनहार न कोई रहा ॥

ओछ जानि कै काहुहि, जिनि कोई गरब करेइ ।

ओछे पर जो देउ है, जीति पत्र तेइ देइ ॥१०॥

अब जो भाँट उहाँ हुत आगे । बिनै उठा राजहि रिस लागे ॥
भाँट अहै संकर कै कला । राजा सहँ राखें अरगला ॥
भाँट मीचु पै आपु न दीसा । ता कहँ कौन करै अस रीसा ॥
भएउ रजायसु गंध्रबसेनी । काहे मीचु के चढै नसेनी ॥
कहा आनि बानि अस पढै । करसि न बुद्धि भेंट जेहि कढै ॥
जाति भाँट कित औगुन लावसि । बाएँ हाथ राज बरम्हावसि ॥
भाँट नाँव का मारौ जीवा? । अबहँ बोल नाइ कै गीवा ॥

तूँरे भाँट ए जोगी, तोहि एहि काहे क संग ?।

काह छरे अस पावा, काह भएउ चित भंग ॥११॥

जौं सत पूछसि गंध्रब राजा । सत पै कहाँ परै नहिं गाजा ॥
भाँटहि काह मीचु सौं डरना । हाथ कटार, पेट हनि मरना ॥
जंबूदीप चित्तउर देसा । चित्रसेन बड़ तहाँ नरेसा ॥
रतनसेन यह ताकर बेटा । कुल चौहान जाइ नहिं मेटा ॥
खाँडै अचल सुमेरु पहारा । टरै न जौं लागै संसारा ॥
दान सुमेरु देत नहिं खाँगा । जो ओहि माँग न औरहि माँगा ॥
दाहिन हाथ उठाएउ ताही । और को अस बरम्हावौ जाही ? ॥

नाँव महापातर मोहिं, तेहिक भिखारी ढीठ ।

जौं खरि बात कहे रिस, लागै कहै बसीठ ॥१२॥

ततखन पुनि महेस मन लाजा । भाँट-करा होइ बिनवा राजा ॥
गंध्रबसेन ! तूँ राजा महा । हौं महेस मूरति, सुनु कहा ॥

जौ पै बात होइ भलि आगे । कहा चाहिय, का भा रिस लागे ॥
 राजकुंवर यह, होहि न जोगी । सुनि पदमावति भएउ बियोगी ॥
 जंबूदीप राजघर बेटा । जो है लिखा सो जाइ न मेटा ॥
 तुम्हरहि सुआ जाइ ओहि आना । औ जेहि कर,बर के तेइ माना ॥
 पुनि यह बात सुनी सिव लोका । करसि बियाह धरम है तोका ॥
 माँगै भीख खपर लेइ, मुए न छाँड़ै बार ।

बूझहु, कनक-कचोरी भीखि देहु, नहिं मार ॥१३॥

ओहट होहु रे भाँट भिखारी । का तू मोहिं देहि असि गारी ॥
 को मोहिं जोग जगत होइ पारा । जा सहुँ हेरौं जाइ पतारा ॥
 जोगी जती आव जो कोई । सुनतहि त्रासमान भा सोई ॥
 भीखि लेहिं फिरि मागहिं आगे । ए सब रैनि रहे गढ लागे ॥
 जस हींछा, चाहौं तिन्ह दीन्हा । नाहिं बेधि सूरी जिउ लीन्हा ॥
 जेहि अस साध होइ जिउ खोवा । सो पतंग दीपक अस रोवा ॥
 सुर, नर, मुनि सब गंध्रब देवा । तेहि को गनै करहि निति सेवा ॥
 मोसौं को सरवरि करै सुनु, रे झूठे भाँट? ।

छार होइ जौ चालौं, निज हस्तिन कर टाट ॥१४॥

जोगी धिरि मेले सब पाछे । उरए माल आए रन काछे ॥
 मंत्रिन्ह कहा, सुनहु हो राजा । देखहु अब जोगिन्ह कर काजा ॥
 हम जो कहा तुम्ह करहु न जूझु । होत आव दर जगत असूझु ॥
 खिन इक महँ झुरमुट होइ बीता । दर महँ चढि जो रहै सो जीता ॥
 कै धीरज राजा तब कोपा । अंगद आइ पाँव रन रोपा ॥
 हस्ति पाँच जो अगमन धाए । तिन्ह अंगद धरि सूड फिराए ॥
 दीन्ह उडाइ सरग कहँ गए । लौटि न फिरै, तहँहि के भए ॥

देखत रहे अचंभौ जोगी, हस्ती बहुरि न आय ।

जोगिन्ह कर अस जूझव, भूमि न लागत पाय ॥१५॥

कहहिं बात, जोगी अब आए । खिनक माहँ चाहत हैं भाए ॥
 जौ लहि धावहिं अस कै खेलहु । हस्तिन केर जूह सब पेलहु ॥
 जस गज पेलि होहिं रन आगे । तस बगमेल करहु सँग लागे ॥
 हस्ति क जूह आय अगसारी । हनुवँत तबै लँगूर पसारी ॥
 जैसे सेन बीच रन आई । सबै लपेटि लँगूर चलाई ॥
 बहुतक टूटि भए नौ खंडा । बहुतक जाइ परे बरम्हंडा ॥
 बहुतक भँवत सोइ अँतरीखा । रहे जो लाख भए ते लीखा ॥

बहुतक परे समुद महँ, परत न पावा खोज ।

जहाँ गरब तहँ पीरा, जहाँ हँसी तहँ रोज ॥१६॥

पुनि आगे का देखै राजा । ईसर केर घंट रन बाजा ॥
 सुना संख जो बिस्सू पूरा । आगे हनुवँत केर लँगूरा ॥
 लीन्हे फिरहिं लोक बरम्हंडा । सरग पतार लाइ मृदमंडा ॥
 बलि, बासुकि औ इंद्र नरिंदू । राहु, नखत, सूरुज औ चंदू ॥
 जावत दानव राच्छस पुरे । आठौं बज्र आइ रन जुरे ॥
 जेहि कर गरब करत हुत राजा । सो सब फिरि बैरी होइ साजा ॥

जहवाँ महादेव रन खडा । सीस नाइ पायँन्ह परा ॥
केहि कारन रिस कीजिए? हौं सेवक औ चेर ।

जेहि चाहिए तेहि दीजिय, बारि गोसाईं केर ॥१७॥

पुनिं महेस अब कीन्ह बसीठी । पहिले करुइ, सोइ अब मीठी ॥
तूँ गंधर्व राजा जग पूजा । गुन चौदह, सिख देइ को दूजा ॥
हीरामन जो तुम्हार परेवा । गा चितउर औ कीन्हेसि सेवा ॥
तेहि बोलाइ पूछहु वह देसू । दहुँ जोगी, की तहाँ नरेसू ॥
हमरे कहत न जौं तुम्ह मानहु । जो वह कहै सोइ परवाँनहु ॥
जहाँ बारि, बर आवा ओका । करहिं बियाह धरम बड तोका ॥
जो पहिले मन मानि न काँधे । परखै रतन गाँठि तब बाँधे ॥
रतन छपाए ना छपै, पारिख होइ सो परीख ।

घालि कसौटी दीजिए, कनक कचोरी भीख ॥१८॥

राजे जब हीरामन सुना । गएउ रोस, हिरदय महुँ गुना ॥
अज्ञा भई बोलावहु सोई । पंडित हुँते धोख नहिं होई ॥
एकहिं कहत सहस्र धाए । हीरामनहिं बेगि लेइ आए ॥
खोला आगे आनि मँजूसा । मिला निकसि बहु दिनकर रूसा ॥
अस्तुति करत मिला बहु भाँती । राजै सुना हिये भइ साँती ॥
जानहुँ जरत आगि जल परा । होइ फुलवार रहस हिय भरा ॥
राजै पुनि पूछी हँसि बाता । कस तन पियर, भएउ मुख राता ॥
चतुर वेद तुम पंडित, पढ़े शास्त्र औ वेद ।

कहा चढाएहु जोगिन्ह, आइ कीन्ह गढ़ भेद ॥१९॥

हीरामन रसना रस खोला । दै असीस, के अस्तुति बोला ॥
इंद्रराज राजेसर महा । सुनि होइ रिस, कछु जाइ न कहा ॥
पै जो बात होइ भलि आगे । सेवक निडर कहै रिस लागे ॥
सुवा सुफल अमृत पै खोजा । होहु न राजा विक्रम भोजा ॥
हौं सेवक, तुम आदि गोसाईं । सेवा करौं जिऔं जब ताई ॥
जेइ जिउ दीन्ह देखावा देसू । सो पै जिउ महुँ बसै, नरेसू! ॥
जो ओहि सँवरै 'एकै तुही' । सोई पंखि जगत रतमुहीं ॥

नैन बैन औ सरवन सब ही तोर प्रसाद ।

सेवा मोरि इहै निति बोलौं आसिरवाद ॥२०॥

जो अस सेवक जेइ तप कसा । तेहि क जीभ पै अमृत बसा ॥
तेहि सेवक के करमहिं दोषू । सेवा करत करै पति रौषू ॥
औ जेहि दोष निदोषहिं लागा । सेवक डरा, जीउ लेइ भागा ॥
जो पंछी कहवाँ थिर रहना । ताकै जहाँ जाइ भए डहना ॥
सप्त दीप फिरि देखेंउँ, राजा । जंबूदीप जाइ तब बाजा ॥
तहँ चितउरगढ़ देखेंउँ ऊँचा । ऊँच राज सरि तोहि पहूँचा ॥
रतनसेन यह तहाँ नरेसू । एहि आनेउँ जोगी के भेसू ॥
सुआ सुफल लेइ आएउँ, तेहि गुन तें मुख रात ।

कया पीत सो तेहि डर, सँवरौं विक्रम बात ॥२१॥

पहिले भएउ भाँट सत भाखी । पुनि बोला हीरामन साखी ॥
राजहि भा निसचय, मन माना । बाँधा रतन छोरि कै आना ॥

कुल पूछा चौहान कुलीना । रतन न बाँधे होइ मलीना ॥
 हीरा दसन पान-रँग पाके । विहँसत सबै बीजु बर ताके ।
 मुद्रा स्रवन विनय सौं चापा । राजपना उघरा सब झाँपा ॥
 आना काटर एक तुखारू । कहा सो फेरौ, भा असवारू ॥
 फेरा तुरय, छतीसो कुरी । सबै सराहा सिंघलपुरी ॥

कुँवर बतीसौ लच्छना, सहस किरिन जस भान ।

काह कसौटी कसिए ? कंचन बारह बान ॥२२॥

देखि कुँवर बर कंचन जोगू । 'अस्ति अस्ति' बोला सब लोगू ॥
 मिला सो बंश अंस उजियारा । भा बरोक तब तिलक सँवारा ॥
 अनिरुध कहँ जो लिखा जयमारा । को मेटै बानासुर हारा ॥
 आजु मिली अनिरुध कहँ ऊखा । देव अनंद, दैत सिर दूखा ॥
 सरग सूर, भुइ सरवर केवा । बनखंड भँवर होइ रसलेवा ॥
 पच्छिउँ कर बर पुरुब क बारी । जोरी लिखी न होइ निनारी ॥
 मानुष साज लाख मन साजा । होइ सोइ जो बिधि उपराजा ॥

गए जो बाजन बाजत, जिन्ह मारन रन माहिं ।

फिर बाजन तेइ बाजे, मंगलचारि उनाहिं ॥२३॥

बोल गोसाईं कर मैं माना । काह सो जुगुति उतर कहँ आना ॥
 माना बोल, हरष जिउ बाढा । औ बरोक भा, टीका काढा ॥
 दूवौ मिले, मनाव्वा भला । सुपुरुष आपु कहँ चला ॥
 लीन्ह उतारि जाहि हित जोगू । जो तप करे सो पावै भोगू ॥
 वह मन चित जो एकै अहा । मारै लीन्ह न दूसर कहा ॥
 जो अस कोई जिउ पर छेवा । देवता आइ करहिं निति सेवा ॥
 दिन दस जीवन जो दुख देखा । भा जुग जुग सुख, जाइ न लेखा ॥

रतनसेन सँग बरनौं, पदमावति क बियाह ।

मंदिर बेगि सँवारा, मादर तूर उछाह ॥२४॥

२६. रतनसेन-पद्मावती-विवाह खंड

लगन धरा औ रचा बियाहू । सिंघल नेवत फिरा सब काहू ॥
 बाजन बाजे कोटि पचासा । भा अनंद सगरौं कैलासा ॥
 जेहि दिन कहँ निति देव मनाव्वा । सोइ दिवस पदमावति पावा ॥
 चाँद सुरुज मनि माथे भागू । औ गावहिं सब नखत सोहागू ॥
 रचि रचि मानिक माँडव छावा । औ भुईं रात बिछाव बिछावा ॥
 चंदन खांभ रचे बहु भाँती । मानिक दिया बरहिं दिन राती ॥
 घर घर बंदन रचे दुवारा । जावत नगर गीत झनकारा ॥

हाट बाट सब सिंघल, जहँ देखहु तहँ रात ।

धनि रानी पदमावति, जेहिकै ऐसि बरात ॥१॥

रतनसेन कहँ कापड आए । हीरा मोति पदारथ लाए ॥
 कुँवर सहस दस आइ सभागे । विनय करहिं राजा सँग लागे ॥
 जाहिं लागि तन साधेहु जोगू । लेहु राज औ मानहु भोगू ॥
 मंजन करहु, भभुत उतारहु । करि अस्नान चित्र सब सारहु ॥
 काढहु मुद्रा फटिक अभाऊ । पहिरहु कुंडल कनक जराऊ ॥

छिरहु जटा, फुलायल लेहु । झारहु केस, मकुट सिर देहु ॥
काढहु कथा चिरकुट लावा । पहिरहु राता दगल सोहावा ॥
पाँवरि तजहु , देहु पग पौरि जो बाँक तुखार ।

बाँधि मौर, सिर छत्र देइ , बेगि होहु असवार ॥२॥

साजा रजा, बाजन बाजे । मदन सहाय दुवौ दर गाजे ॥
औ राता सोने रथ साजा । भए बरात गोहने सब राजा ॥
बाजत गाजत भा असवारा । सब सिंघल नइ कीन्ह जोहारा ॥
चहुँ दिसि मसियर नखत तराई सूरुज चढा चाँद के ताई ॥
सब दिन तपे जैस हिय माहाँ । तैसि राति पाई सुख-छाहाँ ॥
ऊपर रात छत्र तस छावा । इंद्रलोक सब देखै आवा ॥
आजु इंद्र अछरी सौं मिला । सब कबिलास होहि सोहिला ॥
धरती सरग चहुँ दिसि, पूरि रहे मसियार ।

बाजत आवै मँदिर जहँ, होइ मंगलाचार ॥३॥

पदमावति धौराहर चढी । दहुँ कस रवि जेहि कहँ ससि गढी ॥
देखि बरात सखिन्ह सौं कहा । इन्ह मह सो जोगी को अहा ॥
केइ सो जोग लै ओर निवाहा । भएउ सूर, चढी चाँद बियाहा ॥
कौन सिद्ध सो ऐस अकेला । जेइ सिर लाइ पेम सों खेला ॥
का सौं पिता बात अस हारी । उतर न दीन्ह, दीन्ह तेहि बारी ॥
का कहँ दैउ ऐस जिउ दीन्हा । जेइ जयमार जीति रन लीन्हा ॥
धन्नि पुरुष अस नवै न आए । औ सुपुरुष होइ देस पराए ॥
को बरिवंड बीर अस, मोहिं देखै कर चाव ।

पुनि जाइहि जनवासहि, सखि मोहिं बेगि देखाव ॥४॥

सखी देखावहिं चमकै बाहू । तू जस चाँद, सुरुज तोर नाहू ॥
छपा न रहै सूर-परगासू । देखि कँवल मन होइ बिकासू ॥
ऊ उजियार जगत उपराहीं । जग उजियार, सो तेहि परछाहीं ॥
जस रवि, देखु, उठै परभाता । उठा छत्र तस बीच बराता ॥
ओंही माँझ मा दूलह सोई । और बरात संग सब कोई ॥
सहसौं कला रूप विधि गढा । सोने के रथ आवै चढा ॥
मनि माथे, दरसन उजियारा । सौह निरखि नहिं जाइ निहारा ॥

रूपवंत जस दरपन, धनि तू जाकर कंत ।

चाहिय जैस मनोहर मिला सो मन भावंत ॥५॥

देखा चाँद सूर जस साजा । अस्टौ भाव मदन जनु गाजा ॥
हुलसे नैन दरस मद माते । हुलसे अधर रंग-रस-राते ॥
हुलसा बदन ओप रवि पाई । हुलसि हिया कंचुकि न समाई ॥
हुलसे कुच कसनी-बँद टूटै । हुलसी भुजा, वलय कर फूटे ॥
हुलसी लंक कि रावन राजू । राम लखन दर साजहिं आजू ॥
आजु चाँद घर आवा सूरू । आजु सिंगार होइ सब चूरू ॥
आजु कटक जोरा है कामू । आजु बिरह सौं होइ संग्रामू ॥

अंग-अंग सब हुलसे, कोइ कतहँ न समाइ ।

ठावहिं ठाँव बिमोही, गइ मुरछा तनु आइ ॥६॥

सखी सँभारि पियावहिं पानी । राजकुँवरि काहे कुँभिलानी ॥
 हम तौ तोहि देखावा पीऊ । तू मुरझानि कैस भा जीऊ ॥
 सुनहु सखी सब कहहिं बियाहू । मो कहँ भएउ चाँद कर राहू ॥
 तुम जानहु आवै पिउ साजा । यह सब सिर पर धम धम बाजा ॥
 जेते बराती औ असवारा । आए सबै चलावनहारा ॥
 सो आगम हौं देखति झँखी । रहन न आपन देखौं, सखी ॥
 होइ बियाह पुनि होइहि गवना । गवनब तहाँ बहुरि नहिं अवन ॥
 अब यह मिलन कहाँ होइ परा बिछोहा टूटि ।

तैसि गाँठि पिउ जोरब जनम न होइहि छूटि ॥७॥

आइ बजावति बैठि बराता । पान, फूल, सेंदुर सब राता ॥
 जहँ सोने कर चित्तर सारी । लेइ बरात सब तहाँ उतारी ॥
 माँझ सिंघासन पाट सवारा । दूलह आनि तहाँ बैसारा ॥
 कनक खंभ लागे चहुँ पाँती । मानिक दिया बरहिं दिन राती ॥
 भएउ अचल ध्रुव जोगि पखेरू । फूलि बैठ थिर जैस सुमेरू ॥
 आजु दैउ हौं कीन्ह सभागा । जत दुख कीन्ह नेग सब लागा ॥
 आजु सूर ससि के घर आवा । ससि सूरहि जनु होइ मेरावा ॥
 आजु इंद्र होइ आएउँ, सजि बरात कबिलास ।

आजु मिली मोहिं अपछरा, पूजी मन कै आस ॥८॥

होइ लाग जेवनार-पसारा । कनक-पत्र पसरे पनवारा ॥
 सोन थार मनि मानिक जरे । राव रंक के आगे धरे ॥
 रतन-जडाऊ खोरा खोरी । जन जन आगे दस-दस जोरी ॥
 गडुवन हीर पदारथ लागे । देखि बिमोहे पुरुष सभागे ॥
 जानहुँ नखत करहिं उजियारा । छपि गए दीपक औ मसियारा ॥
 गइ मिलि चाँद सुरुज कै करा । भा उदोत तैसे निरमरा ॥
 जेहि मानुष कहँ जोति न होती । तेहि भइ जोति देखि वह जोती ॥
 पाँति पाँति सब बैठे, भाँति भाँति जेवनार ।

कनकपत्र दोनन्ह तर , कनकपत्र पनवार ॥९॥

पहिले भात परोसे आना । जनहुँ सुबास कपूर बसाना ॥
 झालर माँडे आए पोई । देखत उजर पाग जस धौई ॥
 लुचुई और सोहारी धरी । एक तौ ताती औ सुठि कोंवरी ॥
 खँडरा बचका औ डुभकौरी । बरी एकोतर सौ, कोहड़ौरी ॥
 पुनि सँघाने आए बसाधे । दूध दही के मुरंडा बाँधे ॥
 औ छप्पन परकार जो आए । नहिं अस देख, न कबहुँ खाए ॥
 पुनि जाउरि पछियाउरि आई । धिरति खाँड के बनी मिठाई ॥

जेंवत अधिक सुबासित, मुँह महुँ परत बिलाइ ।

सहस स्वाद सो पावै, एक कौर जो खाइ ॥१०॥

जेंवन आवा, बीन न बाजा । बिनु बाजन नहिं जेंवे राजा ॥
 सब कुँवरन्ह पुनि खेंचा हाथू । ठाकुर जेंव तौ जेमवै साथू ॥
 बिनय करहिं पंडित विद्वाना । काहे नहिं जेंवहि जजमाना? ॥
 यह कबिलास इंद्र कर वासू । जहाँ न अन्न न माछरि माँसू ॥
 पान फूल आसी सब कोई । तुम्ह कारन यह कीन्ह रसोई ॥
 भूख, तौ जनु अमृत है सूखा । धूप, तौ सीअर नींबी रूखा ॥

नींद, तौ भुईं जनु सेज सपेती । छाटहुँ का चतुराई एती ॥
कौन काज केहि कारन, बिकल भएउ जजमान ।

होइ रजायसु सोई, बेगि देहिं हम आन ॥११॥

तुम पंडित जानहुँ सब भेदू । पहिले नाद भएउ तब वेदू ॥
आदि पिता जो विधि अवतारा । नाद संग जिउ ज्ञान सँचारा ॥
सो तुम वरजि नीक का कीन्हा । जेंवन संग भोग विधि दीन्हा ॥
नैन, रसन, नासिक, दुइ स्रवना । इन चअरहु संग जेंवै अचना ॥
जेंवन देखा नैन सिराने । जीभहिं स्वाद भुगुति रस जाने ॥
नासिक सबैं बासना पाई । स्रवनहिं काह करत पहुनाई? ॥
तेहि कर होइ नाद सौं पोखा । तब चारिहु कर होइ सँतोषा ॥

औ सो सुनहिं सबद एक, जाहि परा किछु सूझि ।

पंडित ! नाद सूनै कहँ, बरजेहु तुम का बूझि ॥१२॥

राजा! उतर सुनहु अब सोई । महि डोलै जौ वेद न होई ॥
नाद, वेद, मद, पेंड जो चारी । काया महँ ते, लेहु विचारी ॥
नाद, हिये मद उपनै काया । जहँ मद तहाँ पेड नहिं छाया ॥
होइ उनमद जूझा सो करै । जो न वेद-आँकुस सिर धरै ॥
जोगी होइ नाद सो सुना । जेहि सुनि काय जरै चौगुना ॥
कया जो परम तंत मन लावा । घूम माति, सुनि और न भावा ॥
गए जो धरमपंथ होइ राजा । तिनकर पुनि जो सुनै तौ छाजा ॥
जस मद पिए घूम कोइ, नाद सुने पै घूम ।

तेहितें बरजे नीक है, चढै रहसि कै दूम ॥१३॥

भइ जेंवनार, फिरा खँडवानी । फिरा अरगजा कुँहकुँह-पानी ॥
फिरा पान, बहुरा सब कोई । लाग बियाह चार सब होई ॥
माँडौं सोन क गगन सँवारा । बंदनवार लाग सब वारा ॥
साजा पाटा छत्र कै छाँहा । रतन चौक पूरा तेहि माहाँ ॥
कंचन कलस नीर भरि धरा । इंद्र पास आनी अपछरा ॥
गाँठि दुलह दुलहिन कै जोरी । दुऔ जगत जो जाइ न छोरी ॥
वेद पढ़ैं पंडित तेहि ठाऊँ । कन्या तुला राशि लेइ नाऊँ ॥

चाँद सुरुज दुऔ निरमल, दुऔ सँजोग अनूप ।

सुरुज चाँद सौं भूला, चाँदद सुरुज के रूप ॥१४॥

दुओ नाँव लै गावहिं बारा । करहिं सो पदमिनि मंगल चारा ॥
चाँद के हाथ दीन्ह जयमाला । चाँद आनि सुरुज गिउ घाला ॥
सुरुज लीन्ह चाँद पहिराई । हार नखत तरइन्ह स्यों पाई ॥
पुनि धनि भरि अंजुलि जल लीन्हा । जोबन जनम कंत कह दीन्हा ॥
कंत लीन्ह, दीन्हा धनि हाथा । जोरी गाँठि दुऔ एक साथी ॥
चाँद सुरुज सत भाँवरि लेहीं । नखत मोति नेवछावरि देहीं ॥
फिरहिं दुऔ सत फेर, घुटै कै । सातहु फेर गाँठि से एकै ॥

भइ भाँवरि, नेवछावरि, राज चार सब कीन्ह ।

दायज कहौं कहाँ लागि ? लिखि न जाइ जत दीन्ह ॥१५॥

रतनसेन जब दायज पावा । गंधर्वसेन आइ सिर नावा ॥
मानुस चित्त आनु किछु कोई । करै गोसाईं सोइ पै होई ॥

अब तुम्ह सिंघलदीप गोसाईं । हम सेवक अहहीं सेवकाई ॥
जस तुम्हार चितउरगढ़ देसू । तस तुम्ह इहाँ हमार नरेसू ॥
जंबूदीप दूरि का काजू ? । सिंघलदीप करहु अब राजू ॥
रतनसेन बिनवा कर जोरी । अस्तुति-जोग जीभ कहँ मोरी ॥
तुम्ह गोसाईं जेइ छार छुड़ाई । कै मानुस अब दीन्हि बड़ाई ॥

जौ तुम्ह दीन्ह तौ पावा, जिवन जनम सुखभोग ।

नातरु खेह पायँ कै, हौं जोगी केहि जोग ॥१६॥

धौराहर पर दीन्हा बासू । सात खंड जहवाँ कबिलासू ॥
सखी सहसदस सेवा पाई । जनहुँ चाँद सँग नखत तराई ॥
होइ मंडल ससि के चहुँ पासा । ससि सूरहि लेइ चढी अकासा ॥
चलु सूरुज दिन अथवै जहाँ । ससि निरमल तू पावसि तहाँ ॥
गंध्रबसेन धौरहर कीन्हा । दीन्ह न राजहि, जोगहि दीन्हा ॥
मिलीं जाइ ससि के चहुँ पाहाँ । सूर न चाँपै पावै छाँहा ॥
अब जोगी गुरु पावा सोई । उतरा जोग, भसम गा धौई ॥

सात खंड धौराहर, सात रंग नग लाग ।

देखत गा कबिलासहि, दिस्टि-पाप सब भाग ॥१७॥

सात खंड सातौं कबिलासा । का बरनों जग ऊपर बासा ॥
हीरा ईट कपूर गिलावा । मलयगिरि चंदन सब लावा ॥
चूना कीन्ह औटि गजमोती । मोतिहु चाहि अधिक तेहि जोती ॥
विसुकरमें सौ हाथ सँवारा । सात खंड सातहिं चौपारा ॥
अति निरमल नहिं जाइ बिसेखा । जस दरपन महुँ दरसनन देखा ॥
भुइँ गच जानहुँ समुद हिलोरा । कनकखंभ जनु रचा हिंडोरा ॥
रतन पदारथ होइ उजियारा । भूले दीपक औ मसियारा ॥

तहँ अछरी पदमावति, रतनसेन के पास ।

सातौ सरग हाथ जनु औ सातौ कबिलास ॥१८॥

पुनि तहँ रतनसेन पगु धारा । जहाँ नौ रतन सेज सँवारा ॥
पुतरी गढ़ि गढ़ि खंभन काढी । जनु सजीव सेवा सब ठाढी ॥
काहू हाथ चंदन कै खोरी । कोइ सेंदुर, कोइ गहे सिंधोरी ॥
कोइ कुहँकुहँ केसर लिहै रहै । लावै अंग रहसि जनु चहै ॥
कोई लिहे कुमकुमा चोवा । धनि कब चहै, ठाढि मुख जोवा ॥
कोई बीरा, कोइ लीन्हे-बीरी । कोइ परिमल अति सुगँध समीरी ॥
काहू हाथ कस्तूरी मेदू । कोइ किछु लिहे, लागु तस भेदू ॥

पाँतिहि पाँति चहुँ दिसि, सब सोधे कै हाट ।

माँझ रचा इंद्रासन, पदमावति कहँ पाट ॥१९॥

२७.पदमावती-रतनसेन-भेंट खंड

सात खंड ऊपर कबिलासू । तहवाँ नारि सेज सुख बासू ॥
चारि खंभ चारिहु दिसि खरे । हीरा रतन पदारथ जरे ॥
मानिक दिया जरावा मोती । होइ उजियार रहा तेहि जोती ॥
ऊपर राता चँदवा छावा । औ भुइँ सुरग बिछाव बिछावा ॥
तेहि महुँ पालक सेज सो डासी । कीन्ह बिछावन फूलन्ह बासी ॥

चहुँ दिसि गेंडुवा औ गलसूई । काँची पाट भरी धुनि रूई ॥
विधि सो सेज रची केहि जोगू । को तहुँ पौढि मान रस भोगू ?॥

अति सुकुवाँरि सेज सो डासी, छुवै न पारै कोइ ।

देखत नवै खिनहि खिन, पाव धरत कसि होइ ॥१॥

राजै तपत सेज जो पाई । गाँठि छोरि धनि सखिन्ह छपाई ॥
कहैं, कुँवर ! हमरे अस चारू । आज कुँवर कर करव सिंगारू ॥
हरदि उतारि चढाउव रगू । तब निसि चाँद सुरुज सौं संगू ॥
जस चातक मुख बूंद सेवाती । राजा चख जोहत तेहि भाँती ॥
जोगि छरा जनु अछरी साथी । जोग हाथ कर भएउ बेहाथा ॥
वै चातुरि कर लै अपसई । मंत्र अमोल छीनि लेइ गई ॥
बैठेउ खोइ जरी औ बूटी । लाभ न पाव , मूरि भइ टूटी ॥

खाइ रहा ठगलाडू, तंत मंत बुधि खोइ ।

भा धौराहर बनखंड, ना हँसि आव, न रोइ ॥२॥

अस तप करत गएउ दिन भारी ! चारि पहर बीते जुग चारी ॥
परी साँझ, पुनि सखी सो आई । चाँद रहा, उपनी जो तराई ॥
पूँछहिं गुरु कहाँ, रे चेला । बिनु ससि रे कस सूर अकेला ?॥
धअतु कमाय सिखे तैं जोगी । अब कस भा निरधातु बियोगी ?॥
कहाँ सो खोएहु बिरवा लोना । जेहि तैं होइ रूप औ सोना ॥
कअ हरतार पार नहिं पावा । गंधक काहे कुरकुटा खावा ॥
कहाँ छपाए चाँद हमारा ?। जेहि बिनु रैन जगत अँधियारा ॥

नैन कौड़िया, हिय समुद, गुरु सो तेहि महँ जोति ।

मन मरजिया न होइ परे, हाथ न आवै मोति ॥३॥

का पूछहु तुम धातु, निछोही ! जो गुरु कीन्ह अँतर फट ओही ॥
सिधि गुटिका अब मो संग कहा । भएउँ राँग, सत हिये न रहा ॥
सो न रूप जासौं मुख खोलौं । गएउ भरोस तहाँ का बोलौं ॥
जहँ लोना बिरवा कै जाती । कहि कै सँदेस आन को पाती ॥
कै जो पार हरतार करीजै । गंधक देखि अबहिं जिउ दीजै ॥
तुम्ह जोरा कै सूर मयंकू । पुनि बिछोहि सो लीन्ह कलंकू ॥
जो एहि घरी मिलावै मोहीं । सीस देउँ बलिहारी ओही ॥

होइ अबरक ईगुर भया, फेरि अग्नि महँ दीन्ह ।

काया पीतर होइ कनक, जौ तुम चाहहु कीन्ह ॥४॥

का बसाइ जौ गुरु अस बूझा । चकाबूह अभिमनु ज्यौं जूझा ॥
विष जो दीन्ह अमृत देखराई । तेहि रे निछोही को पतियाई ?॥
मरै सोइ जो होइ निगूना । पीर न जानै बिरह बिहूना ॥
पार न पाव जो गंधक पीया । सो हत्यार कहौ किमि जीया ॥
सिद्धि-गुटीका जा पहुँ नाहीं । कौन धातु पूछहु तेहि पाहीं ॥
अब तेहि बाज राँग भा डोलौं । होइ सार तौ बर कै बोलौं ॥
अबरक कै पुनि ईगुर कीन्हा । सो तन फेरि अग्नि महँ दीन्हा ॥

मिलि जो पीतम बिछुरही, काया अग्नि जराइ ।

की तेहि मिले तन तप बुझै, की अब मुए बुझाइ ॥५॥

सुनि कै बात सखी सब हँसी । जानहुँ रैनि तरई परगसीं ॥
 अब सो चाँद गगन महुँ छपा । लालच कै कित पावसि तपा ? ॥
 हमहुँ न जानहि दहुँ सो कहाँ । करब खोज औ बिनउब तहाँ ॥
 औ अस कहब आहि परदेसी । करहि मया; हत्या जनि लेसी ॥
 पीर तुम्हारि सुनत भा छोह । देउ मनाउ, होइ अस ओह ॥
 तू जोगी फिरि तपि करु जोगू । तो कहँ कौन राज सुख-भोगू ॥
 वह रानी जहवाँ सुख राजू । बारह अभरन करै सो साजू ॥
 जोगी दिठ आसन करै, अहथिर धरि मन ठाँव ।

जो न सुना तौ अब सुनहि, बारह अभरन नाँव ॥६॥

प्रथमै मज्जन होइ सरीरू । पुनि पहिरै तन चंदन चीरू ॥
 साजि माँगि सिर सेंदुर सारे । पुनि लिलाट रचि तिलक सँवारै ॥
 पुनि अंजन दुहुँ नैनन्ह करै । औ कुंडल कानन्ह महुँ पहिरै ॥
 पुनि नासिक भल फूल अमोला । पुनि राता मुख खाइ तमोला ॥
 गिउ अभरन पहिरै जहँ ताई । औ पहिरे कर कँगन कलाई ॥
 कटि छुद्रावलि अभरन पूरा । पायन्ह पहिरै पायल चूरा ॥
 बारह अभरन अहँ बखाने । ते पहिरै बरहौं अस्थाने ॥
 पुनि सोरहौ सिंगार जस, चारिहु चौक कुलीन ।

दीरघ चारि, चारि लघु सुभर चौ खीन ॥७॥

पदमावति जो सँवारै लीन्हा । पूनउँ राति देउ ससि कीन्हा ॥
 करि मज्जन तन कीन्ह नहानू । पहिरे चीर, गएउ छपि भानू ॥
 रचि पत्रावलि, माँग सदूरु । भरे मोति औ मानिक चूरू ॥
 चंदन चीर पहिरि बहु भाँती । मेघघटा जानहुँ बग-पाँती ॥
 गूँथि जो रतन माँग बैसारा । जानहुँ गगन टूटि निसि तारा ॥
 तिलक लिलाट धरा तस दीठा । जनहुँ दुइज पर सुहल बईठा ॥
 कानन्ह कुंडल खूँट औ खूँटी । जानहुँ परी कचपची टूटी ॥
 पहिरि जराऊ ठाढ़ि भइ, कहि न जाइ तस भाव ।

मानहुँ दरपन गगन भा, तेहि ससि तार देखाव ॥८॥

बाँक नैन औ अंजन-रेखा । खंजन मनहुँ सरद ऋतु देखा ॥
 जस जस हेर, फेर चख मोरी । लरै सरद महुँ खंजन जोरी ॥
 भौहँ धनुक धनुक पै हारा । नैनन्ह साधि बान विष मारा ॥
 करनफूल कानन्ह अति सोभा । ससि-मुख आइ सूर जनु लोभा ॥
 सुरँग अधर औ मिला तमोरा । सोहे पान फूल कर जोरा ॥
 कुसुमगंध अति सुरँग कपोला । तेहि पर अलक भुअंगिनि डोला ॥
 तिल कपोल अलि कवँल बईठा । बेधा सोइ जेइ तिल दीठा ॥

देखि सिंगार अनूप विधि, बिरह चला तब भागि ।

काल कस्ट इमि ओनवा, सब मोरे जिउ लागि ॥९॥

का बरनौं अभरन औ हारा । ससि पहिरे नखतन्ह कै मारा ॥
 चीर चारू औ चंदन चोला । हीर हार नग लाग अमोला ॥
 तेहि झाँपी रोमावलि कारी । नागिनि रूप डसै हत्यारी ॥
 कुच कंचुकी सिराफल टाँड सलोनी । डोलत बाँह भाव गति लोनी ॥
 बाँहन्ह बहुटा टाँड सलोनी । डोलत बाँह भाव गति लोनी ॥
 तरवन्ह कवल करी जनु बाँधी। बसा-लंक जानहुँ दुइ आधी ॥

छुद्रघंट कटि कंचन-तागा । चलतै उठहिं छतीसौ रागा ॥
चूरा पायल अनवट, पायँन्ह परहिं बियोग ।

हिये लाइ टुक हम कहँ, समदहु मानहुँ भोग ॥१०॥

अस बारह सोरह धनि साजै । छाज न और; आहि पै छाजै ॥
बिनवहिं सखी गहरु का कीजै । जेहि जिउ दीन्ह ताहि जिउ दीजे ॥
सवरि सेज धनि मन भइ संका । ढाढ तेवानि टेकि कर लंका ॥
अनचिन्ह पिउ, कापौं मन माँहा । का मैं कहब गहब जौ बाँहा ॥
बारि बैस गइ प्रीति न जानी । तरुनि भई मैमंत भुलानी ॥
जोबन गरब न मैं किछु चेता । नेह न जानौं सावँ कि सेता ॥
अब सो कंत जो पूछिहि बाता । कस मुख होइहि पीत कि राता ॥
हौं बारी औ दुलहिनि, पीउ तरुन सह तेज ।

ना जानौं कस होइहि, चढत कंत के सेज ॥११॥

सुनु धनि! डर हिरदय तब ताई । जौ लगि रहसि मिलै नहिं साई ॥
कौन कली जो भौर न राई । डार न टूट पुहुप गरुआई ॥
मातु पिता जौ बियाहै सोई । जनम निबाह कंत सँग होई ॥
भरि जीवन राखै जहँ चहा । जाइ न मेंटा ताकर कहा ॥
ताकहँ बिलंब न कीजै बारी । जो पिउ आयसु सोइ पियारी ॥
चलहु बेगि आयसु भा जैसे । कंत बोलावै रहिए कैसे ॥
मान न करसि, पोढ करु लाडू । मान मरत रिस मानै चाँडू ॥

साजन लेइ पठावा, आयसु जाइ न मेट ।

तन मन जोबन, साजि के, देइ चली लेइ भेंट ॥१२॥

पदमिनि-गवन हंस गए दूरी । कुंजर लाज मेल सिर धूरी ॥
बदन देखि घटि चंद छपाना । दसन देखि कै बीजु लजाना ॥
खंजन छपे देखि कै नैना । किकिल चपी सुनत मधु बैना ॥
गीव देखि कै छपा मयूरु । लंक देखि कै छपा सुदूरु ॥
बौहन्ह धनुक छपा आकारा । बेनी बासुकि छपा पतारा ॥
खड्ग छपा नासिका बिसेखी । अमृत छपा अधर-रस देखी ॥
पहुँचहि छपी कवल पौनारी । जंघ छपा कदली होइ बारी ॥

अछरी रूप छपानीं, जबहिं चली धनि साजि ।

जावत गरब गहेली, सबै छपीं मन लाजि ॥१३॥

मिलीं गोहने सखी तराई । लेइ चाँद सूरज पहुँ आई ॥
पारस रूप चाँद देखराई । देखत सूरज गा मुरझाई ॥
सोरह कला दिस्टि ससि कीन्ही । सहसौ कला सुरुज कै लीन्ही ॥
भा रवि अस्त, तराई हसी । सूर न रहा, चाँद परगसी ॥
जोगी आहि, न भोगी होई । खाइ कुरकुटा गा पै सोई ॥
पदमावति जसि निरमल गंगा । तू जो कंत जोगी भिखमंगा ॥
आइ जगावहिं 'चेला जागै । आवा गुरु, पायँ उठि लागै' ॥

बोलहिं सबद सहेली कान लागि, गहि माथ ।

गोरख आइ ठाढ भा, उठु, रे चेला नाथ ॥१४॥

सुनि यह सबद अमिय अस लागा । निद्रा टूटि, सोइ अस जागा ॥
गही बाँह धनि सेजवाँ आनी । अंचल ओट रही छपि रानी ॥

सकुचै डरै मनहि मन बारी । गहु न बाँह, रे जोगि भिखारी ? ॥
 ओहट होसि, जोगि ! तोरि चेरी । आवै बास कुरकुटा केरी ॥
 देखि भभूति छूति मोहि लागै । काँपै चाँद, सूर सौं भागै ॥
 जोगि तोरि तपसी कै काया । लागि चहै मोरे अँग छाया ॥
 बार भिखारि न माँगसि भीखा । माँगे आइ सरग पर सीखा ॥
 जोगि भिखारि कोई मँदिर न पैठै पार ।

माँगि लेहु किछु भिक्षा जाइ ठाढ होइ बार ॥१५॥

मैं तुम्ह कारन, पेम पियारी । राज छाँडि कै भएउँ भिखारी ॥
 नेह तुम्हार जो हिये समाना । चितउर सौं निसरेउँ होइ आना ॥
 जस मालति कहँ भौर बियोगी । चढा बियोग, चलेउँ होइ जोगी ॥
 भौर खोजि जस पावै केवा । तुम्ह कारन मैं जिउ पर छेवा ॥
 भएउँ भिखारि नारि तुम्ह लागी । दीप पतँग होइ अँगएउँ आगी ॥
 एक बार मरि मिले जो आई । दूसरि बार मरै कित जाई ॥
 कित तेहि मीचु जो मरि कै जीया ?। भा सो अमर, अमृत मधु पीया ॥

भौर जो पावै कँवल कहँ , बहु आरति बहु आस ।

भौर होइ नेवछावरि, कँवल देइ हँसि बास ॥१६॥

अपने मुँह न बड़ाई छाजा । जोगी कतहुँ होहिं नहिं राजा ॥
 हौं रानी, तू जोगि भिखारी । जोगहि भोगहि कौन चिन्हारी ?॥
 जोगी सबै छंद अस खेला । तू भिखारि तेहि माहिं अकेला ॥
 पौन बाँधि अपसवहिं अकासा । मनसहिं जाहिं ताहि के पासा ॥
 एही भाँति सिस्टि सब छरी । एही भेख रावन सिय हरी ॥
 भौरहिं मीचु नियर जब आवा । चंपा बास लेइ कहँ धावा ॥
 दीपक जोति देखि उजियारी । आइ पाँखि होइ परा भिखारी ॥
 रैन जो देखै चंदमुख, ससि तन होइ अलोप ।

तुहुँ जोगी तस भूला, करि राजा कर ओप ॥१७॥

अनु , धनि तू निसिअर निसि माहाँ । हौं दिनिअर जेहि कै तू आहाँ ॥
 चादहि कहाँ जोति औ करा । सुरुज के जोति चाँद निरमरा ॥
 भौर बास चंपा नहिं लेई । मालति जहाँ तहाँ जिउ देई ॥
 तुम्ह हुँत भएउँ पतँग कै करा । सिंघलदीप आइ उडि परा ॥
 सेएउँ महादेव कर बारू । तजा अन्न, भा पवन अहारू ॥
 अस मैं प्रीति गाठि हिय जोरी । कटै न काटे, छुटै न छोरी ॥
 सीतै भीखि रावनहिं दीन्हीं । तूँ असि निठुर अतरपट कीन्हीं ॥
 रंग तुम्हारेहि रातेउँ, चढे उँ गगन होइ सूर ।

जहँ ससि सीतल तहँ तपों, मन हींछा, धनि! पूर ॥१८॥

जोगि भिखारी! करसि बहु बाता । कहसि रंग देखौं नहिं राता ॥
 कापर रँगे रंग नहिं होई । उपजे औटि रंग भल सोई ॥
 चाँद के रंग सुरुज जब राता । देखै जगत साँझ परभाता ॥
 दगधि बिरह निति होइ अँगारा । ओही आँच धिकै संसारा ॥
 जो मजीठ औटे बहु आचा । सो रंग जनम न डोलै राँचा ॥
 जरै बिरह जस दीपक वाती भीतर जरै, उपर होइ राती ॥

जरि परास होइ कोइल भेसू । तब फूलै राता होइ टेसू ॥
पान, सुपारी, खैर जिमि, मेरइ करै चकचून ।

तौ लागि रंग न राचै, जौ लागि होइ न चून ॥१९॥

का धनि! पान रंग, का चूना । जेहि तन नेह दाध तेहि दूना ॥
हौं तुम्ह नेह पियर भा पानू । पेडी हुँत सोनरास बखानू ॥
सुनि तुम्हार संसार बडौना । जोग लीन्ह, तन कीन्ह गडौना ॥
करहिं जो किंगरी लेइ बैरागी । नौती होइ बिरह के आगी ॥
फेरि फेरि तन कीन्ह भुँजौना । औटि रक्त रँग हिरदय औना ॥
सूखि सोपारी भा मन मारा । सिरहिं सरौता करवत सारा ॥
हाड चून भा, बिरहहिं दहा । जानै सोइ जो दाध इमि सहा ॥

सोई जान वह पीरा, जेहि दुख ऐस सरीर ।

रक्त पियासा होइ जो, का जानै पर पीर? ॥२०॥

जोगिन्ह बहुत छंद न ओराहीं । बूंद सेवाती जैस पराहीं ॥
परहिं भूमि पर होइ कचूरु । परहिं कदलि पर होइ कपूरु ॥
परहिं समुद्र खार जल ओही । परहिं सीप तौ मोती होहीं ॥
परहिं मेरु पर अमृत होई । परहिं नागमुख विष होइ सोई ॥
जोगी भौर निठुर ए दोऊ । केहि आपन भए? कहै जौ कोऊ ॥
एक ठाँव ए थिर न रहाहीं । रस लेइ खेलि अनत कहूँ जाहीं ॥
होइ गृही पुनि होइ उदासी । अंत काल दूवौ बिसवासी ॥
तेहि सौं नेह को दिइ करै? रहहिं न एकौ देस ।

जोगी, भौर, भिखारी, इन्ह सौं दूर अदेश ॥२१॥

थल थल नग न होहिं जेहि जोती । जल जल सीप न उपनहिं मोती ॥
बन बन बिरिछ न चंदन होई । तन तन बिरह न उपनै सोई ॥
जेहि उपना सो औटि मरि गयऊ । जनम निनार न कबहूँ भएऊ ॥
जल अंबुज,रवि रहै अकासा । जौं इन्ह प्रीति जानु एक पासा ॥
जोगी भौर जो थिर न रहाहीं । जेहि खोजहि तेहि पावहिं नाहीं ॥
मैं तोहि पायउँ आपन जीऊ । छाडि सेवाति न आनहि पीऊ ॥
भौर मालती मिलै जौ आई । सो तजि आन फूल कित जाई ॥
चंपा प्रीति न भौरहि, दिन दिन आगरि बास ।

भौर जो पावै मालती, मुएहु न छाँडै पास ॥२२॥

ऐसे राजकुँवर नहीं मानौं । खेलु सारि पाँसा तब जानौं ॥
काँचे बारह परा जो पाँसा । पाके पैत परी तनु रासा ॥
रहै न आठ अठारह भाखा । सोरह सतरस रहैं त राखा ॥
सत जो धरै सो खेलनहारा । ढारि इगारह जाइ न मारा ॥
तूँ लीन्हे आछसि मन दूवा । ओ जुग सारि जहसि पुनि छूवा ॥
हौं नव नेह रचौं तोहि पाहा । दसव दाव तोरे हिय माहा ॥
तौ चौपर खेलौं करि हिया । जौ तरहेल होइ सौतिया ॥
जेहि मिलि बिछुरन औ तपनि, अंत होइ जौ नित ।

तेहि मिलि गंजन को सहै? बरु बिनु मिलै निचित ॥२३॥

बोलौं रानि! बचन सुनु साचा । पुरुष क बोल सपथ औ बाचा ॥
यह मन लाएउ तोहिं अस, नारी । दिन तुइ पासा औ निसि सारी ॥
पौ परि बारहि बार मनाएउ । सिर सौ खेलि पैत जिउ लाएउ ॥

हैं अब चौंक पंज तें बाची । तुम्ह बिच गोट न आवहि काची ॥
पाकि उठाएउँ आस करीता । हौं जिउ तोहि हारा, तुम जीता ॥
मिलि कै जुग नहिं होहु निनारी । कहा बीच दूती देनिहारी ॥
अब जिउ जनम जनम पासा । चढेउँ जोग, आएउँ कबिलासा ॥
जाकर जीऊ बसै जेहि, तेहि पुनि ताकर टेक ।

कनक सोहाग न बिछुरे, ओटि मिलै होइ एक ॥२४॥

बिहँसी धनि सुनि कै सत बाता । निहचय तू मोरे रंग राता ॥
निहचय भौर कवल-रस सा । जो जेहि मन सो तेहि मन बसा ॥
जब हीरामन भएउ सँदेसी । तुम्ह हँत मँडप गइउँ, परदेसी ॥
तोर रूपतस देखेउँ लोना । जनु, जोगी ! तू मेलेसि टोना ॥
सिद्धि-गुटिका जो दिस्टि कमाई । पारहि मेलि रूप बैसाई ॥
भुगुति देइ कहँ मैं तोहि दीठा । कँवल-नैन होइ भौर बईठा ॥
नैन पुहुप, तू अलि भा सोभी । रहा बेधि अस, उढा न लोभी ॥
जाकर आस होइ जेहि, तेहि पुनि ताकरि आस ।

भौर जो दाधा कँवल कहँ, कस न पाव सो बास ? ॥२५॥

कौन मोहनी दहुँ हुति तोही । जो तोहि बिधा सो उपनी मोही ॥
बिनु जल मीन तलफ जस जीऊ । चातकि भइउँ कहत 'पीउ पीउ' ॥
जरिउँ बिरह जस दीपक बाती । पंथ जोहत भइ सीप सेवाती ॥
डाढि डाढि जिमि कोइल भई । भइउँ चकोरि, नीद निसि गई ॥
तोरे पेम पेम मोहिं भएऊ । राता हेम अगिनि जिमि तएऊ ॥
हीरा दिपै जौ सूर उदोती । नाहिं त कित पाहन कहँ जोती ॥
रवि परगासे कँवल बिगासा । नाहिं त कित मधुकर, कित बासा ॥
तासौं कौन अंतरपट, जो अस पीतम पीउ ।

नेवछावरि अब सारौं तन, मन, जोबन, जीउ ॥२६॥

हँसि पदमावति मानी बाता । निहचय तू मोरे रंगराता ॥
तू राजा दुहुँ कुल उजियारा । अस कै चरिचिउँ मरम तुम्हारा ॥
पै तूँ जंबूदीप बसेरा । किमि जानेसि कस सिंघल मोरा ? ॥
किमि जानेसि सो मानसर केवा । सुनि सो भौर भा, जिउ पर छेवा ॥
ना तुँइ सुनी, न कबहुँ दीठी । कैस चित्र होइ चितहि पईठी ? ॥
जौ लहि अगिनि करै नहिं भेदू । तौ लहि औटि चुवै नहिं मेदू ॥
कहँ संकर तोहि ऐस लखावा ? । मिला अलख अस पेम चखावा ॥
जेहि कर सत्य सँघाती, तेहि कर डर सोइ मेट ।

सो सत कहू कैसे भा, दुवौ भाँति जो भेंट ॥२७॥

सत्य कहौं सुनु पदमावती । जहँ सत पुरुष तहाँ सुरसती ॥
पाएउँ सुवा, कही वह बाता । भा निहचय देखत मुख राता ।
रूप तुम्हार सुनेउँ अस नीका । ना जेहि चढा काहु कहँ टीका ॥
चित्र किएउँ पुनि लेइ लेइ नाऊँ । नैनहि लागि हिये भा ठाऊँ ॥
हौं भा साँच सुनत ओहि घडी । तुम होइ रूप आइ चित चढी ॥
हौं भा काठ मूर्ति मन मारे । चहै जो कर सब हाथ तुम्हारे ॥
तुम्ह जौ डोलाइहु तबहिं डोला । मौन साँस जौ दीन्ह तौ बोला ॥

को सोवै, को जागै ? अस हौं गएँ बिमोहि ।

परगट गुपुत न दूसर, जहँ देखौं तहँ तोहि ॥२८॥

बिहँसी धनि सुनि कै सत भाऊ । हौं रामा तू रावन राऊ ॥
रहा जो भौर कँवल के आसा । कस न भोग मानै रस बासा ?॥
जस तस कहा कुँवर ! तू मोही । तस मन मोर लाग पुनि तोही ॥
जब हुँत कहि गा पंखि सँदेसी । सुनिउँ कि आवा है परदेसी ॥
तब हुत तुम बिनु रहै न जीऊ । चातकि भइउँ कहत 'पिउ पिऊ ' ॥
भइउ चकोरि सो पंथि निहारी । समुद सीप जस नैन पसारी ॥
भइउ विरह दहि कोइल कारी । डार डार जिमि कूकि पुकारी ॥
कौन सो दिन जब पिउ मिलै, यह मन राता तासु ।

वह दुख देखै मोर सब, हौं दुख देखौं तासु ॥२९॥

कहि सत भाव भई कँठलागू । जनु कंचन औ मिला सोहागू ॥
चौरासी आसन पर जोगी । खट रस, बंधक चतुर सो भोगी ॥
कुसुम-माल असि मालति पाई । जनु चम्पा गहि डार ओनाई ॥
कली बेधि जनु भँवर भुलाना । हना राहु अरजुन के बाना ॥
कंचन करी जरी नग जोती । बरमा सौं बेधा जनु मोती ॥
नारँग जानि कीर नख दिए । अधर आमरस जानहुँ लिए ॥
कौतुक केलि करहिँ दुख नंसा । खूँदहिँ कुरलहिँ जनु सर हंसा ॥
रही बसाइ बासना, चोवा चंदन मेद ।

जुहि अस पदमिनि रानी, सो जानै यह भेद ॥३०॥

रतनसेन सो कंत सुजानू । खटरस-पंडित सोरह बानू ॥
तस होइ मिले पुरुष औ गोरी । जैसी बिछुरी सारस जोरी ॥
रची सारि दूनौ एक पासा । होइ जुग जुग आवहिँ कबिलासा ॥
पिय धनि गही, दीन्हि गलबाहीं । धनि बिछुरी लागी उर माहीं ॥
ते छकि रस नव केलि करेहीं । चोका लाइ अधर रस लेहीं ?॥
धनि नौ सात, सात औ पाँचा । पुरुष दस ते रह किमि बाँचा ?॥
लीन्ह बिधाँसिँ विरह धनि साजा । औ सब रचन जीत हुत राजा ॥
जनहुँ औटि कै मिलि गएँ, तस दूनौ भए एक ।

कंचन कसत कसौटी, हाथ न कोऊ टेक ॥३१॥

चतुर नारि चित अधिक चिहँटी । जहाँ पेम बाढ़े किमी छूटी ॥
कुरला काम केरि मनुहारी । कुरला जेहिँ सो न सुनारी ॥
कुरलहिँ होइ कंत कर तोखू । कुरलहिँ किए पाव धनि मोखू ॥
जेहि कुरला सो सोहाग सुभागी । चंदन झेस साम कँठ लागी ॥
गेंद गोद कै जानहु लई । गेंद चाहि धनि कोमल भई ॥
दारिउँ, दाख, बेलरस चाखा । पिय के खेल धनि जीवन राखा ॥
भएउ बसंत कली मुख खोली । बैन सोहावन कोकिल बोली ॥
पिउ पिउ करत जो सूखि रहि, धनि चातक की भाँति ।

परी सो बूँद सीप जनु, मोती होइ सुख सांति ॥३२॥

भएउ जूझ जस रावन रामा । सेज बिधाँसिँ विरह संग्रामा ॥
लीन्हि लंक, कंचन गढ़ टूटा । कीन्ह सिंगार अहा सब लूटा ॥
औ जोबन मैमंत विधाँसा । विचला विरह जीउ जो नासा ॥

टूटे अंग अंग सब भेसा । छूटी माँग, भंग भए केसा ॥
 कंचुकि चूर, चूर भइ तानी । टूटे हार, मोति छहरानी ॥
 बारी, टाँण सलोनी टूटी । बाहूँ कँगन कलाई फूटी ॥
 चंदन अंग छूट अस भेंटी । बेसरि टूटि, तिलक गा मेटी ॥

पुहुप सिंगार सँवार सब, जोबन नवल बसंत ।

अरगज जिमि हिय लाइ कै, मरगज कीन्हेउ कंत ॥३३॥

बिनय करै पदमावति बाला । सुधि न, सुराही पिएउ पियाला ॥
 पिय आयसु माथे पर लेऊँ । जो माँगै नइ नइ सिर देऊँ ॥
 पै, पिया! बचन एक सुनु मोरा । चाखु, पिया! मधु थोरै थोरा ॥
 पेम-सुरा सोई पै पिया । लखै न कोई कि काहू दिया ॥
 चुवा दाख-मधु जो एक बारा । दूसरि बार लेत बेसँभारा ॥
 एक बार जो पी कै रहा । सुख-जीवन, सुख-भोजन लहा ॥
 पान फूल रस रंग करीजै । अधर अधर सौँ चाखा कीजै ॥

जो तुम चाहौ सौ करौ, ना जानौ भल मंद ।

जो भालै सो होइ मोहिँ तुम्ह, पिउ चहाँ अनंद ॥३४॥

सुनु, धनि! प्रेम सुरा के पिए । मरन जियन डर रहै न हिए ॥
 जेहि मद तेहि कहाँ संसारा । को सो घूमि रह, की मतवारा ॥
 सो पै जान पियै जो कोई । पी न अघाइ जाइ परि सोई ॥
 जा कहँ होइ बार एक लाहा । रहै न ओहि बिनु ओही चाहा ॥
 अरथ दरब सो देइ बहाई । की सब जाहु, न जाइ पियाई ॥
 रातिहु दुवस रहै रस भीजा । लाभन देख न देखै छीजा ॥
 भोर होत तब पलुह सरीरु । पाव कूमारी सीतल नीरु ॥

एक बार भरि पियाला, बार बार को माँग ।

मुहमद किमि न पुकारै ऐस दाँव जो खाँग ॥३५॥

भा बिहान ऊठा रवि साई । चहुँ दिसि आई नखत तराई ॥
 सब निसि सेज मिला सिसि सूरु । हार चीर बलया भए चूरु ॥
 सो धनि पान, चून भइ चोली । रग रँधीलि निरग भइ भोली ॥
 जागत रैनि भएउ भिनसारा । भई अलस सावत बेकरारा ॥
 अलक सुरंगिनि हिरदय परी । नारंग छुव नागिनि बिष-भरी ॥
 लरी मुरी हिय-हार लपेटी । सुरसरि जनु कालिंदी भेंटी ॥
 जनु पयाग अरइल बिच मिली । सोमित बेनी रोमावली ॥

नाभी लाभु पुत्रि कै, कासीकुंड कहाव ।

देवता करहिँ कलप सिर, आपुहि दोष न लाव ॥३६॥

बिहँसि जगावहिँ सखी सयानी । सूर उठा, उठु पदमिनि रानी ॥
 सुनत सूर जनु कँवल बिगासा । मधुकर आइ लीन्ह मधु बासा ॥
 जनहुँ माति निसयानी बसी । अति बेसँभार फूलि जनु अरसी ॥
 नैन कँवल जानहुँ दुइ फूले । चितवन मोहि मिरिग जनु भूले ॥
 तन न सँभार केस औ चोली । चित अचेत जनु बाउरि भोली ॥
 भइ ससि हीन गहन अस गही । बिथुरे नखत, सेज भरि रही ॥
 कँवल माँह जनु केसरि दीठी । जोबन हुत सो गँवाइ बईठी ॥

बेलि जो राखी इंद्र कहँ , पवन बास नहिं दीन्ह ।

लागेउ आइ भौर तेहि , कली बेधि रस लीन्ह ॥३७॥

हँसि हँसि पूछहिं सखी सरेखी । मानहुँ कुमुद चंद्रमुख देखी ॥
रानी! तुम ऐसी सुकुमारा । फूल बास तन जीव तुम्हारा ॥
सहि नहिं सकहु हिये पर हारू । कैसे सहिउ कंत कर भारू ?॥
मुख अंबुज बिगसे दिन राती । सो कुँभिलान कहहु केहि भाँती ?॥
अधर कँवल जो सहा न पानू । कैसे सहा लाग मुख भानू ॥
लंक जो पैग देत मुरि जाई । कैसे रही जौ रावन राई ?॥
चंदन चोव पवन अस पीऊ । भइउ चित्र सम, कस भा जीऊ ?॥

सब अरगज मरगज भयउ, लोचन बिंब सरोज ।

‘सत्य कहहु पद्मावति’ सखी परीं सब खोज ॥३८॥

कहाँ, सखी! आपस सतभाऊ । हौं जो कहति कस रावन राऊ ॥
काँपी भौर पुहुप पर देखे । जनु ससि गहन तैस मोहिं लेखे ॥
आजु मरम मैं जाना सोई । जस पियार पिउ और न कोई ॥
डर तौ लगी हिय मिला न पीऊ । भानु के दिस्टि छूटि गा सीऊ ॥
जत खन भानु कीन्ह परगासू । कँवल कली मन कीन्ह बिगासू ॥
हिये छोह उपना औ सीऊ । पिउ न रिसाउ लेउ बरु जीऊ ॥
हुत जो अपार बिरह दुख दूखा । जनहुँ अगस्त उदय जल सूखा ॥
हौं रँग बहुतै आनति, लहरै जैस समुंद ।

पै पिउ कै चतुराई, खसेऊ न एकौ बुंद ॥३९॥

करि सिंगार तापहँ का जाऊँ । ओही देखहुँ ठावहिं ठाँऊँ ॥
जौ जिउ महुँ तौ उहै पियारा । तन मन सौं नहिं होइ निनारा ॥
नैन माँह है उहै समाना । देखौ तहाँ नाहिं कोउ आना ॥
आपन रस आपुहि पै लेई । अधर सोइ लागे रस देई ॥
हिया थार कुच कंचन लाडू । अगमन भेंट दीन्ह कै चाँडू ॥
हुलसी लंक लंक सौं लसी । रावन रहसि कसौटी कसी ॥
जोबन सबै मिला ओहि जाई । हौं रे बीच हुँत गइउँ हेराई ॥

जस किछु देइ धरै कहँ , आपन लेइ सँभारि ।

रसहि गारि तस लीन्हेसि, कीन्हेसि मोहि ठँठारि ॥४०॥

अनु रे छबिली! तोहि छबि लागी । नैन गुलाल कंत सँग जागी ॥
चंप सुदरसन अस भा सोई । सोनजरद जस केसर होई ॥
बैठ भौर कुच नारँग बारी । लागे नख, उछरी रँग-धारी ॥
अधर अधर सों भीज तमोरा । अलकाउर मुरि मुरि गा तोरा ॥
रायमुनी तुम औ रत मुहीं । अलिमुख लागि भई फुलचुहीं ॥
जैस सिंगार हार सौं मिली । मालति ऐसि सदा रहु खिली ॥
पुनि सिंगार करू कला नेवारी । कदम सेवती बैठु पियारी ॥

कुंद कली सम बिगसी, ऋतु बसंत औ फाग ।

फूलहु फरहु सदा सुख, औ सुखसुफल सोहाग ॥४१॥

कहि यह बात सखी सब धाई । चंपावति पहुँ जाइ सुनाई ॥
आजु निरँग पद्मावती बारी । जीवन जानहुँ पवन अधारी ॥
तरकि तरकि गइ चंदन चोली । धरकि धरकि हिय उठै न बोली ॥
अही जौ कली कँवल रसपूरी । चूर चूर होइ गई सो चूरी ॥

देखहु जाइ जैसि कुभिलानी । सुनि सोहाग रानी विहँसानी ॥
 सेइ सँग सबही पदमिनी नारी । आई जहँ पदमावति बारी ॥
 आइ रूप सो सबही देखा । सोन-बरन होइ रही सो रेखा ॥
 कुसुम फूल जस मरदै, निरँग देख सब अंग ।

चंपावति भइ बारी, चूम केस औ मंग ॥४२॥

सब रनिवास बैठ चहुँ पासा । ससि मंडल जनु बैठ अकासा ॥
 बोलीं सबै बारी कुँभिलानी । करहु सँभार, देहु खँडवानी ॥
 कँवल कली कोमल रँग-भीनी । अति सुकुमारि लंक कै छीनी ॥
 चाँद जैस धनि हुत परगासा । सहस करा होइ सूर बिगासा ॥
 तेहिके झार गहन अस गही । भइ निरँग, मुख-जोति न रही ॥
 दरब वारि किछु पुन्नि करेहू । औ तेहि लेइ सन्यासिहि देहू ॥
 भरि कै थार नखत गजमोती । बारा कीन्ह चंद कै जोती ॥
 कीन्ह अरगजा मरदन, औ सखि कीन्ह नहानु ।

पुनि भइ चौदसि चाँद सो, रूप गएउ ठपि भानु ॥४३॥

पुनि बहु चीर आन सब छोरी । सारी कंचुकि लहर=पटोरी ॥
 फुँदिया और कसनिया राती । छायाल बँद लाए गुजराती ॥
 चिकवा चीर मघौना लोने । मोति लाग औ छापे सोने ॥
 सुरंग चीर भल सिंघलदीपी । कीन्ह जो छापा धनि वह छीपी ॥
 पेमचा डरिया औ चौधारी । साम, सेत, पीयर, हरियारी ॥
 सात रंग औ चित्र चितेरे । भारि कै दीठि जाहिं नहीं हेरे ॥
 चँदनौता औ खरदुक भारी । बाँसपूर झिलमिल कै सारी ॥
 पुनि अभरन बहु काढा, अनबन भोति जराव ।

हेरि फेरि निति पहिरै, जब जैसे मन भाव ॥४४॥

२८.रत्नसेन साथी खंड

रत्नसेन गए अपनी सभा । बैठे पाट जहाँ अठ खंभा ॥
 आइ मिले चितउर के साथी । सबै बिहँसि कै दीन्ही हाथी ॥
 राजा कर भल मानहु भाई । जेइ हम कहँ यह भूमि देखाई ॥
 हम कहँ आनत जौ न नरेसू । तौ हम कहाँ, कहाँ यह देसू ॥
 धनि राजा तुम्ह राज बिसेखा । जेहि के राज सबै किछु देखा ॥
 बोगबिलास सबै किछु पावा । कहाँ जीभ जेहि अस्तुति आवा ? ॥
 अब तुम आइ अंतरपट साजा । दरसन कहँ न तपावहु राजा ॥
 नैन सेराने, भूख गइ, देखे दरस तुम्हार ।

नव अवतार आजु भा, जीवन सफल हमार ॥१॥

हँसि कै राज रजायसु दीन्हा । में दरसन कारन एत कीन्हाँ ॥
 अपने जोग लागि अस खेला । गुरु भएउँ आपु, कीन्ह तुम्ह चेला ॥
 अहक मोरि पुरुषारथ देखेहु । गुरु चीन्हि कै जोग बिसेखेहु ॥
 जौ तुम्ह तप साधा मोहिं लागी । अब जिनि हिये होहु बैरागी ॥
 जो जेहि लागि सहै तप जोगू । सो तेहि के सँग मानै भोगू ॥
 सोरह सहस पदमिनी माँगी । सबै दीन्हि, नहिं काहुहि खाँगी ॥

सब कर मंदिर सोने साजा । सब अपने अपने घर राजा ॥
हस्ति घोर औ कापर ,सबहिं दीन्ह नव साज ।
भए गृही औ लखपती, घर घर मानहु राज ॥२॥

२९.षट्क्रतु वर्णन खंड

पदमावति सब सखी बोलाई । चीर पटोर हार पहिराई ॥
सीस सबन्ह के सेंदुर पूरा । और राते सब अंग सेंदुरा ॥
चंदन अगर चित्र सब भरीं । नए चार जानहु अवतारीं ॥
जनहु कँवल सँग फूली कूई । जनहुँ चाँद सँग तरई ऊई ॥
धनि पदमावति, धनि तोर नाहू । जेहि अभरन पहिरा सब काहू ॥
बारह अभरन, सोरह सिंगारा । तोहि सौंह नहिं ससि उजियारा ॥
ससि सकलंक रहै नहिं पूजा । तू निकलंक, न सरि कोई दूजा ॥
काहू बीन गहा कर , काहू नाद मृदंग ।

सबन्ह अनंद मनावा, रहसि कूदि एक संग ॥१॥

पदमावति कह सुनहु, सहेली । हौं सो कँवल, तुम कुमुदनि बेली ॥
कलस मानि हौं तेहि दिन आई । पूजा चलहु चढावहिं जाई ॥
मँझ पदमावतिं कर जो बेवानू । जनु परभात परै लखि भानू ॥
आस पास बाजत चौडोला । दुंदुभि, झाँझ, तूर, डफ, ढोला ॥
एक संग सब सोंधे-भरी । देव-दुवार उतरि भइ खरी ॥
अपने हाथ देव नहलावा । कलस सहस इक घिरित भरावा ॥
पोता मँडप अगर औ चंदन । देव भरा अरगज औ बंदन ॥
कै प्रनाम आगे भई, विनय कीन्ह बहु भाँति ।

रानी कहा चलहु घर, सखी! होति है राति ॥२॥

भइ निसि, धनि जस ससि परगसी । राजै देखि भूमि फिर बसी ॥
भइ कटकई सरद ससि आवा । फेरि गगन रवि चाहै छावा ॥
सुनि चनि भौंह धनुक फिरि फेरा । काम कटाछन्ह कोरहि हेरा ॥
जानहु नाहिं पैज,प्रिय! खाँचौं । पिता सपथ हौं आजु न बाँचौं ॥
काल्हि न होइ, रही महि रामा । आजु करहु रावन संग्रामा ॥
सेन सिंगार महुँ है सजा । गज पति चाल, अँचल गति धजा ॥
नैन समुद औ खड्ग नासिका । सरवरि जूझ को मो सहुँ टिका ॥

हौं रानी पदमावति, मैं जीता रस भोग ।

तू सरवरि करु तासौं, जो जोगी तोहि जोग ॥३॥

हौं अस जोगी जान सब कोऊ । बीर सिंगार जिते मैं दोऊ ॥
उहाँ सामुहें रिपु दल माहाँ । इहाँ त काम कटक तुम्ह पाहाँ ॥
उहा त हय चढि कै दल मंडौं । इहाँ त अधर अमिय-रस खंडौं ॥

उहाँ त खड़ग नरिंदहि मारौं । इहाँ त बिरह तुम्हार सँघारौं ॥
 उहाँ त गज पेलौं होइ केहरि । इहवाँ कामिनी हिय हरि ॥
 उहाँ त लूटौं कटक खँधारू । इहाँ त जीतौं तोर सिंगारू ॥
 उहाँ त कुंभस्थल गज नावौं । इहाँ त कुच कलसहि कर लावौं ॥
 परै बीच धरहरिया, प्रेम राज को टेक ?

मानहिं भोग छवौ ऋतु, मिलि दूवौ होइ एक ॥४॥

प्रथम वसंत नवल ऋतु आई । सुऋतु चैत बैसाख सोहाई ॥
 चंदन चीर पहिरि धरि अंगा । सेंदुर दीन्ह विहँसि भरि मंगा ॥
 कुसुम हार और परिमल बासू । मलयागिरि छिरका कबिलासू ॥
 सौर सुपेती फूलन डासी । धनि औ कंत मिले सुखवासी ॥
 पिउ सँजोग धनि जोबन बारी । भौर पुहुप संग करहिं धमारी ॥
 होइ फाग भलि चाँचरि जोरी । बिरह जराइ दीन्ह जस होरी ॥
 धनि ससि सरिस, तपै पिय सूरू । नखत सिंगार होहिं सब चूरू ॥

जिन्ह घर कंता ऋतु भली, आव बसंत जो नित्त ।

सुख भरि आवहिं देवहरै, दुःख न जानै कित्त ॥५॥

ऋतु ग्रीषम कै तपनि न तहाँ । जेठ असाढ़ कंत घर जहाँ ॥
 पहिरि सुरंग चीर धनि झीना । परिमल मेद रहा तन भीना ॥
 पदमावति तन सिअर सुबासा । नैहर राज, कंत घर पासा ॥
 औ बड़ जूड़ तहाँ सोवनारा । अगर पोति, सुख तने ओहारा ॥
 सेज बिछावनि सौर सुपेती । भोग बिलास कहिरं सुख सेंती ॥
 अधर तमोर कपुर भिमसेना । चंदन चरचि लाव तन बेना ॥
 भा आनंद सिंगल सब कहँ । भागवंत कहँ सुख ऋतु छहँ ॥
 दारिउँ दाख लेहिं रस, आम सदाफर डार ।

हरियर तन सुअटा कर जो अस चाखनहार ॥६॥

रितु पावस बरसै, पिउ पावा । सावन भादौं अधिक सोहावा ॥
 पदमावति चाहत ऋतु पाई । गगन सोहावन, भूमि सोहाई ॥
 कोकिल बैन, पाँति बग छूटी । धनि निसरीं जनु बीरबहूटी ॥
 चमक बीजु, बरसै जल सोना । दादुर मोर सबद सुठि लोना ॥
 रँग राती पीतम सँग जागी । गरजे गगन चौंकि गर लागी ॥
 सीतल बूँद, ऊँच चौपारा । हरियर सब देखाइ संसारा ॥
 हरियर भूमि, कुसुंभी चोला । औ धनि पिउ सँग रचा हिंडोला ॥
 पवन झकोरे होइ हरष, लागे सीतल बास ।

धनि जानै यह पवन है, पवन सो अपने आस ॥७॥

आइ सरद ऋतु अधिक पियारी । आसनि कातिक ऋतु उजियारी ॥
 पदमावति भइ पूनिउँ कला । चौदसि चाँद उई सिंघला ॥
 सोरह कला सिंगार बनावे । नखत-भरा सूरुज ससि पावा ॥

भा निरमल सब धरति अकासू । सेज सँवारि कीन्ह फुल-वासू ॥
 सेत बिछावन औ उजियारी । हँसि हँसि मिलहिं पुरुष औ नारी ॥
 सोन फूल भइ पुहुमी फूली । पिय धनि सौं, धनि पिय सौं भूली ॥
 चख अंजन देइ खंजन देखावा । होइ सारस जोरी रस पावा ॥
 एहि ऋतु कंता पास जेहि, सुख तेहि के हिय माँह ।
 धनि हँसि लागै पिउ गरै, धनि-गर पिउ कै बाँह ॥८॥

ऋतु हेमंत सँग पिएउ पियाला । अगहन पूस सीत सुख-काला ॥
 धनि औ पिउ महँ सीउ सोहागा । दुहुँन्ह अंग एकै मिलि लाग़ा ॥
 मन सौ मन, तन सौं तन गहा । हिय सौं हिय, बिचहार न रहा ॥
 जानहुँ चंदन लागेउ अंगा । चंदन रहै न पावै संग़ा ॥
 भोग करहिं सुख राजा रानी । उन्ह लेखे सब सिस्टि जुडानी ॥
 जूझ दुवौ जोवन सौं लाग़ा । बिच हुँत सीउ जीउ लेइ भागा ॥
 दुइ घट मिलि एकै होइ जाहीं । ऐस मिलहिं, तबहुँ न अघाहीं ॥
 हंसा केलि करहिं जिमि, खूँदहिं कुरलहिं दोउ ।
 सीउ पुकारि कै पार भा, जस चकई क बिछोउ ॥९॥

आइ सिसिर ऋतु, तहाँ न सीऊ । जहाँ माघ फागुन घर पीऊ ॥
 सौर सुपेती मंदिर राती । दगल चीर पहिरहिं बहु भाँती ॥
 घर घर सिंघल होइ सुख जोजू । रहान कतहुँ दुःख कर खोजू ॥
 जहँ धनि पुरुष सीउ नहिं लाग़ा । जानहुँ काग देखि सर भागा ॥
 जाइ इंद्र सौं कीन्ह पुकारा । हौं पदमावति देस निसारा ॥
 एहि ऋतु सदा समग महँ सेवा । अब दरसन तें मोर बिछोवा ॥
 अब हँसि कै ससि सूरहिं भेंटा । रहा जो सीउ बीच सो मेटा ॥
 भएउ इंद्र कर आयसु, बड़ सताव यह सोइ ।
 कबहुँ काहु के पार भइ, कबहुँ काहु के होइ ॥१०॥

३०. नागमती-वियोग खंड

नागमती चितउर पथ हेरा । पिउ जो गए पुनि कीन्ह न फेरा ॥
 नागर काहु नारि बस परा । तेइ मोर पिउ मोसौं हरा ॥
 सुआ काल होइ लेइगा पीऊ । पिउ नहिं जात, जात बरु जीऊ ॥
 भएउ नरायन बावन करा । राज करत राजा बलि छरा ॥
 करन पास लीन्हेउ कै छंदू । बिप्र रूप धरि झिलमिल इंदू ॥
 मानत भोग गोपिचंद भोगी । लेइ अपसवा जलंधर जोगी ॥
 लेइगा कृस्नहि गरुड़ अलोपी । कठिन बिछोह, जियहिं किमि गोपी ?
 सारस जोरी कौन हरि, मारि बियाधा लीन्ह ।
 झुरि झुरि पींजर हौं भई, बिरह काल मोहि दीन्ह ॥१॥

पिउ बियोग अस बाउर जीऊ । पपिहा निति बोलै 'पिउ पीऊ' ॥
 अधिक काम दाधै सो रामा । हरि लेइ सुवा गएउ पिउ नामा ॥
 बिरह बान तस लाग न डोली । रकत पसीज, भींजि गइ चोली ॥
 सूखा हिया, हार भा भारी । हरे हरे प्रान तजहिं सब नारी ॥
 खन एक आव पेट महँ साँसा । खनहिं जाइ जिउ, होइ निरासा ॥
 पवन डोलावहिं, सीचहिं चोला । पहर एक समुजहिं मुख बोला ॥
 प्रान पयान होत को राखा । को सुनाव पीतम कै भाखा ॥
 आजि जो मारै बिरह कै, आगि उठै तेहि लागि ।

हंस जो रहा सरीर मह , पाँख जरा, गा भागि ॥२॥

पाट महादेइ! हिये न हारू । समुझि जीउ, चित चेतु सँभारू ॥
 भौर कँवल सँग होइ मेरावा । सँवरि नेह मालति पहुँ आवा ॥
 पपिहै स्वाती सौं जस प्रीती । टेकु पियास बाँधु मन थीती ॥
 धरतहिं जैस गगन सौं नेहा । पलटि आव बरषा ऋतु मेहा ॥
 पुनि बसंत ऋतु आव नबेली । सो रस, सो मधुकर, सो बेली ॥
 जिनि अस जीव करसि तू बारी । यह तरिबर पुनि उठिहि सँवारी ॥
 दिन दस विनु जल सूखि बिधंसा । पुनि सोई सरवर सोइ हंसा ॥
 मिलहिं जो विछुरे साजन, अंकस भेंटि अहंत ।

तपनि मृगसिरा जे सहैं , ते अद्रा पलुहंत ॥३॥

चढा असाढ, गगन घन गाजा । साजा बिरह दुंद दल बाजा ॥
 धूम, साम, धीरे घन धाए । सेत धजा बग पाँति देखाए ॥
 खड्ग बीजु चमकै चहुँ ओरा । बुंद बान बरसहिं घन घोरा ॥
 ओनई घटा आइ चहुँ फेरी । कंत! उबारु मदन हौं घेरी ॥
 दादुर मोर कोकिला, पीऊ । गिरै बीजु , घट रहै न जीऊ ॥
 पुष्प नखत सिर ऊपर आवा । हौं विनु नाह मँदिर को छाँवा ॥
 अद्रा लाग लागि भुइँ लेई । मोहिं विनु पिउ को आदर देई ॥
 जिन्ह घर कंता ते सुखी, तिन्ह गौरौ औ गर्ब ।

कंत पियारा बाहिरै, हम सुख भूला सर्व ॥४॥

सावन बरस मेह अति पानी । भरनि परी, हौं बिरह झुरानी ॥
 लाग पुनरबसु पीउ न देखा । भइ बाउरि, कहँ कंत सरेखा ॥
 रकत कै आँसु परहिं भुइँ टूटी । रेंगि चली जस बीरबहूटी ॥
 सखिन्ह रचा पिउ संग हिंडोला । हरियारि भूमि, कुसुंभी चोला ॥
 हिय हिंडोल अस डोलै मोरा । बिरह झुलाइ देइ झकझोरा ॥
 बाट असूझ अथाह गँभीरी । जिउ बाउर, भा फिरै भँभीरी ॥
 जग जल बूड जहाँ लगी ताकी । मोरि नाव खेवक विनु थाकी ॥
 परबत समुद, अगम बिच, बीहड़ घन बनढाँख ।

किमि कै भेंटौं कंत तुम्ह ? ना मोहि पाँव न पाँख ॥५॥

भा भादों दूभर अति भारी । कैसे भौर रैनि अँधियारी ॥
 मंदिर सून पिउ अनतै बसा । सेज नागिनी फिरि फिरि डसा ॥
 रहौं अकेलि गहे एक पाटी । नैन पसारि मरौं हिय फाटी ॥
 चमक बीजु, घन गरजि तरासा । बिरह काल होइ जीउ गरासा ॥
 बरसै मघा झकोरि झकोरि । मोर दुइ नैन चुवैं जस ओरी ॥

धनि सूखै भरे भादों माहाँ । अबहुँ न आएन्हि सीचेन्हि नाहाँ ॥
पुरबा लाग भूमि जल पूरी । आक जवास भई तस झूरी ॥
थल जल भरे अपूर सब, धरनि गगन मिलि एक ।

जनि जोवन अवगाह महँ, दे बूडत, पिउ! टेक ॥६॥

लाग कुवार, नीर जग घटा । अबहुँ आउ कंत तन लटा ॥
तोहि देखे पिउ! पलुहै कया । उतरा चीतु बहुरि करु मया ॥
चित्रा मित्र मीन कर आवा । पपिहा पीउ पुकारत पावा ॥
उआ अगस्त, हरित घन गाजा । तुरय पलानि चढे रन राजा ॥
स्वाति बूँद चातक मुख परे । समुद सीप मोती सब भरे ॥
सरवर सँवरि हंस चलि आए । सारस कुरलहिं खँजन देखाए ॥
भा परगास, काँस बन फूले । कंत न फिरे बिदेसहि भूले ॥

बिरह हस्ति तन सालै, घाय करै चित चूर ।

वेगि आइ, पिउ! बाजहु, गाजहु होइ सदूर ॥७॥

कातिक सरद चंद उजियारी । जग सीतल, हौं बिरहै जारी ॥
चौदह करा चाँद परगासा । जनहुँ जरै सब धरति अकासा ॥
तम मन सेज करै अगिदाह । सब कहँ चंद, भएउ मोहिं राहू ॥
चहूँ खंड लागै अँधियारा । जौं घर नाहीं कंत पियारा ॥
अबहुँ निठुर! आउ एहि बारा । परब देवारी होइ संसारा ॥
सखि झूमक गावैं अँग मोरी । हौं झुरावैं, बिछुरी मोरि जोरी ॥
जेहि घर पिउ सो मनोरथ पूजा । मो कहँ बिरह सवति दुख दूजा ॥
सखि मानैं तिउहार सब, गाइ देवारी खेलि ।

हौं का गावौं कंत बिनु रही छार सिर मेलि ॥८॥

अगहन दिवस घटा, निसि बाढी । दुभर रैनि, जाइ किमि गाढी ?
अब यहि बिरह दिवस भा राती । जरौं बिरह जस दीपक बाती ॥
काँपै हिया जनावै सीऊ । तौ पै जाइ होइ सँग पीऊ ॥
घर घर चीर रचे सब काहू । मोर रूप रँग लेइगा नाहू ॥
पलटि त बहुरा गा जो बिछोई । अबहुँ फिरै फिरै रँग सोई ॥
वज्र अग्नि बिरहिन हिय जारा । सुलुगि सुलुगि दगधै होइ छारा ॥
यह दुख दगध न जानै कंतू । जोवन जनम करै भसमंतू ॥

पिउ सौ कहेहु सँदेसडा, हे भौरा हे काग ।

सो धनि बिरहै जरि मुई, तेहि क धुवाँ हम्ह लाग ॥९॥

पूस जाइ थर थर तन काँपा । सुरुज जाइ लंका दिसि चाँपा ॥
बिरह बाढ़, दारुन भा सीऊ । काँपि काँपि मरौं, लेइ हरि जीऊ ॥
कंत कहाँ लागौं ओहि हियरे । पंथ अपार, सूझ नहिं नियरे ॥
सौर सपेती आवै जूडी । जानहु सेज हिवंचल बूडी ॥
चकई निसि बिछूरे दिन मिला । हौं दिन राति बिरह कोकिला ॥
रैनि अकेलि साथ नहिं सखी । कैसे जियै बिछोही पखी ॥
बिरह सचान भएउ तन जाड़ा । जियत खाइ औ मुए न छाँडा ॥

रकत दुरा माँसू गरा, हाइ भएउ सब संख ।

धनि सारस होइ ररि मुई, पाउ समेटहि पंख ॥१०॥

लागेउ माघ परै अब पाला । बिरह काल भएउ जडकाला ॥
 पहल पहल तन रूई झाँपै । हहरि हहरि अधिकौ हिय काँपै ॥
 आइ सूर होइ तपु , रे नाहा । तोहि बिनु जाड न छूटै माहा ॥
 एहि माह उपजै रसमूलू । तू सो भौर मोर जोबन फूलू ॥
 नैन चुवहिं जस महवट नीरू । तोहि बिनु अंग लाग सर चीरू ॥
 टप टप बूँद परहिं जस ओला । बिरह पवन होइ मारै झोला ॥
 केहि क सिंगार, कौ पहिरु पटोरा । गीउ न हार, रही होइ डोरा ॥

तुम बिनु कापै धनि हिया, तन तिनउर भा डोल ।

तेहि पर बिरह जराइ कै, चहै उडावा झोल ॥११॥

फागुन पवन झकोरा बहा । चौगुन सीउ जाइ नहिं सहा ॥
 तन जस पियर पात भा मोरा । तेहि पर बिरह देइ झकझोरा ॥
 तरिवर झरहि , झरहिं बन ढाखा । भइ ओनंत फूलि फरि साखा ॥
 करहिं बनसपति हिये हुलासू । मो कहँ भा जग दून उदासू ॥
 फागु करहिं सब चाँचरि जोरी । मोहि तन लाइ दीन्ह जस होरी ॥
 जौ पै पीउ जरत अस पावा । जरत मरत मोहिं रोष न आवा ॥
 राति दिवस सब यह जिउ मोरे । लगौं निहोर कंत अब तोरे ॥

यह तन जारों छार कै, कहीं कि पवन उडाव ।

मकु तेहि मारग उडि परै, कंत धरै जहँ पाव ॥१२॥

चैत बसंता होइ धमारी । मोहिं लेखे संसार उजारी ॥
 पंचम बिरह पंच सर मारे । रक्त रोइ सगरौं बन ढारै ॥
 बूडि उठे सब तरिवर-पाता । भीजि मजीठ, टेसु बन राता ॥
 बौरै आम फरै अब लागै । अबहुँ आउ घर कंत सभागे ॥
 सहस भाव फूलीं बनसपती । मधुकर घूमहिं सँवरि मालती ॥
 मोकहँ फूल भए सब काँटे । दिस्टि परत जस लागहिं चाँटे ॥
 फरि जोबन भए नारँग साखा । सुआ बिरह अब जाइ न राखा ॥

घिरिन परेवा होइ पिउ! आउ बेगि परु टूटि ।

नारि पराए हाथ है , तोह बिनु पाव न छूटि ॥१३॥

भा बैसाख तपनि अति लागी । चोआ चीर चंदन भा आगि ॥
 सूरुज जरत हिवंचल तअका । बिरह बजागि सौंह रथ हाँका ॥
 जरत बजागिनि करु, पिउ छाहाँ । आइ बुझाउ, अँगारन्ह माहाँ ॥
 तोहि दरसन होइ सीतल नारी । आइ आगि तें करु फुलवारी ॥
 लागिउँ जरै जरै जस भारू । फिर फिर भूजेसि, तजेउँ न बारू ॥
 सरवर हिया घटत निति जाई । टूक टूक होइ कै बिहराई ॥
 बिहरत हिया करहु पिउ! टेका । दीठी दवँगारा मेरवहु एका ॥

कँवल जो मानसर , बिनु जल गएउ सुखाइ ।

कवहुँ बेलि फिरि पलुहै , जौ पिउ सींचै आइ ॥१४॥

जेठ जरै जग, चलै लुवारा । उठहि बवंडर परहिं अँगारा ॥
 बिरह गाजि हनुवंत होइ जागा । लंकादाह करै तनु लागा ॥
 चारिहु पवन झकोरे आगी । लंका दाहि पलंका लागी ॥
 दहि भइ साम नदी कालिंदी । बिरह क आगि कठिन अति मंदी ॥
 उठै आगि औ आवै आँधी । नैन न सूझ, मरौ दुःख-बाँधी ॥

अधजर भइउँ, माँसु तनु सूखा । लागेउ बिरह काल होइ भूखा ॥
माँसु खाइ सब हाइन्ह लागै । अबहुँ आउ, आवत सुनि भागै ॥
गिरि, समुद्र, ससि, मेघ, रवि, सहि न सकहिं वह आगि ।

मुहमद सती सराहिए, जरै जो अस पिउ लागि ॥१५॥
तपै लागि अब जेठ असाढी । मोहि पिउबिनु छाजनि भइ गाढी ॥
तन तिनउर भा, झुरौं खरी । भइ बरखा, दुख आगरि जरी ॥
बंध नाहिं औ कंध न कोई । बात न आव कहौं का रोई ॥
साँठि नाहिं जग बात को पूछा । बिनु जिउ फिरै मूँज तनु छूँछा ॥
भइ दुहेली टेक बिहनी । थाँभ नाहि उठि सकै न थूनी ॥
बरसै मेह, चुवहिं नैनाहा । छपर छपर होइ रहि बिनु नाहा ॥
कोरौं कहाँ ठाट नव साजा ? तुम बिनु कंत न छाजन छाजा ॥
अबहुँ मया दिस्ट करि, नाह निठुर ! घर आउ ।
मँदिर उजार होत है, नव कै आइ बसाउ ॥१६॥

रोइ गँवाए बारह मासा । सहस सहस दुख एक एक साँसा ॥
तिल तिल बरख बरख परि जाई । पहर पहर जुग जुग न सेराई ॥
सो नहिं आवै रूप मुरारी । जासौं पाव सोहाग सुनारी ॥
साँझ भए झुरु झुरि पथ हेरा । कौनि सो घरी करै पिउ फेरा ॥
दहि कोइला भइ कंत सनेहा । तोला माँसु रही नहिं देहा ॥
रकत न रहा बिरह तन गरा । रती रती होइ नैनन्ह ढरा ॥
पाय लागि जोरै धनि हाथा । जारा नेह, जुडावहु, नाथा ॥
बरस दिवस धनि रोइ कै, हारि परी चित झंखि ।

मानुष घर घर बझि कै, बूझै निसरी पंखि ॥१७॥
भई पुछार, लीन्ह बनवासू । बैरिनि सवति दीन्ह चिलवाँसू ॥
होइ खर बान बिरह तनु लागा । जौ पिउ आवै उडहि तौ कागा ॥
हारिल भई पंथ मैं सेवा । अब तहँ पठवौं कौन परेवा ॥
धौरी पंडुक कहु पिउ नाऊँ । जाँ चित रोख न दूसर ठाऊँ ॥
जाहि बया होइ पिउ कँठ लवा । करै मेराव सोइ गौरवा ॥
कोइल भई पुकारति रही । महरि पुकारै 'लेइ लेइ दही ' ॥
पेइ तिलोरी औ जल हंसा । हिरदय पैठि बिरह कटनंसा ॥
जेहि पखी के निअर होइ कहै बिरह कै बात ।

सोई पंखी जाइ जरि, तरिवर होइ निपात ॥१८॥
कुहुकि कुहुकि जस कोइल रोई । रकत-आँसु घुँघुची बन बोई ॥
भइ करमुखी नैन तन राती । को सेराव बिरहा-दुख ताती ॥
जहँ जहँ ठाढि होइ बनबासी । तहँ तहँ होइ घुँघुचि कै रासी ॥
बूँद बूँद महँ जानहुँ जीऊ । गुंजा गुँजि करै 'पिउ पीऊ ' ॥
तेहि दुख भए परास निपाते । लोहू बुडि उठे होइ राते ॥
राते बिंब भीजि तेहि लोहू । परवर पाक, फाट हिय गोहूँ ॥
दैखौं जहाँ होइ सोइ राता । जहाँ सो रतन कहै को बाता ॥
नहिं पावस ओहि देसरा, नहिं हेवंत बसंत ।
ना कोकिल न पपीहरा, जेहि सुनि आवै कंत ॥१९॥

३१.नागमती-संदेश खंड

फिरि फिरि रोव, कोइ नहीं डोला । आधी राति बिहंगम बोला ॥
 तू फिरि फिरि दाहै सब पाँखी । केहि दुख रैनि न लावसि आँखी ॥
 नागमती कारन कै रोई । का सोवै जो कंत बिछोई ॥
 मनचित हूँते न उतरै मोरे । नैन क जल चुकि रहा न मोरे ॥
 कोइ न जाइ ओहि सिंगलदीपा । जेहि सेवाति कहँ नैना सीपा ॥
 जोगी होइ निसरा सो नाहू । तब हूँत कहा सँदेस न काहू ॥
 निति पूछ्यौ सब जोगी जंगम । कोइ न कहै निज बात बिहंगम ॥
 चारिउ चक्र उजार भए , कोइ न सँदेसा टेक ।

कहाँ बिरह दुख आपन, बैठि सुनहु दँड एक ॥१॥

तासौं दुख कहिए, हो बीरा । जेहिं सुनि कै लागै पर पीरा ॥
 को होइ भिउ अँगवे पर दाहा । को सिंगल पहुँचावै चाहा ?
 जहँवाँ कंत गए होइ जोगी । हौं किंगरी भइ झूरि बियोगी ॥
 वै सिंगी पूरी, गुरु भेंटा । हौं भइ भसम, न आइ समेटा ॥
 कथा जो कहै आइ ओहि केरी । पाँवर होउँ, जनम भरि चेरी ॥
 ओहि के गुन सँवरत भइ माला । अबहूँ न बहुरा उडिगा छाला ॥
 बिरह गुरु, खप्पर कै हीया । पवन अधार रहै सो जीया ॥

हाइ भए सब किंगरी, नसैं भई सब ताँति ।

रोवँ रोवँ तें धुनि उठै, कहीं बिथा केहि भाँति ? ॥२॥

पदमावति सौं कहेहु, बिहंगम । कंत लोभाइ रही करि संगम ॥
 तू घर घरनि भई पिउ-हरता । मोहि तन दीन्हेसि जप औ बरता ॥
 रावट कनक सो तोकहँ भएऊ । रावट लंक मोहिं कै गएऊ ॥
 तोहि चैन सुख मिलै सरीरा । मो कहँ हिये दुंद दुख पूरा ॥
 हमहूँ बियाही संग ओहि पीऊ । आपुहि पाइ जानु पर-जीऊ ॥
 अबहूँ मया करु, करु जिउ फेरा । मोहिं जियाउ कंत देइ मेरा ॥
 मोहिं भोग सौं काज न बारी । सौंह दीठि कै चाहनहरी ॥

सवति न होहि तू बैरिनि, मोर कंत जेहहि हाथ ।

आनि मिलाव एक बेर, तोर पाँय मोर माथ ॥३॥

रतनसेन कै माइ सुरसती । गोपीचंद जसि मैनावती ॥
 आँधरि बूढि होइ दुख रोवा । जीवन रतन कहाँ दहूँ खोवा ॥
 जीवन अहा लीन्ह सो काढी । भइ विनु टेक, करै को ठाढी ?
 विनु जीवन भइ आस पराई । कहाँ सो पूत खंभ होइ आई ॥
 नैन दीठ नहिं दिया बराहीं । घर अँधियार पूत जौ नाहीं ॥
 को रे चलै सरवन के ठाँऊ । टेक देह औ टेकै पाऊँ ॥
 तुम सरवन होइ काँवरि सजा । डार लाइ अब काहे तजा ?

‘सरवन! सरवन!’ ररि मुई,माता काँवरि लागि ।

तुम्ह विनु पानि न पावैं, दसरथ लावै आगि ॥४॥

लेइ सो संदेश बिहंगम चला । उठी आगि सगरौं सिंगला ॥
 बिरह बजागि बीच को ठेघा ? । धूम सो उठा साम भए मेघा ॥
 भरिगा गगन लूक अस छूटे । होइ सब नखत आइ भुईं टूटे ॥

जहँ जहँ भूमि जरी भा रेहू । बिरह के दाघ भई जनु खेहू ॥
 राहु केतु, जब लंका जारी । चिनगो उड़ी चाँद महुँ परी ॥
 जाइ बिहंगम समुद डफारा । जरे मच्छ पानी भा खारा ॥
 दाधे बन बीहड़, जड़, सीपा । जाइ निअर भा सिंघलदीपा ॥
 समुद तीर एक तरिवर, जाइ बैठ तेहि रूख ।

जौ लगि कहा सदेस नहि, नहिं पियास, नहिं भूख ॥५॥

रतनसेन बन करत अहेरा । कीन्ह ओही तरिवर-तर फेरा ॥
 सीतल बिरिछ समुद के तीरा । अति उतंग ओ छाँह गँभीरा ॥
 तुरय बाँधि कै बैठ अकेला । साथी और करहिं सब खेला ॥
 देखत फिरै सो तरिवर-साखा । लाग सुनै पंखिन्ह कै भाखा ॥
 पंखिन महुँ सो बिहंगम अहा । नागमती जासौं दुख कहा ॥
 पूछहिं सबै बिहंगम नामा । अहौ मीत! काहै तुम सामा ?
 कहेसि मीत! मासक दुइ भए । जंबूदीप तहाँ हम गए ॥
 नगर एक हम देखा, गढ़ चितउर ओहि नाँव ।

सो दुख कहौं कहाँ लगि, हम दाढ़े तेहिं ठाँव ॥६॥

जोगी होइ निसरा सो राजा । सून नगर जानहु धुंध बाजा ॥
 नागमती है ताकरि रानी । जरी बिरह भइ कोइल बानी ॥
 अब लगि जरि भइ होइहि छारा । कही न जाइ बिरह कै झारा ॥
 हिया फाट वहव जबहिं कूकी । परै आँसु सब होइ होइ लूकी ॥
 चहुँ खंड छिटकी वह आगी । धरती जरति गगन कहँ लागी ॥
 बिरह दवा को जरत बुझावा । जेहि लागै सो सौँहें धावा ॥
 हौं पुनि तहाँ सो दाढ़े लागी । तन भा साम जीउ लेइ भागा ॥
 का तुम हँसहु गरब कै, करहु समुद महुँ केलि ।

मति ओहि बिरहा बस परै, दहै अगिनि जो मेलि ॥७॥

सुनि चितउर-राजा मन गुना । बिदि-सँदेस में कासौं सुना ॥
 को तरिवरि पर पंखि बेखा । नागमति कर कहै सँदेसा ?
 को तूँ मीत मन-चित्त-बसेरु । देव कि दानव पवन पखेरू ?
 ब्रह्म बिस्तु बाचा है तोही । सो निज बात कहै तू मोही ॥
 कहाँ सो नागमती तैं देखी । कहेसि बिरह जस मनहिं बिसेखी ॥
 हौं सोई राजा भा जोगी । जेहि कारन वह ऐसि बियोगी ॥
 जस तूँ पंखि महुँ दिन भरौं । चाहौं कबहि जाइ उड़ि परौं ॥
 पंखि आँखि तेहि मारग, लागी सदा रहाहिं ।

कोइ न सँदेसी आवहिं, तेहिक सँदेश कहाँहिं ॥८॥

पूछसि कहा सँदेस बियोगू । जोगी भए न जानसि भोगू ॥
 दहिने संख न, सिंगी पूरै । बाएँ पूरि राति दिन झूरै ॥
 तेलि बैल जस बावँ फिराई । परा भँवर महुँ सो न तिराई ॥
 तुरय, नाव, दहिने रथ हाँका । बाएँ फिरै कोहोर क चाका ॥
 तोहिं अस नाहीं पंखि भुलाना । उडे सो आव जगत महुँ जाना ॥
 एक दीप का आएँउ तोरे । सब संसार पाँय-तर मोरे ॥
 दहिने फिरै सो अस उजियारा । जस जग चाँद सुरुज मनियारा ॥
 मुहमद बाई दिसि तजा, एक स्रवन, एक आँखि ।

जब तैं दाहिन होइ मिला बोल पपीहा पाँखि ॥९॥

हौं ध्रुव अचल सौं दाहिनि लावा । फिर सुमरु चितुउर गढ आवा ॥
 देखेउँ तोरे मँदिर घमोई । मातु तोहि आँधरि भइ रोई ॥
 जस सरवन बिनु अंधी अंधा । तस ररि मुई तोहि चित बँधा ॥
 कहेसि मरौं, को काँवरि लेइ ? पूत नाहिं, पानी को देई ?
 गई पियास लागि तेहि साथी । पानि दीन्ह दशरथ के हाथा ॥
 पानि नि पियै, आगि पै चाहा । तोहि अस सुत जनमे अस लाहा ॥
 होइ भगीरथ करु तहँ फेरा । जाहि सवार, मरन कै बेरा ॥
 तू सपूत माता कर, अस परदेस न लेहि ।

अब ताई मुइ होइहि, मुए जाइ गति देहि ॥१०॥

नागमति दुख बिरह अपारा । धरती सरग जरै तेहि द्वारा ॥
 नगर कोट घर बाहर सूना । नौजि होइ घर पुरुष बिहूना ॥
 तू काँवरु परा बस टोना । भूला जोग, छरा तोहि लोना ॥
 वह तोहि कारन मरि भइ द्वारा । रही नाग होइ पवन अधारा ॥
 कहुँ बोलहि 'मो कहँ लेइ खाहू' । माँसु न, काया रचै जो काहू ॥
 बिरह मयूर नाग वह नारी । तू मजार करु बेगि गोहारी ॥
 माँसु गिरा, पाँजर होइ परी । जोगी । अबहुँ पहुँचु लेइ जरी ॥
 देखि बिरह दुख ताकर, मैं सो तजा बनवास ।

आएउँ भागि समुद्रतट, तबहुँ न छाड़ै पास ॥११॥

अस परजरा बिरह कर गठा । मेघ साम भए धूम जो उठा ॥
 दाढा राहु, केतु गा दाधा । सूरज जरा चाँद जरि आधा ॥
 औ सब नखत तराई जरहीं । टूटहिं लूक धरति महुँ परहीं ॥
 जरै सो धरती ठावहिं ठाऊँ । दहकि पलास जरै तेहि दाऊ ॥
 बिरह-साँस तस निकसै द्वारा । दहि दहि परबत होहिं अँगारा ॥
 भँवर पतंग जरै औ नागा । कोइल, भुजइल, डोमा कागा ॥
 बन पंखी सब जिउ लेइ उड़े । जल महुँ मच्छ्र दुखी होइ बुड़े ॥
 महुँ जरत तहँ निकसा, समुद्र बुझाएउँ आइ ।

समुद्र पान जरि खार भा, धुँआ रहा जग छाइ ॥१२॥

राजै कहा, रे सरग, सँदेसी । उतरि आउ मोहिं मिलु रे बिदसी ॥
 पाय टेकि तोहि लायौं हियरे । प्रेम सँदेस कहहु होइ नियरे ॥
 कहा बिहंगम जो बनवासी । कित गिरही त होइ उदासी ?
 जेहि तरवर-तर तुम अस कोऊ । कोकिल काग बराबर दोऊ ॥
 धरती महुँ विष-चारा परा । हारिल जानि भूमि परिहरा ॥
 फिरौं बियोगी डारहि डारा । करौं चलै कहँ पंख सँवारा ॥
 जियै क घरी घटति निति जाहीं । साँझहिं जीउ रहै, दिन नाहीं ॥
 जौ लहि फिरौं मुकुत होइ, परौं न पींजर माँह ।

जाऊँ बेगि थल आपने, है जेहि बीच निबाह ॥१३॥

कहि सँदेस बिहंगम चला । आगि लागि सगरौं सिघला ॥
 घरी एक राजा गोहराबा । भा अलोप, पुनि दिस्टि न आवा ॥
 पंखी नावँ न देखा पाँखा । राजा होइ फिरा कै साँखा ॥
 जस हैरत वह पंखि हेराना । दिन एक हमहुँ करब पयाना ॥
 जौ लागि प्रान पिंड एक ठाऊँ । एक बार चितउर गढ जाऊँ ॥

आवा भँवर मंदिर महँ केवा । जीउ साथ लेइ गएउ परेवा ॥
तन सिंघल मन चितउर बसा । जिउ बिसँभर नागिनि जिमि डसा ॥
जेति नारि हँसि पूछहिँ, अमिय-बचन जिउ तंत ।

रस उतरा विष चढ़ि रहा, ना ओहि तंत न मंत ॥१४॥

बरिस एक तेहि सिंगल भएऊ । भौग बिलास करत दिन गयऊ ॥
भा उदास जौ सुना सँदेसू । सँवरि चला मन चितउर देसू ॥
कँवल उदास जो देखा भँवरा । थिर न रहै अब मालति सँवरा ॥
जोगी, भवरा, पवन परावा । कित सो रहै जो चित्त उठावा ॥
जौ पै काढ देइ जिउ कोई । जोगी भँवर न आपन होई ॥
तजा कवल मालति हिय घाली । अब कित थिर आछै अलि आली ॥
गंध्रवसेन आव सुनि बारा । कस जिउ भएउ उदास तुम्हारा ?
मैं तुम्हही जिउ लावा, दीन्ह नैन महँ बास ।
जौ तुम होहु उदास तौ, यह काकर कबिलास ? ॥१५॥

३२. रतनसेन-बिदाई खंड

रतनसेन बिनवा कर जोरी । अस्तुति जोग जीभ नहिँ मोरी ॥
सहस जीभ जौ होहिँ गोसाईं । कहि न जाइ अस्तुति जहँ ताई ॥
काँच रहा तुम कंचन कीन्हा । तब भा रतन जोति तुम दीन्हा ॥
गंग जो निरमल-नीर कुलीना । नार मिले जल होइ मलीना ॥
पानि समुद्र मिला होइ सोती । पाप हरा निरमल भा मोती ॥
तस हौं अहा मलीनी कला । मिला आइ तुम्ह भा निरमला ॥
तुम्ह मन आवा सिंघलपुरी । तुम्ह तैं चढा राज औ कुरी ॥

सात समुद्र तुम राजा, सरि न पाव कोइ खाट ।

सबै आइ सिर नावहिँ जहँ तुम साजा पाट ॥१॥

अब बिनती एक करौं गोसाईं । तौ लागि कया जीउ जब ताई ॥
आवा आजु हमार परेवा । पाती आनि दीन्ह मोहिँ देवा ॥
राज काज औ भुइँ उपराहीं । सत्रु भाइ सम कोई नाहीं ॥
आपन आपन करहिँ सो लीका । एकहिँ मारि एक चह टीका ॥
भए अमावस नखतन्ह राजू । हम्ह कै चंद चलावहु आजू ॥
राज हमार जहाँ चलि आवा । लिखि पठइनि अब होइ परावा ॥
उहाँ नियर दिल्ली सुलतानू । होइ जो भौर उठे जिमि भानू ॥
रहहु अमर महि गगन लागि, तुम महि लेइ हम्ह आउ ।

सीस हमार तहाँ निति, जहाँ तुम्हारा पाउ ॥२॥

राजसभा पुनि उठी सवारी । अनु बिनती राखिय पति भारी ॥
भाइन्ह माहँ होइ जिनि फूटी । घर के भेद लंक अस टूटी ॥
बिरवा लाइन सूखे दीजै । पावै पानि दिस्टि सो कीजै ॥
आनि रखा तुम दीपक लेसी । पै न रहै पाहुन परदेसी ॥
जाकर राज जहाँ चलि आवा । उहै देस पै ताकहँ भावा ॥
हम तुम नैन घालि कै राखे । ऐसि भाख एहि जीभ नभाखे ॥
दिवस देहु सह कुसल सिधावहिँ । दीरघ आइ होइ, पुनि आवहिँ ॥

सबहि विचार परा अस, भा गवने कर साज ।

सिद्धि गनेस मनावहिं, बिधि पुरवहु सब काज ॥३॥

बिनय करै पदमावति बारी । हौं पिउ! जैसी कुंद नेवारी ॥
मोहि असि कहाँ सो मालति बेली । कदम सेवती चंप चमेली ॥
हौ सिंगारहार सज तागा । पुहुप कली अस हिरदय लागा ॥
हौं सो बसंत करौं निति पूजा । कुसुम गुलाल सुदरसन कूजा ॥
बकुचन बिनवौं रोस न मोही । सुनु बकाउ तजि चाहु न जूही ॥
नागसेर जो है मन तोरे । पूजि न सकै बोल सरि मोरे ॥
होइ सदबरग लीन्ह मैं सरना । आगे करु जो कंत! तोहि करना ॥

केत बारि समुझावै, भँवर न काँटे बेध ।

कहै मरौं पै चितउर, जज्ञ करौं असुमेध ॥४॥

गवनचार पदमावति सुना । उठा धसकि जिउ औ सिर धुना ॥
गहबर नैन आए भरि आँसू । छाँडव यह सिंघल कबिलासू ॥
छाँडिउँ नैहर चलिउँ बिछोई । एहि रे दिवस कहँ हौं तब रोई ॥
छाँडिउँ आपन सखी सहेली । दूरि गवन तजि चलिउँ अकेली ॥
जहाँ न रहन भएउ बिनु चालू । होतहि कस न तहाँ भा कालू ॥
नैहर आइ काह सुख देखा ? जनु होइगा सपने कर लेखा ॥
राखत बारि सो पिता निछोहा । कित बियाहि अस दीन्ह बिछोहा ॥

हिये आइ दुख बाजा, जिउ जानहु गा छेंकि ।

मन तेवान कै रोवै हर मंदिर कर टेकि ॥५॥

पुनि पदमावति सखी बोलाई । सुनि कै गवन मिलै सब आई ॥
मिलहु, सखी! हम तहँवाँ जाहीं । जहाँ जाइ पुनि आउब नाहीं ॥
सात समुद्र पार वह देसा । कित रे मिलन कित आव सँदेसा ॥
अगम पंथ परदेस सिधारी । न जनों कुसल कि बिथा हमारी ॥
पितै न छोह कीन्ह हिय माहाँ । तहँ को हमहिं राख गहि बाहाँ ?
हम तुम मिलि एकै सँग खेला । अंत बिछोह आनि गिउ मेला ॥
तुम्ह अस हित संघती पियारी । जियत जीउ नहिं करौं निनारी ॥

कंत चलाई का करौं, आयसु जाइ न मेटि ।

पुनि हम मिलहिं कि ना मिलहिं, लेहु सहेली भेंटि ॥६॥

धनि रोवत रोवहिं सब सखी । हम तुम्ह देखि आपु कहँ झँखी ॥
तुम्ह ऐसी जौ रहै न पाई । पुनि हम काह जो आहिं पराई ॥
आदि अंत जो पिता हमारा । ओहु न यह दिन हिये बिचारा ॥
छोह न कीन्ह निछोही ओहू । का हम्ह दोष लाग एक गोहूँ ॥
मकु गोहूँ कर हिया चिराना । पै सो पिता न हिये छोहाना ॥
औ हम देखा सखी सरेखा । एहि नैहर पाहुन के लेखा ॥

तब तेइ नैहर नाहीं चाहा । जौ ससुरारि होइ अति लाहा ॥

चालन कहँ हम अवतरीं, चलन सिखा नहिं आय ।

अब सो चलन चलावै, कौ राखै गहि पाय ? ॥७॥

तुम बारी पिउ दुहँ जग राजा । गरब किरोध ओहि पै छाजा ॥
सब फर फूल ओहि के साखा । चहै सो तुरै, चाहै राखा ॥
आयसु लिहे रहिहु निति हाथा । सेवा करिहु लाइ भुईं माथा ॥
बर पीपर सिर उभ जो कीन्हा । पाकरि तिन्हहिं छीन फर दीन्हा ॥

बौरिं जो पीठि सीस भुइँ लावा । बड़ फल सुफल ओहि जग पावा ॥
 आम जो फरि कै नवै तराहीं । फल अमृत भा सब उपराहीं ॥
 सोइ पियारी पियहि पिरीती । रहै जो आयसु सेवा जीती ॥
 पत्रा काढ़ि गवन दिन देखहि, कौन दिवस दहँ चाल ।

दिसासूल चक जोगिनी, साँह न चलिए काल ॥८॥

अदित सूक पच्छिउँ दिसि राहू । बीफै दखिन लंक-दिसि दाहू ॥
 सोम सनीचर पुरुब न चालू । मंगल बुद्ध उतर दिसि कालू ॥
 अवसि चला चाहै जौ कोई । ओषद कहौं रोग नहिं होई ॥
 मंगल चलत मेल मुख धनिया । चलत सोम देखै दरपनिया ॥
 सूकहिं चलत मेल मुख राई । बीफै चलै दखिन गुड खाई ॥
 अदिति तँबोल मेलि मुख मंडै । बायबिरंग सनीचर खंडै ॥
 बुद्धहिं दही चलहु कर भोजन । ओषध इहै और नहिं खोजन ॥
 अब सुनु चक्र जोगिनी, ते पुनि थिर न रहाहिं ।

तीसौं दिवस चंद्रमा, आठो दिसा फिराहिं ॥९॥

बारह ओनइस चारि सताइस । जोगिनि परिच्छिउँ दिसा गनाइस ॥
 नौ सोरह चौबिस औ एका । दक्खिन पुरुष कोन तेइ टेका ॥
 तीन इगारह छबिस अठारहु । जोगिनि दक्खिन दिसा बिचारहु ॥
 दुइ पचीस सत्रह औ दसा । दक्खिन पच्छिउँ... कोन बिच बसा ॥
 तेरस तीस आठ पंद्रहा । जोगिनि उत्तर होहिं पुरुब सामुहा ॥
 चौदह बाइस ओनतिस साता । जोगिनि उत्तर दिसि कहँ जाता ॥
 बीस अठारह तेरह पाँचा । उत्तर पच्छिउँ कोन तेइ नाचा ॥
 एकइस औ छ जोगिनि उतर पुरुब के कोन !

यह गनि चक्र जोगिनि बाँचु जौ चह सिध होन ॥१०॥

परिवा, नवमी पुरुब न भाए । दूइज दसमी उतर अदाए ॥
 तीज एकादसि अगनिउ मारै । चौथि, दुवादसि नैऋत वारे ॥
 पाँचइँ तेरसि दखिन रमेसरी । छठि चौदसि पच्छिउँ परमेसरी ॥
 सतमी पूनिउँ बायब आछी । अठइँ अमावस ईसन लाछी ॥
 तिथि नछत्र पुनि बार कहीजै । सुदिन साथ प्रस्थान धरीजै ॥
 सगुन दुघरिया लगन साधना । भद्रा औ दिकसूल बाँचना ॥
 चक्र जोमिनी गनै जो जानै । पर बर जीति लच्छि घर आनै ॥
 सुख समाधि आनंद घर, कीन्ह पयाना पीउ ।

थरथराइ तन काँपै, धरकि धरकि उठ जीउ ॥११॥

मेष, सिंह, धन पूरुब बसै । बिरखि, मकर कन्या जम दिसै ॥
 मिथुन तुला औ कुंभ पछाहाँ । करक, मीन, बिरछिक उतराहाँ ॥
 गवन करै कहँ उगरै कोई । सनमुख सोम लाभ बहु होई ॥
 दहिन चंद्रमा सुख सरबदा । बाएँ चंद त दुख आपदा ॥
 अदित होइ उत्तर कहँ कालू । सोम काल बायब नहिं चालू ॥
 भौम काल पच्छिउ बुध निऋता । गुरु दक्खिन और सुक अगनइता ॥
 पूरब काल सनीचर बसै । पीठि काल देइ चलै त हँसै ॥

धन नछत्र औ चंद्रमा औ तारा बल सोइ ।

समय एक दिन गवनै लछमी केतिक होइ ॥१२॥

पहिले चाँद पुरुब दिसि तारा । दूजे बसै इसान विचारा ॥
 तीजे उतर औ चौथे बायब । पचएँ पच्छिउँ दिसा गनाइब ॥
 छठएँ नैऋत, दक्खिन सतए । बसै जाइ अगनिउँ सो अठएँ ॥
 नवए चंद्र सो पृथिवी बासा । दसएँ चंद्र जो रहै अकासा ॥
 ग्यरहें चंद्र पुरुब फिरि जाई । बहु कलेस सौं दिवस बिहाई ॥
 असुनी, भरनि, रेवती भली । मृगसिर, मूल, पुनरबसु बली ॥
 पुष्य ज्येष्ठा, हस्त, अनुराधा । जो सुख चाहै पूजै साधा ॥

तिथि नछत्र और बार एक, अस्ट सात खंड भाग ।

आदि अंत बुध सो एहि, दुख सुख अंकम लाग ॥१३॥

परवा, छट्ठ, एकादसि नंदा । दुइज, सत्तमी, द्वादसि मंदा ॥
 तीज, अस्टमी, तेरसि जया । चौथि चतुरदसि नवमी खया ॥
 पूरन पूनिउँ दसमी, पाँचै । सुक्रे नंदै, बुध भए नाचै ॥
 अदित सौं हस्त नखत सिधि लहिए । बीफै पुष्य सवन ससि कहिए ॥
 भरनि रेवती बुध अनुराधा । भए अमावस रोहिनि साधा ॥
 राहु चंद्र भू संपत्ति आए । चंद्र गहन तब लाग सजाए ॥
 सनि रिक्ता कुज अज्ञा लीजै । सिद्धि जोग गुरु परिवा कीजै ॥

छठे नछत्र होइ रवि, ओहि अमावस होइ ।

बीचहि परिवा जौ मिलै, सुरुज गहन तब होई ॥१४॥

‘चलहु चलहु’ भा पिउ कर चालू । घरी न देख लेत जिउ कालू ॥
 समदि लोग पुनि चढी बिवाना । जेहि दिन डरी सो आइ तुलाना ॥
 रोवहिं मात पिता औ भाई । कोउ न टेक जौ कंत चलाई ॥
 रोवहिं सब नैहर सिंघला । लेइ बजाइ कै राजा चला ॥
 तजा राज रावन का केहू ? छ्वाँडा लंक विभीषन लेहु ॥
 भरीं सखी सब भेंटत फेरा । अंत कंत सौं भएउ गुरेरा ॥
 कोउ काहू कर नाहिं निआना । मया मोह बाँधा अरुझाना ॥

कंचन-कया सो रानी, रहा न तोला माँसु ।

कंत कसौटी घालि कै, चूरा गढै कि हाँसु ॥१५॥

जब पहुँचाइ फिरा सब कोऊ । चला साथ गुन अवगुन दोऊ ॥
 औ सँग चला गवन सब साजा । उहै देइ अस पारे राजा ॥
 डोली सहस चलीं सँग चेरी । सबै पदमिनी सिंघल केरी ॥
 भले पटोर जराव सँवारे । लाख चारि एक भरे पेटारे ॥
 रतन पदारथ मानिक मोती । काढि भंडार दीन्ह रथ जोती ॥
 परखि सो रतन पारखिन्ह कहा । एक अक दीप एक एक लहा ॥
 सहसन पाँति तुरय कै चली । औ सौ पाँति हस्ति सिंघली ॥

लिखनी लागि जौ लेखै, कहै न परै जोरि ।

अब, खरब दस, नील, संख औ अरबुद पदुम करोरि ॥१६॥

देखि दरब राजा गरबाना । दिस्टि माहँ कोई और न आना ॥
 जौ मैं होहूँ समुद के पारा । को है मोहिं सरिस संसारा ॥
 दरब ते गरब, लोभ विष मूरी । दत्त न रहै, सत्त होइ दूरी ॥
 दत्त सत्त हैं दूनौं भाई । दत्त न रहै, सत्त पै जाई ॥
 जहाँ लोभ तहँ पाप सँघाती । सँचि कै मरै आनि कै थाती ॥

सिद्ध जो दरब आगि कै थापा । कोई जार, जारि कोइ तापा ॥
 काहू चाँद काहु भा राहू । काहू अमृत, विष भा काहू ॥
 तस भुलान मन राजा । लोभ पाप अँधकूप ।
 आइ समुद्र ठाढ़ भा कै दानी कर रूप ॥१७॥

३३.देशयात्रा खंड

बोहित भरे, चला लेइ रानी । दान माँगि सत देखे दानी ॥
 लोभ न कीजै, दीजै दानू । दान पुन्नि तें होइ कल्यानू ॥
 दरब दान देवै बिधि कहा । दान मोख होइ, दुःख न रहा ॥
 दान आहि सब दरब क जूरू । दान लाभ होइ बाँचै मूरू ॥
 दान करै रच्छा मँझ नीरा । दान खेइ कै लावै तीरा ॥
 दान करन दै दुइ जग तरा । रावन संचा अगिनि महुँ जरा ॥
 दान मेरु बड़ि लागि अकासा । सैति कुबेर मुए तेहि पासा ॥
 चालिस अंस दरब जहुँ एक अंस तहुँ मोर ।

नाहिं त जरै कि बूडै, कि निसि मूसहिं चोर ॥१॥

सुनि सो दान राजै रिस मानी । केइ बौराएसि बौरै दानी ॥
 सोई पुरुष दरब जेइ सैती । दरबहिं तें सुनु बातें एती ॥
 दरब तें गरब करै जे चाहा । दरब तें धरती सरग बेसाहा ॥
 दरब तें हाथ आव कविलासू । दरब तें अछरी चाँड न पासू ॥
 दरब तें निरगुन होइ गुनवंता । दरब तें कुबज होइ रूपवंता ॥
 दरब रहै भुईं दिपै लिलारा । अस मन दरब देइ को पारा ? ॥
 दरब तें धरम करम औ राजा । दरब तें सुद्ध बुद्धि बल गाजा ॥
 कहा समुद्र, रे लोभी ! बैरी दरब, न झाँपु ।

भएउ न काहू आपन, मूँद पेटारी साँपु ॥२॥

आधे समुद्र ते आए नाहीं । उठी बाउ आँधी उतराहीं ॥
 लहरें उठीं समुद्र उलथाना । भूला पंथ, सरग नियराना ॥
 अदिन आइ जौ पहुँचै काऊ । पाहन उडै सो घाऊ ॥
 बोहित चले जो चितउर ताके । भए कुपंथ, लंक दिसि हाँके ॥
 जो लेइ भार निबाह न पारा । सो का गरब करै कंधारा ? ॥
 दरब भार सँग काहु न उठा । जेइ सैता ताही सौँ रुठा ॥
 गहे पखान पंखि नहिं उडै । 'मौर मौर' जो करै सो बुडै ॥

दरब जो जानहि आपका, भूलहिं गरब मनाहिं ।

जौ रे उठाइ न लेइ सके, बोरि चले जल माहिं ॥३॥

केवट एक बिभीषन केरा । आव मच्छ कर करत अहेरा ॥
 लंका कर राकस अति कारा । आवै चला होइ अँधियारा ॥
 पाँच मूँड, दस बाहीं ताही । दहि भा सावँ लंक जब दाही ॥
 धुआँ उठै मुख साँस सँघाता । निकसै आगि कहै जौ बाता ॥
 फेंकरे मूँड चँवर जनु लाए । निकसि दाँत मुँह-बाहर आए ॥
 देइ रीछ कै रीछ डेराइ । देखत दिस्टि धाइ जनु खाई ॥

राते नैन नियर जौ आवा । देखि भयावन सब डर खावा ॥
धरती पायँ सरग सिर, जनहुँ सहस्राबाहु ।

चाँद सूर और नखत महँ, अस देखा जस राहु ॥४॥

बोहित बहे, न मानहि खेवा । राजहिं देखि हँसा मन देवा ॥
बहुतै दिनहि बार भइ दूजी । अजगर केरि आइ भुख पूजी ॥
यह पदमिनी विभीषन पावा । जानहु आजु अजोध्या छावा ॥
जानहु रावन पाई सीता । लंका बसी राम कहँ जीता ॥
मच्छ देखि जैसे बग आवा । टोइ टोइ भुइँ पावँ उठावा ॥
आइ नियर होइ किन्ह जोहारू । पूछा खेम कुसल बेवहारू ॥
जो बिस्वासघात कर देवा । बड़ बिसवास करै कै सेवा ॥

कहाँ, मीत! तुम भूलेहु औ आएहु केहि घाट ?

हीं तुम्हार अस सेवक, लाइ देउँ तोहि बाट ॥५॥

गाढ परे जिउ बाउर होई । जो भलि बात कहै भल सोई ॥
राजै राकस नियर बोलावा । आगे कीन्ह, पंथ जनु पावा ॥
करि बिस्वास राकसहि बोला । बोहित फेरू जाइ नहिं डोला ॥
तू खेवक खेवकन्ह उपराहीं । बोहित तीर लाउ गहि बाहीं ॥
तोहिं तें तीर घाट जौ पावौं नोगिरिही तोडेर पहिरावौं ॥
कुंडल स्रवन देउँ पहिराई । महरा कै सौंपौं महराई ॥
तस मैं तोरि पुरावौं आसा । रकसाई कै रहै न बासा ॥

राजै बीरा दीन्हा, नहिं जाना बिसवास ।

बग अपने भख कारन, होइ मच्छ कर दास ॥६॥

राकस कहा गोसाईं बिनाती । भल सेवक राकस कै जाती ॥
जहिया लंक दही श्रीरामा । सेव न छाँडा दहि भा सामा ॥
अबहूँ सेव करौं सँग लागे । मनुष भुलाइ होउँ तेहि आगे ॥
सेतुबंध जहँ राघव बाँधा । तहँवाँ चढौं भार लेइ काँधा ॥
पै अब तुरत धान किछु पावौं । तुरत खेइ ओहि बाँध चढावौं ॥
तुरत जो दान पानि हँसि दीजै । थोरै दान बहुत पुनि लीजै ॥
सेव कराइ जो दोजै दानू । दान नाहिं सेवा कर मानू ॥

दिया बुझा, सत ना रहा, हुत निरमल जेहि रूप ।

आँधी वोहित उडाइ कै, लाइ कीन्ह अँधकूप ॥७॥

जहाँ समुद मझधार मँडारू । फिरै पानि पातार दुआरू ॥
फिर फिरि पानि ठाँव ओहि मरै । फेरि न निकसै जो तहँ परै ॥
ओही ठाँव महिरावन पुरी । परे हलका तर जम कातर छुरी ॥
ओही ठाँव महिरावन मारा । पूरे हाइ जनु खरे पहारा ॥
परी रीढ़ जो तेहि कै पीठी । सेतुबंध अस आवै दीठी ॥
राकस आइ तहाँ के जुरे । बोहित भँवर चक महँ परे ॥
फिरै लगै बोहित तस आई । जस कोहारँ धरि चाक फिराई ॥

राजै कहा, रे राकस! जानि बूझि बौरासि ।

सेतुबंध यह देखै, कस न तहाँ लेइ जासि ? ॥८॥

‘ सेतुबंध ’ सुनि राकस हँसा । जानहु सरग टूटि भुइँ खसा ॥
को बाउर बाउर तुम देखा । जो बाउर, भख लागि सरेखा ॥
पाँखी जो बाउर घर माटी । जीभ बढाइ भखै सब चाँटी ॥

बाउर तुम जो भखै कहँ आने । तबहिं न समझै, पंथ भुलाने ॥
 महिरावन कै रीढ़ जो परी । कहहु सो सेतुबंध, बुधि छरी ॥
 यह तो आहि महिरावन पुरी । जहवाँ सरग नियर घर दुरी ॥
 अब पछिताहु दरब जस जोरा । करहु सरग चढ़ि हाथ मरोरा ॥
 जो रे जियत महिरावन, लेत जगत कर भार ।

सो मरि हाड न लेइगा, अस होइ परा पहार ॥९॥

बोहित भवँहिं भँवै सब पानी । नाचहिं राकस आस तुलानी ॥
 बूडहिं हस्ती घोर, मानवा । चहुँदिशि आइ जुरे मँस-खवा ॥
 ततखन राज पंखि एक आवा । सिखर टूट जस डसन डोलावा ॥
 परा दिस्टि वह राकस खोटा । ताकेसि जैस हस्ति बड़ मोटा ॥
 आइ होही राकस पर टूटा । गहि लेइ उडा, भँवर जल छूटा ॥
 बोहित टूक टूक सब भए । एहु न जाना कहँ चलि गए ॥
 भए राजा रानी दुइ पाटा । दूनौं बहे चले दुइ बाटा ॥
 काया जीउ मिलाइ कै, मारि किए दुइ खंड ।

तन रोवै धरती परा, जीउ चला बरम्हंड ॥१०॥

३४.लक्ष्मी-समुद्र खंड

मुरछि परी पदमावति रानी । कहाँ जीउ, कहँ पीउ न जानी ॥
 जानहु चित्र मूर्ति गहि लाई । पाटा परी बही तस जाई ॥
 जनम न सहा पवन सुकुवाँरा । तेइ सो परी दुख समुद अपारा ॥
 लछिमी नाँव समुद कै बेटी । तेहि कहँ लच्छि होइ जहँ भेटी ॥
 खेलति अही सहेलिन्ह सेंती । पाटा जाइ लाग तेहि रेती ॥
 कहेहि सहेली 'देखहु पाटा । मूरति एक लागि बहि घाटा ॥
 जौ देखा, तिवई है साँसा । फूल मुवा, पै मुई न बासा ' ॥
 रंग जो राती प्रेम के, जानहु बीर बहूटि ।

आइ बही दधि-समुद महुँ, पै रंग गएउ न छूटि ॥१॥

लछिमी लखन बतीसौं लखी । कहेसि 'न मरै, सँभारहु सखी ॥
 कागर पतरा ऐस सरीरा । पवन उडाइ परा मँझ नीरा ॥
 लहरि झकोर उदधि-जल भीजा । तबहुँ रूप-रंग नहिं छीजा ' ॥
 आपु सीस लेइ बैठी कोरै । पवन डोलावै सखि चहुँ, ओरै ॥
 बहुरि जो समुझि परा तन जीऊ । माँगेसि पानि बोलि कै पीऊ ॥
 पानि पियाइ सखी मुख धोई । पदमिनि जनहुँ कवल सँग कोई ॥
 तब लछिमी दुख पूछा ओही । 'तिरिया! समुझि बात कछु मोहीं ॥

देखि रूप तोर आगर, लागि रहा चित मोर ।

केहि नगरी कै नागरी, काह नाँव धनि तोर ॥२॥

नैन पसार देख धन चेती । देखै काह, समुद कै रेती ॥
 आपन कोइ न देखेसि तहाँ । पूछेसि, तुम हौ को?हौं कहाँ ?
 कहाँ सो सखी कँवल सँग कोई । सो नाहीं मोहिं कहाँ बिछोई ॥
 कहाँ जगत महुँ पीउ पियारा । जो सुमेरु बिधि गरुअ सँवारा ॥
 ताकर गरुई प्रीति अपारा । चढ़ी हिये जनु चढ़ा पहारा ॥

रहौं जो गरुड़ प्रीति सौं झाँपी । कैसे जिऔं भार दुख चाँपी ?॥
कँवल करी जिमि चूरी नाहाँ । दीन्ह बहाइ उदधि जल माहाँ ॥
आवा पवन बिछोह कर, पात परी बेकरार ।

तरिवर तजा जौ चूरि कै, लागौं केहि के डार ? ॥३॥

कहेन्हि 'न जानहिं हम तोर पीऊ । हम तोहिं पाव रहा नहिं जीऊ ॥
पाट परी आई तुम बही । ऐस न जानहिं दुहुँ कहँ अही ' ।
तब सुधि पदमावति मन भई । सवरि बिछोह मुरुछि मरि गई ॥
नैनहिं रकत सुराही ढरै । जनहुँ रकत सिर काटे परै ॥
खन चेतै खन होइ बेकरारा । भा चंदन बंदन सब छारा ॥
बाउरि होइ परी पुनि पाटा । देहुँ बहाइ कंत जेहि घाटा ॥
को मोहिं आगि देइ रचि होरी । जियत न बिछुरै सारस-जोरी ॥
जेहि सिर परा बिछोहा, देहु ओहि सिर आगि ।

लोग कहैं यह सिर चढी, हौं सो जरीं पिउ लागि ॥४॥

काया उदधि चितव पिउ पाँहा । देखौं रतन सो हिरदय माहाँ ॥
जनहुँ आहि दरपन मोर हीया । तेहि महुँ दरस देखावै पीया ॥
नैन नियर पहुँचत सुठि दूरी । अब तेहि लागि मरौं में झूरी ॥
पिउ हिरदय महुँ भेंट न होई । को रे मिलाव कहौं केहि रोई ?॥
साँस पास निति आवै जाई । सो न सँदेस कहै मोहिं आई ॥
नैन कौडिया होइ मँडराहीं । थिरकि मार पै आवै नाहीं ॥
मन भँवरा भा कँवल बसेरी । होइ मरजिया न आनै हेरी ॥
साथी आथि निआथि जो , सकै साथ निरबाहि ।

जौ जिउ जारे पिउ मिलै, भेंटु रे जिउ ! जरि जाहि ॥५॥

सती होइ कहँ सीस उधारा । घन महुँ बीजु घाव जिमि मारा ॥
सेंदुर जरै आगि जनु लाई । सिर कै आगि सँभारि न जाई ॥
छूटि माँग अस मोति पिरोई । बारहिं बार जरै जौं रोई ॥
टूटहिं मोति बिछोह जो भरै । सावन बूँद गिरहिं जनु झरे ॥
भहर भहर कै जोबन बरा । जानहुँ कनक अगिनि महुँ परा ॥
अगिनि माँग, पै देइ न कोई । पाहुन पवन पानि सब कोई ॥
खीन लंक टूटी दुखभरी । बिनु रावन केहि बर होइ खरी ॥
रोवत पंखि बिमोहे, जस कोकिल अरंभ ।

जाकर कनक लता सो, बिछुरा पीतम खंभ ॥६॥

लछिमी लागि बुझावै जीऊ । 'ना मरु बहिन! मिलिहि तोर पीऊ ॥
पीउ पानि, होइ पवन अधारी । जसि हौं तहूँ समुद कै बारी ॥
मैं तोहि लागि लेऊँ खटवाटू । खोजहि पिता जहाँ लागि घाटू ॥
हौं जेहि मिलौं ताहि बड भागू । राजपाट औ देऊँ सोहागू ' ॥
कहि बुझाइ लेइ मंदिर सिधारी । भइ जेवनार न जेंवै बारी ॥
जेहि रे कंत कर होइ बिछोवा । कहँ तेहि भूख कहाँ सुख सोवा ?
कहाँ सुमेरु, कहाँ वह सेसा । को अस तेहि सौं कहै सँदेसा ॥

लछिमी जाइ समुद पहुँ, रोइ बात यह चालि ।

कहा समुद वह घट मोरे, आनि मिलावौं कालि ॥७॥

राजा जाइ तहाँ बहि लागा । जहाँ न कोइ सँदेसी कागा ॥
तहाँ एक परबत अस डूंगा । जहँवाँ सब कपूर औ मूंगा ॥

तेहि चढ़ि हेर कोइ नहिं साथा । दरब सैति किछु लाग न हाथा ॥
 अहा जो रावन लंक बसेरा । गा हेराइ, कोइ मिला न हेरा ॥
 ढाढ़ मारि कै राजा रोवा । केइ चितउरगढ़ राज बिछोवा! ॥
 कहाँ मोर सब दरब भँडारा । कहाँ मोर सब कटक खँधारा ॥
 कहाँ तुरंगम बाँका बली । कहाँ मोर हस्ती सिंघली? ॥

कहँ रानी पदमावति, जीउ बसे जेहि पाहँ ।

मोर मोर कै खोएउँ, भूलि गरब अवगाह ॥८॥

भँवर केतकी गुरु जो मिलावै । माँगै राज बेगि सो पावै ॥
 पदमिनि-चाह जहाँ सुनि पावौं । परौं आगि औ पानि धँसावौं ॥
 खोजौं परबत मेरु पहारा । चढौं सरग औ परौं पतारा ॥
 कहाँ सो गुरु पावौं उपदेसी । अगम पंथ जो कहै गवेसी ॥
 परेउँ समुद्र माहँ अवगाहा । जहाँ न वार पार, नहि थाहा ॥
 सीता हरन राम संग्रामा । हनुवँत मिला त पाई रामा ॥
 मोहिं न कोइ बिनवौं केहि रोई । को बर बाँधि गवेसी होई ॥

भँवर जो पावा कँवल कहँ, मन चीता बहु केलि ।

आइ परा कोइ हस्ती, चूर कीन्ह सो बेलि ॥९॥

काहि पुकारौं का पहुँ जाऊँ । गाढे मीत होइ एहि ठाऊँ ॥
 को यह समुद्र मथै बल गाढै । को मथि रतन पदारथ काढै? ॥
 कहाँ सो बरम्हा बिसुन महेसू । कहाँ सुमेरु, कहाँ वह सेसू ॥
 को अस साज देइ मोहिं आनी । बासुकि दाम, सुमेरु मथानी ॥
 को दधि-समुद्र मथै जस मथा? । करनी सार न कहिए कथा ॥
 जौ लहि मथै न कोइ देइ जीऊ । सूधी अँगुरि न निकसै घीऊ ॥
 लेइ नग मोर समुद्र भा बटा । गाढ़ परै तौ लेइ परगटा ॥

लीलि रहा अब ढील होइ, पेट पदारथ मेलि ।

को उजियार करै जग, झाँपा चंद उघेलि ॥१०॥

ए गोसाइँ! तू सिरजन हारा । तुइँ सिरजा यह समुद्र अपारा ॥
 तुइँ अस गगन अंतरिख थाँभा । जहाँ न टेक, न थूनि, न खाँभा ॥
 तुइँ जल ऊपर धरती राखी । जगत भार लेइ भार न थाकी ॥
 चाँद सुरुज औ नखतन्ह पाँती । तोरे डर धावहिं दिन राती ॥
 पानी पवन आगि औ माटी । सब के पीठ तोरि है साँटी ॥
 सो मूरुख औ बाउर अंधा । तोहि छौँडि चित औरहि बंधा ॥
 घट घट जगत तोरि है दीठी । हौं अंधा जेहि सूझ न पीठी ॥

पवन होइ भा पानी, पानि होइ भा आगि ।

आगि होइ भा माटी, गोरखधंधे लागि ॥११॥

तुइँ जिउ तन मेरवसि देइ आऊ । तुही बिछोवसि, करसि मेराऊ ॥
 चौदह भुवन सो तोरे हाथा । जहँ लागि बिधुर आव एक साथा ॥
 सब कर मरम भेद तोहि पाहाँ । रोवँ जमावसि टूटे जाहाँ ॥
 जानसि सबै अवस्था मोरी । जस बिछुरी सारस कै जोरी ॥
 एक मुए ररि मुवै जो दूजी । रहा न जाइ, आउ अब पूजी ॥
 झूरत तपत बहुत दुख भरऊँ । कलपौं माँथ बेगि निस्तरऊँ ॥

मरौं सो लेइ पदमावति नाऊँ । तुइँ करतार करेसि एक ठाऊँ ॥
दुख सौँ पीतम भेंटे कै, सुख सौँ सोव न कोइ ।

एहि ठाँव मन डरपै, मिलि न बिछोहा होइ ॥१२॥

कहि कै उठा समुद्र पहुँ आवा । काढि कटार गीउ महुँ लावा ॥
कहा समुद्र, पाप अब घटा । बाह्यन रूप आइ परगटा ॥
तिलक दुवादस मस्तक कीन्हे । हाथ कनक-बैसाखी लीन्हे ॥
मुद्रा स्रवन जनेऊ काँधे । कनक-पत्र धोती तर बाँधे ॥
पाँवरि कनक जराऊँ पाऊँ । दीन्हि असीस आइ तेहि ठाऊँ ॥
कहसि कुँवर मोसौँ सत वाता । काहे लागि करसि अपघाता ॥
परिहँस मरस कि कौनिउ लाजा । आपन जीउ देसि केहि काजा ॥

जिनि कटार गर लावसि, समुझि देखु मन आप ।

सकति जीउ जौँ काढै, महा दोष औ पाप ॥१३॥

को तुम्ह उतर देइ हो पाँडे । सो बीलै जाकर जिउ भाँडे ॥
जंबूदीप केर हौँ राजा । सो मैं कीन्हे जो करत न छाजा ॥
सिंघलदीप राजघर बारी । सो मैं जाइ बियाही नारी ॥
बहु बोहित दायज उन दीन्हा । नग अमोल निरमर भरि लीन्हा ॥
रतन पदारथ मानिक मोती । हुतीन काहु के संपति ओती ॥
बहल, घोड़ हस्ती सिंघली । और सँग कुँवरि लाख दुइ चलीं ।
ते गोहने सिंघल पदमिनी । एक सो एक चाहि रुपमनी ॥

पदमावती जग रूपमति, कहँ लागि कहौँ दुहेल ।

तेहिं समुद्र महुँ खोएउँ, हौँ का जिओ अकेल ॥१४॥

हँसा समुद्र, होइ उठा अँजोरा । जग बूडा सब कहि कहि 'मोरा' ॥
तोर होइ तोहि परे न बेरा । बूझि बिचारि तहुँ केहि केरा ॥
हाथ मरोरि धुनै सिर झँखी । पै तोहि हिये न अघरै आँखी ॥
बहुतै आइ रोइ सिर मारा । हाथ न रहा झूठ संसारा ॥
जो पै जगत होति फुर माया । सैतत सिद्धि न पावत राया ! ॥
सिद्धै दरब न सैता गाड़ा । देखा भार चूमि कै छाड़ा ॥
पानी कै पानी महुँ गई । तू जो जिया कुसल सब भई ॥

जा कर दीन्हे कया जिउ, लेइ चाह जब भाव ।

धन लछिमी सब थअकर, लेइ त का पछितावा ॥१५॥

अनु, पाँडे! पुरुषहि का हानी । जौ पावौं पदमावति रानी ॥
तपि कै पावा, मिली कै फूला । पुनि तेहि खौइ सोइ पथ भूला ॥
पुरुष न आपनि नारि सराहा । मुए गए सँवरै पै चाहा ॥
कहँ अस नारी जगत उपराहीं ? कहँ अस जीवन कै सुख छाहीं ॥
कहँ अस रहस भोग अब करना । ऐसे जिए चाहि भल मरना ॥
जहँ अस परा समुद्र नग दीया । तहँ किमि जिया चहै मरजीया ?
जस यह समुद्र दीन्हे दुख मोकाँ । देइ हत्या झगरौं सिवलोका ॥

का मैं ओहि क नसअवा, का सँवरा सो दाँव ।

जाइ सरग पर होइहि, एहि कर मोर नियाव ॥१६॥

जौ तु मुवा, कित रोवसि खरा ? । ना मुइ मरै, न रौवै मरा ॥
जो मरि भा औ छाँडेसि काया । बहुरि न करै मरन कै दाँया ॥

जो मरि भएउ न बूडै नीरा । बहा जाइ लागै पै तीरा ॥
 तुही एक मैं बाउर भेंटा । जैस राम दसरथ कर बेटा ॥
 ओहू नारि कर परा बिछोवा । एहि समुद महुँ फिरि फिरि रोवा ॥
 उदधि आइ तेइ बंधन कीन्हा । इति दशमाथ अरमपद दीन्हा ॥
 तोहि बल नाहिं मूँदु अब आँखी । लावौ तीर टेक बैसाखी ॥

बाउर अंध प्रेम कर सुनत लुबधि भा बाट ।

निमिष एक महुँ लेइगा पदमावति जेहि घाट ॥१७॥

पदमावति कहँ दुख तस बीता । जस असोक बीरो तर सीता ॥
 कनक लता दुइ नारँग फरी । तेहि के भार उठि होइ न खरी ॥
 तेहि पर अलक भुअंगिनि डसा । सिर पर चढै हिये परगसा ॥
 रही मृनाल टेकि दुख दाधी । आधी कँवल भई ससि आधी ॥
 नलिन-खंड दुइ तस करिहाऊ । रोमावली बिछूक कहाऊँ ॥
 रही टूटि जिमि कंचन-तागू । को पिउ मेरवै देइ सोहागू ॥
 पान न खाइ करै उपवासू । फुल सूख तन रही न बासू ॥

गगन धरति जल बुडि गए , बूडत होइ निसाँस ।

पिउ पिउ चातक ज्यों ररै , मरै सेवाति पियास ॥१८॥

लछमी चंचल नारि परेवा । जेहि सत होइ छरै कै सेवा ॥
 रतनसेन आवै जेहि घाटा । अगमन होइ बैठी तेहि बाटा ॥
 औ भइ पदमावति कै रूपा । कीन्हेसि छाँह जरै जहुँ धूपा ॥
 देखि सो कँवल भँवर होइ धावा । साँस लीन्ह, वह बास न पाबा ॥
 निरखत आइ लच्छमी दीठी । रतनसेन तब दीन्ही पीठी ॥
 जौ भलि होति लच्छमी नारी । तजि महेस कत होत भिखारी ? ॥
 पुनि धनि फिरि आगे होइ रोई । पुरुष पीठि कस दीन्ह निछोई ? ॥

हौं रानी पदमावति, रतनसेन तू पीउ ।

आनि समुद महुँ छाँडेहु, अब रोवौं देइ जीउ ॥१९॥

मैं हौं सोइ भँवर औ भोजू लेत फिरौं मालति कर खौजू ॥
 मालति नारी, भँवर पीऊ । लहि वह बास रहै थिर जीऊ ॥
 का तुइँ नारि बैठि अस रोई । फूल सोइ पै बास न सोई ॥
 भँवर जो सब फूलन कर फेरा । बास न लेइ मालतिहि हेरा ॥
 जहाँ पाव मालति कर बासू । वारै जीउ तहाँ होइ दासू ॥
 कित वह बास पवन पहुँचावै । नव तन होइ, पेट जिउ आवै ॥
 हौं ओहि बास जीउ बलि देऊँ । और फूल कै बास न लेऊँ ॥

भँवर मालतिहि पै चहै , काँट न आवै दीठि ।

सौहैं भाल खाइ , पै फिरि कै देइ न पीठि ॥२०॥

तब हँसि कह राजा ओहि ठाऊँ । जहाँ सो मालति लेइ चलु, जाऊँ ॥
 लेइ सो आइ पदमावति पासा । पानि पियावा मरत पियासा ॥
 पानी पिया कँवल जस तपा । निकसा सुरुज समुद महुँ छपा ॥
 मैं पावा पिउ समुद के घाटा । राजकुँवर मनि दिपै ललाटा ॥
 दसन दिपै जस हीरा जोती । नैन-कचोर भरे जनु मोती ॥
 भुजा लंक डर केहरि जीता । मूरत कान्ह देख गोपीता ॥
 जस राजा नल दमनहि पूछा । तस विनु प्रान पिंड है छूँछा ॥

जस तू पदिक पदारथ, तैस रतन तोहि जोग ।

मिला भँवर मालति कहाँ करहु दोउ मिलि भोग ॥२१॥

पदिक पदारथ खीन जो होती । सुनतहि रतन चढी मुख जोती ॥
जानहुँ सूर कीन्ह परगासू । दिन बहुरा भा कँवल-बिगासू ॥
कँवल जो बिहँसि सूर-मुख दरसा । सूरुज कँवल दिस्टि सौँ परसा ॥
लोचन-कँवल सिरी-मुख सूरु । भएउ अनंद दुहुँ रस-मूरु ॥
मालति देखि भँवर गा भूली । भँवर देखि मालति बन फूली ॥
देखा दरस भए एक पासा । वह ओहि के वह ओहि के आसा ॥
कंचन दाहि दीन्हि जनु जीऊ । ऊवा सूर, छूटिगा सीऊ ॥
पायँ परी धनि पीउ के, नैनन्ह सों रज मेट ।

अचरज भएउ सबन्ह कहँ, भइ ससि कवलहिँ भेंट ॥२२॥

जिनि काहू कह होइ बिछोऊ । जस वै मिलै मिलै सब कोऊ ॥
पदमावति जौ पावा पीऊ । जनु मरजियहि परा तन जीऊ ॥
कै नेवछावरि तन मन वारी । पायन्ह परी घालि गिउ नारी ॥
नव अवतार दीन्ह बिधि आजू । रही छार भइ मानुष-साजू ॥
राजा रोव घालि गिउ पागा । पदमावति के पायन्ह लागा ॥
तन जिउ महुँ बिधि दीन्ह बिछोऊ । अस न करै तौ चीन्ह न कोऊ ॥
सोई मारि छार कै मेटा । सोइ जियाइ करावै भेंटा ॥
सुहमद मीत जौ मन बसै, बिधि मिलाव ओहि आनि ।

संपति बिपति पुरुष कहँ, काह लाभ, का हानि ॥२३॥

लछमी सौँ पदमावति कहा । तुम्ह प्रसाद पायउँ जो चहा ॥
जौ सब खोइ जाहि हम दोऊ । जो देखै भल कहै न कोऊ ॥
जे सब कुँवर आए हम साथी । औ जत हस्ति घोड़ औ आथी ॥
जौ पावै, सुख जीवन भोगू । नाहिँ त मरन, भरन दुख रोगू ॥
तब लछमी गइ पिता के ठाऊँ । जो एहि कर सब बूड सो पाऊँ ॥
तब सो जरी अमृत लेइ आवा । जो मरे हुत तिन्ह छिरिकि जियावा ॥
एक एक कै दीन्ह सो आनी । भा सँतोष मन राजा रानी ॥

आइ मिले सब साथी, हिलि मिलि करहिँ अनंद ।

भई प्राप्त सुख संपति, गएउ छूटि दुख द्वंद ॥२४॥

और दीन्ह बहु रतन पखाना । सोन रूप तौ मनहिँ न आना ॥
जे बहु मोल पदारथ नाऊँ । का तिन्ह बरनि कहाँ तुम्ह ठाऊँ ॥
तिन्ह कर रूप भाव को कहै । एक एक नग चुनि चुनि कै गहे ॥
हीर फार बहु-मोल जो अहे । तेइ सब नग चुनि चुनि कै गहे ॥
जौ एक रतन भँजावै कोई । करै सोइ जो मन महुँ होई ॥
दरब गरब मन गएउ भुलाई । हम सब लक्ष्छ मनहिँ नहिँ आई ॥
लघु दीरघ जो दरब बखाना । जो जेहि चाहिय सोइ तेइ माना ॥
बड़ औ छोट दोउ सम, स्वामी -काज जो सोइ ।

जो चाहिय जेहि काज कहँ, ओहि काज सो होइ ॥२५॥

दिन दस रहे तहाँ पहुनाई । पुनि भए बिदा समुद सौँ जाई ॥
लछमी पसमावति सौँ भेंटी । औ तेहि कहा 'मोरि तू बेटी' ॥
दीन्ह समुद्र पान कर बीरा । भरि कै रतन पदारथ हीरा ॥
और पाँच नग दीन्ह बिसेखे । सरवन सुना, नैन नहिँ देखे ॥

एक तौ अमृत दूसर हंसू । औ तीसर पंखी कर बंसू ॥
चौथ दीन्ह सावक-सादूरू । पाँचवँ परस जो कंचन मूरू ॥
तरुन तुरंगम आनि चढाए । जल मानुष अगुवा संग लाए ॥

भेंट घाँट कै समदि तब, फिरे नाइकै माथ ।

जल-मानुष तबहीं फिरे, जब आए जगनाथ ॥२६॥

जगन्नाथ कहँ देखा आई । भोजन रींधा भात बिकाई ॥
राजै पदमावति सौँ कहा । साँठि नाठि, किछु गाँठि न रहा ॥
साँठि होइ जेहि तेहि सब बोला । निसँठ जो पुरुष पात जिमि डोला ॥
साँठहि रंक चलै झौराई । निसँठ राव सब कह बौराई ॥
साँठिहि आव गरब तन फूला । निसँठहि बोल, बुद्धि बल भूला ॥
साँठिहि जागि नींद निसि जाई । निसँठहि काह होइ औँघाई ॥
साँठिहि दिस्टि जोति होइ नैना । निसँठ होइ मुख आव न बैना ॥

साँठिहि रहै साधि तन, निसँठहि आगरि भूख ।

बिनु गथ विरिछ निपात जिमि, ठाढ़ ठाढ़ पै सूख ॥ २७॥

पदमावति बोली सुनु राजा । जीउ गए धन कौने काजा? ॥
अहा दरब तब कीन्ह न गाँठी । पुनि कित मिलै लच्छि जौ नाठी ॥
मुकती साँठि गाँठि जो करै । साँकर परे सोइ उपकरै ॥
जेहि तन पंख, जाइ जहँ ताका । पैग पहार होइ जौ थाका ॥
लछमी दीन्ह रहा मोहिं बीरा । भरि कै रतन पदारथ हीरा ॥
काढ़ि एक नग बेगि भँजावा । बहुरी लच्छि, फेरि दिन पावा ॥
दरब भरोस करै जिनि कोई । साँभर सोइ गाँठि जो होई ॥

जोरि कटक पुनि राजा, घर कहँ कीन्ह पयान ।

दिवसहि भानु अलोप भा, बासुकि इंद्र सकान ॥२८॥

३५.चितौर-आगमान खंड

चितउर आइ नियर भा राजा । बहुरा जीति इंद्र अस गाजा ॥
बाजन बाजहिं होइ अँदोरा । आवहिं बहल हस्ति औ घोरा ॥
पदमावति चंडोल बईठी । पुनि गइ उलटि सरग सौँ दीठी ॥
यह मन ऐंठा रहै न सूझा । बिपति न सँवरे संपति-अरुझा ॥
सहस बरिस दुख सहै जो कोई । घरी एक सुख बिसरै सोई ॥
जोगी इहै जानि मन मारा । तौँहुँ न यह मन मरै अपारा ॥
रहा न बाँधा बाँधा जेही । तेलिया मारि डार पुनि तेही ॥

मुहमद यह मन अमर है, केहुँ न मारा जाइ ।

ज्ञान मिलै जौ एहि घटै, घटतै घटत बिलाइ ॥१॥

नागमती कहँ अगम जनावा । गई तपनि बरषा जनु आवा ॥
रही जो मुइ नागिनि जसि तुचा । जिउ पाएँ तन कै भइ सुचा ॥
सब दुख जस केंचुरि गा छूटी । होइ निसरी जनु बीरबहूटी ॥
जसि भुइँ दहि असाढ़ पलुहाई । परहिं बूँद औ साँधि बसाई ॥
ओहि भाँति पलुही सुख बारी । उठी करिल नइ कोप सँवारी ॥
हुलसि गंग जिमि बाढ़िहि लेई । जोबन लाग हिलोरें देई ॥

काम धनुक सर लेइ भइ ठाढ़ी । भागेउ बिरह रहा जो डाढ़ी ॥
पूछहिं सखी सहेलरी, हिरदय देखि अनंद ।

आजु बदन तोर निरमल, अहैं उवा जस चंद ॥२॥

अब लागि रहा पवन, सखि ताता । आजु लाग मोहिं सीअर गाता ॥
महि हुलसै जस पावस छाहाँ । तस उपना हुलास मन माहाँ ॥
दसवैं दावैं कै गा जो दसहरा । पलटा सोइ नाव लेइ महरा ॥
अब जोबन गंगा होइ बाढा । औटन कठिन मारि सब काढा ॥
हरियर सब देखौं संसारा । नए चार जनु भा अवतारा ॥
भागेउ बिरह करत जो दाहू । भा मुख चंद छूटि गा राहू ॥
पलुहे नैन बाँह हुलसाहीं । कोउ हितु आवै जाहि मिलाहीं ॥
कहतहि बात सखिन्ह सौं, ततखन आवा भाँट ।

राजा आइ निअर भा, मंदिर बिछावहु पाट ॥३॥

सुनि तेहि खन राजा कर नाऊँ । भा हुलास सब ठाँवहिं ठाऊँ ॥
पलटा जनु बरषा ऋतु राजा । जस असाढ़ आवै दर साजा ॥
देखि सो छत्र भई जग छाहाँ । हस्ति मेघ ओनए जग माहाँ ॥
सेन पूरि आई घन घोरा । रहस चाव बरसै चहुँ ओरा ॥
धरति सरग अब होइ मेरावा । भरीं सरित औ ताल तलावा ॥
उठी लहकि महि सुनतहि नामा । ठावहिं ठावैं दूब अस जामा ॥
दादुर मोर कोकिला बोले । हुत जो अलोप जीभ सब खोले ॥
होइ असवार जो प्रथमै मिलै चले सब भाइ ।

नदी अठारह गंडा मिलीं समुद कह जाइ ॥४॥

बाजत गाजत राजा आवा । नगर चहुँ दिसि बाज बधावा ॥
बिहँसि आइ माता सौं मिला । राम जाइ भेंटी कौसिला ॥
साजै मंदिर बंदनवारा । होइ लाग बहु मंगलचारा ॥
पदमावति कर आव बेवानू । नागमती जिउ महुँ भा आनू ॥
जनहुँ छाँह महुँ धूप देखाई । तैसइ झार लागि जौ आई ॥
सही न जाइ सवति कै झारा । दुसरे मंदिर दीन्ह उतारा ॥
भई उहाँ चहुँ खंड बखानी । रतनसेन पदमावति आनी ॥
पुहुप गंध संसार महुँ, रूप बखानि न जाइ ।

हेम सेत जनु उघरि गा, जगत पात फहराइ ॥५॥

बैठ सिंघासन लोग जोहारा । निधनी निरगुन दरब बोहारा ॥
अगनित दान निछावरि कीन्हा । मँगतन्ह दान बहुत कै दीन्हा ॥
लेइ के हस्ति महाउत मिले । तुलसी लेइ उपरोहित चले ॥
बेटा भाइ कुँवर जत आवहिं । हँसि हँसि राजा कंठ लगावहिं ॥
नेगी गए, मिले अरकाना । पँवरहिं बाजै घहरि निसाना ॥
मिले कुँवर, कापर पहिराए । देइ दरब तिन्ह घरहिं पठाए ॥
सब कै दसा फिरी पुनि दुनी । दान-डाँग सबही जग सुनी ॥
बाजैं पाँच सबद निहित, सिद्धि बखानहिं भाँट ।

छतिस कूरि, षट दरसन, आइ जुरे ओहि पाट ॥६॥

सब दिन राजा दान दिआवा । भइ निसि, नागमती पहुँ आवा ॥
नागमती मुख फेरि बईठी । सौँह न करै पुरुष सौं दीठी ॥
ग्रीषम जरत छाँड़ि जो जाइ । सो मुख कौन देखावै आई ? ॥

जबहिं जरै परबत बन लागै । उठी झार, पंखी उडि भागे ॥
जब साखा देकै औ छाहाँ । को नहिं रहसि पसारै बाहाँ ॥
को नहिं हरषि बैठ तेहि डारा । को नहिं करै केलि कुरिहारा ?॥
तू जोगी होइगा बैरागी । हौं जरि छार भएउँ तोहि लागी ॥
काह हँसौ तुम मोसौं, किएउ ओर सौं नह ।

तुम्ह मुख चमकै बीजुरी, मोहिं मुख बरिसै मेह ॥७॥

नागमति तू पहिलि बियाही । कठिन प्रीति दाहै जस दाही ॥
बहुतै दिनन आव जो पीऊ । धनि न मिलै धनि पाहन जीऊ ॥
पाहन लोह पोढ जग दोऊ । तेऊ मिलहिं जौ होइ बिछोऊ ।
भलेहि सेत गंगाजल दीठा । जमुन जो साम, नीर अति मीठा ॥
काह भएउ तन दिन दस दहा । जौ बरषा सिर ऊपर अहा ॥
कोइ केहु पास आस कै हेरा । धनि ओहि दरस निरास न फेरा ॥
कंठ लाइ कै नारि मनाई । जरी जो बेलि सींचि पलुहाई ॥
फरे सहस साखा होइ, दारिउँ, दाख, जँभीर ।

सबै पांखि मिलि आइ जोहारे, लौटि उहै भइ भीर ॥८॥

जौ भा मेर भएउ रँग राता । नागमती हँसि पूछी बाता ॥
कहहु कंत! ओहि देस लोभाने । कस धनि मिली, भोग कस माने ॥
जौ पदमावति सुठि होइ लोनी । मोरे रूप की सरवरि होनी ?॥
जहाँ राधिका गोपिन्ह माहाँ । चंद्रावलि सरि पूज न छाहाँ ॥
भँवर पुरुष अस रहै न राखा । तजै दाख, महुआ सर चाखा ॥
तजि नागेसर फूल सोहावा । कँवल बिसैंधहिं सौं मन लावा ॥
जौ अन्हवाइ भरै अरगजा । तौहुँ बिसायँध वह नहिं तजा ॥
काह कहौं हौं तोसौं, किछु न हिये तोहि भाव ।

इहाँ भात मुख मोसौं, उहाँ जीउ ओहि ठाँव ॥९॥

कहि दुख कथा जौ रैनि बिहानी । भएउ भोर जहँ पदमिनि रानी ॥
भानु देख ससि बदन मलीना । कँवल नैन राते, तनु खीना ॥
रेनि नखत गनि कीन्ह बिहानू । बिकल भई देखा जब भानू ॥
सूर हँसै, ससि रोइ डफारा । टूट आँसु जनु नखतन्ह मारा ॥
रहै न राखी होइ निसाँसी । तहँवा जाहु जहाँ निसि बासी ॥
हौं कै नेह कुआँ महँ मेली । सींचै लागि झुरानी बेली ॥
नैन रहे होइ रहँट क घरी । भरी ते ढारी, छूँछी भरी ॥

सुभर सरोवर हंस चल, घटतहि गए बिछोइ ।

कँवल न प्रीतम परिहरै, सूखि पंक बरू होइ ॥१०॥

पदमावति तुइँ जीउ पराना । जिउ तें जगत पियार न आना ॥
तुइ जिमि कँवल बसी हिय माहाँ । हौं होइ अलि बेधा तोहि पाहाँ ॥
मालति-कली भँवर जौ पावा । सो तजि आन फूल कित भावा ॥
मैं हौं सिंघल कै पदमिनी । सरि न पूज जंबू-नगिनी ॥
हौं सुगंध निरमल उजियारी । वह बिष भरी डेरावनि कारी ॥
मोरी बास भँवर संग लागहिं । ओहि देखत मानुष डरि भागहिं ॥
हौं पुरुषन्ह कै चितवन दीठी । जेहिके जिउ अस अहाँ पईठी ॥

ऊँचे ठाँव जो बैठे, करै न नीचहि संग ।

जहँ सो नागिनि हिरकै करिया करै सो अंग ॥११॥

पलुही नागमती कै बारी । सोने फूल फूलि फुलवारी ॥
जावत पंखि रहे सब दहे । सबै पंखि बोलत गहगहे ॥
सारिउँ सुवा महरि कोकिला । रहसत आइ पपीहा मिला ॥
हारिल सबद महोख सोहावा । काग कुराहर करि सुख पावा ॥
भोग बिलास कीन्ह कै फेरा । बिहँसहिं, रहसहिं करहिं बसेरा ॥
नाचहिं पंडुक मोर परेवा । बिफल न जाइ काहुकै सेवा ॥
होइ उजियार सूर जस तपै । खूसट मुख न देखावै छपै ॥
संग सहेली नागमति, आपनि बारी माहँ ।
फूल चुनहिं, फल तूरहिं, रहसि कूदि सुख छाँह ॥१२॥

३६. नागमती-पदमावती-विवाद खंड

जाही जूही तेहि फुलवारी । देखि रहस रहि सकी न बारी ॥
दूतिन्ह बात न हिये समानी । पदमावति पहुँ कहा सो आनी ॥
नागमती है आपनि बारी । भँवर मिला रस करै धमारी ॥
सखी साथ सब रहसहिं कूदहिं । औ सिंगार-हार सब गूँथहिं ॥
तुम जो बकावरि तुम्ह सौं भर ना । बकुचन गहै चहै जो करना ॥
नागमती नागेसरि नारी । कँवल न आछे आपनि बारी ॥
जस सेवतीं गुलाल चमेली । तैसि एक जनु वहु अकेली ॥
अलि जो सुदरसन कूजा, कित सदबरगै जोग ?

मिला भँवर नागेसरिहि, दीन्ह ओहि सुख भोग ॥१॥

सुनि पदमावति रिस न सँभारी । सखिन्ह साथ आई फुलवारी ॥
दुवौ सबति मिलि पाट बईठी । हिय विरोध, मुख बातें मीठी ॥
बारी दिस्टि सुरंग सो आई । पदमावति हँसि बात चलाई ॥
बारी सुफल अहैं तुम रानी । है लाई पै लाइ न जानी ॥
नागेसर औ मालति जहाँ । संगतराव नहिं चाही तहाँ ॥
रहा जो मधुकर कँवल पिरीता । लाइउ आनि करीलहि रीता ॥
जह अमिलीं पाकै हिय माहाँ । तहँ न भाव नौरँग कै छाहाँ ॥
फूल फूल जस फर जहाँ, देखहु हिये बिचारि ।

आँब लाग जेहि बारी जाँबु काह तेहि बारि ? ॥२॥

अनु, तुम कही नीक यह सोभा । पै फल सोइ भँवर जेहि लोभा ॥
साम जाँबु कस्तूरी चोवा । आँब ऊँच हिरदय तेहि रोवाँ ॥
तेहि गुन अस भइ जाँबु पियारी । लाई आनि माँझ कै बारी ॥
जल बाढे बहि इहाँ जो आई । है पाकी अमिली जेहि ठाई ॥
तुँ कस पराई बारी दूखी । तजा पानि धाई मुँह-सूखी ॥
उठै आगि दुइ डार अभेरा । कौन साथ तहँ बैरी केरा ॥
जो देखी नागेसर बारी । लगे मरै सब सूआ सारी ॥
जो सरवर जल बाढै रहै सो अपने ठाँव ।

तजि कै सर औ कुंडहि जाइ न पर अंबराव ॥३॥

तुई अंबराव लीन्हा का जूरी ? । काहे भई नीम विषमूरी ॥
भई बैरि कित कुटिल कटेली । तेंदू टेंटी चाहि कसेली ॥
दारिउँ दाख न तोरि फुलवारी । देखि मरहिं का सूआ सारी ? ॥

औ न सदाफर तुरँज जँभीरा । लागे कटहर बड़हर खीरा ॥
 कँवल के हिरदय भीतर केसर । तेहि न सरि पूजै नागेसर ॥
 जहँ कटहर ऊमर को पूछै? । बर पीपर का बोलहिं छूँछै ॥
 जो फल देखा सोई फीका । गरब न करहिं जानि मन नीका ॥
 रहु आपनि तू बारी, मोसों जूझु , न बाजु ।

मालति उपम न पूजै वन कर खूझा खाजु ॥४॥

जो कटहर बड़हर झड़बेरी । तोहि असि नाही, कोकाबेरी ! ॥
 साम जाँबु मोर तुरँज जँभीरा । करुई नीम तौ छाँह गँभीरा ॥
 नरियर दाख ओहि कहँ राखों । गलगल जाउँ सवति नहिं भाखों ॥
 तोरे कहे होइ मोरर काहा । फरे बिरिछ कोइ ढेल न बाहा ॥
 नवें सदाफर सदा जो फरई । दारिउँ देखि फाटि हिय मरई ॥
 जयफर लौंग सोपारि छोहारा । मिरिच होइ जो सहै न झारा ॥
 हों सो पान रंग पूज न कोई । बिरह जो जरै चून जरि होई ॥
 लालहिं बूडि मरसि नहिं , उभि उठावसि बाँह ।

हों रानी, पिय राजा, तो कहँ जोगी नाह ॥५॥

हों पदमिनि मानसर केवा । भँवर मराल करहिं मोरि सेवा ॥
 पूजा जोग दर्ई हम्म गडी । और महेस के माथे चडी ॥
 जानै जगत कँवल कै करी । तोहि अस नहिं नागिनि बिष भरी ॥
 तुई सब लिए जगत के नागा । कोइल भेस न छाँडेसि कागा ॥
 तू भुजइल, हों हँसिनि भोरी । मोहि तोहि मोति पोति कै जोरी ॥
 कंचन-करी रतन नग बाना । जहाँ पदारथ सोह न आना ॥
 तू तौ राहु, हों ससि उजियारी । दिनहि न पूजै निसि अँधियारी ॥
 ठाढ़ि होसि जेहि ठाई , मसि लागै तेहि ठाव ।

तेहि डर राँध न बैठों , मकु साँवरि होइ जाव ॥६॥

कँवल सो कौन सोपारी रोठा । जेहि के हिये सहस दस कोठा ॥
 रहै न झाँपै आपन गटा । सो कित उघेलि चहै परगटा ॥
 कँवल-पत्र तर दारिउँ चोली । देखे सूर देसि है खोली ॥
 ऊपर राता भीतर पियरा । जारों ओहि हरदि अस हियरा ॥
 इहाँ भँवर मुख बातन्ह लावसि । उहाँ सुरुज कह हँसि बहरावसि ॥
 सब निसि तपि तपि मरसि पियासी । भोर भए पावसि पिय बासी ॥
 सेजवाँ रोइ रोइ निसि भरसी । तू मोसों का सरवरि करसी ॥
 सुरुज किरिन बहरावै, सरवर लहरि न पूज ।

भँवर हिया तोर पावै, धूप देह तोरि भूँज ॥७॥

मैं हों कँवल सुरुज कै जोरी । जौ पिय आपन तौ का चोरी ? ॥
 हों ओहि आपन दरपन लेखों । करों सिंगार, भोर मुख देखों ॥
 मोर बिगास ओहिक परगासू । तू जरि मरसि निहारि अकासू ॥
 हों ओहि सों, वह मोसों राता । तिमिर बिलाइ होत परभाता ॥
 कँवल के हिरदय महुँ जो गटा । हरि हर हार कीन्ह का घटा ? ॥
 जाकर दिवस तेहि पहुँ आवा । कारि रैन कित देखे पावा ॥
 तू ऊमर जेहि भीतर माखी । चाहहिं उडै मरन के पाँखी ॥

धूप न देखहि बिषभरी, अमृत सो सर पाव ।

जेहि नागनि डस सो मरै, लहरि सुरुज कै आव ॥८॥

फूल न कँवल भानु बिनु ऊए । पानी मैल होइ जरि छूए ॥
फिरहिं भँवर तारे नयनाहाँ । नीर बिसाइँध होइ तोहि पाहाँ ॥
मच्छ कच्छ दादुर कर बासा । बग अस पंखि बसहिं तोहि पासा ॥
जे जे पंखि पास तोहि गए । पानी महुँ सो बिसाइँध भए ॥
जौ उजियार चाँद होइ ऊआ । बदन कलंक डोम लेइ छूआ ॥
मोहि तोहि निसि दिन कर बीचू । राहु के साथ चाँद कै मीचू ॥
सहस बार जौ धोवै कोई । तौहु बिसाइँध जाइ न धोई ॥

काह कहीं ओहि पिय कहँ, मोहि सिर धरेसि अँगारि ।

तेहि के खेल भरोसे, तुइ जीती, मैं हारि ॥९॥

तोर अकेल का जीतिउँ हारू । मैं जीतिउँ जग कर सिंगारू ॥
बदन जितिउँ सो ससि उजियारी । बेनी जितिउँ भुअंगिनि कारी ॥
नैनन्ह जितिउँ मिरिग के नैना । कंठ जितिउँ कोकिल के बैना ॥
भौँह जितिउँ अरजुन धनुधारी । गीउ जितिउँ तमचूर पुछारी ॥
नासिक जितिउँ पुहुप तिल सूआ । सूक जितिउँ बेसरि होइ ऊआ ॥
दामिनि जितिउँ दसन दमकाहीं । अधर रंग जीतिउँ बिंबाहीं ॥
केहरि जितिउँ लंक मैं लीन्हीं । जितिउँ मराल चाल वे दीन्हीं ॥

पुहुप बास मलयगिरि, निरमल अंग बसाई ।

तू नागिनि आसा लुबुध डससि काहु कहँ जाइ ॥१०॥

का तोहिं गरब सिंगार पराए । अबहीं लैहिं लूट सब ठाएँ ॥
हाँ साँवरि सलोन मोर नैना । सेत चीर, मुख चातक-बैना ॥
नासिक खरग, फूल धुव तारा । भौँहैं धनुक गगन गा हारा ॥
हीरा दसन सेत औ सामा । चपै बीजु जौ बिहँसै बामा ॥
बिद्रूम अधर रंग रस-राते । जूड अमिय अस रवि नहिं ताते ॥
चाल गयंद गरब अति भारी । बसा लंक, नागेसर करी ॥
साँवरि जहाँ लोनि सुठि नीकी । का सरवरि तू करसि जो फीकी ॥

पुहुप बास औ पवन अधारी, कँवल मोर तरहेल ।

चहाँ केस धरि नावौं, तोर मरन मोर खेल ॥११॥

पदमावति सुनि उतर न सही । नागमती नागिनि जिमि गही ॥
वह ओहि कहँ, वह ओहि कहँ गहा । काह कहीं तस जाइ न कहा ॥
दुवौ नवल भरि जोवन गाजै । अछरी जनहुँ अखारे बाजै ॥
भा बाहुँन बाहुँन सौं जोरा । हिय सौं हिय, कोइ बाग न मोरा ॥
कुच सौं कुच भइ सौँहैं अनी । नवहिं न नाए टूटहिं तनी ॥
कुंभस्थल जिमि गज मैमंता । दूवौ आइ भिरे चौदंता ॥
देवलोक देखत हुत ठाढ़े । लगे बान हिय जाहिं न काढ़े ॥

जनहुँ दीन्ह ठगलाडू देखि आइ तस मीचु ।

रहा न कोइ धरहरिया करै दुहुन्ह महुँ बीचु ॥१२॥

पवन स्रवन राजा के लागा । कहेसि लइहिं पदमिनि औ नागा ॥
दूनौ सवति साम औ गोरी । मरहिं तौ कहँ पावसि असि जोरी ॥
चलि राजा आवा तेहि बारी । जरत बुझाई दूनौ नारी ॥
एक बार जेइ पिय मन बूझा । सो दुसरे सौं काहे क जूझा ॥

अस गियान मन आव न कोई । कबहुँ राति, कबहुँ दिन होई ॥
धूप छाँह दोउ पिय के रंगा । दूनौ मिली रहहिँ एक संगी ॥
जूझ छाँड़ि अब बूझहु दोऊ । सेवा करहु सेव फल होऊ ॥

गंग जमुन तुम नारि दोउ, लिखा मुहम्मद जोग ।

सेव करहु मिलि दूनौ, तौ मानहु सुख भोग ॥१३॥

अस कहि दूनौ नारि मनाई । बिहँसि दोउ तब कंठ लगाई ॥
लेइ दोउ संग मँदिर महुँ आए । सोन-पलंग जहुँ रहे बिछाए ॥
सीझी पाँच अमृत-जेवनारा । औ भोजन छप्पन परकारा ॥
हुलसीं सरस खजहजा खाई । भोग करत बिहँसी रहसाई ॥
सोन-मँदिर नगमति कहँ दीन्हा । रूप-मँदिर पदमावति लीन्हा ॥
मंदिर रतन रतन के खंभा । बैठा राज जोहारै सभा ॥
सभा सो सबै सुभर मन कहा । सोई अस जो गुरु भल कहा ॥

बहु सुगंध, बहु भोग सुख, कुरलहिँ केलि कराहिँ ।

दुहुँ सौं केलि नित मानै, रहस अनंद दिन जाहिँ ॥१४॥

३७.रत्नसेन-संतति खंड

जाएउ नागमति नागसेनहि । ऊँच भाग ऊँचै दिन रैनहि ॥
कँवलसेन पदमावति जाएउ । जानहुँ चंद धरति मइँ आएउ ॥
पंडित बहु बुधिवंत बोलाए । रासि बरग औ गरह गनाए ॥
कहेन्हि बडे दोउ राजा होहीं । ऐसे पूत होहिँ सब तोहीं ॥
नवौं खंड के राजन्ह जाहीं । औ किछु दुंद होइ दल माहीं ॥
खोलि भँडारहिँ दान देवावा । दुखी सुखी करि मान बढावा ॥
जाचक लोग, गुनीजन आए । औ अनंद के वाज बधाए ॥

बहु किछु पावा जोतिसिन्ह औ देइ चले असीस ।

पुत्र, कलत्र, कुटुंब सब जीयहिँ कोटि बरीस ॥१॥

३८.राघवचेतन देशनिकाला खंड

राघव चेतन चेतन महा । आऊ सरि राजा पहुँ रहा ॥
चित चेटा जाने बहु भेऊ । कबि बियास पंडित सहदेऊ ॥
बरनी आइ राज कै कथा । पिंगल महुँ सब सिंघल मथा ॥
जो कबि सुनै सीस सो धुना । सरवन नाद बेद सो सुना ॥
दिस्टि सो धरम पंथ जेहि सूझा । ज्ञान सो जो परमारथ बूझा ॥
जोगि, जो रहै समाधि समाना । भोगि सो, गुनी केर गुन जाना ॥
बीर जो रिस मारै, मन गहा । सोइ सिगार कंत जो चहा ॥

बेग भेद जस बररुचि, चित चेटा तस चेत ।

राजा भोज चतुरदस, भा चेतन सौं हेत ॥१॥

होइ अचेत घरी जौ आई । चेतन कै सब चेत भुलाई ॥
भा दिन एक अमावस सोई । राजै कहा 'दुइज कब होई!' ॥
राघव के मुख निकसा 'आजू' । पंडितन्ह कहा 'काल्हि, महाराजू' ॥
राजै दुवौ दिसा फिरि देखा । इन महुँ को बाउर, को सरेखा ॥

भुजा टेकि पंडित तब बोला । छाँडहिं देस बचन जौ डोला ' ॥
 राघव करै जाखिनी पूजा । चहै सो भाव देखावै दूजा ॥
 तेहि ऊपर राघव बर खाँचा । 'दुइज आजु तौ पंडित साँचा ' ॥

राघव पूजि जाखिनी, दुइज देखाएसि साँझ ।

बेद पंथ जे नहिं चलहिं, ते भूलहिं बन माँझ ॥२॥

पंडितन्ह कहा परा नहिं धोखा । कौन अगस्त समुद जेइ सोखा ॥
 सो दिन गएउ साँझ भइ दूजी । देखी दुइज घरी वह पूजी ॥
 पंडितन्ह राजहि दीन्ह असीसा । अब कस यह कंचन और सीसा ॥
 जौ यह दुइज काल्हि कै होती । आजु तेज देखत ससि-जोती ॥
 राघव दिस्टिबंध कल्हि खेला । सभा माँझ चेटक अस मेला ॥
 एहि कर गुरु चमारिन लोना । सिखा काँवरू पाढन टोना ॥
 दुइज अमावस कहँ जो देखावै । एक दिन राहु चाँद कहँ लावै ॥

राज बार अस गुनी न चाहिय जेहि टोना कै खोज ।

एहि चेटक औ विद्या छला जो राजा भोज ॥३॥

राघव बैन जो कंचन रेखा । कसे बानि पीतर अस देखा ॥
 अज्ञा भई, रिसान, नरेसू । मारहु नाहिं, निसारहु देसू ॥
 झूठ बोलि थिर रहै न राँचा । पंडित सोइ बेद मत साँचा ॥
 वेद-वचन मुख साँच जो कहा । सो जुग-जुग अहथिर होइ रहा ॥
 खोट रतन सोई फटकारै । केहि घर रतन जो दारिद हरै? ॥
 चहै लच्छि बाउर कवि सोई । जहँ सुरसती लच्छि कित होई? ॥
 कविता-सँग दारिद मतिभंगी । काँटे कूट पुहुप कै संगी ॥
 कवि तौ चेला, विधि गुरु, सीप सेवाती-बूँद ।

तेहि मानुष कै आस का जौ मरजिया समुंद ॥४॥

एहि रे बात पदमावति सुनी । देस निसारा राघव गुनी ॥
 ज्ञान दिस्टि धनि अगम बिचारा । भल न कीन्ह अस गुनी निसारा ॥
 जेइ जाखिनी पूजि ससि काढा । सूर के ठाँव करै पुनि ठाढा ॥
 कवि कै जीभ खड्ग हरद्वानी । एक दिसि आगि, दुसर दिसि पानी ॥
 जिनि अजुगुति काढै मुख भोरे । जस बहुते, अपजस होइ थोरे ॥
 रानी राघव बेगि हँकारा । सूर गहन भा लेहु उतारा ॥
 बाम्हन जहाँ दच्छिना पावा । सरग जाइ जौ होई बोलावा ॥

आवा राघव चेतन, धौराहर के पास ।

ऐस न जाना ते हियै, बिजुरी बसै अकास ॥५॥

पदमावति जो झरोखे आई । निहकलंक ससि दीन्ह दिखाई ॥
 ततखन राभव दीन्ह असीसा । भएउ चकोर चंदमुख दीसा ॥
 पहिरे ससि नखतन्ह कै मारा । धरती सरग भएउ उजियारा ॥
 औ पहिरे कर कंकन जोरी । नग लागे जेहि महुँ नौ कोरी ॥
 कंकन एक कर काढि पवारा । काढत हार टूट औ मारा ॥
 जानहुँ चाँद टूट लेइ तारा । छुटी अकास काल कै धारा ॥
 जानहुँ टूटि बीजु भुईँ परी । उठा चौधि राघव चित हरी ॥

परा आइ भुईँ कंकन, जगत भएउ उजियार ।

राघव बिजुरी मारा, बिसँभर किछ न सँभार ॥६॥

पदमावति हँसि दीन्ह झरोखा । जौ यह गुनी मरै, मोहिं दोखा ॥
 सबै सहेली दैखे धाई । 'चेतन चेतु' जगावहिं आई ॥
 चेतन परा, न आवै चैतू । सबै कहा 'एहि लाग परेतु' ॥
 कोई कहै, आहि सनिपातू । कोई कहै, कि मिरगी बातू ॥
 कोइ कह, लाग पवन झर झोला । कैसेहु समुझि न चेतन बोला ॥
 पुनि उठाइ बैठाएन्हि छाहाँ पूछहिं, कौन पीर हिय माहाँ? ॥
 देहुँ काहू के दरसन हरा । की ठग धूत भूत तोहि छरा ॥
 की तोहि दीन्ह काहु किछु, की रे डसा तोहि साँप ।

कहु सचेत होइ चेतन, देह तोरि कस काँप ॥७॥

भएउ चेत चेतन चित चेत । नैन झरोखे, जीउ सँकेता ॥
 पुनि जो बोला मति बुधि खोवा । नैन झरोखा लाग रोवा ॥
 बाउर बहिर सीस पै धूना । आपनि कहै, पराइ न सुना ॥
 जानहु लाई काहु ठगौरी । खन पुकार खन बातें बौरी ॥
 हौं रे ठगा एहि चितउर माहाँ । कासौं कहौं, जाउं केहि पाहाँ ॥
 यह राजा सठ बड़ हत्यारा । जेइ राखा अस ठग बटपारा ॥
 ना कोइ बरज, न लाग गोहारी । अस एहि नगर होइ बटपारी ॥

दिस्टि दीन्ह ठगलाडू, अलक-फाँस परे गीउ ।

जहाँ भिखारि न बाँचै, तहाँ बाँच को जीऊ ॥८॥

कित धोराहर आइ झरोखे? लेइ गइ जीउ दच्छिना धोखे ॥
 सरग ऊइ ससि करै अँजोरी । तेहि ते अधिक देहुँ केहि जोरी? ॥
 तहाँ ससिहि जौ होति वह जोती । दिन होइ राति रैन कस होती ॥
 तेइ हंकारि मोहिं कंकन दीन्हा । दिस्टि जो परी जीउ हरि लीन्हा ॥
 नैन भिखारि ढीठ सतछँडा । लागै तहाँ बान होइ गड़ा ॥
 नैनहिं नैन जो बेधि समाने । सीस धुनै निसरहिं नहिं ताने ॥
 नवहिं न आए निलज भिखारी । तबहिं न लागि रही मुख कारी ॥
 कित करमुहें नैन भए, जीउ हरा जेहि वाट ।

सरवर नीर निछोह जिमि दरकि दरकि हिय फाट ॥९॥

सखिन्ह कहा चेतसि बिसँमारा । हिये चेतु जेहि जासि न मारा ॥
 जौ कोइ पावै आपन माँगा । ना कोइ मरै, न काहू खाँगा ॥
 वह पदमावति आहि अनूपा । बरनि न जाइ काहु के रूपा ॥
 जो देखा सो गुपुत चलि गएउ । परगट कहाँ जीउ बिनु भएउ ॥
 तुम्ह अस बहुत बिमोहित भए । धुनि धुनि सीस जीउ देइ गए ॥
 बहुतन्ह दीन्ह नाइ कै गीवा । उतर देइ नहिं मारै जीवा ॥
 तुई पै मरहिं होइ जरि भूई । अबहुँ उघेलु कान कै रूई ॥
 कोइ माँगे नहिं पावै, कोइ माँगे बिनु पाव ।

तू चेतन औरहि समुझावै, तोकहँ को समुझाव? ॥१०॥

भएउ चेत, चित चेतन चेत । बहुरि न आइ सहौं दुख एता ॥
 रोवत आइ परे हम जहाँ । रोवत चले, कौन सुख तहाँ? ॥
 जहाँ रहे संसौ जिउ केरा । कौन रहनि? चलि चलै सबेरा ॥
 अब यह भीख तहाँ होइ मागौं । देइ एत जेहि जनम न खाँगौं ॥
 अस कंकन जौ पावौं दूजा । दारिद हरै आस मन पूजा ॥

दिल्ली नगर आदि तुरकानू । जहाँ अलाउदीन सुलतानू ॥
 सोन ढरै जेहि के टकसारा । बारह बानी चलै दिनारा ॥
 कँवल बखानौं जाइ तहँ , जहँ अलि अलाउदीन ।
 सुनि कै चढै भानु होइ , रतन जो होइ मलीन ॥११॥

३१. राघवचेतन-दिल्ली-गमन खंड

राघव चेतन कीन्ह पयाना । दिल्ली नगर जाइ नियराना ॥
 आइ साह के बार पहुँचा । देखा राज जगत पर ऊँचा ॥
 छत्तिस लाख तुरुक असवारा । तीस सहस हस्ती दरबारा ॥
 जहँ लगे तपै जगत पर भानू । तहँ लगे राज करै सुलतानू ॥
 चहँ खंड के राजा आवहिं । ठाढ झुराहिं, जोहार न पावहिं ॥
 मन तेवान कै राघव झूरा । नाहिं उबार, जीउ डर पूरा ॥
 जहँ झुराहिं दीन्हें सिर छाता । तहँ हमार को चालै बाता ॥
 वार पार नहिं सूझै, लाखन उमर अमीर ?
 अब खुर खेह जाहुँ मिलि, आइ परेउँ एहि भीर ॥१॥

बादशाह सब जाना बूझा । सरग पतार हिये महँ सूझा ॥
 जौ राजा अस सजग न होई । काकर राज, कहाँ कर कोई ॥
 जगत भार उन्ह एक सँभारा । तौ थिर रहै सकल संसारा ॥
 औ अस ओहिक सिंघासन ऊँचा । सब काहू पर दिस्टि पहुँचा ॥
 सब दिन राजकाज सुख भोगी । रैनि फिरै घर घर होइ जोगी ॥
 राव रंक जावत सब जाती । सब कै चाह लेइ दिन राती ॥
 पंथी परदेसी जत आवहिं । सब कै चाह दूत पहुँचावहिं ॥
 एहू वात तहँ पहुँची, सदा छत्र सुख छाहँ !
 बाम्हन एक बार है , कँकन जराऊ बाहँ ॥२॥

मया साह मन सुनत भिखारी । परदेसी को? पूछु हँकारी ॥
 हम्ह पुनि जाना है परदेसा । कौन पंथ गवनब, केहि भेसा? ॥
 दिल्ली राज चिंत मन गाढी । यह जग जैस दूध के साढी ॥
 सैंति बिलोव कीन्ह बहु फेरा । मथि कै लीन्ह घीउ महि केरा ॥
 एहि दहि लेइ का रहै ढिलाई । साढी काढ दही जब ताई ॥
 एहि दहि लेइ कित होइ होइ गए । कै कै गरब खेह मिलि गए ॥
 रावन लंक जारि सब तापा । रहा न जोबन, आव बुढापा ॥
 भीख भिखारी दीजिए , का बाम्हन का भाँट ।

अज्ञा भइ हँकारहु , धरती धरै लिलाट ॥३॥

राघव चेतन हुत जो निरासा । ततखन बेगि बोलावा पासा ॥
 सीस नाइ कै दीन्ह असीसा । चमकत नग कंकन कर दीसा ॥
 अज्ञा भइ पुनि राघव पाहाँ । तू मंगन कंकन का बाहाँ ॥
 राघव फेरि सीस भुईँ धरा । जुग जुग राज भानु कै करा ॥
 पदमिनि सिंघलदीप क रानी । रतनसेन चितउरगढ आनी ॥
 कँवल न सरि पूजै तेहि बासा । रूप न पूजै चंद अकासा ॥

जहाँ कँवल ससि सूर न पूजा । केहि सरि देउँ, और को दूजा ॥
सोइ रानी संसार मनि, दछिना कंकन दीन्ह ।

अछरी रूप देखाइ कै जीउ झरोखे लीन्ह ॥४॥

सुनि कै उतर साहि मन हँसा । जानहु बीजु चमकि परगसा ॥
काँच जोग जेहि कंचन पावा । मंगन ताहि सुमेरु चढावा ॥
नावँ भिखारि जीभ मुख बाँची । अबहुँ सँभारि बात कहु साँची ॥
कहँ अस नारि जगत उपराहीं । जेहि के सूरुज ससि नाहीं ॥
जो पदमिनि सो मंदिर मोरे । सातौ दीप जहाँ कर जोरे ॥
सात दीप महँ चुनि चुनि आनी । सो मोरे सोरह सै रानी ॥
जौ उन्ह कै देखसि एक दासी । देखि लोन होइ लोन बिलासी ॥

चहँ खंड हौं चक्कवै, जस रबि तपै अकास ।

जौ पदमिनि तौ मोरे, अछरी तौ कबिलास ॥५॥

तुम बड़ राज छत्रपति भारी । अनु बाम्हन में अहौं भिखारी ॥
चारउ खंड भीख कहँ बाजा । उदय अस्त तुम्ह ऐस न राजा ॥
धरमराज औ सत कलि माहाँ । झूठ जो कहै जीभ केहि पाहाँ ॥
किछु जो चारि सब किछु उपराहीं । ते एहि जंबू दीपहि नाहीं ॥
पदमिनि, अमृत, हंस, सदूरु । सिंघलदीप मिलहिं पै मूरु ॥
सातौं दीप देखि हौं आवा । तब राघव चेतन कहवावा ॥
अज्ञा होइ, न राखौं धोखा । कहौं सबै नारिन्ह गुन दोषा ॥

इहाँ हस्तिनी, संखिनी, औ चित्रिनि बहु बास ।

कहाँ पदमिनी पदुम सरि, भँवर फिरै जेहि पास ॥६॥

४०.स्त्री-भेद-वर्णन खंड

पहिले कहौं हस्तिनी नारी । हस्ती कै परकीरति सारी ॥
सिर औ पायँ सुभर गिउ छोटी । उर कै खीनि लंक कै मोटी ॥
कुंभस्थल कुच मद उर माहीं । गवन गयंद ढाल जनु बाहीं ॥
दिस्टि न आवै आपन पीऊ । पुरुष पराएअ ऊपर जिऊ ॥
भोजन बहुत बहुत रति चाऊ । अछवाई नहिं थोर बनाऊ ॥
मद जस मंद बसाइ पसेऊ । औ बिसवासि छरै सब केऊ ॥
डर औ लाज न एकौ हिये । रहै जो राखे आँकुस दिये ॥
गज गति चलै चहँ दिसि, चितवै लाए चोख ।

कही हस्तिनी नारि यह, सब हस्तिन्ह के दोख ॥१॥

दूसरि कहौं संखिनी नारी । करै बहुत बल अलप अहारी ॥
उर अति सुभर खीन अति लंका । गरब भरी, मन करै न संका ॥
बहुत रोष चाहै पिउ हना । आगे घाल न काहू गना ॥
अपनै अलंकार ओहि भावा । देखि न सकै सिंगार परावा ॥
सिंघ क चाल चलै डग ढीली । रोवाँ बहुत जाँघ औ फीली ॥
मोटि माँसु रुचि भोजन तासू । औ मुख आव बिसायँध बासू ॥
दिस्टि तिरहुड़ी हेर न आगे । जनु मथवाह रहै सिर लागे ॥

सेज मिलत स्वामी कहँ, लावै उर नखवान ।

जेहि गुन सबै सिंघ के, सो संखिनि सुलतान! ॥२॥

तीसरि कहौं चित्रिनी नारी । महा चतुर रस-प्रेम पियारी ॥
 रूप सुरूप सिंगार सवाई । अछरी जैसि रहै अछवाई ॥
 रोष न जानै हँसता-मुखी । जेहि असि नारी कंत सो सुखी ॥
 अपने पिउ कै जानै पूजा । एक पुरुष तजि आन न दूजा ॥
 चंदबदनि रँग कुमुदिनि गोरी । चाल सोहाइ हंस कै जोरी ॥
 खीर खाँड़ रुचि, अल्प अहारू । पान फूल तेहि अधिक पियारू ॥
 पदमिनि चाहि घाटि दुइ करा । और सबै गुन ओहि निरमरा ॥
 चित्रिनि जैस कुमुद रँग, सोइ बासना अंग ।

पदमिनि सब चंदन असि, भँवर फिरहिं तेहि संग ॥३॥

चौथी कहौं पदमिनी नारी । पदुम गंध ससि देउ सँवारी ॥
 पदमिनि जाति पदुम रँग ओही । पदुम बास मधुकर सँग होहीं ॥
 ना सुठि लाँबी, ना सुठि छोटी । ना सुठि पातरि, ना सुठि मोटी ॥
 सोरह करा रँग ओहि बानी । सो, सुलतान ! पदमिनी जानी ॥
 दीरघ चारि, चारि लघु सोई । सुभर चारि चहुँ खिनौ होई ॥
 औ ससि बदन देखि सब मोहा । बाल मराल चलत गति सोहा ॥
 खीर अहार न कर सुकुवाँरी । पान फूल के रहै अधारी ॥

सोरह करा सँपूरन, औ सोरहौ सिंगार ।

अब ओहि भाँति कहत हौं, जस बरनै संसार ॥४॥

प्रथम केस दीरघ मन मोहै । औ दीरघ अँगुरी कर सोहै ॥
 दीरघ नैन तीख तहँ देखा । दीरघ गीउ, कंठ तिनि रेखा ॥
 पुनि लघु दसन होहिं जनु हीरा । औ लघु कुच उत्तंग जँभीरा ॥
 लघु लिलाट छूइज परगासू । औ नाभी लघु, चंदन बासू ॥
 नासिक खीन खरग कै धारा । खीन लंक जनु केहरि हारा ॥
 खीन पेट जानहुँ नहिं आँता । खीन अधर बिद्रुम रँग राता ॥
 सुभर कपोल, देख मुख सोभा । सुभर नितंब देखि मन लोभा ॥

सुभर कलाई अति बनी, सुभर जंघ, गज चाल ।

सोरह सिंगार बरनि कै, करहिं देवता लाल ॥५॥

४१.पद्मावती-रूप चर्चा खंड

वह पदमिनि चितउर जो आनी । काया कुंदन द्वादसबानी ॥
 कुंदन कनक ताहि नहिं बासा । वह सुगंध जस कँवल बिगासा ॥
 कुंदन कनक कठोर सो अंगा । वह कोमल, रँग पुहुप सुरंगा ॥
 ओहि छुइ पवन विरिछ जेहि लागा । सोइ मलयागिरि भएउ सुभागा ॥
 काह न मूठी भरी ओहि देही । असि मूरति केइ देउ उरेही ॥
 सबै चितेर चित्र कै हारे । ओहिक रूप कोइ लिखै न पारे ॥
 कया कपूर हाइ सव मोती । तिन्हतें अधिक दीन्ह बिधि जोती ॥

सुरुज किरिन जसि निरमल, तेहितें अधिक सरीर ।

सौह दिस्ट नहिं जाइ करि नैनन्ह आवै नीर ॥१॥

ससि मुख जबहिं कहै किछु बाता । उठत ओठ सूरज जस राता ॥
 दसन दसन सौं किरिन जो फूटहिं । सब जग जनहुँ फुलझरी छूटहिं ॥
 जानहुँ ससि महुँ बीजु देखावा । चौंधि परै किछु कहै न आवा ॥

कौंधत अह जस भादों रैनी । साम रैनि जनु चलै उडैनी ॥
 जनु बसंत ऋतु कोकिल बोली । सुरस सुनाइ मारि सर डोली ॥
 ओहि सिर सेस नाग जौ हरा । जाइ सरन बेनी होइ परा ॥
 जनु अमृत होइ बचन बिगासा । कैवल जो बास बास धनि पासा ॥
 सबै मनहि हरि जाइ मरि, जो देखै तस चार ।

पहिले सो दुख बरनि कै, बरनौ ओहिक सिंगार ॥२॥

कित हौं रहा काल कर काढा । जाइ धौरहर तर भा ठाढा ॥
 कित वह आइ झरोखै झाँकी । नैन कुरँगिनि चितवनि बाँकी ॥
 विहँसि ससि तरई जनु परी । की सो रैनि छूटीं फुलझरी ॥
 चमक बीजु जस भादों रैनी । जगत दिस्टि भरि रही उडैनी ॥
 काम कटाछ दिस्टि विष बसा । नागिनि अलक पलक महुँ डसा ॥
 भौंह धनुष पल काजर बूडी । वह भइ धानुक हौं भा ऊडी ॥
 मारि चली मारत हू हँसा । पाछे नाग रहा हौं डँसा ॥
 काल घालि पाछे रखा, गरुड न मंतर कोइ ।

मोरे पेट वह पैठा, कासौं पुकारौं रोइ ॥३॥

बेनी छोरि झार जौ केसा । रैनि होइ जग दीपक लेसा ॥
 सिर हुत बिसहर परे भुईं बारा । सगरौं देस भएउ अँधियारा ॥
 सकपकाहिं विष भरे पसारे । लहरि भरे लहकहिं अति कारे ॥
 जानहुँ लोटहिं चढे भुअंगा । बेधे बास मलयगिरि अंगा ॥
 लुरहिं मुरहिं जनु मानहिं केली । नाग चढे मालति कै बेली ॥
 लहरै देइ जनहुँ कालिंदी । फिरि फिरि भँवर होइ चित बंदी ॥
 चँवर दुरत आछै चहुँ पासा । भँवर न उडहिं जो लुबुधे बासा ॥

होइ अँधियार बीजु धन लौपै जबहि चीर गहि झाँप ।

केस नाग कित देख मै, सँवरि सँवरि जिय काँप ॥४॥

माँग जो मानिक सेंदुर-रेखा । जनु बसंत राता जग देखा ॥
 कै पत्रावलि पाटी पारी । औ रुचि चित्र बिचित्र सँवारी ॥
 भए उरेह पुहुप सब नामा । जनु बग बिखरि रहे घन सामा ॥
 जमुना माँझ सुरसती मंगा । दुहुँ दिसि रही तरंगिनी गंगा ॥
 सेंदुर रेख सो ऊपर राती । बीरबहूटिन्ह कै जसि पाँती ॥
 बलि देवता भए देखी सेंदूरू । पूजै माँग भोर उटि सूरू ॥
 भोर साँझ रबि होइ जो राता । ओहि रेखा राता होइ गाता ॥
 बेनी कारी पुहुप लेइ, निकसी जमुना आइ ।

पूज इंद्र आनंद सौं, सेंदुर सीस चढाइ ॥५॥

दुइज लिलाट अधिक मनियारा । संकर देखि माथ तहँ धारा ॥
 यह निति दुइज जगत सब दीसा । जगत जोहारै देइ असीसा ॥
 ससि जो होइ नहिं सरवरि द्वाजै । होइ सो अमावस छपि मन लाजै ॥
 तिलक सँवारि जो चुन्नी रची । दुइज माँझ जनहुँ कचपची ॥
 ससि पर करवत सारा राहू । नखतन्ह भरा दीन्ह बड़ दाहू ॥
 पारस जोति लिलाटहि ओती । दिस्टि जो करै होइ तेहि जोती ॥
 सिरी जो रतन माँग बैठारा । जानहु गगन टूट निसितारा ॥

ससि औ सूर जो निरमल तेहि लिलाट के ओप ।

निसि दिन दौरि न पूजहिं, पुनि पुनि होहिं अलोप ॥६॥

भौहैं साम धनुक जनु चढा । बेझ करै मानुष कहँ गढा ॥
 चंद क मूठि धनुक वह ताना । काजर मनच बरुनि बिष बाना ॥
 जा सहँ हेर जाइ सो मारा । गिरिवर टरहिं भौह जो टारा ॥
 सेतुबंध जेइ धनुष बिगाडा । उहौ धनुष भौहन्ह सौं हारा ॥
 हारा धनुष जो बेधा राहू । और धनुष कोइ गनै न काहू ॥
 कित सो धनुष मैं भौहन्ह देखा । लाग बान तिन्ह आउ न लेखा ॥
 तिन्ह बानन्ह झाँझर भा हीया । जो अस मारा कैसे जीया ॥
 सूत सूत तन बेधा, रोवँ रोवँ सब देह ।

नस नस महँ ते सालहिं , हाड हाड भए बेह ॥७॥

नैन चित्र एहि रूप चितेरा । कँवल पत्र पर मधुकर फेरा ॥
 समुद तरंग उठहि जनु राते । डोलहि औ घूमहिं रस माते ॥
 सरद चंद महँ खंजन जोरी । फिरि फिरि लरै बहोरि बहोरी ॥
 चपल बिलोल डोल उन्ह लागे । थिर न रहै चंचल बैरागे ॥
 निरखि अघाहिं न हत्या हूँते । फिरि, फिरि स्रवनन्ह लागहिं मते ॥
 अंग सेत मुख साम सो ओही । तिरछे चलहिं सूध नहिं होही ॥
 सुर नर गंधब लाल कराहीं । उथले चलहिं सरग कहँ जाहीं ॥
 अस वै नयन चक्र दुइ, भँवर समुद उलथाहिं ।

जनु जिउ घालि हिंडोलहिं, लेइ आवहिं लेइ जाहिं ॥८॥

नासिक खडग हरा धनि कीरू । जोग सिंगार जिता औ बीरू ॥
 ससि मुँह सौहँ खडग देइ रामा । रावन सौं चाहै संग्रामा ॥
 दुहँ समुद्र महँ जनु बिच नीरू । सेतु बंध बाँधा रघुबीरू ॥
 तिल के पुहुप अस नासिक तासू । औ सुगंध दीन्ही बिधि बासू ॥
 हीर फूल पहिरे उजियारा । जनहुँ सरद ससि सोहिल तारा ॥
 सोहिल चाहि फूल वह ऊँचा । धावहिं नखत न जाइ पहुँचा ॥
 न जनौं कैस फूल वह गढा । बिगसि फूल सब चाहहिं चढा ॥
 अस वह फूल सुवासित, भएउ नासिका बंध ।

जेत फूल ओहि हिरकहिं तिन्ह कहँ होइ सुगंध ॥९॥

अधर सुरंग पान अस खीने । राते रंग अमिय रस भीने ॥
 आछहिं भिजे तँबोल सौं राते । जनु गुलाल दीसहिं बिहँसाते ॥
 मानिक अधर दसन जनु हीरा । बैन रसाल काँड मुख बीरा ॥
 काँडे अधर डाभ जिमि चीरा । रुहिर चुवै जौ खाँडै बीरा ॥
 ढारै रसहि रसहि रस गीली । रकत भरी औ सुरंग रँगिली ॥
 जनु परभात राति रवि रेखा । बिगसे बदन कँवल जनु देखा ॥
 अलक भुअंगिनि अधरहि राखा । गहै जो नागिनि सो रस चाखा ॥
 अधर अधर रस प्रेम कर , अलक भुअंगिनि बीच ।

तब अमृत रस पावै, जब नागिनि गहि खींच ॥१०॥

दसन साम पानन्ह रँग-पाके । बिगसे कँवल माँह अलि ताके ॥
 ऐसि चमक मुख भीतर होई । जनु दारिउँ औ साम मकोई ॥
 चमकहिं चौक बिहँस जौ नारी । बीजु चमक जस निसि अँधियारी ॥
 सेत साम अस चमकत दीठी । नीलम हीरक पाँति बईठी ॥
 केइ सो गढे अस दसन अमोला । मारै बीजु बिहँसि जौ बोला ॥
 रतन भीजि रस रंग भए सामा । ओही द्याज पदारथ नामा ॥

कित वै दसन देख रस भीने । लेइ गइ जोति नैन भए हीने ॥
दसन जोति होइ नैन मग, हिरदय माँझ परईठ ।

परगट जग अँधियार जनु, गुपुत ओहि मैं दीठ ॥११॥

रसना सुनहु जो कह रस बाता । कोकिल बैन सुनत मन राता ॥
अमृत कोंप जीभ जनु लाई । पान फूल असि बात सोहाई ॥
चातक बैन सुनत होइ साँती । सुनै सो परै प्रेम मधु माती ॥
बिरवा सूख पाव जस नीरू । सुनत बैन तस पलुह सरीरू ॥
बोल सेवाति बूँद जनु परहीं । स्रवन सीप मुख मोती भरहीं ॥
धनि वै बैन जो प्राण अधारू । भूखे स्रवनहिं देहिं अहारू ॥
उन्ह बैनन्ह कै काहि न आसा । मोहहि मिरिग बीन विस्वासा ॥
कंठ सारदा मोहै, जीभ सुरसती काह ।

इंद्र चंद्र रवि देवता, सबै जगत मुख चाह ॥१२॥

स्रवन सुनहु जो कुंदन सीपी । पहिरे कुंडल सिंघलदीपी ॥
चाँद सुरुज दुहुँ दिसि चमकाहीं । नखतन्ह भरे निरखि नहिं जाहीं ॥
खिन खिन करहिं बीजु अस काँपा । अँवर मेघ महुँ रहहिं न झाँपा ॥
सूक सनीचर दुहुँ दिसि मते । होहिं निनार न स्रवनन्ह हुँते ॥
काँपत रहहिं बोल जो बैना । स्रवनन्ह जौ लागहि फिर नैना ॥
जस जस बात सखिन्ह सौं सुना । दुहुँ दिसि करहिं सीस वै धुना ॥
खूँट दुवौ अस दमकहिं खूँटी । जनहु परै कचपचिया टूटी ॥
वेद पुरान ग्रंथ जत, स्रवन सुनत सिखि लीन्ह ।

नाद विनोद राग रस बंधक, स्रवन ओहि विधि दीन्ह ॥१३॥

कँवल कपोल ओहि अस छाजै । और न काहु देउ अस साजै ॥
पुहुक पंक रस अमिय सँवारे । सुरँग गेंद नारँग रतनारे ॥
पुनि कपोल वाएँ तिल परा । सो तिल बिरह-चिनगि कै करा ॥
जो तिल देख जाइ जरि सोई । बाएँ दिस्टि काहु जिनि होई ॥
जानहुँ भँवर पदुम पर टूटा । जीउ दीन्ह औ दिए न छूटा ॥
देखत तिल नैनन्ह गा गाडी । और न सूझै सो तिल छाँडी ॥
तेहि पर अलक मनि जरि डोला । छुबै सो नागिनि सुरंग कपोला ॥
रच्छा करै मयूर वह, नाँधि न हिय पर लोट ।

गहिरे जग को छुइ सकै, दुई पहार के ओट ॥१४॥

गीउ मयूर केरि जस ठाडी । कुंदै फेरि कुंदै काडी ॥
धनि वह गीउ का बरनौं करा । बाँक तुरंग जनहुँ गहि परा ॥
घिरिन परेवा गीउ उठावा । चहै बोल तमचूर सुनावा ॥
गीउ सुराही कै अस भई । अमिय पियाला कारन नई ॥
पुनि तेहि ठाँव परी तिनि रेखा । तेइ सोइ ठाँव होइ जो देखा ॥
सुरुज किरिनि हुँत गिउ निरमली । देखे बेगि जाति हिय चली ॥
कंचन तार सोह गिउ भरा । साजि कँवल तेहि ऊपर धरा ॥
नागिनि चढी कँवल पर, चढि कै बैठ कमठ ।

कर पसार जो काल कहँ, सो लागै ओहि कंठ ॥१५॥

कनक दंड भुज बनी कलाई । डाँडी कँवल फेरि जनु लाई ॥
चंदन खाँभहि भुजा सँवारी । जानहुँ मेलि कँवल पौनारी ॥
तेहि डाँडी सँग कँवल हथोरी । एक कँवल कै दूनौ जोरी ॥

सहजहि जानहु मेहँदी रची । मुकुताहल लीन्हें जनु घुँघची ॥
 कर पल्लव जो हथोरिन्ह साथा । वै सब रक्त भरे तेहि हाथा ॥
 देखत हिया काढि जनु लेई । हिया काढि कै जाई न देई ॥
 कनक अँगूठी औ नग जरी । वह हत्यारिन नखतन्ह भरी ॥
 जैसी भुजा कलाई, तेहि बिधि जाइ न भाखि ।

कंकन हाथ होइ जहँ, तहँ दरपन का साखि ? ॥१६॥

हिया थार कुच कनक कचोरा । जानहुँ दुवौ सिरीफल जोरा ॥
 एक पाट वै दूनौ राजा । साम छत्र दूनहुँ सिर छाजा ॥
 जानहुँ दोउ लटु एक साथा । जग भा लटू चढै नहिं हाथा ॥
 पातर पेट आहि जनु पूरी । पान अधार फूल अस फूरी ॥
 रोमावली ऊपर लटु घूमा । जानहु दोउ साम औ रूमा ॥
 अलक भुअंगिनि तेहि पर लोटा । हिय घर एक खेल दुइ गोटा ॥
 बान पगार उठे कुच दोऊ । नाँघि सरन्ह उन्ह पाव न कोऊ ॥

कैसहु नवहिं न नाए, जोबन गरब उठान ।

जो पहिले कर लावै, सो पाछे रति मान ॥१७॥

भुंग लंक जनु माँझ न लागा । दुइ खंड नलिन माँझ जनु तागा ॥
 जब फिरि चली देख मैं पाछे । अछरी इंद्रलोक जनु काछे ॥
 जबहिं चली मन भा पछिताऊ । अबहुँ दिस्टि लागि ओहि ठाऊ ।
 अछरी लाजि छपीं गति ओही । भई अलोप न परगट होहीं ॥
 हंस लजाइ मानसर खेले । हस्ती लाजि धूरि सिर मेले ॥
 जगत बहुत तिय देखी महुँ । उदय अस्त अस नारि न कहूँ ॥
 महिमंडल तौ ऐसि न कोई । ब्रह्ममंडल जौ होइ तो होई ॥

बरनेउँ नारि, जहाँ लागि, दिस्टि झरोखे आइ ।

और जो अही अदिस्ट धनि, सो किछु बरनि न जाइ ॥१८॥

का धनि कहौँ जैसि सुकुमारा । फूल के छुए होइ बेकरारा ॥
 पखुरी काढहि फूलन सेंती । सोई डासहिं सौर सपेती ॥
 फूल समूचै रहै जौ पावा । व्याकुल होइ नींद नहिं आवा ॥
 सहै न खीर खाँड़ औ घीऊ । पान अधार रहै तन जीऊ ॥
 नस पानन्ह कै काढहि हेरी । अधर न गडै फाँस ओहि केरी ॥
 मकरि क तार तेहि कर चीरू । सो पहिरे छिरि जाइ सरीरू ॥
 पालग पावँ क आछै पाटा । नेत बिछाव चलै जौ बाटा ॥

घालि नैन ओहि राखिय, पल नहिं कीजिय ओट ।

पेम का लुबुधा पाव ओहि, काह सो बड़ का छोट ॥१९॥

जौ राघव धनि बरनि सुनाई । सुना साह गइ मुरछा आई ॥
 जनु मूरति वह परगट भई । दरस देखाइ माहिं छपि गई ॥
 जो जो मंदिर पदमिनि लेखी । सुना जौ कँवल कुमुद अस देखी ॥
 होइ मालति धनि चित्त पईठी । और पुहुप कोउ आव न दीठी ॥
 मन होइ भँवर भएउ बैरागा । कँवल छाँडि चित और न लागा ॥
 चाँद के रंग सुरुज जस राता । और नखत सो पूछ न बाता ॥
 तब कह अलाउदीं जग सूरू । लेउँ नारि चितउर कै चूरू ॥

जौ वह पदमिनि मानसर, अलि न मलिन होइ जात ।

चितउर महुँ जो पदमावति, फेरि उहै कहू बात ॥२०॥

ए जगसूर कहों तुम्ह पाहाँ । और पाँच नग चितउर माहाँ ॥
 एक हंस है पंखि अमोला । मोती चुनै पदारथ बोला ॥
 दूसर नग जौ अमृत बसा । सो विष हरै नाग कर डसा ॥
 तीसर पाहन परस पखाना । लोह छुए होइ कंचन बाना ॥
 चौथ अहै सादूर अहेरी । जो बन हस्ति धरै सब घेरी ॥
 पाँचव नग सो तहाँ लागना । राजपंखि पेखा गरजना ॥
 हरिन रोझ कोइ भागि न बाँचा । देखत उड़ै सचान होइ नाचा ॥
 नग अमोल अस पाँचौ, भेंट समुद ओहि दीन्ह ।

इसकंदर जो न पावा सो सायर धँसि लीन्ह ॥२१॥

पान दीन्ह राघव पहिरावा । दस गज हस्ति घोड़ सो पावा ॥
 औ दूसर कंकन कै जोरी । रतन लाग ओहि बत्तिस कोरी ॥
 लाख दिनार देवाई जेंवा । दारिद हरा समुद कै सेवा ॥
 हौ जेहि दिवस पदमिनी पावौं । तोहि राघव! चितउर बैठावौं ॥
 पहिले करि पाँचौं नग मूठी । सो नग लेउं जो कनक अँगूठी ॥
 सरजा बीर पुरुष बरियारू । ताजन नाग सिंघ असवारू ॥
 दीन्ह पत्र लिखि बेगि चलावा । चितउर गढ़ राजा पहुँ आवा ॥
 राजै पत्र बँचावा, लिखी जो करा अनेग ।
 सिंगल कै जो पदमिनी, पठै देहु तेहि बेग ॥२२॥

४२. बादशाह-चढ़ाई खंड

सुनि अस लिखा उठा जरि राजा । जानौ दैउ तडपि घन गाजा ॥
 का मोहिं सिंघ देखावसि आई । कहों तौ सारदूल धरि खाई ॥
 भलेहिं साह पुहुमीपति भारी । माँग न कोउ पुरुष कै नारी ॥
 जो सो चक्कवै ताकहँ राजू । मँदिर एक कहँ आपन साजू ॥
 अछरी जहाँ इंद्र पै आवै । और न सुनै न देखै पावै ॥
 कंस राज जीता जौ कोपी । कान्ह न दीन्ह काहु कहँ गोपी ॥
 को मोहिं तें अस सूर अपारा । चढ़ै सरग खसि परै पतारा ॥
 का तोहिं जीउ मराबौं सकत आन के दोस ?

जो नहिं बुझै समुद्र-जल सो बुझाइ कित ओस ? ॥१॥

राजा! अस न होहु रिस राता । सुनु होइ जूड़, न जरि कहु बाता ॥
 मैं हौं इहाँ मरै कहँ आवा । बादशाह अस जानि पठावा ॥
 जो तोहि भार, न औरहि लेना । पूछहि कालि उतर है देना ॥
 बादशाह कहँ ऐस न बोलू । चढ़ै तौ परै जगत महँ डोलू ॥
 सूरहि चढ़त न लागहि बारा । तपै आगि जेहि सरग पतारा ॥
 परबत उड़हिं सूर के फूँके । यह गढ़ छार होइ एक झूँके ॥
 धँसै सुमेरु, समुद गा पाटा । पुहुमी डोल, सेस-फन फाटा ॥
 तासौं कौन लड़ाई? बैठहु चितउर खास ।

ऊपर लेहु चँदेरी, का पदमिनि एक दास? ॥२॥

जौ पै घरनि जाइ घर केरी । का चितउर, का राज चँदेरी ॥
 जिउ न लेइ घर कारन कोई । सो घर देइ जो जोगी होई ॥

हैं रनथंभउर नाह हमीरू । कल्पि माथ जेइ दीन्ह सरीरू ॥
 हैं सो रतननसेन सकबंधी । राहु बेधि जीता सैरंधी ॥
 हनुवँत सरिस भार जेइ काँधा । राघव सरिस समुद जो बाँधा ॥
 विक्रम सरिस कीन्ह जेइ साका । सिंघलदीप लीन्ह जौ ताका ॥
 जौ अस लिखा भएउँ नहिं ओछा । जियत सिंघ कै गह को मोछा ॥
 दरब लेई तौ मानौं, सेव करौं गहि पाउ ।

चाहै जौ सो पदमिनी, सिंघलदीपहि जाउ ॥३॥

बोलु न राजा ! आपु जनाई । लीन्ह देवगिरि और छिताई ॥
 सातौ दीप राज सिर नावहिं । औ सँग चली पदमिनी आवहिं ॥
 जेहि कै सेव करै संसारा । सिंघलदीप लेत कित बारा ॥
 जिनि जानसि यह गढ़ तोहि पाहीं । ताकर सबै तोर किछु नाहीं ॥
 जेहि दिन आइ गढ़ी कहँ छेकिहि । सरबस लेइ हाथ को टेकिहि ॥
 सीस न छाँड़ै खेह के लागे । सो सिर छार होइ पुनि आगे ॥
 सेवा करु जौ जियन तोहि भाई । नाहिं त फेरि माँख होइ जाई ॥
 जाकर जीवन दीन्ह तेहि, अगमन सीस जोहारि ।

ते करनी सब जानै, काह पुरुष का नारि ॥४॥

तुरुक! जाइ कहु मरै न धाई । होइहि इसकंदर कै नाई ॥
 सुनि अमृत कदलीबन धावा । हाथ न चढा रहा पछितावा ॥
 औ तेहि दीप पतँग होइ परा । अगिनि पहार पाँव देइ जरा ॥
 धरती लोह, सरग भा ताँबा । जीउ दीन्ह पहुँचत कर लाँबा ॥
 यह चितउरगढ़ सोइ पहारू । सूर उठै तब होइ अँगारू ॥
 जौ पै इसकंदर सरि लीन्हीं । समुद लेहु धँसि जस वै लीन्ही ॥
 जो छरि आनै जाइ छिताई । तेहि छर औ डर होइ मिताई ॥
 महुँ समुझि अस अगमन सजि राखा गढ़ साजु ।

काल्हि होइ जेहि आवन सो चलि आवै आजु ॥५॥

सरजा पलटि साह पहुँ आवा । देव न मानै बहुत मनाव्वा ॥
 आगि जो जरै आगि पै सूझा । जरत रहै न बुझाए बूझा ॥
 ऐसे माथ न टावै देवा । चढै सुलेमाँ मानै सेवा ॥
 सुनि कै अस राता सुलतानू । जैसे तपै जेठ कर कर भानू ॥
 सहसौ करा रोष अस भरा । जेहि दिसि देखै तेइ दिसि जरा ॥
 हिंदू देव काह बर खाँचा ? सरगहु अब न सूर सौं बाँचा ॥
 एहि जग आगि जो भरि मुख लीन्हा । सो सँग आगि दुहुँ जग कीन्हा ॥

रनथंभउर जस जरि बुझा, चितउर परै सो आगि ।

फेरि बुझाए ना बुझै, एक दिवस जौ लागि ॥६॥

लिखा पत्र चारिहु दिसि धाए । जावत उमरा बेगि बोलाए ॥
 दुंद घाव भा इंद्र सकाना । डोला मेरु सेस अकुलाना ॥
 धरती डोलि कमठ खरभरा । मथन अरंभ समुद महुँ परा ॥
 साह बजाइ चढा जग जाना । तीस कोस भा पहिल पयाना ॥
 चितउर सौँह बारिगह तानी । जहुँ लागि सुना कूच सुलतानी ॥
 उठि सरवान गगन लागि छाए । जानहु राते मेघ देखाए ॥
 जो जहुँ तहुँ सूता जागा । आइ जोहार कटक सब लागा ॥

चले पंथ बेसर सुलतानी । तीख तुरंग बाँक कनकानी ॥
हस्ति घोड़ औ दर पुरुष जावत बेसरा ऊँट ।

जहँ तहँ लीन्ह पलानै कटक सरह अस छूट ॥७॥

चले पंथ बेसर सुलतानी । तीख तुरंग बाँक कनकानी ॥
कारे, कुमइत, लील, सुपेते । खिंग, कुरंग, बीज, दुर केते ॥
अबलक, अरबी, लखी सिराजी । चौघर चाल, समँद भल, ताजी ॥
किरमिज, नुकरा, जरदे, भले । रूपकरान, बोलसर, चले ॥
पँचकल्यान, सँजाब, बखाने । महि सायर सब चुनि चुनि आने ॥
मुशकी औ हिरमिजी, एराकी । तुरकी कहे भोथार बुलाकी ॥
बिखरी चले जो पाँतिहि पाँती । बरन बरन औ भाँतिहि भाँती ॥
सिर औ पूँछ उठाए चहुँ, दिसि साँस ओनाहि ।

रोष भरे जस बाउर, पवन तुरास उड़ाहिं ॥८॥

लोहसार हस्ती पहिराए । मेघ साम जनु गरजत आए ॥
मेघहि चाहि अधिक वै कारे । भएउ असूझ देखि अँधियारे ॥
जसि भादौं निसि आवै दीठी । सरग जाइ हिरकी तिन्ह पीठी ॥
सवा लाख हस्ती जब चाला । परवत सहित सबै जग हाला ॥
चले गयंद माति मद आवहिं । भागहिं हस्ती गंध जौ पावहिं ॥
ऊपर जाइ गगन सिर धँसा । औ धरती तर कहँ धसमसा ॥
भा भुईँचाल चलत जग जानी । जहँ पग धरहि उठै तहँ पानी ॥
चलत हस्त जग काँपा, चाँपा सेस पतार ।

कमठ जो धरती लेइ रहा, बैठि गएउ गजभार ॥९॥

चले जो उमरा मीर बखाने । का बरनों जस उन्ह कर बाने ॥
खुरासान औ चला हरेऊ । गौर बँगाला रहा न केऊ ॥
रहा न रूम-शाम-सुलतानू । कासमीर, ठठ्ठा मुलतानू ॥
जावत बड़ बड़ तुरुक कै जाती । माँडौबाले औ गुजराती ॥
पटना, उड़ीसा के सब चले । लेइ गज हस्ति जहाँ लागि भले ॥
कवँरू, कामता औ पिंडवाए । देवगिरि लेइ उदयगिरि आए ॥
चला परवती लेइ कुमाऊँ । खसिया मगर जहाँ लागि नाऊँ ॥

उदय अस्त लहि देस जो, को जानै तिन्ह नाँव ? ॥

सातौ दीप नवौ खंड, जुरे आई एक ठाँव ॥१०॥

धनि सुलतान जेहिक संसारा । उहै कटक अस जोरै पारा ॥
सबै तुरुक सिरताज बखाने । तबल बाज औ बाँधे बाने ॥
लाखन मार बहादुर जंगी । जँबुर, कमानै तीर खदंगी ॥
जीभा खोलि रअग सौँ मठ्ठे । लेजिम घालि एराकिन्ह चढे ॥
चमकहिं पाखर सार सँवारी । दरपन चाहि अधिक उजियारी ॥
बरन बरन औ पाँतिहि पाँती । चली सो सेना भाँतिहि भाँती ॥
बेहर बेहर सब कै बोली । बिधि यह खानि कहाँ दहुँ खोली ? ॥

सात सात जोजन कर, एक दिन होइ पयान ।

अगिलहि जहाँ पयान होइ, पछिलहि तहाँ मिलान ॥११॥

डोले गढ़ गढ़ पति सब काँपै । जीउ न पेट हाथ हिय चाँपै ॥
काँपा रनथँभउर गढ़ डोला । नरवर गएउ झुराइ, न बोला ॥

जूनागढ़ औ चंपानेरी । काँपा माडों लेइ चँदेरी ॥
 गढ़ गुवालियर परी मथानी । औ अँधियार मथा भा पानी ॥
 कालिंजर महुँ परा भगाना । भागेउ जयगढ़ रहा न थाना ॥
 काँपा बाँधव, नरवर राना । डर रोहतास बिजयगिरि माना ॥
 काँप उदयगिरि देवगिरि डरा । तब सो छपाइ आपु कहँ धरा ॥
 जावत गढ़ औ गढ़ पति सब काँपै जस पात ।

का कहँ बोलि सौहँ भा बादसाह कर छात ? ॥१२॥

चितउरगढ़ औ कुंभलनेरै । साजै दूनौ जैस सुमेरै ॥
 दूतन्ह आइ कहा जहँ राजा । चढ़ा तुरुक आवै दर साजा ॥
 सुनि राजा दौराई पाती । हिंदू नावँ जहाँ लगि जाती ॥
 चितउर हिंदुन कर अस्थाना । सत्रु तुरुक हठी कीन्ह पयाना ॥
 आव समुद्र रहै नहिँ बाँधा ! मैं होई मेड़ भार सिर काँधा ॥
 पुरवहु साथ तुम्हारि बड़ाई । नाहिँ त सत को पार छँडाई ॥
 जौ लहि मेड़ रहै सुखसाखा । टूटे बारि जौइ नहिँ राखा ॥
 सती जौ जिउ महुँ सत धरै , जरै न छाँडै साथ ।

जहँ बीरा तहँ चून है पान, सोपारी, काथ ॥१३॥

करत जो राय साह कै सेवा । तिन्ह कहँ आइ सुनाव परेवा ॥
 सब होइ एकमते जो सिधारे । बादसाह कहँ आइ जोहारे ॥
 है चितउर हिंदुन्ह कै माता । गाढ़ परे तजि जाइ न नाता ॥
 रतनसेन तहँ जौहर साजा । हिंदुन्ह माँझ आहि बड़ राजा ॥
 हिंदुन्ह केर पतँग कै लेखा । दौरि परहिँ अगिनी जहँ देखा ॥
 कृपा करहु चित बाँधहु धीरा । नातरु हमहिँ देह हँसि बीरा ॥
 पुनि हम जाइ मरहिँ ओहि ठाऊँ । मेटि न जाइ लाज सौँ नाऊँ ॥
 दीन्ह साह हँसि बीरा, और तीन दिन बीचु ।

तिन्ह सीतल को राखै, जिनहिँ अगिनि महुँ मीचु? ॥१४॥

रतनसेन चितउर महुँ साजा । आइ बजार बैठ सब राजा ॥
 तोवर, बैस, पवार, सो आए । औ गहलौत आइ सिर नाए ॥
 पत्ती औ पँचवान बघेले । अगरपार, चौहान चँदले ॥
 गहरवार परिहार जो कुरे । औ कलहंस जो ठाकुर जुरे ॥
 आगे ठाढ़ बजावहिँ ढाढ़ी । पाछे धुजा मरन कै काढ़ी ॥
 बाजहिँ सिंगी संख औ तूरा । चंदन खेवरे भरे सेंदूरा ॥
 सजि संग्राम बाँध सब साका । छाँडा जियन, मरन सब ताका ॥

गगन धरति जेइ टेका, तेहि का गरू पहार ।

जौ लहि जिउ काया महुँ, परै सो अँगवै भार ॥१५॥

गढ़ तस सजा जौ चाहै कोई । बरिस बीस लगि खाँग न होई ॥
 बाँके चाहि बाँक गढ़ कीन्हा । औ सब कोट चित्र कै लीन्हा ॥
 खंड खंड चौखंड सँवारा । धरी विषम गोलन्ह कै मारा ॥
 ठाँवहि ठाँव लीन्ह तिन्ह बाँटी । रहा न बीचु जो सँचरे चाँटी ॥
 बैठे धानुक कँगुरन कँगुरा । भूमि न आँटी अँगुरन अँगुरा ॥
 औ बाँधे गढ़ गज मतवारे । फाटै भूमि होहिँ जौ ठारे ॥

बिच बिच बुर्ज बने चहुँ फेरी । बाजहिं तबल ढोल औ भेरी ॥
भा गढ़ राज सुमेरु जस, सरग छुवै पै चाह ।

समुद्र न लेखे लावै, गंग सहसमुख काह ॥१६॥

बादशाह हठि कीन्ह पयाना । इंद्र भँडार डोल भय माना ॥
नबे लाख असवार जो चढ़ा । जो देखा सो लोहे मढ़ा ॥
बीस सहस घहराहिं निसाना । गलगंजहिं भेरी असमाना ॥
बैरख ढाल गगन गा छाई । चला कटक धरती न समाई ॥
सहस पाँति गज मत्त चलावा । धँसत अकास धरत भुईं आवा ॥
विरिछि उचारि पेड़ि सौं लेहीं । मस्तक झारि डारि मुख देहीं ॥
चढहिं पहार हिये भय लागू । बनखँड खोह न देखहिं आगू ॥
कोइ काहू न सँभारे, होत आव तस चाँप ।

धरति आपु कहँ काँपै, सरग आपु कहँ काँप ॥१७॥

चलीं कमनै जिन्ह मुख गोला । आवहिं चली धरति सब डोला ॥
लागे चक्र बज्र के गढे । चमकहिं रथ सोने सब मढ़े ॥
तिन्ह पर विषम कमनै धरिं । साँचे अष्टधातु के ढरिं ॥
सौ सौ मन वै पीयहिं दारू । लागहिं जहाँ सो टूट पहारू ॥
माती रहहिं रथन्ह पर परी । सत्रुन्ह महुँ ते होहिं उठि खरी ॥
जौ लागै संसार न डोलहिं । होइ भुइकंप जीभ जौ खोलहिं ॥
सहस सहस हस्तिन्ह के पाँती । खींचहि रथ डोलहिं नहिं माती ॥
नदी नार सब पाटहिं, जहाँ धरहि वै पाव ।

ऊँच खाल बन बीहड़, होत बराबर आव ॥१८॥

कहाँ सिंगार जैसि वै नारी । दारू पियहिं जैसि मतवारी ॥
उठै आगि जौ छाँडहि साँसा । धुआँ जौ लागै जाइ अकासा ॥
कुच गोला दुइ हिरदय लाए । चंचल धुजा रहहिं छिटकाए ॥
रसना लूक रहहिं मुख खोले । लंका जरै सो उनके बोले ॥
अलक जँजीर बहुत गिउ बाँधे । खींचहिं हस्ती, टूटहिं काँधे ॥
बीर सिंगार दोउ एक ठाऊँ । सत्रुसाल गढ़ भंजन नाऊँ ॥

तिलक पलीता माथे, दसन बज्र के बान ।

जेहि हेरहिं तेहि मारहिं, चुरकुस करहिं निदान ॥१९॥

जेहि जेहि पंथ चली वै आवहिं । तहँ तहँ जरै, आगि जनु लावहिं ॥
जरहिं जो परबत लागि अकासा । बनखँड धिकहिं परास के पासा ॥
गँड गयदँ जरे भए कारे । औ बन-मिरिग रोझ झवँकारे ॥
कोइल, नाग काग औ भँवरा । और जो जरे तिनहिं को सँवरा ॥
जरा समुद्र पानी भा खारा । जमुना साम भई तेहि घारा ॥
धुआँ जाम, अँतरिख भए मेघा । गगन साम भा धुँआ जो ठेघा ॥
सुरुज जरा चाँद औ राहू । धरती जरी, लंक भा दाहू ॥

धरती सरग एक भा, तबहु न आगि बुझाइ ।

उठे बज्र जरि हुंगवै, धूम रहा जग छाड ॥२०॥

आवै डोलत सरग पतारा । काँपै धरति न अँगवै भारा ॥
टूटहिं परबत मेरु पहारा । होइ चकचून उड़हिं तेहि झारा ॥
सत खँड धरती भइ षटखंडा । ऊपर अष्ट भए बरम्हंडा ॥

इंद्र आइ तिन्ह खंडन्ह छावा । चढ़ि सब कटक घोड़ दौरावा ॥
 जेहि पथ चल ऐरावत हाथी । अबहुँ सो डगर गगन महुँ आथी ॥
 औ जहँ जामि रही वह धूरी । अबहुँ बसै सो हरिचंद-पूरी ॥
 गगन छपान खेह तस छाई । सूरुज छपा, रैनि होइ आई ॥
 गएउ सिंकंदर कजरिबन, तस होइगा अँधियार ।

हाथ पसारे न सूझै, बरै लाग मसियार ॥२१॥

दिनहिं राति अस परी अचाका । भा रवि अस्त, चंद्र रथ हाँका ॥
 मंदिर जगत दीप परगसे । पंथी चलत बसेरै बसे ॥
 दिन के पंखि चरत उडि भागे । निसिके निसरि चरै सब लागे ॥
 कँवल सँकेता, कुमुदिनि फूली । चकवा बिछुरा, चकई भूली ॥
 चला कटक दल ऐस अपूरी । अगिलहि पानी, पछिलहि धूरी ॥
 महि उजरी सायर सब सूखा । वनखँड रहेउ न एकौ रूखा ॥
 गिरि पहार सब मिलि गे माटी । हस्ति हेराहिं तहाँ होइ चाँटी ॥
 जिन्ह घर खेह हेराने, हेरत फिरत सो खेह ।

अब तौ दिस्ट तब आवै, अंजन नैन उरेह ॥२२॥

एहि विधि होत पयान सो आवा । आइ साह चितउर नियरावा ॥
 राजा राव देख सब चढ़ा । आव कटक सब लोहे-मढ़ा ॥
 चहुँ दिसि दिस्टि परा गजजूहा । साम घटा मेघन्ह अस रूहा ॥
 अध ऊरध किछु सूझ न आना । सरगलोक घुम्मरहिं निशाना ॥
 चढ़ि धौराहर देखहि रानी । धनि तुइ अस जाकर सुलतानी ॥
 की धनि रतनसेन तुइँ राजा । जा कह तुरुक कटक अस साजा ॥
 बेरख ढाल केरि परछाहीं । रैनि होति आवै दिन माहीं ॥

अंधकूप भा आवै, उडत आव तस छार ।

ताल तलावा पोखर, धूरि भरी जेवनार ॥२३॥

राजै कहा करहु जो करना । भएउ असूझ, सूझ अब मरना ॥
 जहँ लगि राज साज सब होऊ । ततखन भएउ सजोउ सँजोऊँ ॥
 बाजे तबल अकूत जुझाऊ । चडै कोपि सब राजा राऊ ॥
 करहिं तुखार पवन सौं रीसा । कंध ऊँच, असवार न दीसा ॥
 का बरनों अस ऊँच तुखारा । दुइ पौरी पहुँचै असवारा ॥
 बाँधे मोरछाँह सिर सारहिं । भाँजहि पूछ चँवर जनु ढारहिं ॥
 सजे सनाहा, पहुँची टोपा । लोहसार पहिरे सब ओपा ॥

तैसे चँवर बनाए, औ घाले गलझंप ।

बाँधे सेत गजगाह तहँ, जो देखै सो कंप ॥२४॥

राज तुरंगम बरनों काहा ? आने छोरि इंद्ररथ बाहा ॥
 ऐस तुरंगम परहिं न दीठी । धनि असवार रहहिं तिन्ह पीठी ॥
 जाति बालका समुद थहाए । सेत पूँछ जनु चँवर बनाए ॥
 बरन बरन पाखर अति लोने । जानहु चित्र सँवारे सोने ॥
 मानिक जडे सीस औ काँधे । चँवर लाग चौरासी बाँधे ॥
 लागे रतन पदारथ हीरा । बाहन दीन्ह, दीन्ह तिन्ह बीरा ॥
 चढ़हिं कुँवर मन करहिं उछाहू । आगे घाल गनहिं नहिं काहू ॥

सेंदुर सीस चढाए , चंदन खेवरे देह ।

सो तन कहा लुकाइय, अंत होइ जो खेह ॥२५॥

गज मैमंत बिखरे रजबारा । दीसहिं जनहुँ मेघ अति कारा ॥
सेत गयंद पीत औ राते । हरे साम घूमहिं मद माते ॥
चमकहिं दरपन लोहे सारी । जनु परबत पर परी अंबारी ॥
सिरी मेलि पहिराई सूँडैं । देखत कटक पाँय तर रूदैं ॥
सोना मेलि कै दंत सँवारे । गिरिवर टरहिं सो उन्ह के टारे ॥
परबत उलटि भूमि महुँ मारहिं । परै जो भीर पत्र अस झारहिं ॥
अस गयंद साजै सिंघली । मोटी कुरुम-पीठि कलमली ॥

ऊपर कनक मंजुसा ,लाग चँवर और ढार ।

भलपति बैठे भाल लेइ ,औ बैठे धनुकार ॥ २६॥

असुदल गजदल दूनौ साजे । औ घन तबल जुझाऊ बाजे ॥
माथे मुकुट छत्र सिर साजा । चढा बजाइ इंद्र अस राजा ॥
आगे रथ सेना सब ठाढ़ी । पाछे धुजा मरन कै काढ़ी ॥
चढा बजाइ चढा जस इंद्र । देवलोक गोहने भए हिंदू ॥
वैसे ही राजा रत्नसेन के साथ हिन्दू लोग चले ॥
जानहु चाँद नखत लेइ चढा । सूर कै कटक रैन-मसि मढा ॥
जौ लगी सूर जाइ देखरावा । निकसि चाँद घर बाहर आवा ॥
गगन नखत जस गने न जाहीं । निकसि आए तस धरती माहीं ॥

देखि अनी राजा कै, जग होइ गएउ असूझ ।

दहुँ कस होवै चाहै, चाँद सूर के जूझ ॥२७॥

४३.राजा-बादशाह-युद्ध खंड

इहाँ राज अस सेन बनाई । उहाँ साह कै भई अवाई ॥
अगिले दौरे आगे आए । पछिले पाछ कोस दस छाए ॥
साह आइ चितउरगढ बाजा । हस्ती सहस बीस सँग साजा ॥
ओनइ आए दूनौ दल साजे । हिंदू तुरक दुवौ रन गाजे ॥
दुवौ समुद दधि उदधि अपारा । दूनौ मेरू खिखिंद पहारा ॥
कोपि जुझार दुवौ दिसि मेले । औ हस्ती हस्ती सहुँ पेले ॥
आँकुस चमकि बीजु अस बाजहिं । गरजहिं हस्ति मेघ जनु गाजहिं ॥

धरती सरग एक भा , जूहहि ऊपर जूह ।

कोई टरै न टारे, दूनौ बज्र समूह ॥१॥

हस्ती सहुँ हस्ती हठि गाजहिं । जनु परबत परबत सौं बाजहिं ॥
गरु गयंद न टारे टरहीं । टूटहिं दाँत, माथ गिरि परही ॥
परबत आइ जो परहिं तराहीं । दर महुँ चाँपि खेह मिलि जाहीं ॥
कोइ हस्ती असवारहि लेहीं । सूँड समेटि पायँ तर देहीं ॥
कोइ असवार सिंघ होइ मारहिं । हनि कै मस्तक सूँड उपारहिं ॥
गरब गयंदन्ह गगन पसीजा । रुहिर चूवै धरती सब भीजा ॥
कोइ मैमंत सँभारहिं नाहीं । तब जानहिं जब गुद सिर जाहीं ॥

गगन रुहिर जस बरसै, धरती बहै मिलाइ ।

सिर धर टूटि बिलाहिं तस, पानी पंक बिलाइ ॥२॥

आठों बज्र जुझ जस सुना । तेहि तें अधिक भएउ चौगुना ॥
 बाजहिं खड्ग उठै दर आगी । भुइँ जरि चहै सरग कहँ लागी ॥
 चमकहिं बीजु होइ उजियारा । जेहि सिर परै होइ दुइ फारा ॥
 मेघ जो हस्ति हस्ति सहँ गाजहिं । बीजु जो खड्ग खड्ग सौं बाजहिं ॥
 बरसहिं सेल बान होइ काँदो । जस बरसै सावन औ भादों ॥
 झपटहिं कोपि, परहिं तरवारी । औ गोला ओला जस भारी ॥
 जूझे वीर कहौं कहँ ताई । लेइ अछरी कैलास सिधार्ई ॥
 स्वामि-काज जो जूझे, सोइ गए मुख रात ।

जो भागे सत छाँडि कै, मसि मुख चढ़ी परात ॥३॥

भा संग्राम न भा अस काऊ । लोहे दुहँ दिसि भए अगाऊ ॥
 सीस कंध कटि कटि भुइँ परे । रुहिर सलिल होइ सायर भरे ॥
 अनँद बधाव करहिं मसखावा । अब भख जनम जनम कहँ पावा ॥
 चौंसठ जोगिनि खप्पर पूरा । बिग जंबुक घर बाजहिं तूरा ॥
 गिद्ध चील सब माँडो छावहिं । काग कलोल करहिं औ गावहिं ॥
 आजु साह हठि अनी बियाही । पाई भुगुति जैसि चित चाही ॥
 जेई जस माँसू भखा परावा । तस तेहि कर लेइ औरन्ह खावा ?

काहू साथ न तन गा, सकति मुए सब पोखि ।

ओछ पूर तेहि जानब, जो थिर आवत जोखि ॥४॥

चाँद न टरै सूर सौं कोपा । दूसर छत्र सौंह कै रोपा ॥
 सुना साह अस भएउ समूहा । पेले सब हस्तिन्ह के जूहा ॥
 आज चाँद तोर करौं निपातू । रहै न जग महँ दूसर छातू ॥
 सहस करा होइ किरिन पसारा । छेका चाँद जहाँ लगी तारा ॥
 दर लोहा दरपन भा आवा । घट घट जानहु भानु देखावा ॥
 अस क्रोधित कुठार लेइ धाए । अगिनि पहर जरत जनु आए ॥
 खड्ग बीजु सब तुरुक उठाए । ओइन चाँद काल कर पाए ॥

जगमग अनी देखि कै, धाइ दिस्टि तेहि लागि ।

छुए होइ जो लोहा, माँझ आव तेहि आगि ॥५॥

सूरुज देखि चाँद मन लाजा । बिगसा कँवल कुमुद भा राजा ॥
 भलेहि चाँद बड होइ दिसि पाई। दिन दिनअर सहँ कौन बडाई ॥
 अहे जो नखत चंद्र सँग तपे । सूर के दिस्टि गगन महँ छपे ॥
 कै चिंता राजा मन बूझा । जो होइ सरग न धरती जूझा ॥
 गढ़ पति उतरि लडै नहिं धाए । हाथ परै गढ़ हाथ पराए ॥
 गढ़ पति इंद्र गगन-गढ़ गाजा । दिवस न निसर रैनि कर राजा ॥
 चंद्र रैनि रह नखतन्ह माँझा । सूरुज के सौंह न होइ चहै साँझा ॥

देखा चंद्र भोर भा, सूरुज के बड भाग ।

चाँद फिरा भा गढ़पति, सूर गगन गढ़ लाग ॥६॥

कटक असूझ अलाउदि-साही । आवत कोइ न सँभारै ताही ॥
 उदधि-समुद जस लहरें देखी । नयन देख, मुख जाइ न लेखी ॥
 केते तजा चितउर कै घाटी । केते बजावत मिलि गए माटी ॥
 केतेन्ह नितहिं देइ नव साजा । कबहुँ न साज घटै तस राजा ॥
 लाख जाहिं आवहिं दुइ लाखा । फरै झरै उपनै नव साखा ॥
 जो आवै गढ़ लागै सोई । थिर होइ रहै न पावै कोई ॥

उमरा मीर रहे जहँ ताई । सबहीं बाँटि अलंगें पाई ॥
लाग कटक चारिहु दिसि, गढ़हि परा अगिदाहु ।

सुरुज गहन भा चाहै, चाँदहि जस राहु ॥७॥

अथवा दिवस, सूर भा बसा । परी रैनि, ससि उवा अकसा ॥
चाँद छत्र देइ बैठा आई । चहुँ दिसि नखत दीन्ह छिटकाई ॥
नखत अकासहि चढ़े दिपाहीं । टुटि टुटि लूक परहिं, न बुझाहीं ॥
परहिं सिला जस परै बजागी । पाहन पाहन सौं उठ आगी ॥
गोला परहिं, कोल्हु ढरकाहीं । चूर करत चारिउ दिसि जाहीं ॥
ओनई घटा बरस झरि लाई । ओला टपकहिं, परहिं विछाई ॥
तुरुक न मुख फेरहिं गढ़ लागे । एक मरै दूसर होइ आगे ॥

परहिं बान राजा के, सकै को सनमुख काढ़ि ।

ओनई सेन साह कै, रही भोर लागि ठाढ़ि ॥८॥

भएउ बिहानु , भानु पुनि चढ़ा । सहसहु करा दिवस बिधि गढ़ा ॥
भा धावा गढ़ कीन्ह गरेरा । कोपा कटक लाग चहुँ फेरा ॥
बान करोर एक मुख छूटहिं । बाजहिं जहाँ फोंक लागि फूटहिं ॥
नखत गगन जस देखहिं घने । तस गढ़ कोटन्ह बानन्ह हने ॥
बान बेधि साही कै राखा । गढ़ भा गरुड फुलावा पाँखा ॥
ओहि रँग केरि कठिन है बाता । तौ पै कहै होइ मुख राता ॥
पीठि न देहिं घाव के लागे । पैग पैग भुईँ चाँपहिं आगे ॥

चारि पहर दिन जूझ भा, गढ़ न टूट तस बाँक ।

गरुअ होत पै आवै, दिन दिन नाकहि नाक ॥९॥

छेंका कोट जोर अस कीन्हा । घुसि कै सरग सुरँग तिन्ह दीन्हा ॥
गरगज बाँधि कमानें धरीं । बज्र-आगि मुख दारु भरीं ॥
हबसी, रूमी और फिरंगी । बड़ बड़ गुनी और तिन्ह संगी ॥
जिन्हके गोट कोट पर जाहीं । जेहि ताकहिं चूकहिं तेहि नाहीं ॥
अस्ट धातु के गोला छूटहिं । गिरहिं पहार चून होइ फूटहिं ॥
एक बार सब छूटहिं गोला । गरजै गगन, धरति सब डोला ॥
फूटहिं कोट फूट जनु सीसा । ओदरहिं बुरुज जाहिं सब पीसा ॥

लंका रावट जस भई, दाह परी गढ़ सोइ ।

रावन लिखा जरै कहँ, कहहु अजर किमि होइ ॥१०॥

राजगीर लागै गढ़ थवई । फूटै जहाँ सँवारहिं सबई ॥
बाँके पर सुठि बाँक करेहीं । रातिहि कोट चित्र कै लेहीं ॥
गाजहिं गगन चढ़ा जस मेघा । बरिसहिं बज्र, सीस को ठेधा? ॥
सौ सौ मन के बरसहिं गोला । बरसहिं तुपक तीर जस ओला ॥
जानहुँ परहिं सरग हुत गाजा । फाटे धरति आइ जहँ राजा ॥
गरगज चूर चूर होइ परहीं । हस्ति घोर मानुष संघरहीं ॥
सबै कहा अब परलै आई । धरती सरग जूझ जनु लाई ॥

आठौ बज्र जुरे सब, एक डुँगवै लागि ।

जगत जरै चारिउ दिसि, कैसैहि बुझै न आगि ॥११॥

तबहुँ राजा हिये न हारा । राज-पौरि पर रचा अखारा ॥
सोह साह कै बैठक जहाँ । समुहें नाच करावै तहाँ ॥

जंत्र पखाउज औ जत बाजा । सुर मादर रबाब भल साजा ॥
 बीना वेनु कमाइच गहे । बाजे अमृत तहँ गहगहे ॥
 चंग उपंग नाद सुर तूरा । महुअर बंसि बाज भरपूरा ॥
 हुडुक बाज डफ बाज गँभीरा । औ बाजहिं बहु झाँझ मजीरा ॥
 तंत बितंत सुभर घनतारा । बाजहिं सबद होइ झनकारा ॥
 जग सिंगार मनमोहन, पातुर नाचहिं पाँच ।

बादसाह गढ छेंका, राजा भूला नाच ॥१२॥

बीजानगर केर सब गुनी । करहिं अलाप जैस नहिं सुनी ॥
 छवौ राग गाए सँग तारा । सगरी कटक सुने झनकारा ॥
 प्रथम राग भैरव तिन्ह कीन्हा । दूसर मालकोस पुनि लीन्हा ॥
 पुनि हिंडोल राग भल गाए । मेघ मलार मेघ बरिसाए ॥
 पाँचवँ सिरी राग भल किया । छठवाँ दीपक बरि उठ दिया ॥
 ऊपर भए सो पातुर नाचहिं । तर भए तुरुक कमानें खाँचहिं ॥
 गढ माथे होइ उमरा झुमरा । तर भए देख मीर औ उमरा ॥
 सुनि सुनि सीस धुनहिं सब, कर मलि मलि पछिताहिं ।

कब हम माथ चढहिं ओहि, नैनन्ह के दुख जाहिं ॥१३॥

छवौ राग गावहिं पातुरनी । औ पुनि छत्तीसौ रागिनी ॥
 औ कल्यान कान्हरा होई । राग बिहाग केदारा सोई ॥
 परभाती होइ उठै बेगाला । आसावरी राग गुनमाला ॥
 धनासिरी औ सूहा कीन्हा । भएउ बिलावल, मारू लीन्हा ॥
 रामकली, नट, गौरी गाई । धुनि खममाच सो राग सुनाई ॥
 साम गूजरी पुनि भल भाई । सारँग औ विभास मुँह आई ॥
 पुरबी, सिंधी, देस, बरारी । टोड़ी, गौड़ सौं भई निरारी ॥

सबै राग औ रागिनी, सुरै अलापहिं ऊँच ।

तहाँ तीर कहँ पहुँचे, दिस्टि जहाँ न पहुँच ॥१४॥

जहवाँ सौँह साह कै दीठी । पातुरि फिरत दीन्हि तहँ पीठी ॥
 देखत साह सिंघासन गूँजा । कब लागि मिरिग चाँद तोहि भूजा ॥
 छाँडहिं बान जाहिं उपराही । का तैं गरब करसि इतराही ॥
 बोलत बान लाख भए ऊँचे । कोइ कोट, कोइ पौरि पहुँचे ॥
 जहाँगीर कनउज कर राजा । ओहि क बान पातुरि के लागा ॥
 बाजा बान, जाँघ तस नाचा । जिउ गा सरग, परा भुईँ साँचा ॥
 उडसा नाच, नचनिया मारा । रहसे तुरुक बजाइ कै तारा ॥

जो गढ साजै लाख दस, कोटि उठावै कोटि ।

बादशाह जब चाहै छपै, न कौनिउ ओट ॥१५॥

राजै पौरि अकास चढाई । परा बाँध चहुँ फेर लगाई ॥
 सेतुबंध जस राघव बाँधा । परा फेर, भुईँ भार न काँधा ॥
 हनुवँत होइ सब लाग गोहारू । चहुँ दिसि ढोइ ढोइ कीन्ह पहारू ॥
 सेत फटिक अस लागै गढा । बाँध उठाइ चहुँ गढ मढा ॥
 खँड खँड ऊपर होइ पटाऊ । चुत्र अनेक, अनेक कटाऊ ॥
 सीढ़ी होति जाहिं बहु भाँती । जहाँ चढै हस्तिन कै पाँती ॥

भा गरगज कस कहत न आवा । जनहुँ उठाइ गगन लेइ आवा ॥
 राहु लाग जस चाँदहिं, तस गढ लाग बाँध ।
 सरब आगि अस बरि रहा, ठाँव जाइ को काँध ॥१६॥

राजसभा सब मतै बईठी । दखि न जाइ, मूँदि गइ दीठी ॥
 उठा बाँध, चहुँ दिसि गढ बाँधा । कीजै बेगि भार जस काँधा ॥
 उपजै आगि आगि जस बोई । अब मत कोई आन नहिं होई ॥
 भा तेवहार जौ चाँचरि जोरी । खेलि फाग अब लाइय होरी ॥
 समदि फाग मेलिय सिर धूरी । कीन्ह जो साका चाहिय पूरी ॥
 चंदन अगर मलयगिरि काढा । घर घर कीन्ह सरा रचि ठाढा ॥
 जौहर कहँ साजा रनिवासू । जिन्ह सत हिये कहाँ तिन्ह आँसू ॥
 पुरुषन्ह खड्ग सँभारे, चंदन खेवरे देह ।
 मेहरिन्ह सेंदुर मेला, चहहिं भई जरि खेह ॥१७॥

आठ बरिस गढ छेंका रहा । धनि सुलतान कि राजा महा ॥
 आइ साह अंबराव जो जाए । फरे झरे पै गढ नहिं जाए ॥
 जौ तोरौ तौ जौहर होई । पदमिनि हाथ चढ़े नहिं सोई ॥
 एहि बिधि ढील दीन्ह, तब ताई । दिल्ली तै अरदासै आई ॥
 पछिउँ हरेव दीन्ह, जो पीठी । सो अब चढ़ा सौँह कै दीठी ॥
 जिन्ह भुईँ माथ गगन तेइ लागे । थाने उठे, आव सब भागा ॥
 उहाँ साह चितउरगढ छावा । इहाँ देस अब होइ परावा ॥
 जिन्ह जिन्ह पंथ न तून परत, बाढे बेर बबूर ।
 निसि अँधियारी जाइ तब, बेगि उठै जौ सूर ॥१८॥

४४. राजा-बादशाह-मेल खंड

सुना साह अरदासैं पढ़ीं । चिंता आन आनि चित चढ़ी ॥
 तौ अगमन मन चीतै कोई । जौ आपन चीता किछु होई ॥
 मन झूठा, जिउ हाथ पराए । चिंता एक हिये दुइ ठाएँ ॥
 गढ सौँ अरुझि जाइ तब छूटै । होइ मेराव, कि सो गढ टूटै ॥
 पाहन कर रिपु पाहन हीरा । बेधौँ रतन पान देइ बीरा ॥
 सुरजा सेंति कहा यह भेऊ । पलटि जाहु अब मान हु सेऊ ॥
 कहु तोहि सौँ पदमिनि नहिं लेऊँ । चूरा कीन्ह छाँडि गढ देऊँ ॥
 आपन देस खाहु सब, औ चंदेरी लेहु ।
 समुद जो समदन कीन्ह तोहि ते पाँचौ नग देहु ॥१॥

सुरजा पलटि सिंघ चढ़ि गाजा । अज्ञा जाइ कही जहँ राजा ॥
 अबहुँ हिये समुझु रे राजा । बादसाह सौ जूझ न छाजा ॥
 जेहि कै देहरी पृथिवी सेई । चहै तौ मारै औ जिउ लेई ॥
 पिंजर माहँ ओहि कीन्ह परेवा । गढ पति सोइ बाँच कै सेवा ॥
 जौ लगी जीभ अहै मुख तोरे । सँवरि उघेलु बिनय कर जोरे ॥
 पुनि जौ जीभ पकरि जिउ लेई । को खोलै, को बोले देई ? ॥
 आगे जस हमीर मैमंता । जौ तस करसि तोरे भा अंता ॥

देखु काल्हि गड टूटै , राज ओहि कर होइ ।

करु सेवा सिर नाइ कै, घर न घालु बुधि खोइ ॥२॥

सरजा! जौ हमीर अस ताका । और निवाहि बाँधि गा साका ॥
हौं सक- बंधी ओहि अस नाही । हौं सो भोज विक्रम उपराहीं ॥
बरिस साठ लागि साँठि न काँगा । पानि पहार चुवै बिनु माँगा ॥
तेहि ऊपर जौ पै गढ टूटा । सत सकबंधी केर न छूटा ॥
सोरह लाख कुँवर हैं मोरे । परहिं पतँग जस दीप अँजोरे ॥
जेहि दिन चाँचरि चाहौं जोरी । समदौं फागु लाइ कै होरी ॥
जौ निसि बीच, डरै नहिं कोई । देखु तौ काल्हि काह दहुँ होई ॥

अबहिं जौहर साजि कै, कीन्ह चहाँ उजियार ।

होरी खेलौं रन कठिन, कोइ समेटै छार ॥३॥

अनु राजा सो जरै निआना । बादसाह कै सेव न माना ॥
बहुतन्ह अस गढ कीन्ह सजवना । अंत भई लंका जस रवना ॥
जेहि दिन वह छेकै गढ घाटी । होइ अन्न ओही दिन माटी ॥
तू जानसि जल चुवै पहारू । सो रोवै मन सँवरि सँघारू ॥
सूतहि सूत सँवरि गढ रोवा । कस होइहि जौ होइहि ढोवा ॥
सँवरि पहार सो ढारै आँसू । पै तोहि सूझ न आपन नासू ॥
आजु काल्हि चाहै गढ टूटा । अबहुँ मानु जौ चाहसि छूटा ॥

हैं जो पाँच नग तो पहुँ, लेइ पाँचो कहँ भेंट ।

मकु सो एक गुन मानै, सब ऐगुन धरि मेट ॥४॥

वह तुम्हारे इस एक ही गुण से सब अवगुणों को भूल जाय ॥
अनु सरजा को मेटै पारा । बादसाह बड अहै तुम्हारा ॥
ऐगुन मेटि सकै पुनि सोई । औ जो कीन्ह चहै सो होई ॥
नग पाँचौ देइ देउँ भँडारा । इसकंदर सौं बाँचै दारा ॥
जौ यह बचन त माथे मोरे । सेवा करौं ठाढ कर जोरे ॥
पै बिनु सपथ न अस मन माना । सपथ बोल बाचा परवानाँ ॥
खंभ जो गरुअ लीन्ह जग भारू । तेहि क बोल नहिं टरै पहारू ॥
नाव जो माँझ भार हुँत गीवा । सरजै कहा मंद वह जीवा ॥

सरजै सपथ कीन्ह छल, बैनहि मीठे मीठ ।

राजा कर मन माना , माना तुरत बसीठ ॥५॥

हंस कनक पींजर हुँत आना । औ अमृत नग परस पखाना ॥
औ सोनहार सोन के डाँडी । सारदूल रूपे के काँडी ॥
सो बसीठ सरजा लेइ आवा । बादसाह कहँ आनि मेरावा ॥
ए जगसूर भूमि उजियारे । बिनती करहिं काग मसि कारे ॥
बड परताप तोर जग तपा । नवौ खंड तोहि को नहिं छपा ॥
कोह छोह दूनौ तोहि पाहाँ । मारसि धूप, जियावसि छाहाँ ॥
जो मन सूर चाँद सौं रूसा । गहन गरासा, परा मँजूसा ॥

भोर होइ जौ लागै, उठहिं रोर कै काग ।

मसि छूटै सब रैनि कै, कागहि केर अभाग ॥६॥

करि बिनती अज्ञा अस पाई । 'कागहु कै मसि आपुहि लाई ॥
पहिलेहि धनुष नवै जब लागै । काग न टिकै, देखि सर भागै ॥

अबहूँ ते सर सौहें होहीं । देखैं धनुक चलहिं फिरि त्योहीं ॥
 तिन्ह कागन्ह कै कौन बसीठी । जो मुख फेरि चलहिं देइ पीठी ॥
 जो सर सौह होहिं संग्रामा । कित बग होहिं सेत वै सामा ? ॥
 करै न आपन ऊजर केसा । फिरि फिरि कहै परार सँदेसा ॥
 काग नाग ए दूनौ बाँके । अपने चलत साम वै आँके ॥
 कैसेहु जाइ न मेटा, भएउ साम तिन्ह अंग ।

सहस बार जौ धोवा, तबहूँ न गा वह रंग ॥७॥

अब सेवा जो आइ जोहारे । अबहूँ देखु सेत की कारे ॥
 कहैं जाइ जौ साँच, न डरना । जहवाँ सरन नाहिं तहँ मरना ॥
 काल्हि आव गढ ऊपर भानू । जो रे धनुक, सौह होइ बानू ॥
 पान बसीठ मया करि पावा । लीन्ह पान, राजा पहुँ आवा ॥
 जस हम भेंट कीन्ह गा कोहू । सेवा माँझ प्रीति औ छोहू ॥
 काल्हि साह गढ देखै आव । सेवा करहु जेस मन भावा ॥
 गुन सौं चलै जो बोहित बोझा । जहँवाँ धनुक बान तहँ सोझा ॥
 भा आयसु अस राजघर, बेगि दै करहु रसोइ ।

ऐस सुरस रस मेरवहु, जेहि सौं प्रीति-रस होइ ॥८॥

४५. बादशाह भोज खंड

छागर मेढ्रा बड़ औ छोटे । धरि धरि आने जहँ लगि मोटे ॥
 हरिन, रोझ, लगना बन बसे । चीतर गोइन, झाँख औ ससै ॥
 तीतर, बटई, लवा न बाँचे । सारस, कूज, पुछार जो नाचे ॥
 धरे परेवा पंडुक हेरी । खेहा, गुडरू और बगेरी ॥
 हारिल चरग चाह बँदि परे । बन कुक्कुट, जल कुक्कुट धरे ॥
 चकई चकवा और पिदारे । नकटा, लेदी, सोन सलारे ॥
 मोट बड़े सो टोइ टोइ धरे । ऊबर दूबर खुरुक न चरे ॥
 कंठ परी जब छूरी, रक्त दुरा होइ आँसु ।

कित आपन तन पोखा, भखा परावा माँसु ॥१॥

धरे माछ पढिना औ रोहू । धीमर मारत करै न छोहू ॥
 सिधरी, सौरि, धरी जल गाढे । टेंगर टोइ टोइ सब काढे ॥
 सींगी भाकुर बिनि सब धरी । पथरी बहुत बाँब बनगरी ॥
 मारे चरख औ चाल्ह पियासी । जल तजि कहाँ जाहिं जलबासी ? ॥
 मन होइ मीन चरा सुख चारा । परा जाल को दुख निरुवारा ? ॥
 माँटी खाय मच्छ नहिं बाँचे । बाँचहि काह भोग सुख राँचे ? ॥
 मारै कहँ सब अस कै पाले । को उबार तेहि सरवर घाले ? ॥
 एहि दुख काँटहि सारि कै, रक्त न राखा देह ।

पंथ भुलाइ आइ जल बाझे, झूठे जगत सनेह ॥२॥

देखत गोहूँ कर हिय फाटा । आने तहाँ होव जहँ आटा ॥
 तब पीसे जब पहिले धोए । कपरछानि माँडे, भल पोए ॥
 चढी कराही, पाकहिं पूरी । मुख महुँ परत होहि सो चूरी ॥
 जानहुँ तपत सेत औ उजरी । नैनू चाहि अधिक वै कोंवरी ॥

मुख मेलत खन जाहिं बिलाई । सहस सवाद सो पाव जो खाई ॥
 लुचुई पोइ पोइ घिउ मेई । पाछे छानि खाँड रस मेई ॥
 पूरि सोहारी कर घिउ चूआ । छुअत बिलाइ, डरन्ह को छूआ ? ॥

कही न जाहिं मिठाई , कहत मीठ सुठि बात ।

खात अघात न कोई , हियरा जात सेरात ॥३॥

चढे जो चाउर बरनि न जाहीं । बरन बरन सब सुगँध बसाहीं ॥
 रायभोग औ काजर-रानी । झिनवा, रुदवा, दाउदखानी ॥
 बासमती, कजरी, रतनारी । मधुकर, डेला, झीनासारी ॥
 घिउकाँदौ औ कुँवरबिलासू । रामबास आवै अति बासू ॥
 लौंगचूर लाची अति बाँके । सोनखरीका कपुरा पाके ॥
 कोरहन, बड़हन, जड़हन मिला । औ संसारतिलक खँडविला ॥
 धनिया देवल और अजाना । कहँ लागि बरनों जावत धाना ॥
 सोंधे सहस बरन अस, सुगंध बासना झूटि ।

मधुकर पुहुप जो बन रहे ,आइ परे सब टूटि ॥४॥

निरमल माँसु अनूप बघारा । तेहि के अव बरनों परकारा ॥
 कटुवा, बटुवा मिला सुबासू । सीझा अनवन भाँति गरासू ॥
 बहुते सोंधे घिउ महँ तरे । कस्तूरी केसर सौं भरे ॥
 सेंधा लोन परा सब हाँडी । काटी कंदमूर कै आँडी ॥
 सोआ सौंफ उतारे घना । तिन्ह तें अधिक आव बासना ॥
 पानि उतारहिं ताकहिं ताका । घीउ परेह माहिं सब पाका ॥
 औ लीन्हें माँसुन्ह के खंडा । लागे चुरै सो बड़ बड़ हंडा ॥

छागर बहुत समूची, धरी सरागन्ह भूँजि ।

जो अस जेवन जेवै, उठै सींध अस गूँजि ॥५॥

भूँजि समोसा घिउ महँ काढे । लौंग मरिच जिन्ह भीतर ठाढे ॥
 और माँसु जो अनवन बाँटा । भए फर फूल, आम औ भाँटा ॥
 नारंग, दारिउँ, तुरँज जभीरा । औ हिंदवाना, बालम खीरा ॥
 कटहर बड़हर तेउ सँवारे । नरियर, दाख, खजूर छोहारे ॥
 औ जावत जो खजहजा होहीं । जो जेहि बरन सवाद सो ओहीं ॥
 सिरका भेइ काढि जनु आने । कवँल जो कीन्ह रहे बिगसाने ॥
 कीन्ह मसेवरा, सीझि रसोई । जो किछु सबै माँसु सौं होई ॥

बारी आइ पुकारेसि, लीन्ह सबै करि छूँछ ।

सब रस लीन्ह रसोई , को अव मोकहँ पूछ ॥६॥

काटे माछ मेलि दधि धोए । औ पखारि बहु बार निचोए ॥
 करुए तेल कीन्ह बसवारू । मेथी कर तब दीन्ह बघारू ॥
 जुगुति जुगुति सब माँछ बघारे । आम चीरि तिन्ह माँझ उतारे ॥
 औ परेह तिन्ह चुटपुट राखा । सो रस सुरस पाव जो चाखा ॥
 भाँति भाँति सब खाँडर तरे । अंडा तरि तरि बेहर धरे ॥
 घीउ टाँक महँ सोंध सेरावा । लौंग मरिच तेहि ऊपर नावा ॥
 कुहुँकुहुँ परा कपूर बसावा । नख तें बघारि कीन्ह अरदावा ॥

घिरित परेह रहा तस, हाथ पहुँच लागि बूड ।

बिरिध खाइ नवजोबन, सौ तिरिया सौं ऊड ॥७॥

भाँति भाँति सीझीं तरकारी । कइउ भाँति कोहँडन के फारी ॥
 बने आनि लौआ परबती । रयता कीन्ह काटि रती रती ॥
 चूक लाइ के रींधे भाँटा । अरुई कहँ भल अरहन बाटा ॥
 तोरई, चिचिडा, डेंडसी तरी । जीर धुँगार झार सब भरी ॥
 परवर कुँदरू भूँजे ठाढे । बहुत घिउ महँ चुरमुर काढे ॥
 करुई काढि करैला काटे । आदी मेलि तरे के खाटे ॥
 रींधे ठढ सेब के फारा । छौँकि साग पुनि सोंध उतारा ॥

सीझीं सब तरकारी, भा जेंवन सब ऊँच ।

दहँ का रुचै साह कहँ, केहि पर दिस्टि पहुँच ॥८॥

घिउ कराह भरि, बेगर धरा । भाँति भाँति के पाकहिं बरा ॥
 एक त आदी मरिच सौं पीठा । दूसर दूध खँड सौ मीठा ॥
 भई मुगौछी मरिचें परी । कीन्ह मुगौरा औ बहु बरी ॥
 भई मेथौरी, सिरका परा । सोंठि नाइ के जरसा धरा ॥
 माठा महि महियाउर नावा । भीज बरा नैनु जनु खावा ॥
 खंडे कीन्ह आमचुर परा । लौंग लायची सौं खँडवरा ॥
 कढी सँवारी और फुलौरी । औ खँडवानी लाइ बरौरी ॥

रिक्वँच कीन्हि नाइ के, हींग मरिच औ आद ।

एक खंड जौ खाइ तौ, पावै सहस सवाद ॥९॥

तहरी पाकि, लौंग औ गरी । परी चिरौंजी औ खरहरी ॥
 घिउ महँ भाँजि पकाए पेठा । औ अमृत गुरंब भरे मेठा ॥
 चुंबक लोहँडा औटा खोवा । भा हलुवा घिउ गरत निचोवा ॥
 सिखरन सोंध छनाई गाढी । जामी दूध दही के साढी ॥
 दूध दही के मुरंडा बाँधे । और सँधाने अनबन साधे ॥
 भइ जो मिठाई कही न जाई । मुख मेलत खन जाइ बिलाई ॥
 मोतीचूर, छाल औ ठोरी । माठ पिराकें और बुँदौरी ॥

फेरी पापर भूँजे, भा अनेक परकार ।

भइ जाउरि पछियाउरि, सीझी सब जेवनार ॥१०॥

जत परकार रसोइ बखानी । तत सब भई पानि सौं सानी ॥
 पानी मूल परिख जौ कोई । पानी बिना सवाद न होई ॥
 अमृत-पान सह अमृत आना । पानी सौं घट रहै पराना ॥
 पानी दूध औ पानी घीऊ । पानि घटै, घट रहै न जीऊ ॥
 पानी माँझ समानी जोती । पानिहि उपजै मानिक मोती ॥
 पानिहि सौं सब निरमल कला । पानी छुए होइ निरमला ॥
 सो पानी मन गरब न करई । सीस नाइ खाले पग धरई ॥

मुहमद नीर गँभीर जो, भरे सो मिले समुंद ।

भरै ते भारी होइ रहे, छूँछे बाजहिं दुंद ॥११॥

४६.चित्तौरगढ़-वर्णन खंड

जेवाँ साह जो भएउ बिहाना । गढ़ देखै गवना सुलताना ॥
 कवँल सहाय सूर सँग लीन्हा । राघवचेतन आगे कीन्हा ॥

ततखन आइ बिवाँन पहुँचा । मन तें अधिक, गगन तें ऊँचा ॥
 उघरी पवँरि, चला सुलतानू । जानहु चला गगन कहँ भानू ॥
 पवँरी सात, सात खँड बाँके । सातौ खंड गाढ दुइ नाके ॥
 आजु पवँरि मुख भा निरमरा । जौ सुलतान आइ पग धरा ॥
 जनहुँ उरेह काटि सब काढी । चित्र क मूरति बिनवहिं ठाढी ॥

लाखन बैठ पवँरिया, जिन्ह तें नवहिं करोरि ।

तिन्ह सब पवँरि उघारे, ठाढ भए कर जोरि ॥१॥

सातौ पँवरी कनक-केवरा । सातो पर बाजहिं गरियारा ॥
 सात रंग तिन्ह सातों पँवरी । तब तिन्ह चढै फिरै नव भँवरी ॥
 खँड खँड साज पलंग औ पीढी । जानहुँ इंद्रलोक कै सीढी ॥
 चंदन बिरिछ सोह तहँ छाहाँ । अमृत कुंड भरे तेहि माहाँ ॥
 फरे खजहजा दारिउँ दाखा । जोज ओहि पंथ जाइ सो चाखा ॥
 कनक छत्र सिंघासन साजा । पैठत पँवरि मिला लेइ राजा ॥
 बादशाह चढि चितउर देखा । सब संसार पाँव तर लेखा ॥

देखा साह गगन गढ, इंद्रलोक कर साज ।

कहिय राज फुर ताकर, सरग करै अस राज ॥२॥

चढि गढ ऊपर संगत देखी । इंद्रसभा सो जानि बिसेखी ॥
 ताल तलावा सरवर भरे । औ अँबराव चहुँ दिसि फरे ॥
 कुआँ बावरी भाँतिहि भाँती । मठ मंडप साजे चहुँ पाँती ॥
 राय रंक घर घर सुख चाऊ । कनक मँदिर नग कीन्ह जडाऊ ॥
 निसि दिन बाजहिं मादर तूरा । रहस कूद सब भरे सेंदूरा ॥
 रतन पदारथ नग जो बखाने । घूरन्ह माँह देख छहराने ॥
 मँदिर मँदिर फुलवारी बारी । बार बार बहु चित्र सेंवारी ॥

पाँसासारि कुँवर सब खेलहिं, गीतन्ह स्रवन ओनाहिं ।

चैन चाव तस देखा, जनु गढ छेंका नाहिं ॥३॥

देखत साह कीन्ह तहँ फेरा । जहँ मँदिर पदमावति केरा ॥
 आस पास सरवर चहुँ पासा । माँझ मँदिर नु लाग अकासा ॥
 कनक सँवारि नगन्ह सब जरा । गगन चंद जनु नखतन्ह भरा ॥
 सरवर चहुँ दिसि पुरइन फूली । देखत बारि रहा मन भूली ॥
 कुँवरि सहसदस बार अगोरे । दुहुँ दिसि पँवरि ठाढि कर जोरे ॥
 सारदूल दुहुँ दिसि गढि काढे । गलगाजहिं जानहुँ ते ठाढे ॥
 जावत कहिए चित्र कटाऊ । तावत पवँरिन्ह बने जडाऊ ॥

साह मँदिर अस देखा, जनु कैलास अनूप ।

जाकर अस धौराहर, सो रानी केहि रूप ॥४॥

नाँघत पँवर गए खँड साता । सतएँ भूमि बिछावन राता ॥
 आँगन साह ठाढ भा आई । मँदिर छाँह अति सीतल पाई ॥
 चहुँ पास फुलवारी बारी । माँझ सिंहासन धरा सँवारी ॥
 जनु बसंत फूला सब सोने । फल औ फूल बिगसि अति लोने ॥
 जहाँ जो ठाँव दिस्टि महँ आवा । दरपन भाव दरस देखरावा ॥
 तहाँ पाट राखा सुलतानी । बैठ साह, मन जहाँ सो रानी ॥

कवल सुभाय सूर सौं हँसा । सूर क मन चाँदहि पहुँ बसा ॥
सो पै जानै नयन रस, हिरदय प्रेम अँकूर ।

चंद जो बसै चकोर चित, नयनहि आव न सूर ॥५॥

रानी धौराहर उपराहीं । करै दिस्टि नहिं तहाँ तराहीं ॥
सखी सरेखी साथ बईठी । तपै सूर, ससि आव न दीठी ॥
राजा सेव करै कर जोरे । आजु साह घर आवा मोरे ॥
नट नाटक, पातुरि औ बाजा । आइ अखाड माँह सब साजा ॥
पेम क लुबुध बहिर औ अंधा । नाच कूद जानहुँ सब धंधा ॥
जानहुँ काठ नचावै कोइ । जो नाचत सो प्रगट न होई ॥
परगट कह राजा सौं बाता । गुपुत प्रेम पदमावति राता ॥

गीत नाद अस धंधा, दहक बिरह कै आँच ।

मन कै डोरि लाग तहँ, जहँ सो गहि गुन खाँच ॥६॥

गोरा बादल राजा पाहाँ । रावत दुवौ दुवौ जनु बाहाँ ॥
आइ स्रवन राजा के लागे । मूसि न जाहि पुरुष जो जागे ॥
बाचा परखि तुरुक हम बूझा । परगट मेर गुपुत छल सूझा ॥
तुम नहिं करौ तुरुक सौं मेरू । छल पै करहिं अंत कै फेरू ॥
बैरी कठिन कुटिल जस काँटा । सो मकोय रह राखै आँटा ॥
सत्रु कोट जो आइ अगोटी । मीठी खाँड जेंवाएहु रोटी ॥
हम तेहि ओछ क पावा घातू । मूल गए सँग न रहै पातू ॥

यह सो कृसन बलिराज जस, कीन्ह चहै छर बाँध ।

हम्ह बिचार अस आवै, मेर न दीजिय काँध ॥७॥

सुनि राजहिं यह बात न भाई । जहाँ मेर तहँ नहिं अधमाई ॥
मंदहि भल जो करै सोई । अंतहि भला भले कर होई ॥
सत्र जो विष देइ चाहै मारा । दीजिय लोन जानि विषहारा ॥
विष दीन्हें बिसहर होइ खाई । लोन दिए होइ लोन बिलाई ॥
मारे खड्ग खड्ग कर लेइ । मारे लोन नाइ सिर देई ॥
कौरव विष जो पँडवन्ह दीन्हा । अंतहि दाँव पँडवन्ह लीन्हा ॥
जो छल करै ओहि छल बाजा । जैसे सिंघ मँजूसा साजा ॥

राजै लोन सुनावा, लाग दुहन जस लोन ।

आए कोहाइ मँदिर कहँ, सिंघ छान अब गोन ॥८॥

राजा कै सोरह सै दासी । तिन्ह महँ चुनि काढी चौरासी ॥
बरन बरन सारी पहिराई । निकसि मँदिर तें सेवा आई ॥
जनु निसरी सब वीरबहूटी । रायमुनी पींजर हुँत छूटी ॥
सबै परथमै जोबन सोहैं । नयन बान औ सारँग भौहैं ॥
मारहिं धनुक फेरि सर ओही । पनिघट घाट धनुक जिति मोही ॥
काम कटाछ हनहिं चित हरनी । एक एक तें आगरि बरनी ॥
जानहुँ इंद्रलोक तें काढी । पाँतिहि पाँति भई सब ठाढी ॥

साह पूछ राघव पहुँ, ए सब अछरी आहिं ।

तुइ जो पदमिनि बरनी, कहु सो कौन इन माहि ॥९॥

दीरघ आउ, भूमिपति भारी । इन महँ नाहिं पदमिनी नारी ॥
यह फुलवारि सो ओहि के दासी । कहँ केतकी भवर जहँ बासी ॥

वह तौ पदारथ, यह सब मोती । कहँ ओह दीप पतँग जेहि जोती ॥
 ए सब तरई सेव कराहीं । कहँ वह ससि देखत छपि जाहीं ॥
 जौ लगि सूर क दिस्टि अकासू । तौ लगि ससि न करै परगासू ॥
 सुनि कै साह दिस्ट तर नावा । हम पाहुन, यह मँदिर परावा ॥
 पाहुन ऊपर हेरै नाहीं । हना राहु अर्जुन परछाहीं ॥
 तपै बीज जस धरती, सूख बिरह के घाम ।

कब सुदिस्टि सो बरिसै, तन तरिवर होइ जाम ॥१०॥

सेव करै दासी चहुँ पासा । अछरी मनहुँ इंद्र कबिलासा ॥
 कोउ परात कोउ लोटा लाई । साह सभा सब हाथ धोवाई ॥
 कोई आगे पनवार बिछावहिं । कोई जेवन लेइ लेइ आवहिं ॥
 माँडे कोइ जाहि धरि जूरी । कोई भात परोसहि पूरी ॥
 कोई लेइ लेइ आवहिं थारा । कोइ परसहि छप्पन परकारा ॥
 पहिरि जो चीर परोसै आवहिं । दूसरसि और बरन देखरावहिं ॥
 बरन बरन पहिरे हर फेरा । आव झुंड जस अछरिन्ह केरा ॥
 पुनि सँधान बहु आनहिं, परसहिं बूकहि बूक ।

करहिं सँवार गोसाई, जहाँ परै किछु चूक ॥११॥

जानहु नखत करहिं सब सेवा । बिनु ससि सूरहिं भाव न जेवा ॥
 बहु परकार फिरहिं हर फेरे । हेरा बहुत न पावा हेरे ॥
 परीं असूझ सबै तरकारी । लोनी बिना लोन सब खारी ॥
 मच्छ छुवै आवहिं गडि काटा । जहाँ कवँल तहँ हाथ न औंटा ॥
 मन लागेउ तेहि कवँल के दंडी । भावै नाहिं एक कनउंडी ॥
 सो जेवन नहिं जाकर भूखा । तेहि बिन लाग जनहुँ सब सूखा ॥
 अनभावत चाखै वेरागा । पंचामृत जानहुँ विष लागा ॥
 बैठि सिंघासन गूजै, सिंघ चरै नहिं घास ।

जौ लगि मिरिग न पावै, भोजन करै उपास ॥१२॥

पानि लिए दासी चहुँ ओरा । अमृत मानहुँ भरे कचोरा ॥
 पानी देहिं कपूर कै बासा । सो नहिं पियै दरसकर प्यासा ॥
 दरसन पानि देइ तौ जीओं । बिनु रसना नयनहिं सों पीओं ॥
 पपिहा बूँद सेवातिनि अघा । कौन काज जौ बरिसै मघा? ॥
 पुहि लोटा कोपर लेइ आई । कै निरास अब हाथ धोवाई ॥
 हाथ जो धोवै बिरह करोरा । सँवरि सँवरि मन हाथ मरोरा ॥
 विधि मिलाव जासौं मन लागा । जोरहि तूरि प्रेम कर तागा ॥
 हाथ धोइ जब बैठा, लीन्ह ऊबि कै साँस ।

सँवरा सोइ गोसाई, देई निरासहि आस ॥१३॥

भइ जेवनार फिरा खँडवानी । फिरा अरगजा कुहकुह पानी ॥
 नग अमोल जो थारहि भरे । राजै सेव आनिके धरै ॥
 बिनती कीन्ह घालि गिउ पागा । ए जगसूर! सीउ मोहिं लागा ॥
 ऐगुन भरा काँप यह जीऊ । जहाँ भानु तहँ रहै न सीऊ ॥
 चारिउ खंड भानु अस तपा । जेहि के दिस्टि रैनि मसि छपा ॥
 औ भानुहि अस निरमल कला । दरस जौ पावै सो निरमला ॥
 कवल भानु देखे पै हँसा । औ भा तेहु चाहि परगसा ॥

रतन साम हौं रैनि मसि, ए रबि तिमिर सँघार ।

करु सो कृपा दिस्टि अब, दिवस देहि उजियार ॥१४॥

सुनि बिनती बिहँसा सुलतानू । सहसौ करा दिपा जस भानू ॥
ए राजा! तुइ साँच जुडावा । भइ सुदिस्टि अब, सीउ छुडावा ॥
भानु क सेवा जो कर जीऊ । तेहि मसि कहाँ, कहाँ तेहि सीऊ ॥
खाहु देस आपन करि सेवा । और देउँ माँडौ तोहि देवा ! ॥
लीक पखान पुरुष कर बोला । धुव सुमेरु ऊपर नहिँ डोला ॥
फेरि पसाउ दीन्ह नग सूरू । लाभ देखाइ लीन्ह चह मूरू ॥
हँसि हँसि बोलै, टैके काँधा । प्रीति भुलाइ चहै छल बाँधा ॥

माया बोल बहुत कै, साह पान हँसि दीन्ह ।

पहिले रतन हाथ कै, चहै पदारथ लीन्ह ॥१५॥

माया मोह बिबस भा राजा । साह खेल सतरँज कर साजा ॥
राजा ! है जौ लागि सिर घामू । हम तुम घरिक करहिँ बिसरामू ॥
दरपन साह भीति तहँ लावा । देखौं जबहि झरोखे आवा ॥
खेलहिँ दुऔ साह औ राजा । साह क रुख दरपन रह साजा ॥
प्रेम क लुबुध पियादे पाऊँ । ताकै साँह चलै कर ठाऊँ ॥
घोडा देइ फरजीबंद लावा । जेहि मोहरा रुख चहै सो पावा ॥
राजा पील देइ शह माँगा । शह देइ चाह मरै रथ खाँगा ॥
पीलहि पील देखावा, भए दुऔ चौदात ।

राजा चहै बुर्द भा, शाह चहै शह मात ॥१६॥

सूर देख जौ तरई दासी । जहँ ससि तहाँ जाइ परगासी ॥
सुना जो हम दिल्ली सुलतानू । देखा आजु तपै जस भानू ॥
ऊँच छत्र जाकर जग माहाँ । जग जो चाँह सब ओहि कै छाहाँ ॥
बैठि सिंघासन गरबहि गूजा । एक छत्र चारिउ खँड भूजा ॥
निरखि न जाइ साँह ओहि पाहीं । सबै नवहिँ करि दिस्टि तराहीं ॥
मनि माथे, ओहि रूप न दूजा । सब रुपवंत करहिँ ओहि पूजा ॥
हम अस कसा कसौटी आरस । तहँ देखु कस कंचन, पारस ॥

बादसाह दिल्ली कर, कित चितउर महँ आव ।

देखि लेहु पदमावति ! जेहि न रहै पछिताव ॥१७॥

बिगसै कुमुद कसे ससि ठाऊ । बिगसै कँवल सुने रबि-नाऊँ ॥
भइ निसि ससि धौराहर चढी । सोरह कला जैस बिधि गढी ॥
बिहँसि झरोखे आइ सरेखी । निरखि साह दरपन महँ देखी ॥
होतहि दरस परस भा लोना । धरती सरग भएउ सब सोना ॥
रुख माँगत रुख ता सहँ भएऊ । भा शह मात, खेल मिटि गएऊ ॥
राजा भेद न जानै झाँपा । भा बिसँभार, पवन बिनु काँपा ॥
राघव कहा कि लागि सोपारी । लेइ पौढावहिँ सेज सँवारी ॥

रैनि बीति गइ, भोर भा, उठा सूर तब जागि ।

जो देखै ससि नाहीं, रही करा चित लागि ॥१८॥

भोजन प्रेम सो जान जो जेंवा । भँवरहि रुचै वास-रस-केवा ॥
दरस देखाइ जाइ ससि छपी । उठा भानु जस जोगी तपी ॥
राघव चेति साह पहुँ गयउ । सूरज देखि कवँल बिसमयऊ ॥

छत्रपती मन कीन्ह सो पहुँचा । छत्र तुम्हार जगत पर ऊँचा ॥
 पाट तुम्हार देवतन्ह पीठी । सरग पतार रहै दिन दीठी ॥
 छोह ते पलुहहिं उकठे रूखा । कोह तें महि सायर सब सूखा ॥
 सकल जगत तुम्ह नावै माथा । सब कर जियन तुम्हारे हाथा ॥
 दिनहि नयन लाएहु तुम, रैन भएहु नहिं जाग ।

कस निचिंत अस सोएहु, काह बिलैब अस लाग ॥१९॥

देखि एक कौतुक हौं रहा । रहा अंतरपट, पै नहिं अहा ॥
 सरवर देख एक मैं सोई । रहा पानि, पै पान न होई ॥
 सरग आइ धरती महँ छावा । रहा धरति, पै धरत न आवा ॥
 तिन्ह महँ पुनि एक मंदिर ऊँचा । करन्ह अहा, पर कर न पहुँचा ॥
 तेहि मंडप मूरति मैं देखी । बिनु तन, बिनु जिउ जाइ बिसेखी ॥
 पूरन चंद होइ जनु तपी । पारस रूप दरस देइ छपी ॥
 अब जहँ चतुरदसी जिउ तहाँ । भानु अमावस पावा कहाँ ॥

बिगसा कँवल सरग निसि, जनहुँ लौकि गइ बीजु ।

ओहि राहु भा भानुहि, राघव मनहिं पतीजु ॥२०॥

अति विचित्र देखा सो ठाढ़ी । चित कै चित्र, लीन्ह जिउ काढ़ी ॥
 सिंघ लंक, कुंभस्थल जोरु । आँकुस नाग, महाउत मोरु ॥
 तेहि ऊपर भा कँवल बिगासू । फिरि अलि लीन्ह पुहुप मधु बासू ॥
 दुइ खंजन बिच बैठाउ सूआ । दुइज क चाँद धनुक लेइ ऊआ ॥
 मिरिग देखाई गवन फिरि किया । ससि भा नाग, सूर भा दिया ॥
 सुठि ऊँचे देखत वह उचका । दिस्टि पहुँचि, कर पहुँचि न सका ॥
 पहुँच बिहून दिस्ट कित भई ? गहि न सका, देखत वह गई ॥

राघव हेरत जिउ गएउ, कित आछत जो असाध ।

यह तन राख पाँख कै सकै न, केहि अपराध ॥२१॥

राघव सुनत सीस भुइ धरा । जुग जुग राज भानु कै करा ॥
 उहै कला, वह रूप बिसरखी । निसचै तुम्ह पदमावति देखी ॥
 केहरि लंक कुंभस्थल हिया । गीउ मयूर, अलक वेधिया ॥
 कँवल बदन औ बास सरीरु । खंजन नयन, नासिका कीरु ॥
 भौंह धनुक, ससि दुइज लिलाटू । सब रानिन्ह ऊपर ओहि पाटू ॥
 सोई मिरिग देखाइ जो गएऊ । वेनी नाग, दिया चित भएऊ ॥
 दरपन महँ देखी परछाहीं । सो मूरति, भीतर जिउ नाहीं ॥

सबै सिंगार बनी धनि, अब सोई मति कीज ।

अलक जो लटकै अधर पर, सो गहि कै रस लीज ॥२२॥

४७.रत्नसेन-बंधन खंड

मीत भै माँगा बेगि बिवानू । चला सूर, सँवरा अस्थानू ॥
 चलत पंथ राखा जौ पाऊ । कहाँ रहै थिर चलत बटाऊ ॥
 पंथी कहाँ कहाँ सुसताई । पंथ चलै तब पंथ सेराई ॥
 छर कीजै बर जहाँ न आँटा । लीजै फूल टारिकै काँटा ॥
 बहुत मया सुनि राजा फूला । चला साथ पहुँचावै भूला ॥

साह हेतु राजा सौं बाँधा । बातन्ह लाइ लीन्ह गहि काँधा ॥
घिउ मधु सानि दीन्ह रस सोई । जो मुँह मीठ, पेट विष होई ॥

अमिय बचन औ माया, को न मुएउ रस भीज ।

सत्रु मरै जौ अमृत, कित ता कहँ विष दीज ? ॥१॥

चाँद घरहि जौ सूरुज आवा । होइ सो अलोप अमावस पावा ॥
पूछहिं नखत मलीन सो मोती । सोरह कला, न एकौ जोती ॥
चाँद क गहन अगाह जनावा । राज भूल गहि साह चलावा ॥
पहिलौं पँवरि नाँघिजौ आवा । ठाढ होइ राजहि पहिरावा ॥
सौ तुषार, तेइस गज पावा । दुंदुभि औ चौघडा दियावा ॥
दूजी पँवरि दीन्ह असवारा । तीजि पँवरि नग दीन्ह अपारा ॥
चौथि पँवरि देइ दरब करोरी । पँचई दुइ हीरा कै जोरी ॥
छठई पँवरि देइ माँडौ, सतई दीन्ह चँदेरि ।

सात पँवरि नाँघत नृपहिं, लेइगा बाँधि गरेरि ॥२॥

एहि जग बहुत नदी जल जूडा । कोउ पार भा, कोऊ बूडा ॥
कोउ अंध भा आगु न देखा । कोउ भएउ डिठियार सरेखा ॥
राजा कहँ विधाय भइ माया । तजि कबिलास धरा भुई पाया ॥
जेहि कारन गढ कीन्ह अगोठी । कित छाँडै जौ आवै मूठी ॥
सत्रुहि कोउ पाव जौ बाँधी । छोडि आपु कहँ करै बियाधी ॥
चारा मेलि धरा जस माछ । जल हुँत निकसि मुवै कित काछ ॥
सत्रु नाग पेटारी मूँदा । बाँधा मिरिग पैग नहिं खूँदा ॥

राजहि धरा, आनि कै, तन पहिरावा लोह ।

ऐस लोह सो पहिरै, चीत सामि कै दोह ॥३॥

पायँन्ह गाढी बेडी परी । साँकर गीउ हाथ हथकरी ॥
औ धरि बाँधि मँजूषा मेला । ऐस सत्रु जिनि होइ दुहेला ॥
सुनि चितउर महँ परा बखाना । देस देस चारिउ दिसि जाना ॥
आजु नरायन फिरि जग खूँदा । आजु सो सिंघ मँजूषा मूँदा ॥
आजु खसे रावन दस माथा । आजु कान्ह कालीफन नाथा ॥
आजु परान कंस कर ढीला । आजु मीन संखासुर लीला ॥
आजु परे पंडव बदि माहाँ । आजु दुसासन उतरीं बाहाँ ॥

आजु धरा बलि राजा, मेला बाँधि पतार ।

आजु सूर दिन अथवा, भा चितउर अँधियार ॥४॥

देव सुलैमा के बँदि परा । जह लागि देव सबै सत-हरा ॥
साहि लीन्ह गहि कीन्ह पयाना । जो जहँ सत्रु सो तहाँ बिलाना ॥
खुरासान औ डरा हरेऊ । काँपा विदर, धरा अस देऊ ॥
बाँधौं, देवगिरि, धौलागिरी । काँपी सिस्टि, दोहाई फिरी ॥
उबा सूर, भइ सामुँह करा । पाला फूट, पानि होइ ढरा ॥
दुंदुहि डाँड दीन्ह, जहँ ताई । आइ दंडवत कीन्ह सवाई ॥
दुंद डाँड सब सरगहि गई । भूमि जो डोली अहथिर भई ॥

बादशाह दिल्ली महँ, आइ बैठ सुख पाट ।

जेइ जेइ सीस उठावा, धरती धरा लिलाट ॥५॥

हबसी बँदवाना जिउ-बधा । तेहि सौंपा राजा अगिदधा ॥
 पानि पवन कहँ आस करेई । सो जिउ बधिक साँस भर देई ॥
 माँगत पानि आगि लेइ धावा । मुँगरी एक आनि सिर लावा ॥
 पानि पवन तुइ पिया सो पिया । अब को आनि देइ पानीया ॥
 तब चितउर जिउ रहा न तोरे । बादसाह है सिर पर मोरे ॥
 जबहि हँकारे है उठि चलना । सकती करै होइ कर मलना ॥
 करै सो मीत गाँढ वँदि जहाँ । पान फूल पहुँचावै तहाँ ॥

जब अंजल मुँह , सोवा, समुदन सँवरा जागि ।

अब धरि काढि मच्छ जिमि, पानी माँगति आगि ॥६॥

पुनि चलि दुइ जन पूछै आए । ओउ सुठि दगध आइ देखराए ॥
 तुई मरमुरी न कबहुँ देखी । हाड़ जो बिथुरै देखि न लेखी ॥
 जाना नहिं कि होब अस महुँ । खौजे खौज न पाउब कहँ ॥
 अब हम्ह उतर देहु, रे देवा । कौने गरब न मानेसि सेवा ॥
 तोहि अस बुत गाड़ि खनि मूँदे । बहुरि न निकसि बार होइ खूँदे ॥
 जो जस हँसा तो तैसे रोवा । खेलत हँसत अभय भुईँ सोवा ॥
 जस अपने मुह काढे धूवाँ । मेलेसि आनि नरक के कूआँ ॥

जरसि मरसि अब बाँधा, तैस लाग तोहि दोख ।

अबहुँ माँगु पदमिनी, जौ चाहसि भा मोख ॥७॥

पूछहिं बहुत, न बोला राजा । लीन्हेसि जोउ मीचु कर साजा ॥
 खनि गडवा चरनन्ह देइ राखा । नित उठि दगध होहिं नौ लाखा ॥
 ठाँव सो साँकर औ अँधियारा । दूसर करवट लेइ न पारा ॥
 बीछी साँप आनि तहँ मेला । बाँका आइ छुआवहिं हेला ॥
 धरहिं सँडासन्ह छूटै नारी । राति दिवस दुख पहुँचै भारी ॥
 जो दुख कठिन न सहै पहारू । सो अँगवा मानुष-सिर भारू ॥
 जो सिर परै आइ सो सहै । किछु न बसाइ, काह सौँ कहै ॥

दुख जारै , दुख भूँजै, दुख खोवै सब लाज ।

गाजहु चाहि अधिक दुख, दुखी जान जेहि बाज ॥८॥

४८.पद्मावती-नागमती-विलाप खंड

पद्मावति विनु कंत दुहेली । विनु जल कँवल सूखी जस बेसी ॥
 गाढी प्रीति सो मोसौँ लाए । दिल्ली कंत निचिंत होइ छाए ॥
 सो दिल्ली अस निबहुर देसू । कोइ न बहुरा कहै सँदेसू ॥
 जो गवनै सो तहाँ कर होई । जो आवै किछु जान न सोई ॥
 अगम पंथ पिय तहाँ सिधावा । जो रे गएउ सो बहुरि न आवा ॥
 कुवाँ धार जल जैस बिछौवा । डोल भरे नैनन्ह धनि रोवा ॥
 लेजुरि भई नाह विनु तोहीं । कुवाँ परी, धरि काढसि मोहीं ॥

नैन डोल भरि ढारै, हिये न आगि बुझाइ ।

घरी घरी जिउ आवै, घरी घरी जिउ जाइ ॥१॥

नीर गँभीर कहाँ हो पिया । तुम्ह विनु फाटै सरवर हीया ॥
 गएहु हेराइ, परेहु केहि हाथा? । चलत सरोवर लीन्ह न साथा ॥

चरत जो पंखि केलि कै नीरा । नीर घटे कोई आव न तीरा ॥
 कँवल सूख, पखुरी बेहरानी । गलि गलि कै मिलि छार हेरानी ॥
 बिरह रेत कंचन तन लावा । चून चून कै खेह मेरावा ॥
 कनक जो कन कन होइ बेहराई । पिय कहँ? छार समेटे आई ॥
 बिरह पवन वह छार सरीरू । छारहि आनि मेरावहु नीरू ॥
 अबहुँ जियावहु कै मया, बिथुरी छार समेट ।

नइ काया, अवतार नव, होइ तुम्हारे भेंट ॥२॥

नैन सीप, मोती भरि आँसू । टुटि-टुटि परहिं करहिं तन नासू ॥
 पदिक पदारथ पदमिनि नारी । पिय बिनु भइ कौड़ी बर बारी ॥
 सँग लेइ गएउ रतन सब जोती । कंचन कया काँच कै पोती ॥
 बूडति हौं दुख दगध गँभीरा । तुम बिनु कंत लाव को तीरा? ॥
 हिये बिरह होइ चढा पहारू । चल जोबन सहि सकै न भारू ॥
 जल महुँ अगिनि सो जान बिछूना । पाहन जरहिं, होहिं सब चूना ॥
 कौनै जतन कंत! तुम्ह पावौं । आजु आगि हौं जरत बुझावौं ॥
 कौन खंड हौं हेरौं, कहाँ बँधे हौं, नाह ।

हेरे कतहुँ न पावौं, बसै तु हिरदय माहँ ॥३॥

नागमतिहि 'पिय पिय' रट लागी । निसि दिन तपै मच्छ जिमि आगी ॥
 भँवर, भुजंग कहाँ, हो पिया । हम ठेघा तुम कान न किया ॥
 भूलि न जाहि कवल के पाहाँ । बाँधत बिलंब न लागै नाहा ॥
 कहाँ सो सूर पास हौं जाऊँ । बाँधा भँवर छोरि कै लाऊँ ॥
 कहाँ जाऊँ को कहै सँदेसा । जाऊँ सो तहँ जोगिनि के भेसा ॥
 फारि पट रहि, पहिरौं कथा । जौ मोहिं कोउ देखावै पंथा ॥
 वह पंथ पलकन्ह जाइ बोहारौं । सीस चरन कै तहाँ सिधारौं ॥
 को गुरु अगुवा होइ, सखि! मोहि लावै पथ माँह ।

तम मन धन बलि बलि करौं, जो रे मिलावै नाह ॥४॥

कै कै कारन रोवै बाला । जनु टूटहिं मोतिन्ह कि माला ॥
 रोवति भई, न साँस सँभारा । नैन चुवहिं जस ओरति-धारा ॥
 जाकर रतन परै पर हाथा । सो अनाथ किमि जीवै नाथा ॥
 पाँच रतन ओहि रतनहि लागे । बेगि आउ पिय रतन सभागे ॥
 रही न जोति नैन भए खीने । स्रवन न सुनौं, बैन तुम लीने ॥
 रसनहिं रस नहिं एकौ भावा । नासिक और बास नहिं आवा ॥
 तचि तचि तुम्ह बिनु अँग मोहि लागे । पाँचौ दगधि बिरह अब जागे ॥
 बिरह सो जारि भसम कै चहै, चहै उडावा खेह ।

आइ जो धनि पिय मेरवै, करि सो देइ नइ देह ॥५॥

पिय बिनु व्याकुल बिलपै नागा । बिरहा-तपनि साम भए कागा ॥
 पवन पानि कहँ सीतल पीऊ? । जेहि देखे पलुहै तन जीऊ ॥
 कहँ सो बास मलयगिरि नाहा । जेहि कल परति देत गल बाहाँ ॥
 पदमिनि ठगिनि भई कित साथा । जेहिं तें रतन परा पर हाथा ॥
 होइ बसंत आवहु पिय केसरि । देखे फिर फूलै नागेसरि ॥
 तुम्ह बिनु, नाह! रहै हिय तचा । अब नहिं बिरह गरुड सौ बचा ॥

अब अँधियार परा, मसि लागी । तुम्ह बिनु कौन बुझावै आगी? ॥
 नैन, स्रवन, रस रसना, सबै खीन भए, नाह ।
 कौन सो दिन जेहि भेंटि कै, आइ करै सुख-छाँह ॥६॥

४९. देवपाल-दूती खंड

कुंभलनेर राय देवपालू । राजा केर सत्रु हिय -सालू ॥
 वह पै सुना कि राजा बाँधा । पाछिल बैर सँवरि छर साधा ॥
 सत्रु-साल तब नेवरै सोई । जौ घर आव सत्रु कै जोई ॥
 दूती एक बिरिध तेहि ठाऊँ । बाम्हन जाति कुमोदिनि नाऊँ ॥
 ओहि हँकारि कै बीरा दीन्हा । तोरे बर में बर जिउ कीन्हा ॥
 तुइ जो कुमोदिनि कँवल, के नियरे । सरग जो चाँद बसै तोहि हियरे ॥
 चितउर महुँ जो पदमिनि रानी । कर बर छर सौं दे मोहिँ आनी ॥
 रूप जगत मन मोहन, औ पदमावति नावँ ।

कोटि दरब तिहि देइहौं, आनि करसि एहि ठावँ ॥१॥

कुमुदिनि कहा देखु, हौं सो हौं । मानुष काह देवता मोहौं ॥
 जस काँवरु चमारिनि लोना । को नहिँ छर पाढत कै टोना ॥
 बिसहर नाचहिँ पाढत मारे । औ धरि मूँदहि घालि पेटारे ॥
 बिरिछ चलै पाढत कै बोला । नदी उलटि वह परबत डोला ॥
 पढत हरै पंडित मन गहिरे । और को अंध गूँग औ बहिरै ॥
 पाढत ऐस देवतन्ह लागा । मानुष कहँ पाढत सौं भागा ॥
 चढि अकास कै काढत पानी । कहाँ जाइ पदमावति रानी ॥

दूती बहुत पैज कै, बोली पाढत बोल ।

जाकर सत्त सुमेरू है, लागे जगत न डोल ॥२॥

दूती बहुत पकावन साधे । मोतिलाडू औ खरौरा बाँधे ॥
 माठ पिराकै फैनी पापर । पहिरे बूझि, दूत के कापर ॥
 लेइ पूरी भरि डाल अछूती । चितउर चली पैज कै दूती ॥
 बिरिध बेस जौ बाँधे पाऊ । कहाँ सो जोबन, कित बेवसाऊ ? ॥
 तन बूढा, मन बूढ न होई । बल न रहा पै लालच सोई ।
 कहाँ सो रूप जगत सब राता । कहाँ सो हस्ति जस माता ॥
 कहाँ सो तीख नयन तन ठाढा । सबै मारि जोबन पन काढा ॥

मुहमद बिरिधि जो नइ चलै, काह चलै भुइँ टोह ।

जोबन रतन हेरान है, मकु धरती महुँ होइ ॥३॥

आइ कुमोदिनी चितउर चढी । जोहन मोहन पाढत पढी ॥
 पूछि लीन्ह रनिवास बरोठा । पैठी पँवरी भीतर कोठा ॥
 जहाँ पदमिनी ससि उजियारी । लेइ दूती पकवान उतारी ॥
 हाथ पसारि धाइ कै भेंटी । चीन्हा नहिँ राजा कै बेटी ॥
 हौं बाम्हनि जेहि कुमुदिनि नाऊँ । हम तुम उपने एकै ठाऊँ ॥
 नावँ पिता कर दूबे बेनी । सोइ पुरोहित गँधरबसेनी ॥
 तुम बारी तब सिंघलदीपा । लीन्हे दूध पियाइँ सीपा ॥

ठाँव कीन्ह मैं दूसर, कुँभलनेरै आइ ।

सुनि तुम्ह कहँ चितउर महँ , कहिउँ कि भेटौँ जाइ ॥४॥

सुनि निसचै नैहर कै कोई । गरे लागि पदमावति रोई ॥
 नैन गगन रबि अँधियारे । ससि मुख आँसु टूट जनु तारे ॥
 जग अँधियार गहन धनि परा । कब लगि सखी नखतन्ह निसि भरा ॥
 माय बाप कित जनमी बारी । गीउ तूरि कित जनम न मारी ॥
 कित बियाहि दुख दीन्ह दुहेला । चितउर पंथ कंत बँदि मेला ॥
 अब एहि जियन चाहि भल मरना । भएउ पहार जन्म दुख भरना ॥
 निकसि न जाइ निलज यह जीऊ । देखौँ मँदिर सून बिनु पीऊ ॥
 कुहुकि जो रोई ससि नखत, नैन हैं रात चकोर ।

अबहँ बोलैं तेहि कुहुक, कोकिल, चातक, मोर ॥५॥

कुमुदिनि कंठ लागि सुठी रोई । पुनि लेइ रूप डार मुख धोई ॥
 तुइ ससि रूप जगत उजियारी । मुख न झाँपु निसि होइ अँधियारी ॥
 सुनि चकौर कोकिल दुख दुखी । घुँघची भई नैन करमुखी ॥
 केतौ धाइ मरै कोइ बाटा । सोइ पाव जो लिखा लिलाटा ॥
 जो बिधि लिखा आन नहिं होई । कित धावै कित रौवै कोई ॥
 कित कोउ हींछ करै ओ पूजा । जो बिधि लिखा होइ नहिं दूजा ॥
 जेतिक कुमुदिनि बैन करेई । तस पदमावति स्रवन न देई ॥
 सेंदुर चीर मैल तस, सूखि रही जस फूल ।

जेहि सिंगार पिय तजिगा, जनम न पहिरै भूल ॥६॥

तब पकवान उघारा दूती । पदमावति नहिं छुवै अछूती ॥
 मोहि अपने पिय केर खमारू । पान फूल कस होइ अहारू ?॥
 मोकहँ फूल भए सब काँटे । बाँटि देहु जौ चाहहु बाँटे ॥
 रतन छुवा जिन्ह हाथन्ह सेंती । और न छुवाँ सो हाथ सँकेती ॥
 ओहि के रँग भा हाथ मँजीठी । मुकता लेउँ तौ घुँघची दीठी ॥
 नैन करमुहँ राती काया । मोति होहिं घुँघची जेहि छाया ॥
 अस कै ओछ नैन हत्यारे । देखत गा पिउ, गहै न पारे ॥

का तोर छुवाँ पकवान, गुड करवा, घिउ रूख ।

जेहि मिलि होत सवाद रस, लेइ सो गएउ पिउ भूख ॥७॥

कुमुदिनि रही कँवल के पासा । बैरी सूर, चाँद कै आसा ॥
 दिन कुँभिलानि रही, भइ चूरू । बिगसि रैन बातन्ह कर भूरू ॥
 कस तुइ, बारि! रहसि कुँभलानी । सूखि बेलि जस पाव न पानी ॥
 अबही कँवल करी तुई बारी । कोवँरि बैस, उठत पौनारी ॥
 बेनी तोरि मैलि औ रूखी । सरवर माहँ रहसि कस सूखी ?॥
 पान बेलि बिधि कया जमाई । सींचत रहै तबहि पलुहाई ॥
 करु सिंगार सुख फूल तमोरा । बैठु सिंहासन, झूलु हिंडोरा ॥

हार चीर निति पहिरहु, सिर कर करहु सँभार ।

भोग मानि लेहु दिन दस, जोबन जात न बार ॥८॥

बिहँसि जो जोबन कुमुदिनि कहा । कँवल न बिगसा, संपुट रहा ॥
 ए कुमुदिनि! जोबन तेहि माहा । जो आछै पिउ के सुख छाहाँ ॥
 जाकर छत्र सो बाहर छावा । सो उजार घर कौन बसावा ?॥

अहा न राजा रतन अँजोरा । केहिक सिंघासन, केहिक पटोरा ? ॥
 को पालक पौढे को माढी सोवनहार परा बँदि गाढी ॥
 चहुँ दिसि यह घर भा अँधियारा । सब सिंगार लेइ साथ सिधारा ॥
 कया बेलि तब जानौं जामी । सींचनहार आव घर स्वामी ॥
 तौ लहि रहौं झुरानी, जौ लहि आव सो कंत ।

एहि फूल, एहि सेंदूर, नव होइ उठै बसंत ॥१॥

जिनि तुइ, बारि! करसि अस जीऊ । जौ लहि जोबन तौ लहि पीऊ ॥
 पुरुष संग आपन केहि केरा । एक कोहाँइ, दुसर सहुँ हेरा ॥
 जोबन जल दिन दिन जस घटा । भँवर छपान, हंस परगटा ॥
 सुभर सरोवर जौ लहि नीरा । बहु आदर, पंखी बहु तीरा ॥
 नीर घटे पुनि पूछ न कोई । बिरसि जो लीज हाथ रह सोई ॥
 जौ लगि कालिंदी, होहि बिरासी । पुनि सुरसरि होइ समुद परासी ॥
 जोबन भँवर, फूल तन तोरा । बिरिध पहुँचि जस हाथ मरोरा ॥
 कृस्न जो जोबन कारनै, गोपितन्ह कै साथ ।

छरि कै जाइहि बानपै, धनुक रहै तोरे हाथ ॥१०॥

जौ पिउ रतनसेन मोर राजा । बिनु पिउ जोबन कौने काजा ॥
 जौ पै जिउ तौ जोबन कहे । बिनु जिउ जोबन काह सो अहे ॥
 जौ जिउ तौ यह जोबन भला । आपन जैस करै निरमला ॥
 कुल कर पुरुष सिंघ जेहि खेरा । तेहि थर कैस सियार बसेरा ॥
 हिया फार कूकुर तेहि केरा । सिंघहिं तजि सियार मुख हेरा ॥
 जोबन नीर घटे का घटा ? सत्त के बर जौ नहिं हिय फटा ॥
 सघन मेघ होइ साम बरीसहिं । जोबन नव तरिवर होइ दीसहिं ॥

रावन पाप जो जिउ धरा, दुवौ जगत मुँह कार ।

राम सत्त जो मन धरा, ताहि छरै को पार ? ॥११॥

कित पावसि पुनि जोबन राता । मैँमँत चढा साम सिर छाता ॥
 जोबन बिना बिरिध होइ नाऊँ । बिनु जोबन थाकै सब ठाऊँ ॥
 जोबन हेरत मिलै न हेरा । सो जौ जाइ करै नहिं फेरा ॥
 हैं जो केस नग भँवर जो बसा । पुनि बग होहिं, जगत सब हँसा ॥
 सँवर सेव न चित्त करु सूआ । पुनि पछिताहि अंत जब भूआ ।
 रूप तोर जग ऊपर लोना । यह जोबन पाहुन चल होना ॥
 भोग बिलास केरि यह बेरा । मानि लेहु पुनि को केहि केरा ॥
 उठत कोंप जस तरिवर, तस जोबन तोहि रात ।

तौ लगि रंग लेहु रचि, पुनि सो पियर होइ पात ॥१२॥

कुमुदिनि बैन सुनत हिय जरी । पदमिनि उरहि आगि जनु परी ॥
 रंग ताकर हौं जारौं काँचा । आपन तजि जो पराएहि राँचा ।
 दूसर करै जाइ दुइ बाटा । राजा दुइ न होहिं एक पाटा ॥
 जेहि के जीउ प्रीति दिइ होई । मुख सोहाग सौं बैठे सोई ॥
 जोबन जाउ जाउ सो भँवरा । पिय कै प्रीति न जाइ जो सँवरा ॥
 एहि जग जौ पिउ करहिं न फेरा । ओहि जग मिलहिं जौ दिन दिन हेरा ॥
 जोबन मोर रतन जहँ पीऊ । बलि तेहि पिउ पर जोबन जीऊ ॥

भरथरि बिछुरि पिंगला, आहि करत जिउ दीन्ह ।

हौं पापिनि जो जियत हौं, इहै दोष हम कीन्ह ॥१३॥

पदमावति! सो कौन रसौई । जेहि परकार न दूसर होई ॥
रस दूसर जेहि जीभ बईठा । सो जानै रस खाटा मीठा ॥
भँवर बास बहु फूलन्ह लेई । फूल बास बहु भँवरन्ह देई ॥
दूसर पुरुष न रस तुइ पावा । तिन्ह जाना जिन्ह लीन्ह परावा ॥
एक चुल्लू रस भरै न हीया । जौ लहि नहिं फिर दूसर पीया ॥
तोर जोवन जस समुद हिलोरा । देखि देखि जिउ बूडै मोरा ॥
रंग और नहिं पाइय बैसे । जरे मरे विनु पाउब कैसे ? ॥

देखि धनुक तोर नैना, मोहिं लाग विष बान ।

बिहँसि कँवल जो मानै, भँवर मिलावौं आन ॥१४॥

कुमुदिनि! तुइ बैरिनि, नहिं धाई । तुइ मसि बोलि चढावसि आई ॥
निरमल जगत नीर कर नामा । जौ मसि परै होइ सो सामा ॥
जहँवा धरम पाप नहिं दीसा । कनक सोहाग माँझ जस सीसा ॥
जो मसि परे होइ ससि कारी । सो मसि लाइ देसि मोहिं गोरी ॥
कापर महुँ न छूट मसि अंकू । सो मसि लेइ मोहिं देसि कलंकू ॥
साम भँवर मोर सूरुज करा । और जो भँवर साम मसि भरा ॥
कँवल भवरि रबि देखै आँखी । चंदन-बास न बैठै माखी ॥

साम समुद मोर निरमल, रतनसेन जगसेन ।

दूसर सरि जो कहावै, सो बिलाइ जस फेन ॥१५॥

पदमिनि! पुनि मसि बोल न बैना । सो मसि देखु दुहुँ तोरे नना ॥
मसि सिंगार, काजर सब बोला । मसि क बुंद तिल सोह कपोला ॥
लोना सोइ जहाँ मसि रेखा । मसि पुतरिन्ह तिन्ह सौं जग देखा ॥
जो मसि घालि नयन दुहुँ लीन्ही । सो मसि फेरि जाइ नहिं कीन्ही ॥
मसि मुद्रा दुइ कुच उपराहीं । मसि भँवरा जे कवल भँवाहीं ॥
मसि केसहिं, मसि भौंह उरेही । मसि विनु दसन सोह नहिं देहीं ॥
सो कस सेत जहाँ मसि नाहीं? । सो कस पिंड न जेहि परछाहीं? ॥

अस देवपाल राय मसि, छत्र धरा सिर फेर ।

चितउर राज बिसरिगा गएउ जो कुंभलनेर ॥१६॥

सुनि देवपाल जो कुंभलनेरी । पंकजनैन भौंह धनु फेरी ॥
सत्रु मोरे पिउ कर देवपालू । सो कित पूज सिंघ सरि भालू ? ॥
दुःख भरा तन जेत न केसा । तेहि का सँदेस सुनावसि बेसा ॥
सोन नदी अस मोर पिउ गरुवा । पाहन होइ परै जौ हरुवा ॥
जेहि ऊपर अस गरुवा पीऊ । सो कस डोलाए डोलै जीऊ ॥
फेरत नैन चेरि सौ छूटी । भइ कूटन कुटनी तस कूटीं ॥
नाक कान काटेन्हि, मसि लाई । मूँड मूँडि कै गदह चढाई ॥

मुहमद बिधि जेहि गरुड गढा का कोई तेहि फूँक ।

जेहि के भार जग थिर रहा, उडै न पवन के झूँक ॥१७॥

५०.बादशाह-दूती खंड

रानी धरमसार पुनि साजा । बंदि मोख जेहि पावहिं राजा ॥
जावत परदेसी चलि आवहिं । अन्नदान औ पानी पावहिं ॥
जोगि जती आवहिं जत कंथी । पूछै पियहि, जान कोइ पंथी ॥
दान जो देत बाहूँ भइ ऊँची । जाइ साह पहुँ बात पहुँची ॥
पातुरि एक हृति जोगि-सवाँगी । साह अखारे हुँत ओहि माँगी ॥
जोगिनि भेस बियोगिनि कीन्हा । सींगी सबद मूल तँत लीन्हा ॥
पदमिनि पहुँ पठई करि जोगिनि । बेगि आनु करि बिरह बियोगिनि ॥
चतुर कला मन मोहन, परकाया परवेस ।

आइ चढी चितउरगढ, होइ जोगिनि के भेस ॥१॥

माँगत राजबार चलि आई । भीतर चेरिन्ह बात जनाई ॥
जोगिनि एक बार है कोई । माँगै जैसि बियोगिनि सोई ॥
अबहीं नव जोबन तप लीन्हा । फारि पटोरहि कंथा कीन्हा ॥
बिरह भभूत, जटा बैरागी । छाला काँध, जाप कँठलागी ॥
मुद्रा स्रवन, नाहिं थिर जीऊ । तन तिरसूल अधारी पीऊ ॥
छात न छाहूँ धूप जनु मरई । पावँ न पँवरी, भूभुर जरई ॥
सिंगी सबद धँधारी करा । जरै सो ठाँव पावँ जहँ धरा ॥
किंगरी गहे बियोग बजावै, बारहि बार सुनाव ।

नयन चक्र चारिउ दिसि (हेरहिं) दहूँ दरसन कब पाव ॥२॥

सुनि पदमावति मँदिर बोलाई । पूछा कौन देस तें आई ? ॥
तरुन बैस तोहि छाज न जोगू । केहि कारन अस कीन्ह बियोगू ? ॥
कहेसि बिरह दुख जान न कोई । बिरहनि जान बिरह जेहि होई ॥
कंत हमार गएउ परदेसा । तेहि कारन हम जोगिनि भेसा ॥
काकर जिउ जोबन औ देहा । जौ पिउ गएउ, भएउ सब खेहा ॥
फारि पटोर कीन्ह मैं कंथा । जहँ पिउ मिलहिं लेउँ सो पंथा ॥
फिरौं, करौं चहुँ चक्र पुकारा । जटा परीं का सीस सँभारा ॥
हिरदय भीतर पिउ बसै, मिलै न पूछौं काहि ।

सून जगत सब लागै, ओहि बिनु किछु नहिं आहि ॥३॥

स्रवन छेद महुँ मुद्रा मेला । सबद ओनाउँ कहाँ पिउ खेला ॥
तेहि बियोग सिंगी निति पूरौं । बार बार किंगरी लेइ झूरौं ॥
को मोहिं लेइ पिउ कंठ लगावै । परम अधारी बात जनावै ॥
पाँवरि टूटि चलत, पर छाला । मन न भरै तन जोबन बाला ॥
गइउँ पयाग मिला नहिं पीऊ । करवत लीन्ह, दीन्ह बलि जीऊ ॥
जाइ बनारस जारिउँ कया । पारिउँ पिंड नहाइउँ गया ॥
जगन्नाथ जगरन कै आई । पुनि दुवारिका जाइ नहाई ॥

जाइ केदार दाग तन, तहँ न मिला तिन्ह आँक ।

ढूँढि अजोध्या आइउँ, सरग दुवारी झाँक ॥४॥

गउमुख हरिद्वार फिर कीन्हिउँ । नगरकोट कटि रसना दीन्हिउँ ॥
ढूँढिउँ बालनाथ कर टीला । मथुरा मथिउँ, नसो पिउ मीला ॥
सुरुजकुंड महुँ जारिउँ देहा । बद्री मिला न जासौं नेहा ॥

रामकुंड, गोमति, गुरुद्वारू । दाहिनवरत कीन्ह कै बारू ॥
 सेतुबंध, कैलास, सुमेरू । गइउँ अलकपुर जहाँ कुबेरू ॥
 बरम्हावरत ब्रह्मावति परसी । बेनी-संगम सीझिउँ करसी ॥
 नीमषार मिसरिख कुरुछेता । गोरखनाथ अस्थान समेता ॥
 पटना पुरुब सो घर घर, हाँडि फिरिउँ संसार ।

हेरत कहूँ न पिउ मिला, ना कोइ मिलवनहार ॥५॥

बन बन सब हेरेउँ नव खंडा । जल जल नदी अठारह गंडा ॥
 चौसठ तीरथ के सब ठाऊँ । लेत फिरिउँ ओहि पिउ कर नाऊँ ॥
 दिल्ली सब देखिउँ तुरकानू । औ सुलतान केर बंदिखानू ॥
 रतनसेन देखिउँ बँदि माहाँ । जरै धूप, खन पाव न छाहाँ ॥
 सब राजहि बाँधे औ दागे । जोगनि जान राज पग लागे ॥
 का सो भोग जेहि अंत न केऊ । यह दुख लेइ सो गएउ सुखदेऊ ॥
 दिल्ली नावँ न जानहु ठीली । सुठि बँदि गाढ़ि निकस नहीं कीली ॥
 देखि दगध दुख ताकर, अबहुँ कया नहिं जीउ ।

सो धन कैसे दहुँ जियै, जाकर बँदि अस पीउ ॥६॥

पदमावति जौ सुना बँदि पीऊ । परा अगिनि महुँ मानहुँ घीऊ ।
 दौरि पायँ जोगिनि के परी । उठी आगि अस जोगिनि जरी ॥
 पायँ देहि, दुइ नैनन्ह लाऊँ । लेइ चलु तहाँ कंत जेहि ठाऊँ ॥
 जिन्ह नैनन्ह तुइ देखा पीऊ । मोहिं देखाउ, देहुँ बलि जीऊ ॥
 सत औ धरम देहुँ सब तोहीं । पिउ कै बात कहै जौ मोहीं ॥
 तुइ मोर गुरु, तोरि हौं चेली । भूली फिरत पंथ जेहि मेली ॥
 दंड एक माया करु मोरे । जोगिनि होउँ, चलौं सँग तोरे ॥

सखिन्ह कहा, सुनु रानी, करहु न परगट भेस ।

जोगी जोगवै गुपुत मन, लेइ गुरु कर उपदेस ॥७॥

भीख लेहु, जोगिनि ! फिरि माँगू । कंत न पाइय किए सवाँगू ॥
 यह बड़ जोग बियोग जो सहना । जेहुँ पीउ राखै तेहुँ रहना ॥
 घर ही महुँ रहु भई उदासा । अँजुरी खप्पर, सिंगी साँसा ॥
 रहै प्रेम मन अरुझा गटा । बिरह धँधारि, अलक सिर जटा ॥
 नैन चक्र हेरे पिउ-कंथा । कया जो कापर सोई कंथा ॥
 छाला भूमि, गगन सिर छाता । रंग करत रह हिरदय राता ॥
 मन माला फेरै तँत ओही । पाँचौ भूत भसम तन होहीं ॥

कुंडल सोइ सुनु पिउ कथा, पँवरि पाँव पर रेहु ।

दंडक गोरा बादलहि, जाइ अधारी लेहु ॥८॥

५१. पदमावती-गोरा-बादल-संवाद खंड

सखिन्ह बुझाई दगध अपारा । गइ गोरा बादल के बारा ॥
 चरन कँवल भुईं जनम न धरे । जात तहाँ लागि छाला परे ॥
 निसरि आए छत्री सुनि दोऊ । तस काँपे जस काँप न कोऊ ॥
 केस छोरि चरनन्ह-रज झारा । कहाँ पावँ पदमावति धारा ॥
 राखा आनि पाट सोनवानी । बिरह बियोगिनि बैठी रानी ॥

दोउ ठाढ़ होइ चँवर डोलावहिं । माथे छात, रजायसु पावहिं ॥
उलटि बहा गंगा कर पानी । सेवक बार आइ जो रानी ॥
का अस कस्ट कीन्ह तुम्ह, जो तुम्ह करत न छाज ।

अज्ञा होइ बेगि सो, जीउ तुम्हारे काज ॥१॥

कही रोइ पदमावति बाता । नैनन्ह रकत दीख जग राता ॥
उथल समुद जस मानिक-भरे । रोइसि रुहिर आँसु तस ढरे ॥
रतन के रंग नैन पै वारौं । रती रती कै लोहू ढारौं ॥
भँवरा ऊपर कँवल भवावौं । लेइ चलु तहाँ सूर जहँ पावौं ॥
हिय कै हरदि बदन कै लोहू । जिउ बलि देउँ सो सँवरि बिछोहू ॥
परहिं आँसु जस सावन नीरू । हरियरि भूमि, कुसुंभी चीरू ॥
चढी भुअँगिनि लट लट केसा । भइ रोवति जोगिनि के भेसा ॥

बीर बहूटी भइ चलीं, तबहुँ रहहिं नहिं आँसु ।

नैनहिं पंथ न सूझै, लागेउ भादौं मासु ॥२॥

तुम गोरा बादल खँभ दोऊ । जस रन पारथ और न कोऊ ॥
दुख बरखा अब रहै न राखा । मूल पतार सरग भइ साखा ॥
छाया रही सकल महि पूरी । बिरह बेलि भइ बाढ़ि खजूरी ।
तेहि दुख लेत बिरिछ बन बाढ़े । सीस उघारे रोवहिं ठाढ़े ॥
पुहुमि पूरि सायर दुःख पाटा । कौडी केर बेहरि हिय फाटा ॥
बेहरा हिये खजूर क बिया । बेहर नाहिं मोर पाहन हिया ॥
पिय जेहि बँदि जोगिनि होइ धावौं । हौं बँदि लेउँ पियहि मुकरावौं ॥

सूरुज गहन गरासा, कँवल न बैठे पाट ।

महँ पंथ तेहि गवनब, कंत गए जेहि बाट ॥३॥

गोरा बादल दोउ पसीजे । रोवत रुहिर बूडि तन भीजे ॥
हम राजा सौं इहै कोहाँने । तुम न मिलौ, धरिहैं तुरकाने ।
जो मति सुनि हम गये कोहाँई । सो निआन हम्ह माथे आई ॥
जौ लागि जिउ, नहिं भागहिं दोऊ । स्वामि जियत कित जोगिनि होऊ ॥
उए अगस्त हस्ति जब गाजा । नीर घटे घर आइहि राजा ॥
बरषा गए, अगस्त जौ दीठिहि । परिहि पलानि तुरंगम पीठिहि ॥
बेधौं राहु, छोडावहुँ सूरू । रहै न दुख कर मूल अँकूरू ॥

सोइ सुर, तुम ससहर, आनि मिलावौं सोइ ।

तस दुख महँ सुख उपजै, रैनि माहँ दिनि होइ ॥४॥

लीन्ह पान बादल औ गोरा । केहि लेइ देउँ उपम तुम्ह जोरा ॥
तुम सावंत, न सरवरि कोऊ । तुम्ह हनुवंत अंगद सम दोऊ ॥
तुम अरजुन औ भीम भुवारा । तुम बल रत-दल-मंडनहारा ॥
तुम टारन भारन्ह जग जाने । तुम सुपुरुष जस करन बखाने ॥
तुम बलबीर जैस जगदेऊ । तुम संकर औ मालकदेऊ ॥
तुम अस मोरे बादल गोरा । काकर मुख हेरौं, बँदिछोरा ? ॥
जस हनुवंत राघव बँदि छोरी । तस तुम छोरि मेरावहु जोरी ॥

जैसे जरत लखाघर, साहस कीन्हा भीउँ ।

जरत खँभ तस काढहु, कै पुरुषारथ जीउ ॥५॥

रामलखन तुम दैत सँघारा । तुमहीं घर बलभद्र भुवारा ॥
 तुमही द्रोण और गंगेउ । तुम्ह लेखौं जैसे सहदेऊ ॥
 तुमही युधिष्ठिर औ दुरजोधन । तुमहिं नील नल दोउ संबोधन ॥
 परसुराम राघव तुम जोधा । तुम्ह परतिज्ञा तें हिय बोधा ॥
 तुमहिं सत्रुहन भरत कुमारा । तुमहिं कृष्ण चानूर सँघारा ॥
 तुम परदुम्र औ अनिरुध दोऊ । तुम अभिमन्यु बोल सब कोऊ ॥
 तुम्ह सरि पूज न विक्रम साके । तुम हमीर हरिचँद सत आँके ॥
 जस अति संकट पंडवन्ह, भएउ भीवैं बँदि छोर ।

तस परबस पिउ काढहु, राखि लेहु भ्रम मोर ॥६॥

गोरा बादल बीरा लीन्हा । जस हनुवंत अंगद बर कीन्हा ॥
 सजहु सिंघासन, तानहु छातू । तुम्ह माथे जुग जुग अहिबातू ॥
 कँवल चरन भुईँ धरि दुख पावहु । चढि सिंघासन मँदिर सिंघावहु ॥
 सुनतहिं सूर कँवल हिय जागा । केसरि बरन फूल हिय लागा ॥
 जनु निसि महुँ दिन दीन्ह देखाई । भा उदोत, मसि गई बिलाई ॥
 चढी सिंघासन झमकति चली । जानहुँ चाँद दुइज निरमली ॥
 औ सँग सखी कुमोद तराई । ढारत चँवर मँदिर लेइ आई ॥
 देखि दुइज सिंघासन, संकर धरा लिलाट ।
 कँवल चरन पदमावती, लेइ बैठारी पाट ॥७॥

५२.गोरा-बादल-युद्ध-यात्रा खंड

बादल केरि जसौवै माया । आइ गहेसि बादल कर पाया ॥
 बादल राय! मोर तुइ बारा । का जानसि कस होइ जुझारा ॥
 बादसाह पुहुमीपति राजा । सनमुख होइ न हमीरहि छाजा ॥
 छत्तिस लाख तुरय दर साजहिं । बीस सहस हस्ती रन गाजहिं ॥
 जबहीं आइ चढै दल ठटा । दीखत जैसि गगन घन घटा ॥
 चमकहिं खड्ग जो बीजु समाना । घुमरहिं गलगाजहिं नीसाना ॥
 बरिसहिं सेल बान घनघोरा । धारज धार न बाँधिहि तोरा ॥
 जहाँ दलपती दलि मरहिं, तहाँ तोर का काज ।

आजु गवन तोर आवै, बैठि मानु सुख राज ॥१॥

मातु! न जानसि बालक आदी । हौं बादला सिंह रनबादी ॥
 सुनि गजजूह अधिकाक जिउ तपा । सिंघ क जाति रहै किमि छपा? ॥
 तौ लागि गाज न गाज सिंघेला । सौंह साह सौं जुरौं अकेला ॥
 को मोहिं सौंह होइ मैमंता । फारौं सूँड, उखारौं दंता ॥
 जुरौं स्वामि सँकरे जस ढारा । पेलौं जस दुरजोधन भारा ॥
 अंगद कोपि पाँव जस राखा । टेकौं कटक छतीसौ लाखा ॥
 हनुवंत सरिस जंघ बर जोरौं । दहौं समुद्र, स्वामि बँदि छोरौं ॥

सो तुम, मातु जसौवै । मोहिं न जानहु बार ।

जहँ राजा बलि बाँधा छोरौं पैठि पतार ॥२॥

बादल गवन जूझ कर साजा । तैसेहि गवन आइ घर बाजा ॥
 का बरनौं गवने कर चारू । चंद्रबदनि रुचि कीन्ह सिंगारू ॥
 माँग मोति भरि सेंदुर पूरा । बैठ मयूर बाँक तस जूरा ॥

भौंहें धानुक टकोरि परीखे । काजर नैन, मार सर तीखे ॥
 घालि कचपची टीका सजा । तिलक जो देख ठाँव जिउ तजा ॥
 मनि कुंडल डोलैं दुइवना । सीस धुनहिं सुनि सुनि पिउ गवना ॥
 नागिनि अलक झलक उर हारू । भयउ सिंगार कंत बिनु भारू ॥
 गवन जो आवा पँवरि महुँ, पिउ गवने परदेस ।

सखी बुझावहिं किमि अनल, बुझै सो केहि उपदेस ॥३॥

मानि गवन सो घूँघुट काढी । बिनवै आइ बार भइ ठाढी ॥
 तीखे हेरि चीर गहि ओढा । कंत न हेर, कीन्हि जिउ पोढा ॥
 तब धानि बिहँसि कीन्हि सहुँ दीठी । बादल ओहि दीन्हि फिरिपीठी ॥
 मुख फिराइ मन अपने रीसा । चलत न तिरिया कर मुख दीसा ॥
 भा मिन मेष नारि के लेखे । कस पिउ पीठि दीन्हि मोहिं देखे ॥
 मकु पिउ दिस्टि समानेउसालू । हुलसी पीठि कढावौं फालू ॥
 कुच तूँवी अब पीठि गड़ोवौं । गहै जो हूकि गाढ रस धोवौं ॥
 रहाँ लजाइ त पिउ चलै, गहाँ त कह मोहिं ढीठ ।

ठाढि तेवानि कि का करौं, दूभर दुऔ बईठ ॥४॥

लाज किए जौ पिउ नहिं पाबौं । तजौं लाज कर जोरि मनावौं ॥
 करि हठ कंत जाइ जेहि लाजा । घूँघुट लाज आवा केहि काजा ॥
 तब धानि बिहँसि कहा गहि फेंटा । नारि जो बिनवै कंत न मेटा ॥
 आजु गवन हौं आई नाहाँ । तुम न, कंत! गवनहु रन माहाँ ॥
 गवन आव धानि मिलै के ताई । कौन गवन जौ बिछुरै साई ॥
 धानि न नैन भरि देखा पीऊ । पिउ न मिला धानि सौं भरि जीऊ ॥
 जहँ अस आस भरा है केवा । भँवर न तजै बास रसलेवा ॥
 पायँन्ह धारा लिलाट धानि, बिनय सुनहु, हो राय !।

अलकपरी फँदवार होइ, कैसेहु तजै न पाय ॥५॥

छाँडु फेंट धानि! बादल कहा । पुरुष गवन धानि फेंट न गहा ॥
 जो तुइ गवन आइ, गजगामी । गवन मोर जहँवा मोर स्वामी ॥
 जौ लागि राजा छूटि न आवा । भावै बीर, सिंगार न भावा ॥
 तिरिया भूमि खडग कै चेरी । जीत जो खडग होइ तेहि केरी ॥
 जेहि घर खडग मोंछ, तेहिं गाढी । जहाँ न खडग मोंछ नहिं दाढी ॥
 तब मुँह मोछ जीउ पर खेलौं । स्वामि काज इंद्रासन पेलौं ॥
 पुरुष बोलि कै टरै न पाछू । दसन गयंद, गीउ नहिं काछू ॥

तुइ अबला धानि! कुबुधि बुधि, जानै काह जुझार ।

जेहि पुरुषहि हिय बीररस, भावै तेहि न सिंगार ॥६॥

जौ तुम चहहु जूझि, पिउ! बाजा । कीन्ह सिंगार जूझ मैं साजा ॥
 जोबन आइ सौँह होइ रोपा । बिखरा विरह, काम दल कोपा ॥
 बहेउ बीररस सेंदुर माँगा । राता रुहिर खडग जस नाँगा ॥
 भौंहें धानुक नैन सर साधो । काजर पनच, बरुनि विष बाँधो ॥
 जनु कटाछ स्यों सान सँवारे । नखसिख बान सेल अनियारे ॥
 अलक फाँस गिउ मेल असूझा । अधार अधार सौं चाहहिं जूझा ॥
 कुंभस्थल कुच दोउ मैमंता । पेलौं सौँह, सँभारहु कंता?॥

कोप सिंगार, बिरह दल, टूटि होइ दुइ आधा ।

पहिले मोहिं संग्राम कै, करहु जूझ कै साधा ॥७॥

एकौ बिनति न मानै नाहाँ । आगि परी चित उर धानि माहाँ ॥
 उठा जो धामू नैन करवाने । लागे परै आँसु झहराने ॥
 भीजै हार, चीर हिय चोली । रही अछूत कंत नहिं खोली ॥
 भीजी अलक छुए कटि मंडन । भीजे कँवल भँवर सिर फुंदन ॥
 चुइ चुइ काजर आँचर भीजा । तबहुँ न पिउ कर रोवँ पसीजा ॥
 जौ तुम कंत! जूझ जिउ कांधा । तुम किय साहस, मैं सत बाँधा^(*) ॥
 रन संग्राम जूझि जिति आवहु । लाज होइ जौ पीठि देखावहु ॥
 तुम्ह पिउ साहस बाँधा, मैं दिय माँग सेंदूर ।
 दोउ सँभारे होइ सँग, बाजै मादर तूर ॥८॥

५३.गोरा-बादल-युद्ध खंड

मतैं बैठि बादल औ गोरा । सो मत कीज परै नहिं भोरा ॥
 पुरुष न करहिं नारि-मति काँची । जस नौशाबा कीन्ह न बाँची ॥
 परा हाथ इसकंदर बैरी । सो कित छोडि कै भई बँदेरी ॥
 सुबुधि सो ससा सिंघ कहँ मारा । कुबुधि सिंघ कूआँ परि हारा ॥
 देवहिं छरा आइ अस आँटी । सज्जन कंचन, दुर्जन माटी ॥
 कंचन जरै भए दस खंडा । फूटि न मिलै काँच कर भंडा ॥
 जस तुरकन्ह राजा छर साजा । तस हम साजि छोडावहिं राजा ॥
 पुरुष तहाँ पै करै छर, जहाँ बर किए न आँट ।

जहाँ फूल तहँ फूल है, जहाँ काँट तहँ काँट ॥१॥

सोरह सै चंडोल सँवारे । कुँवर सजोइल कै बैठारे ॥
 पदमावति कर सजा बिवानू । बैठ लोहार न जानै भानू ॥
 रचि बिवान सो साजि सँवारा । चहुँ दिसि चँवर करहिं सब ढारा ॥
 साजि सबै चंडोल चलाए । सुरँग ओहार, मोति बहु लाए ॥
 भए सँग गोरा बादल बली । कहत चले पदमावति चली ॥
 हीरा रतन पदारथ झूलहिं । देखि बिवान देवता भूलहिं ॥
 सोरह सै संग चलीं सहेली । कँवल न रहा, और को बेली ? ॥

राजहि चलीं छोडावै, तहँ रानी होइ ओल ।

तीस सहस तुरि खिंची सँग, सोरह सै चंडोल ॥२॥

राजा बँदि जेहि के सौंपना । गा गोरा तेहि पहुँ अगमना ॥
 टका लाख दस दीन्ह अँकोरा । बिनती कीन्हि पायँ गहि गोरा ॥
 विनवा बादसाह सौं जाई । अब रानी पदमावति आई ॥
 बिनती करै आइ हौं दिल्ली । चितउर के मोहि स्यो है किल्ली ॥
 बिनती करै, जहाँ है पूजी । सब भँडार कै मोहि स्यो कूँजी ॥
 एक घरी जौ अज्ञा पावौं । राजहि सौंपि मँदिर महुँ आवौं ॥
 तब रखवार गए सुलतानी । देखि अँकोर भए जस पानी ॥
 लीन्ह अँकोर हाथ जेहि, जीउ दीन्ह तेहि हाथ ।

जहाँ चलावै तहँ चलै, फेरे फिरै न माथ ॥३॥

लोभ पाप कै नदी अँकोरा । सत्त न रहै हाथ जौ बोरा ॥
 जहँ अँकोर तहँ नीक न राजू । ठाकुर केर बिनासै काजू ॥
 भा जिउ घिउ रखवारन्ह केरा । दरब लोभ चंडोल न हेरा ॥
 जाइ साह आगे सिर नावा । ए जगसूर! चाँद चलि आवा ॥
 जावत हैं सब नखत तराई । सोरह सै चंडौल सो आई ॥
 चितउर जेति राज कै पूँजी । लेइ सो आइ पदमावति कूँजी ॥
 बिनती करै जोरि कर खरी । लेइ सौँपौँ राजा एक घरी ॥
 इहाँ उहाँ कर स्वामी ! दुऔ जगत मोहिं आस ।

पहिले दरस देखावहु, तौ पठवहु कबिलास ॥४॥

आजा भई, जाइ एक घरी । छूँछि जो घरी फेरि बिधि भरी ॥
 चलि बिवान राजा पहुँ आवा । सँग चंडोल जगत सब छावा ॥
 पदमावति के भेस लोहारू । निकसि काटि बाँदि कीन्ह जोहारू ॥
 उठा कोपि जस छूटा राजा । चढा तुरंग सिंघ अस गाजा ॥
 गोरा बादल खाँडै काढे । निकसि कुँवर चढि चढि भए ठाढे ॥
 तीख तुरंग गगन सिर लागा । केहुँ जुगुति करि टेकी बागा ॥
 जो जिउ ऊपर खडग सँभारा । मरनहार सो सहसन्ह मारा ॥

भई पुकार साह सौँ, ससि औ नखत सो नाहिं ।

छरकै गहन गरासा, गहन गरासे जाहिं ॥५॥

लेइ राजा चितउर कहँ चले । छूटेउ सिंघ मिरिग खलभले ॥
 चढा साहि चढि लागि गोहारी । कटक असूझ परी जग कारी ॥
 फिरि गोरा बादल सौँ कहा । गहन छूटि पुनि चाहै गहा ॥
 चहुँ दिसि आवै लोपत भानू । अब इहै गोइ इहै मैदानू ॥
 तुइ अब राजहि लेइ चलु गोरा । हौँ अब उलटि जुरौँ भा जोरा ॥
 वह चौगान तुरुक कस खेला । होइ खेलार रन जुरौँ अकेला ॥
 तौ पावौँ बादल अस नाऊँ । जौ मैदान गोइ लेइ जाऊँ ॥

आजु खडग चौगान गहि, करौँ सीस रिपु गोइ ।

खेलौँ सौँह साह सौँ, हाल जगत महँ होइ ॥६॥

तब अगमन होइ गोरा मिला । तुइ राजहि लेइ चलु, बादला ॥
 पिता मरै जो सँकरे साथी । मीचु न देइ पूत के माथा ॥
 मैं अब आउ भरी औ भूँजी । का पछिताव आउ जौ पूजी ॥
 बहुतन्ह मारि मरौँ जौ जूझी । तुम जिनि रोएहु तौ मन बूझी ॥
 कुँवर सहस सँग गोरा लीन्हे । और बीर बादल सँग कीन्हे ॥
 गोरहि समदि मेघ अस गाजा । चला लिए आगे करि राजा ॥
 गोरा उलटि खेत भा ठाड़ा । पूरुष देखि चाव मन बाढा ॥

आव कटक सुलतानी, गगन छपा मसि माँझ ।

परति आव जग कारी, होत आव दिन साँझ ॥७॥

होइ मैदान परी अब गोई । खेल हार दहुँ काकरि होई ॥
 जोबन तुरी चढी जो रानी । चली जीति यह खेल सयानी ॥
 कटि चौगान, गोइ कुच साजी । हिय मैदान चली लेइ बाजी ॥
 हाल सो करै गोइ लेइ बाढा । कूरी दुवौ पैज कै काढा ॥
 भई पहार वै दूनौ कूरी । दिस्टि नियर, पहुँचत सुठि दूरी ॥

ठाढ़ बान अस जानहु दोऊ । सालै हिये न काढै कोऊ ॥
 सालहिं हिय न जाहिं सहि ठाढ़े । सालहिं मरै चहै अनकाढ़े ॥
 मुहमद खेल प्रेम कर , गहिर कठिन चौगान ।
 सीस न दीजै गोइ जिमि हाल न होइ मैदान ॥८॥

फिरि आगे गोरा तब हाँका । खेलौं, करौं आजु रन-साका ॥
 हौं कहिए धौलागिरि गोरा । टरौं न टारे, अंग न मोरा ॥
 सोहिल जैस गगन उपराहीं । मेघ घटा मोहि देखि बिलाहीं ॥
 सहसौ सीस सेस सम लेखौं । सहसौ नैन इंद्र सम देखौं ॥
 चारिउ भुजा चतुरभुज आजू । कंस न रहा और को साजू
 हौं होइ भीम आजु रन गाजा । पाछे घालि हुंगवै राजा ॥
 होइ हनुवँत जमकातर ढाहौं । आजु स्वामि साँकरे निबाहौं ॥
 होइ नल नील आजु हौं ,देहुँ समुद महुँ मेंड ।

कटक साह कर टेकौं ,होइ सुमेरु रन बेंड ॥९॥

ओनई घटा चहुँ दिसि आई । छूटहिं बान मेघ-झरि लाई ॥
 डोलै नाहिं देव अस आदी । पहुँचे आइ तुरुक सब बादी ॥
 हाथन्ह गहे खडग हरद्वानी । चमकहिं सेल बीजु कै बानी ॥
 सोझ बान जस आवहिं गाजा । बासुकि डरै सीस जनु वाजा ॥
 नेजा उठे डरै मन इंद्र । आइ न बाज जानि कै हिंदू ॥
 गोरे साथ लीन्ह सब साथी । जस मैमंत सूँड बिनु हाथी ॥
 सब मिलि पहिलि उठौनी कीन्ही । आवत आइ हाँक रन दीन्ही ॥
 रुंड मुंड अब टूटहि , स्यो बखतर औ कूँड ।

तुरय होहिं बिनु काँधे, हस्ति होहिं बिनु सूँड ॥१०॥

ओनवत आइ सेन सुलतानी । जानहुँ परलय आव तुलानी ॥
 लोहे सेन सूझ सब कारी । तिल एक कहूँ न सूझ उघारी ॥
 खडग फोलाद तुरुक सब काढ़े । दरे बीजु अस चमकहिं ठाढ़े ॥
 पीलवान गज पेले बाँके । जानहुँ काल करहिं दुइ फाँके ॥
 जनु जमकात करसिं सब भवाँ । जिउ लेइ चहहिं सरग अपसवाँ ॥
 सेल सरप जनु चाहहिं डसा । लेहिं काढि जिउ मुख विष बसा ॥
 तिन्ह सामुहुँ गोरा रन कोपा । अंगद सरिस पावँ भुइँ रोपा ॥
 सुपुरुष भागि न जानै, भुइँ जौ फिरि लेइ ।

सूर गहे दोऊ कर , स्वामि काज जिउ देइ ॥११॥

भइ बगमेल, सेल घनघोरा । औ गज पेल, अकेल सो गोरा ॥
 सहस कुँवर सहसौ सत बाँधा । भार पहार जूझ कर काँधा ॥
 लगे मरै गोरा के आगे । बाग न मोर घाव मुख लागे ॥
 जैस पतंग आगि दँसि लेई । एक मुवै, दूसर जिउ देई ॥
 टूटहिं सीस, अधर धर मारै । लोटहिं कंधहि कंध निरारै ॥
 कोई परहिं रुहिर होइ राते । कोई घायल घूमहिं माते ॥
 कोई खुरखेह गए भरि भोगी । भसम चढाइ परे होइ जोगी ॥
 घरी एक भारत भा, भा असवारन्ह मेल ।

जूझि कुँवर सब निबरे, गोरा रहा अकेल ॥१२॥

गोरै देख साथि सब जूझा । आपन काल नियर भा, बूझा ॥
 कोपि सिंघ सामुहँ रन मेला । लाखन्ह सौं नहिं मरै अकेला ॥
 लेइ हाँकि हस्तिन्ह कै ठटा । जैसे पवन बिदारै घटा ॥
 जेहि सिर देइ कोपि करवारू । स्यो घोडे टूटै असवारू ॥
 लोटहिं सीस कबंध निनारे । माठ मजीठ जनहुँ रन ढारे ॥
 खेलि फाग सेंदुर छिरकावा । चाचरि खेलि आगि जनु लावा ॥
 हस्ती घोड़ धाइ जो धूका । ताहि कीन्ह सो रुहिर भभूका ॥
 भइ अज्ञा सुलतानी, बेगि करहु एहि हाथ ।

रतन जात है आगे, लिए पदारथ साथ ॥१३॥

सबै कटक मिलि गोरहि छेका । गूँजत सिंघ जाइ नहिं टेका ॥
 जेहि दिसि उठै सोइ जनु खावा । पलटि सिंघ तेहि ठावँ न आवा ॥
 तुरुक बोलावहिं, बोलै बाहाँ । गोरै मीचु धरी जिउ माहाँ ॥
 मुए पुनि जूझि जाज, जगदेऊ । जियत न रहा जगत महुँ केऊ ॥
 जिनि जानहु गोरा सो अकेला । सिंघ के मोँछ हाथ को मेला ॥
 सिंघ जियत नहिं आपु धरावा । मुए पाछ कोई घिसियावा ॥
 करै सिंघ मुख सौहहिं दीठी । जौ लागि जियै देइ नहिं पीठी ॥
 रतनसेन जो बाँधा, मसि गोरा के गात ।

जौ लागि रुधिर न धोवौं, तौ लागि होइ न रात ॥१४॥

सरजा बीर सिंघ चढ़ि गाजा । आइ सौह गोरा सौ बाजा ॥
 पहलवान सो बखाना बली । मदद मीर हमजा औ अली ॥
 लँधउर धरा देव जस आदी । और को बर बाँधै, को बादी? ॥
 मदद अयूब सीस चढ़ि कोपे । महामाल जेइ नावँ अलोपे ॥
 औ ताया सालार सो आए । जेइ कौरव पंडव पिंड पाए ॥
 पहुँचा आइ सिंघ असवारू । जहाँ सिंघ गोरा बरियारू ॥
 मारेसि साँग पेट महुँ धँसी । काढे सि हुमुकि आँति भुइँ खसी ॥
 भाँट कहा, धनि गोरा ! तू भा रावन राव ।

आँति समेटि बाँधि कै, तुरय देत है पाव ॥१५॥

कहेसि अंत अब भा भुइँ परना । अंत त खसे खेह सिर भरना ॥
 कहि कै गरजि सिंघ अस धावा । सरजा सारदूल पहुँ आवा ॥
 सरजै लीन्ह साँग पर घाऊ । परा खडग जनु परा निहाऊ ॥
 बज्र क साँग, बज्र कै डाँडा । उठा आगि तस बाजा खाँडा ॥
 जानहु बज्र बज्र सौं बाजा । सब ही कहा परी अब गाजा ॥
 दूसर खडग कंध पर दीन्हा । सरजे ओहि ओइन पर लीन्हा ॥
 तीसर खडग कूँड पर लावा । काँध गुरुज हुत, घाव न आवा ॥
 तस मारा हठि गोरे, उठी बज्र के आगि ।

कोइ नियरे नहिं आवै, सिंघ सदूरहि लागि ॥१६॥

तब सरजा कोपा बरिबंडा । जनहु सदूर केर भुजदंडा ॥
 कोपि गरजि मारेसि तस बाजा । जानहु परी टूटि सिर गाजा ॥
 ठाँठर टूट, फूट सिर तासू । स्यो सुमेरू जनु टूट अकासू ॥
 धमकि उठा सब सरग पतारू । फिरि गइ दीठि फिरा संसारू ॥
 भइ परलय अस सबही जाना । काढा कडग सरग नियराना ॥

तस मारेसि स्यो घोडै काटा । घरती फाटि, सेस फन फाटा ॥
 जौ अति सिंह बरी होइ आई । सारदूल सौं कौनि बड़ाई ॥
 गोरा परा खेत महुँ, सुर पहुँचावा पान ।
 बादल लेइगा राजा, लेइ चितउर नियरान ॥१७॥

५४.बंधन-मोक्ष; पद्मावती-मिलन खंड

पद्मावति मन रही जो झूरी। सुनत सरोवर-हिय गा पूरी ॥
 अद्रा महि हुलास जिमि होई । सुख सोहाग आदर भा सोई ॥
 नलिन नीक दल कीन्ह अँकूरु । विगसा कँवल उवा जब सूरु ॥
 पुरइनि पूर सँवारे पाता । औ सिर आनि धरा विधि छाता ॥
 लागेउ उदय होइ जस भोरा । रैनि गई, दिन कीन्ह अँजोरा ॥
 अस्ति अस्ति कै पाई कला । आगे बली कटक सब चला ॥
 देखि चाँद पदमिनि रानी । सखी कुमोद सबै विगसानी ॥
 गहन छूट दिनिअर कर, ससि सौं भएउ मेराव ।

मँदिर सिंघासन साजा, बाजा नगर बधाव ॥१॥

बिहँसि चाँद देइ माँग सेंदूरु । आरति करै चली जहँ सूरु ॥
 औ गोहन ससि नखत तराई । चितउर कै रानी जहँ ताई ॥
 जनु बसंत ऋतु पलुही छूटीं । की सावन महुँ भीर बहूटी ॥
 भा आनंद, बाजा घन तूरु । जगत रात होइ चला सेंदूरु ॥
 डफ मृदंग मंदिर बहु बाजे । इंद्र सबद सुनि सबै सो लाजे ॥
 राजा जहाँ सूर परगासा । पद्मावति मुख-कँवल विगासा ॥
 कवँल पाँय सूरुज के परा । सूरुज कवँल आनि सिर धरा ॥
 सेंदुर फूल तमोल सौं, सखी सहेली साथ ।

धनि पूजे पिउ पायँ दुइ, पिउ पूजा धनि माथ ॥२॥

पूजा कौनि देउं तुम्ह राजा ? सबै तुम्हार आव मोहि लाजा ॥
 तन मन जोबन आरति करऊँ । जीव काटि नेवछावरि धरऊँ ॥
 पंथ पूरि कै दिस्टि बिछावौं । तुम पग धरहु, सीस मैं लावौं ॥
 पायँ निहारत पलक न मारौं । बरुनी सेंति चरन रज झारौं ॥
 हिय सो मंदिर तुम्हरै, नाहा । नैन पंथ पैठहु तेहि माहाँ ॥
 बैठहु पाट छत्र नव फेरी । तुम्हरे गरब गरुइ मैं चेरी ॥
 तुम जिउ, मैं तन जौ लहि मया । कहै जो जीव करै सौ कया ॥

जौ सूरुज सिर ऊपर, तौ रे कँवल सिर छात ।

नाहिं त भरे सरोवर, सूखे पुरइन पात ॥३॥

परसि पाय राजा के रानी । पुनि आरति बादल कहँ आनी ॥
 पूजे बादल के भुजदंडा । तुरय के पायँ दाब कर खंडा ॥
 यह गजगवन गरब जो मोरा । तुम राखा, बादल औ गोरा ॥
 सेंदुर तिलक जो आँकुस अहा । तुम राखा, माथे तौ रहा ॥
 काछ काछि तुम जिउ पर खेला । तुम जिउ आनि मँजूषा मेला ॥
 राखा छात, चँवर औधारा । राखा छुत्रघंट झनकारा ॥

तुम हनुवत होइ धुजा पईठे । तब चितउर पिय आय बईठे ॥
पुनि जगमत्त चढावा, नेत बिछाई खाट ।

बाजत गाजत राजा, आइ बैठ सुखपाट ॥४॥

निसि राजै रानी कंठ लाई । पिउ मरि जिया नारि जनु पाई ॥
रति रति राजै दुख उगसारा । जियत जीउ नहिं होउं निनारा ॥
कठिन बंदि तुरुकन्ह लेइ गहा । जौ सँवरा जिउ पेट न रहा ॥
घालि निगड़ ओबरी लेइ मेला । साँकरि औ अँधियार दुहेला ॥
खन खन करहिं सडासन्ह आँका । औ निति डोम छुआवहिं बाँका ॥
पाछे साँप रहहि चहुँ पासा । भोजन सोइ, रहै भर साँसा ॥
राँध न तहँवा दूसर कोई । न जनों पवन पानि कस होई ॥
आस तुम्हारि मिलन कै, तब सो रहा जिउ पेट ।

नाहिं त होत निरास जौ, कित जीवन, कित भेंट ! ॥५॥

तुम्ह पिउ! आइ परी असि बेरा । अब दुख सुनहु कँवल धनि केरा ॥
छोडि गएउ सरवर महँ मोहीं । सरवर सूखि गएउ बिनु तोहीं ॥
केलि जो करत हंस उडि गयऊ । दिनिअर निपट सो बैरी भयऊ ॥
गई तजि लहरैं पुरइनि-पाता । मुइउँ धूप, सिर रहेउ न छाता ॥
भइउँ मीन, तन तलफै लागा । बिरह आइ बैठा होइ कागा ॥
काग चोंच, तस सालै नाहा । जब बंदि तोरि साल हिय माहाँ ॥
कहों 'काग! अब तहँ लेइ जाही । जहँवा पिउ देखै मोहिं खाही ' ॥

काग औ गिद्ध न खंडहिं, का मारहं बहु मंदि ?!

एहि पछितावै सुठि मुइउँ, गइउँ न पिउ सँग बंदि ॥६॥

तेहि ऊपर का कहों जो मारी । विषम पहार परा दुख भारी ॥
दूती एक देवपाल पठाई । बाह्यनि भेस छरै मोहिं आई ॥
कहै तोरि हौं आहुँ सहेली । चलि लेइ जाउँ भँवर जहँ, बेली ॥
तब मैं ज्ञान कीन्ह, सत बाँधा । ओहि कर बोल लाग विष-साँधा ॥
कहूँ कँवल नहिं करत अहेरा । चाहै भँवर करै सै फेरा ॥
पाँच भूत आतमा नेवारिउँ । बारहिं बार फिरत मन मारिउँ ॥
रोइ बुझाइउँ आपन हियरा । कंत न दूर अहै सुठि नियरा ॥
फूल बास, घिउ छीर जेउँ नियर मिले एक ठाई ।

तस कंता घट घर कै, जिइउँ अगिनि कहँ खाई ॥७॥

५५. रत्नसेन-देवपाल-युद्ध खंड

सुनि देवपाल राय कर चालू । राजहि कठिन परा हिय सालू ॥
दादुर कतहुँ कँवल कहँ पेखा । गादुर मुख न सूर कर देखा ॥
अपने रँग जस नाच मयूरू । तेहि सरि साध करै तमचूरू ॥
जों लागि आइ तुरुक गढ़ बाजा । तौ लागि धरि आनों तौ राजा ॥
नींद न लीन्ह, रैनि सब जागा । होत बिहान जाइ गढ़ लागा ॥
कुंभलनेर अगम गड बाँका । विषम पंथ चढि जाइ न झाँका ॥
राजहि तहाँ गएउ लेइ कालू । होइ सामुहँ रोपा देवपालू ॥

दुवौ अनी सनमुख भई , लोहा भएउ असूझ ।

सत्र जूझि तब नेवरै , एक दुवौ महुँ जूझ ॥१॥

जौ देवपाल राव रन गाजा । मोहि तोहि जूझ एकौझा, राजा ॥
मेलेसि साँग आइ बिष-भरी । मेटि न जाइ काल कै घरी ॥
आइ नाभि पर साँग बईठी । नाभि बेधि निकसी सो पीठी ॥
चला मारि,तब राजै मारा । टूट कंध, धड़ भएउ निनारा ॥
सीस काटि कै बैरी बाँधा । पावा दाँव बैर जस साधा ॥
जियत फिरा आएउ बल भरा । माँझ बाट होइ लोहै धरा ॥
कारी घाव जाइ नहिँ डोला । रही जीभ जम गही, को बोला ॥

सुधि बुधि तौ सब बिसरी, भार परा मझ बाट ।

हस्ति घोर को काकर ? घर आनी गइ खाट ॥२॥

५६.राजा रतनसेन बैकुंठवास खंड

तौ लही साँस पेट महुँ अही । जौ लहि दसा जीउ कै रही ॥
काल आइ देखराई साँटी । उठी जिउ चला छोड़ि कै माटी ॥
काकर लोग, कुटुंब, घर बारू । काकर अरथ दरब संसारू ॥
ओही घरी सब भएउ परावा । आपन सोइ जो परसा, खावा ॥
अहे जे हितू साथ के नेगी । सबै लाग काढै तेहि बेगी ॥
हाथ झारि जस चलै जुवारी । तजा राज, होइ चला भिखारी ॥
जब हुत जीउ, रतन सब कहा । भा बिनु जीउ, न कौड़ी लहा ॥

गढ सौंपा बादल कहँ, गए टिकठि बसि देव ।

छोड़ी राम अजोध्या, जो भावै सो लेव ॥१॥

५७.पद्मावती-नागमती-सती खंड

पद्मावति पुनि पहिरि पटोरी । चली साथ पिउ के होइ जोरी ॥
सूरुज छपा, रैनि होइ गई । पूनो-ससि सो अमावस भई ॥
छोरे केस, मोति लर झूटीं । जानहुँ रैनि नखत सब टूटीं ॥
सेंदुर परा जो सीस अघारा । आगि लागि चह जग अँधियारा ॥
यही दिवस हौं चाहति, नाहा । चलौं साथ, पिउ ! देइ गलबाहाँ ॥
सारस पंखि न जियै निनारे । हौं तुम्ह बिनु का जिऔं, पियारे ॥
नेवछावरि कै तन छहरावौं । छार होउँ सँग, बहुरि न आवौं ॥

दीपक प्रीति पतँग जेउँ, जनम निबाह करेउँ ।

नेवछावरि चहुँ पास होइ, कंठ लागि जिउ देउँ ॥१॥

नागमती पद्मावति रानी । दुवौ महा सत सती बखानी ॥
दुवौ सवति चढि खाट बईठीं । औ सिवलोक परा तिन्ह दीठी ॥
बैठौ कोइ राज औ पाटा । अंत सबै बैठे पुनि खाटा ॥
चंदन अगर काठ सर साजा । औ गति देइ चले लेइ राजा ॥
बाजन बाजहिं होइ अगूता । दुवौ कंत लेइ चाहहिं सूता ॥
एक जो बाजा भएउ बियाहू । अब दुसरे होइ ओर-निबाहू ॥

जियत जो जरै कंत के आसा । मुएँ रहसि बैठे एक पासा ॥
आजु सूर दिन अथवा, आजु रेनि ससि बूड ।

आजु नाचि जिउ दीजिय, आजु आगि हम्ह जूड ॥२॥

सर रचि दान पुन्नि बहु कीन्हा । सात बार फिरि भाँवरि लीन्हा ॥
एक जो भाँवरि भई बियाही । अब दुसरे होइ गोहन जाहीं ॥
जियत, कंत! तुम हम्ह गर लाई । मुए कंठ नहिं छोड़हिं, साई ॥
औ जो गाँठि कंत तुम्ह जोरी । आदि अंत लहि जाइ न छोरी ।
यह जग काह जो अछहि न आथी । हम तुम, नाह ! दुहुँ जग साथी ॥
लेइ सर ऊपर खाट बिछाई । पाँढी दुवौ कंत गर लाई ॥
लागीं कंठ आगि देइ होरी । छार भई जरि, अंग न मोरी ॥

रातीं पिउ के नेह गइँ , सरग भएउ रतनार ।

जो रे उवा , सो अथवा, रहा न कोइ संसार ॥३॥

वै सहगवन भई जब जाई । बादसाह गढ छेंका आई ॥
तौ लगि सो अवसर होइ बीता । भए अलोप राम औ सीता ॥
आइ साह जो सुना अखारा । होइगा राति दिवस उजियारा ॥
छार उठाइ लीन्ह एक मूठी । दीन्ह उडाइ, पिरथिमी झूठी ॥
सगरिउ कटक उठाई माटी । पुल बाँधा जहँ जहँ गढ घाटी ॥
जौ लहि ऊपर छार न परै । तौ लहि यह तिस्ना नहिं मरै ॥
भा धावा, भइ जूझ असूझा । बादल आइ पाँवरि पर जूझा ॥

जौहर भइ सब इस्तरी, पुरुष भए संग्राम ।

बादसाह गढ चूरा, चितउर भा इसलाम ॥४॥

उपसंहार

मैं एहि अरथ पंडितन्ह बूझा । कहा कि हम्ह किछु और न सूझा ॥
चौदह भुवन जो तर उपराहीं । ते सब मानुष के घट माहीं ॥
तन चितउर, मन राजा कीन्हा । हिय सिंघल, बुधि पदमिनि चीन्हा ॥
गुरु सुआ जेइ पंथ देखावा । बिनु गुरु जगत को निरगुन पावा ॥
नागमती यह दुनिया-धंधा । बाँचा सोइ न एहि चित बंधा ॥
राघव दूत सोई सैतानू । माया अलाउदीं सुलतानू ॥
प्रेम कथा एहि भाँति बिचारहु । बूझि लेहु जौ बूझै पारहु ॥
तुरकी, अरबी, हिंदुई , भाषा जती आहिं ।

जेहि महुँ मारग प्रेम कर, सबै सराहैं ताहि ॥१॥

मुहमद कबि यह जोरि सुनावा । सुना सो पीर प्रेम कर पावा ॥
जोरी लाइ रक्त कै लेई । गाढि प्रीति नयनन्ह जल भेई ॥
औ मैं जानि गीत अस कीन्हा । मकु यह रहै जगत महुँ चीन्हा ॥
कहाँ सो रतनसेन अब राजा ? । कहाँ सुआ अस बुधि उपराजा ? ॥
कहाँ अलाउदीन सुलतानू ? । कहाँ राघव जेइ कीन्ह बखानू ? ॥
कहुँ सूरुप पदमावति रानी ? । कोइ न रहा, जग रही कहानी ॥
धनि सोई जस कीरति जासू । फूल मरै, पै मरै न बासू ॥

केइ न जगत बेँचा, कइ न लीन्ह जस मोल ।

जो यह पढ़ै कहानी, हम्ह सँवरै दुइ बोल ॥२॥

मुहमद बिरिध बैस जो भई । जोबन हुत, सो अवस्था गई ॥

बल जो गएउ कै खीन सरीरू । दीस्टि गई नैनहिं देइ नीरू ॥

दसन गए कै पचा कपोला । बैन गए अनरुच देइ बोला ॥

बुधि जो गई देई हिय बोराई । गरब गएउ तरहुँत सिर नाई ॥

सरवन गए ऊँच जो सुना । स्याही गई सीस भा धुना ॥

भवरँ गए केसहि देइ भूवा । जोबन गएउ जीति लेइ जूवा ॥

जौ लहि जीवन जोबन-साथा । पुनि सो मीचु पराए हाथा ॥

बिरिध जो सीस डोलावै, सीस धुनै तेहि रीस ।

बूढी आऊ होहु तुम्ह, केइ यह दीन्ह असीस ?॥३॥